

821.837
381
:1

書叢本基學國

元詩紀事

(上)

輯衍陳



行發館書印務商

書叢本基學國

事紀詩元

(上)

輯衍陳



行發館書印務商



原敍

唐宋金詩皆有紀事。金詩紀事未見傳本。僅見數則於全金詩中。而元獨無。錢竹汀先生嘗病元史疎蕪。欲採各家詩文集及筆記小說之類。改修元史。恐違功令。改爲元詩紀事。事詳漢學師承記。乃記合元詩紀事於元史藝文志。統稱六卷。而潛齋堂全書書目已刻未刻。均未著紀事之名。惟近人陳揆子準。稽瑞樓書目。於唐宋詩二紀事後。載有元詩紀事二冊。下注一鈔字。据全目例。鈔本也。潘文勤敍稱子準歿。書盡散。翁文端公以重價收其藏本。僅得三四。則元詩紀事鈔本。未知尙在其中否也。獨念竹汀先生博極羣書。尤熟元事。果如計厲二書之徧探詩林故實。其卷數必哀然以數十計。而師承記所稱六卷。除藝文志四卷已刻外。紀事祇二卷耳。稽瑞樓書目亦止云二冊。何其少耶。新修嘉定縣志云五卷。則合錢侗陶梁所補言之。意其爲書必專取夫關繫元史得失者。與計厲二書之體例異焉者也。抑嘗論之。宋詩紀事廣收無事之詩。且多采從本集者。宋詩經明人棄斥略盡。吳之振宋詩鈔。曹廷棟宋百家詩存。總之不過二百家。樊榭以人存詩。重在網羅散失故也。至元詩則顧選初二三集及癸集。家數已燦然大備。紀事之體當搜羅一代傳作。散見於筆記小說各書者。不宜復收尋常無事之詩矣。歲在柔兆閏茂。侯官陳衍石遺自敍。



凡例

一 有元詩人。上多宋金遺老。下多裸將有明。今於宋金遺老涉元者。如於宋金未登仕版。則概入之元。其已登宋金仕版。入元未仕。原不必援之入元。願選於元遺山羅礪谷諸人。徑屬之元。似欠斷限。今仿全金詩列耆舊遺獻之意。另編遺老一門附焉。其元末諸人。亦於元已登仕版者。雖入明尙存。仍列之元也。

一 女真蒙古譯語。經清朝釐定。諸家姓名。如伯顏改作巴延。桑哥改作僧格之類。未易僕數。但所採詩文集筆記小說。多作伯顏桑哥等字。今若遽標巴延僧格等字。與所採之書兩相歧異。轉令閱者茫然。故仍之。

一 所採詩有一題多至百十首者。則節錄其要。如灤京雜詠百首。止錄有自注者五十四首。趙待制詩詞卷十八首。止錄三首。勉學詩二十四首。止錄明詩綜誤收之一首。此類甚多。

一 春帖子。本係一絕句。漁父詞。向屬諸詩。故間採入。



元詩紀事總目

卷一

文宗皇帝 順帝

卷二

順帝太子

卷三

耶律楚材 劉潤之

杜仁傑 楊鵬

商左山 胡紫山

卷四

郝經 許衡

張之翰 梁曾

王思廉 王宥

撒罕 鄭雲表

卷五

呂鯤

楊果

李冶

崔斌

徐琬

信世昌

耶律鑄

趙衍

高鵬

姚燧

陳伯通

耶律季天

徐世隆

石國英

盧摯

李庭

楊奐

王磐

張弘範

閻復

耶律柳溪

劉祁

一庵

王惲

伯顏

員炎

821857

384

1

元詩紀事 總目

劉因	方回	方存心	劉光	楊公遠	葉梅嶠	唐元
許古清	程鉅夫	葉李	元淮	李思衍	董恢	湯仲友
龔開	于石	杜伯高	呂起猷	許獻臣		

卷六

葉林	鄧牧	陳觀國	劉壘	王義山	傅定保	張伯淳
洪德章	尹廷高	趙棠	連文鳳	馮澄	楊本然	全璧
呂文老	方德麟	劉汝鈞	翁合老	林子明	劉蒙山	周陳
趙必范	姚潼翔	胡南	姜霖	東必曾	方子靜	朱孟翁
趙必折	劉時可	許元發	洪貴叔	徐端甫	朱釋老	李萼
陳君用	蔡潭	俞自得	王進之	陳希聲	陳堯道	陳舜道
吳瑀	黃景昌	劉應龜	劉邊	戴東老	陳文增	劉存行
傅宣山	柳耆	俞如山	翁自適	郭建德	駱師賓	陳帝臣
俞堃山	林泉生	傅九萬	章彬	彭九萬		

卷七

戴表元	熊朋來	吳澄	倪南杰	胡長孺	黃泰亨	龍仁夫
羅志仁	白珉	張瑛	俞伯奇	仇遠	魯仕能	吳鉞

李應春

羅太岳

羅太亨

林清

卷八

趙孟頫

鮮于樞

吾邱衍

陳儼

黃玠

方夔

劉詵

劉彥章

陸文奎

黃庚

張觀光

虞德觀

卷九

陳孚

徐明善

馮子振

曹伯啓

鄧文原

宋无

艾性夫

朱浚

卷十

高克恭

李材

姚式

鄧楡

趙孟頫

李淦

李孟

袁易

戴天錫

盛彪

盧亘

袁桷

袁裒

鄧椿

吳延壽

顏天祥

錢資深

林宏

葉齊賢

陸桂

從大

黃肖翁

東南仲

孟淳

卷十一

虞集

王克敏

謝文質海牙

范玉壺

小雲石海涯

王士熙

柳貫

卷十二

梁相 吳元德 何中 周權 任士林 滕斌 龔璠

郭天錫 張菊存 何失 汪炎昶 陳森 段天祐 趙山儋

孫轍 郭道卿 林以辨 劉鶚 王振鵬 陳櫟 吳彬

貢奎 張養浩 馬祖常 李洞 黃潛 許晉孫

卷十三

楊載 范梈 揭傒斯 歐陽玄 何貞立 許有壬 許有孚

許楨 馬熙 趙恆 陸煥然 胡井表

卷十四

丁復 應夢虎 洪震老 辛鈞 陳繹曾 韓性同 汪澤民

吳萊 張翔 呂權 韓性 劉子郁 趙雍 葉森

鄭采 鄭禧 黃敏 汪子才 徐天贇 沈君清 胡炳文

宋本 吳師道 三寶柱 李好文 夏溥 劉麟瑞 洪希文

陳植 孫鳳洲 傅子建

卷十五

陳旅 傅若金 黃裳 宋駿 張仲容 呂思誠 廖毅

陸居仁 李黼 薩都刺 胡善

卷十六

楊維禎

卷十七

朱仲明

楊得祿

汪志堅

胡元采

程維巖

胡祥

柯九思

哲理野臺

焦文炯

韓玉倫都

甘立

項炯

胡助

雅琬

楊瑀

赫德爾

林泉生

何正

黃鎮

陳楚春

卷十八

迺賢

余闕

李祁

王禮

宇文公諒

蔡廷秀

李介石

樊執敬

石抹宜孫

黃復圭

魯至道

陳柏

方瀾

濮彥仁

朱守諒

黃德廣

申屠駟

僧家奴

奧魯赤

卷十九

錢維善

盧琦

孔皖

李孝光

張翥

成廷珪

陸仁

高明

謝應芳

吳師尹

方子京

陳高

周志遠

鄭玉

陳謙

卷二十

楊允孚

達不花

鄭元祐

周伯琦

貢師泰

卷二十一

黃公望

吳鎮

倪瓚

王冕

鄭韶

陳方

楊謙

沈良

張監

沈廷珪

鍾虞

何恆

石宇

黃仲瑤

鄧資深

倪維哲

趙次進

金灝

陳樵

卷二十二

潘純

謝宗可

郭豫亨

金涓

葉廣居

吳復

衛仁近

郭鈺

胡布

岑安卿

王士毅

朱子範

韓奕

劉渙

顧觀

沈貴

舒頤

周必達

李序

何景福

彭炳

羅蒙正

陳德載

程從龍

韓友直

潘時雍

顧素

沈貞

韓介玉

程渠南

魯琪琳

卷二十三

袁介

王禎

張端

俞俊

高志道

陳乾富

陳孔彥

周棐

察伋

陵希惠

施坦

熊不易

朱得先

師晦文

胡晉

何致中

汪士深

劉得之

梅德明

吳鎡

繆思恭

唐朝

林彥華

程彥明

李子飛

丁守中

吳漳

王東

潘伯修

王圭

王璋

李廷臣

曹文晦

錢岳

余寅

陸侗

趙觀

韓壁

唐奎

涂子約

卷二十四

郭翼

沈右

同同

唐棣

韓好禮

黃季倫

李廷臣

呂誠

賈策

堵簡

楊椿

邊魯

楊慶源

完澤

謝寅

徐夢吉

劉肅

李庸

康瑞

陸繼善

朱彬

歐陽公瑾

鄭賀

高克禮

屠性

李元珪

陳聚

張渥

陸元泰

馬稷

繆侃

任昱

蔣克勤

周溥

錢大有

留容

張田

張師賢

顧敬

朱庸

李一中

陳樞

莊蒙

朱元禧

嚴恭

張世昌

馬貫

曹睿

馮士頤

不花帖木兒

掌機沙

聶鏞

郭庸

王立中

熊進德

徐哲

章珪

盧浩

吳禮

申屠衡

姚文奐

張守中

沈性

燕不花

卷二十五

張昱

張簡

周霆震

卷二十六

陳有定

王翰

伯顏

林諫

吳訥

孔從善

丁鶴年

王逢

戴良

鄧定

董旭

卷二十七

顧瑛

顧佐

顧元臣

顧晉

黃文德

卞思義

瞿士衡

文質

時太初

顧亮

李費

林世濟

貢性之

吳志淳

陳思

吳敬夫

呂玄英

沙可學

郝經

曾朴

周南

趙汭

張翼

梁寅

魯淵

張思孝

鄧雅

卷二十八 割據

張憲

陳秀民

陳基

卞元亨

方行

劉仁本

謝理

王霖

諸綱

徐昭文

鄭彝

張溥

吳徹

卷二十九 寇賊

芝麻李

西昌寇

卷三十 遺老

元好問

白君舉

楊弘道

李俊民

段克己

卷三十一 遺老

趙復

汪元量

唐珣

林景熙

謝翱

鄭思肖

劉應鳳

周密

錢選

羅椅

劉辰翁

熊禾

梁棟

高晞遠

牟巖

李珣

魏新之

何鳴鳳

高銘

陳傑

林月香

莫崙

錢仲鼎

孫嵩

孫巖

吳龍翰

曹良史

陳普

卷三十二 無時代

趙永嘉

金方所

項平父

于演

李宗列

徐孟岳

吳仁叔

吳伯慶

楊鵬翼

張明

侯友彰

何有成

劉淵

郭正平

文若

李明中

張孟

張起

韃靼

卷三十三 道流

邱處機

王元粹

聶碧窗

梁大柱

馬臻

吳全節

李道坦

薛玄曦

黃石翁

王與敬

彭日隆

朱思本

張雨

鄒復雷

富恕

余善

于立

鄧青陽

方從義

卷三十四 釋子

子溫

有規

德豐

炳同

淨權

存誠

了慧

有在

溥光

明本

與恭

覺恩

行端

一初

圓至

善住

本誠

廣璇

壽寧

梵琦

祖柏

若舟

宗衍

文信

法智

祖銘

至剛

瞻

辨才

惟則

普惠

椿

良震

照

自悅

如阜

福報

寧

實

同

明

清濬

越僧

禪僧

游僧

無名僧

又

又

又

又

卷三十五 宮掖

駱妃

程一寧

凝香兒

順帝宮人

卷三十六 閨閣

耶律夫人

張阿慶

管道杲

管道昇

万俟蕙柔

杜氏婦

劉氏

陸蕙奴

張玉娘

賈娉娉

王嬌

余氏

吳氏

孫淑

鄭允端

劉氏

韓氏

李氏

萬氏

吳氏

曹妙清

張妙淨

薛蕙英

盛貞一

趙氏

陳氏

范秋蟾

賈蓬萊

趙鸞鸞

劉翠翠

曠家婦

徐綵鸞

何氏

胡妙端

董淑貞

卷三十七 女冠

元氏

李翠娥

卷三十八 尼

妙湛

梅花尼

卷三十九 妓女

徐氏 羅愛卿 暨氏

卷四十 藩屬

阿嚕主 楊淵海 段寶 段僧奴 段明 陳日照 陳日烜

陳日煊 陳日燿 世子 陳遂 陳秀峻 陳元旦 陳愛山

黎崩 黎括 范邁 阮忠彥 阮聖訓 范五老 圓照

李齊賢 鄭可臣 柳淑

卷四十一 無名子

北客 何公 仙村人 東湖散人 感興吟 九山人 桑柘區

柳州 草堂後人 君瑞 青山白雲人 無機老農 子問

田農夫 唐人機軸 忘懷老人 五雲山人 老農 石姥寄客 雙溯

雲水 白雲人 跨犢者 缺名 山野人 盤隱末子 扶杖夫

廷雲 晚靜 竹簑笠翁 藍田道人 才人 翁某 鎮江郡人

康衢遺民 章某 郊居生 白縣尹 朽木居士 張某 某神童

無名子共三十二人

卷四十二 下

岳武穆 馬巫父 三茅吳真人 鄭文選 張君有 方武裘

王大圭 翠華仙伯

趙靜齋

獨樂園主

密蘭沙求仙詩

忘烈祠神

卷四十三 仙神鬼怪

羽客

懸胡盧詩

劉妙容歌

水仙祠神

衛芳華鬼

鄭婉娥鬼

華亭二生

仙方詩

晚翠亭詩

荊州鬼語

卷四十四 夢

大滌洞天仙人

夢中貫酸齋

卷四十五

歌頌銘謠諺識謎雜語共六十四首

元詩紀事卷一

文宗皇帝

侯官陳衍緝

帝名圖帖睦爾。武宗次子。初封懷王。卽位。改元天曆。至順。在位五年。

黃文獻集。天曆二年三月。上肇開奎章閣。延登儒流。至順二年正月。御製閣記成。萬幾之暇。親灑宸翰。書閣記。刻置禁中。

自建康之京都途中作

穿了襖衫便著鞭。一鉤殘月柳梢邊。兩三點露滴如雨。五六箇星猶在天。犬吠竹籬人過語。雞鳴茅店客驚眠。須臾捧出扶桑日。七十二峯都在前。

草木子。梁王登寶位時。自建康之京都。途中嘗作一詩云云。

月山詩話。明太祖早行詩。忙著征衣快著鞭。轉頭月挂柳梢邊。兩三點露不爲雨。七八箇星尙在天。茅舍雞鳴人過語。竹籬犬吠客驚眠。等閒攤出扶桑日。社稷山河在眼前。案此篇乃元文宗自集慶路入正大統途中所作。不知何以載入明祖集中。且竄易十數字。又案居易錄云。兩三條電欲爲雨。四五箇星猶在天。乃五代盧延遜山寺詩。文宗勦取之。

順帝



帝名妥懽帖睦爾。明宗長子。在位三十六年。改元元統。至元。至正。明太祖滅之。奔沙漠。元亡。北平錄以元主不戰而奔。克順天命。今殂。特諡曰順帝。

庚申外史。瀛國公初爲僧。居白塔寺中。已而奉詔居甘州山寺。有趙王者。嬉遊至寺。憐其老且孤。留一回回女子與之。延祐七年四月十六夜。生一子。明宗適自北方來。早行。見寺上有龍文五采氣。卽物色得之。因求爲子。并載其母以歸。

菽園雜記。皇宋第十六飛龍。元朝降封瀛國公。元君召公尙公主。時承錫宴明光宮。酒醒伸手扒金柱。化爲龍爪。驚天容。元君含笑語羣臣。鳳雛寧與凡禽同。侍臣獻謀將見除。公主泣淚沾酥胸。幸脫虎口走方外。易名合尊沙漠中。是時明宗在沙漠。締交合尊情頗濃。合尊之妻夜生子。明宗隔帳聞笙鏞。乞歸行宮養爲嗣。皇考崩時年甫童。元君降詔移南海。五年乃歸居九重。憶昔宋祖受周禪。仁義綽有三代風。至今兒孫主沙漠。吁嗟趙氏何其隆。此詩爲閩人俞應所作。至今兒孫句。言元君避歸沙漠後事。

答明主

金陵使者渡江來。漠漠風煙一道開。王氣有時還自息。皇恩何處不昭回。信知海內歸明主。亦喜江南有俊才。歸去誠心煩爲說。春風先到鳳凰臺。

剪勝野聞。元君旣遁。留兵開平。猶有覬覦之志。太祖遣使馳書。明示禍福。因答詩云云。

御製詩

父疾精虔禱上天。願將己算益親年。孝心感格天心動。恍惚神將帝命傳。母渴思瓜正歲寒。那堪山路雪漫漫。雙瓜忽產空岩裏。歸奉慈親痼疾安。

榕陰新檢。元王薦字希賢。福寧人。父疾。禱天減年以益父壽。父絕而復甦。曰。適有神人。皂衣紅帔。語我曰。汝子孝。上帝賜汝十二齡。後果符其數而卒。母沈氏。病渴思啖瓜。時冬月不得薦。至深壩嶺。值雪。避樹下。思母病。仰天而哭。忽見石岩間青蔓離披。有二瓜。摘歸奉母。渴遂止。至正間。福建宣慰司上狀旌之。御製詩云云。

句

烏啼紅樹裏。人在翠微中。

草木子。上有佳句云云。餘詳太子愛猷識理達臘下。

元詩紀事卷二

順帝太子

太子名愛猷識理達臘。順帝長子。至正二十七年。命總天下兵馬。二十八年國亡。次年隨帝駐應昌府。又次年帝殂。明兵襲應昌府。太子從十數騎遁去。

新月

昨夜嚴陵失釣鉤。何人移上碧雲頭。雖然未得團圓相。也有清光照九州。

弇山堂別集。草木子謂上有佳句。烏啼云云。天下誦之。又皇太子新月詩云云。野史附之。謂爲太祖及懿文不享年之證。草木子乃元遺民國初所著書。謂上者順帝也。皇太子者愛猷識理達臘也。蓋以其不獲有天下。而在東宮頗擅權。故記之耳。高帝集無此二句。

列朝詩集。建文惠宗讓皇帝下云。鄭曉遜國記云。帝幼敏穎。能詩。太祖命賦新月。應聲云。誰將玉指甲。抓破碧天痕。影落江湖上。蛟龍不敢吞。太祖悽然久之曰。必免於難。案葉子奇草木子餘錄。載皇太子新月詩云云。所謂皇太子者。庚申君之子也。野史以爲懿文太子作。爲不及享國之識。而曉則以爲建文作。考楊維禎東維子詩集。此詩爲維禎作。則諸書皆傳會也。案今東維子集共三十卷。詩只兩卷。並無此兩詩。

元詩紀事卷三

耶律楚材

楚材字晉卿。遼東丹王突欲八世孫。金尙書右丞履之子。元太祖召見。處之左右。太宗朝。拜中書令。薨於位。至順元年。贈太師。追封廣寧王。諡文正。有湛然居士集。

元朝名臣事略。公以明昌元年六月二十日生。文獻公通術數。尤邃於太玄。私謂所親曰。此子吾家千里駒也。他日必成偉器。且當爲異國用。因取左氏之楚。雖有材。晉實用之。以爲名字。

湛然居士集。萬松野老行秀序。湛然年一十有七。受顯訣於萬松。其法忘死生。外身世。湛然大會其心。精究入神。三年盡得其道。萬松面授衣頌。目之爲湛然居士。從源。湛然自是稱嗣法弟子。從源。萬松一日過其門。見其執菜根。蘸油鹽飯。脫粟。膏和友人詩云。贈君一句直截處。只要教君能養素。但能死生榮辱哀樂不能羈。存亡進退盡是無生路。至於西天三步遠。東海一杯深。老作衲僧。未易及此。

湛然居士集。王鄰序。中書湛然有天然之才。或吟哦數句。或揮掃百張。皆信手拈來。非積習而成之。如寶鑑無塵。寒冰絕翳。其照物也瑩然。

西域河中十詠

寂寞河中府。連蔓及萬家。蒲萄親釀酒。杷欖看開花。飽噉雞舌肉。分餐馬首瓜。土產瓜大如馬首。人生唯

口腹何礙過流沙。

寂寞河中府。臨流結草廬。開尊傾美酒。擲網得新魚。有客同聯句。無人獨看書。天涯獲此樂。終老又何如。

寂寞河中府。遐荒僻一隅。蒲萄垂馬乳。杷欖燦牛酥。釀酒無輸課。耕田不納租。西行萬餘里。誰謂乃良圖。

寂寞河中府。生民屢有災。避兵開邃穴。防水築高臺。六月常無雨。三冬卻有雷。偶思禪伯語。不覺笑顏開。

寂寞河中府。頽垣遠故城。園林無盡處。花木不知名。南岸獨垂釣。西疇自省耕。爲人但知足。何處不安生。

寂寞河中府。西流綠水傾。衝風磨舊麥。西人作磨。風動機軸以磨麥。懸碓杵新粳。西人皆懸杵以舂。春月花渾謝。冬天草再生。優游聊卒歲。更不望歸程。

寂寞河中府。清歡且自尋。麻牋聊寫字。葦筆亦供吟。傘柄學鑽笛。宮門自斲琴。臨風時適意。不負昔年心。

得故宮門堅木三尺許。斲爲琴。有清聲。

寂寞河中府。西來亦偶然。每春忘舊閨。隨月出新年。強策渾心竹。難穿無限錢。異同何定據。俯仰且隨緣。

西人不計閨。以十二月爲歲。有渾心竹。其金銅芽錢無孔郭。

寂寞河中府。聲名昔日開。城隍連畎畝。市井半邱墳。食飯秤斤賣。金銀用麥分。生民怨來後。簞食謁吾君。

寂寞河中府。遺民自足糧。黃橙調蜜煎。白餅糝糖霜。救旱河爲雨。無衣壠種羊。一從西到此。更不憶吾鄉。

庶齋老學叢談。湛然居士集。有河中府十首。尋思干城。西遼稱河中府。詠其風景。開樽云云。釀酒云云。避兵云云。六月云云。園林云云。衝風云云。西人用風磨。如南方水磨。春則懸杵。春月云云。每春云云。強策云云。食飯云云。黃橙云云。救旱云云。余嘗閱唐會要有壘種羊。未之信。觀此信有公。

自注西人不計閏

西遊錄芭欖城邊皆芭欖園故以名其花如杏而微淡葉如桃而差小冬季而花夏盛而實有大城曰尋斯干尋斯干者西人云肥也以地土肥饒故名甚富庶用金銅錢無孔郭環城數十里皆園林飛渠走泉方池圓沼花木連延誠爲勝概瓜大者如馬首盛夏無雨以蒲萄釀酒又土多甘蔗取其液釀酒熬糖又民多羊馬以蜜爲釀

丁亥過沙井和移刺子春韻

行藏俯仰且隨時。緇袍懷珠人未知。燕雀旣羣難立鶴。鳳凰不至擬胡爲。可嗟世態頻更變。何奈人生多別離。莫忘天山風雪裏。湛然駝背和君詩。

湛然居士集自注予昨至沙井乘牛車過前路跨駝方達行在偶得隔句一聯云牛車馳傳頗異相如駟馬車駝背吟詩不似竹林七賢畫成有是句

懷親

黃犬不來愁耿耿。白雲望斷思依依。欲憑鱗羽傳音信。海水西流雁北飛。

又

黃沙三萬里。白髮一孀親。腸斷邊城月。徘徊照旅人。

雙溪醉隱集趙著序余嘗在貞祐季年親見玉泉大老懷親詩云云又云云所以見哀思之情極矣又和人云仁義說與當途人恰似春風射馬耳此見感憤之懷亦已極矣

夢中偶得

庚辰正月夢旃檀利澄公託萬松老人乞算壽於予予以九十一莖贈之仍作頌一絕覺而猶憶遂錄之爲他日一笑云

昔年鈎隱索幽奇只向縱橫枝上覓而今拍手笑呵呵九九元來九十一

湛然居士集仍囑付從者云若澄公道何不云八十一汝但應云果然果然拂袖使出覺而自著語云幾日昏沈夢中挫五

劉潤之

抵和林

破帽麻鞋布腿褌強扶衰病且徒行區區不道圖他甚一夜山妻罵到明

湛然居士集潤之館於忘憂門下生徒乘駟渠徒步抵和林城有詩云云予憐而和之述懷有云弟子二三同會食誰曾開口問先生余感而和之

呂鯤

鯤號龍山居士雁門人

案鯤敍雙溪醉隱集在甲辰年時金已亡十年

夏日道中

叢花初落路塵香燕掠麻池乍頽頽一片雲陰遮十頃賣瓜棚下午陰涼

困學齋雜錄。呂龍山與趙虎巖齊名。平生多佳句。夏日道中一絕句。曲盡田家夏日之趣。

耶律鑄

鑄字成仲。楚材子。官至中書左丞相。卒追贈懿寧王。諡文忠。有雙溪醉隱集。

雙溪醉隱集。予嘗有詩。碎擘桃花泛酒卮。時亦取花散酒。酌遺花者。依片數浮以大白。

高城曲

城高三百尺。枉教人費力。賊不從外來。當察城中賊。

日將出

陰雲夜合乾坤失。萬象不能分別得。蒼涼海底浴重光。卻與行人指南北。

帶將來

野花新傍玉欄開。長恨何人向此栽。自是王孫不知道。牡丹根上帶將來。

擬回文

詩成怨立小橋西。晚日春懷傷鳥啼。離別書情多寄恨。遠山高處暮雲低。樓上獨來心上愁。淚垂難道不腸柔。秋深夜雨風迴夢。燭剪空窗暗燄浮。

磨劍行

故國江山夢裏行。不期今日果長征。劍華休遣塵生澁。萬事人間總未平。

贈坐竿道士井序

竿幾五十尺。語人曰。歲倍之。則不數年。可得上天矣。其謬如此。故作詩以懲之。因寄長春李真人。
說似蓬萊恐更迷。劉郎親涉武陵溪。梭拋霞綺龍鱗澀。輅展虹橋鳳翅齊。碁燭縱光然日月。宴衣分色剪
雲霓。桃花零落春風起。笑殺王嬾醉似泥。

水平橋

洞簫吹罷思無聊。卻下閒庭弄柳條。寂寂小園春晝永。一聲啼鳥水平橋。

題藍采和圖

終日蹁躚舞綠袍。有錢繩串戲兒曹。爭如收腳牀頭坐。滿眼春風醉碧桃。

山市吟

山閣連城日日新。千形萬狀只無人。自分長樂樓臺象。不染長安市井塵。

松聲行

水深深山重重。前溪後嶺萬蒼松。我來秋雨霽。夜宿深山中。霜寒千里龍蛇怒。巖谷蕭條嘯貔虎。波濤漾
漾生秋寒。碧落無雲自飛雨。璫璫兀兀驚俗聾。餘韻飄蕭散碧空。悠然策杖出門去。方知萬壑生清風。清
歡一夕無今古。勾引幽人風雅句。那堪更被山頭月。團圓掛在青松樹。

雪後吟

雪助夜寒更漏澀。何能盼得到天明。乾坤已落羲和手。休更瓊瑤陌上行。

立秋前一日

大火西流暑氣迴。青蠅心緒已徘徊。人言明日新消息。天外秋風刮地來。

句

人去豪華山好在。夢回歌舞水空流。翠輦不回天地老。白雲飛盡海山秋。蓬萊宮殿遺基在。休對西風子細看。躊躇搔首無人會。時下樓來卻上樓。既解寶藏秦照膽。也須珍惜漢吹毛。水涵春色柳涵煙。半是人間半是仙。燕南春色老燕北。草初肥。露冷野花瘦。月明江樹稀。芳草不隨鶯燕老。好山依舊水雲深。

雙溪醉隱集。趙著序。雙溪成仲玉。泉中令君之子也。生長北溟。十三作歌詩。下筆便入唐人之閫。與嘗作高城曲。日將出。帶將來。小胡笳。擬回文。暮春曲。磨劍行。春夜吟。獨倚門之類。皆十二時作也。陰不雨。惜花吟。琵琶調。公子行。廣陵散。十五六作也。又贈坐竿道士。水平橋。題藍采和圖。早行吟。十八九作也。又山市吟。暮春對花。寄故人。題牧牛圖。二十一二作也。與寄情趣。前人閒有所不到者。又九日登瓊花島。用呂香山詩韻留題。松聲曲。春雪謠。蟄龍興雨圖。休嗟行路難。大傳燕市。自是與燕之士大夫。唱酬無虛日。又雪後吟。立春前一日曲。情之至也。又人去豪華各云云。

又

金檠夜延螢燭暗。翠簾風窅月鉤閒。南漢水乾秋飲馬。五城霜重夜屯兵。

雙溪醉隱集。呂鯤序。如云云。此時年十五耳。云云。又十七時語也。發言便高。

耶律季天

季天耶律鐸弟名未詳。

句

夢蝶豈知真是蝶。騎牛何必更尋牛。

雙溪醉隱集李隱卿名谷與青城劉翁同舟至蘭溪卿大夫修生者館之道侶贈李詩云李郎涉世似虛舟片帆來度楚江秋又毗陵家弟季天和此篇云云老夫亦慕道者次韻和之

楊奐

奐字煥然乾州奉天人太宗詔試諸道進士奐試東平兩中賦論第一官至河南路廉訪使謚文憲有還山集

還山集君甫勝衣嘗信口唱歌有紫陽閣之語扣之不能答也未冠夢遊紫陽閣景趣甚異後因以自號初泰和大安閒入仕者惟舉選爲貴科榮路所在人爭走之程文之外翰墨雜體悉指爲無用之技尤諱作詩君舉業旣成乃以餘力作爲詩文下筆卽有可觀在鄂下日中秋燕集一寓士忌君名諷諸生作詩請君屬和君被酒謂客曰欲觀詩者舉酒欲和以次唱韻筆不停綴長韻短章終夕成三十九首長安中目爲鄠郊卽席倡和詩傳之禮部閑閑趙公平章政事蕭國侯公內翰馮公屏山李公皆折行位與相間遺

試萬寧宮

月澹長楊曉色清大題飛下寂無聲南山霧豹文章在北海雲鵬羽翼成玉檻玲瓏紅露重金爐縹緲翠

煙輕。誰言半夜曾前席。白日君王問賈生。

元文類。楊奐跋趙太常擬試賦稿後。當泰和丙寅春三月二十五日。萬寧宮試貢士。上躬命賦題。曰日合天統。侍臣初甚難之。而太常卿北京趙公。適充御前讀卷官。獨以謂不難。即日奏賦。議乃定。既而中選者纔二十有八人。僕時甫冠。獲試廷下。而席屋偶居前。列朝隙。聞異香出殿櫺。開一紫衣。顧予起。問題之難易。及名氏里貫年齒而去。少頃。復相慶曰。適駕至耳。薄暮出宮。傳以爲希遇。所謂月澹云云者。少作也。無可取。以紀一時之事云。

錄汴梁宮人語十九首

一入深宮裏。經今十五年。長因批帖子。呼到御床前。
歲歲逢元夜。金蛾鬧簇巾。見人心自怯。終是女兒身。
殿前輪直罷。偷去賭金釵。怕見黃昏月。殷勤上玉階。
翠翹珠掘背。小殿夜藏鈎。驀地羊車至。低頭笑不休。
內府頒金帛。教酬賀節盤。兩宮新有旨。先與問孤寒。
人閒多棗栗。不到九重天。長被黃衫吏。花攤月賜錢。
仁聖生辰節。君王進玉卮。壽棚兼壽表。留待北還時。
邊奏行臺急。東華夜啓封。內人催步輦。不待景陽鐘。
畫燭雙雙引。珠簾一一開。輦前齊下拜。歡飲解寒杯。

聖躬香閣內。只道下朝遲。扶杖嬌無力。紅綃貼玉肌。
今日天顏喜。東朝內宴開。外邊農事動。詔遣教坊回。
駕前雙白鶴。日日候朝回。自送鑾輿去。經今更不來。
陡覺文書靜。相將立夕陽。傷心寧福位。無復夜熏香。
二后睢陽去。潛身泣到明。卻回誰敢問。較似有心情。
爲道圍城久。妝奩鬪犒軍。入春渾斷絕。飢苦不堪聞。
監國推梁邸。初頭靜不知。但疑牆外笑。人有看宮時。
別殿弓刀響。倉皇接鄭王。尙愁宮正怒。含淚強添妝。
一向傳宣喚。誰知不復還。來時舊鍼線。記得在窗間。
北去遶沙漠。誠心畏從行。不如當日死。頭白若爲生。

輟耕錄。楊文憲公免。嘗作汴故宮記云云。公又有錄汴梁宮人語。五言絕句一十九首。雖一時之所寄興。亦不無傷感之意云云。

詩藪。楊煥然錄大梁宮人語十九絕。殊得仲初格調。如怕見云云。蕙地云云之類。

讀通鑑作

風煙慘淡駐三巴。漢燼將燃蜀婦髻。欲起溫公問書法。武侯入寇寇誰家。

輟耕錄。霍治書云。楊煥然先讀通鑑。至論漢魏正閏。大不平之。遂修漢書。駁正其事。因作詩云云。

後攻宋軍回始見通鑑綱目其書乃疑

謁廟

會見春風入杏壇奎文閣上獨凭闌淵源自古尊洙泗祖述何人似孟韓竹簡不隨秦火冷楷林高倚魯城寒漂零蹤跡千年後無分東家寄一簞

山房隨筆楊煥然號關西夫子題孔子廟云云

陶九嫂

勿輕釵與笄勿賤裙與襦柘皋一女子健勝百丈夫家住廬州東庫藏饒金珠天陰夜抹漆暴客萌覬覦肘篋不足較父兄罹刳屠女年十五六以色竟見驅捕捉星火急亡命洞庭湖既爲陶家婦九嫂從渠呼寢息風浪中四隣唯菰蒲琴瑟未免合積久產二雛春秋祭享絕對面佯悲吁向來郎鬢黑漂泊生白須身後乏寸土奈我子母孤干戈又換世幸在昔塵區何當決歸口卒歲容相娛聞語略不疑意謂癡且愚銳然口輕舟攜抱登長塗青氈復舊物水陸多膏腴女兒拜夫前靈貺焉可誣兒初有祕祝欲答神口扶紉郎俟西祠徑往公府趨畫地訴首尾曾不口錙銖官長怒咆哮俄頃就執俘械扭滿蟻蝨口口臨街衢使女坐其旁笑頰如施朱自推二口口口請加鎖鉢官曰產爾腹頗亦憐呱呱女口口口種不可謂不辜環觀交感泣猛烈今古無口事鬼神畏失機或斯須甘露若訓注反遭口口圖政類竇桂娘兒同心實殊桂娘建中時人見杜牧言隱忍寂寞濱豈甘盜賊污白玉投青泥至寶終莫渝此雛若不雪何以見烏鳥一息傳萬口南北通燕吳夫願女爲婦婦願女爲姑綠林肝膽寒低頭羞穿窬佳人固不幸能還誰爾拘

何事原巨先，遂使輕俠徒。見前漢原涉傳。

自注：述蘄春劉益甫所言，以爲強暴不道者之戒。

句

孤城晴雪底，雙塔暮雲閒。

詩數元五言律可摘者，楊煥然云云。

劉祁

祁字京叔，渾源人。舉金進士，廷試失意歸。國初戊戌，詔試儒人，祁就試，魁西京，選充山西東路考試官。有神川遜士集。

歸潛堂記：還鄉里，鄉帥高侯爲築室以居，因榜其堂曰歸潛，且以張橫渠東西二銘書諸壁。金史值金末喪亂，作歸潛志以紀金事，修金史者多採用焉。

寄高丞相

青雲自致不須階，十稔從容位上台。負荷一堂森柱石，調和衆口費鹽梅。勤勞密邇三朝重，壽考康寧七秩開。家道益昌孫有息，綵衣扶杖好歸來。

歸潛志：高丞相巖夫在相位，因元光二年元日慶七十，會鄉里交舊，且求作詩文。時先子以新罷御史，避嫌不赴。余方弱冠，爲作詩，以公頗負謗，且勸其退休也。公得詩大喜，趣召余，迎謂余曰：解道青雲自致不須階耶？又撫余背曰：汝費字如何下來？蓋余詩云云。

贈鮮于伯機

憶昔逢君北渚秋。藕花香裏醉輕舟。三年一別空回首。千里相思更倚樓。明月不隨春物老。碧山長帶暮雲愁。天平松竹黃華水。早晚柴車得共遊。思君一日如三載。兩寄詩來慰我心。塵土愈知人世隱。風煙遙見海門深。貧來笑我常癡坐。亂後憐君更苦吟。歷下亭前春水闊。扁舟何日重相尋。

困學齋雜錄。平生交游。贈余詩者多矣。唯劉京叔二篇。嘗吟詠之云云。

句

玄猿哭處江天暮。白雁來時澤國秋。

歸潛志。夢中作詩或得句。多清邁出塵。余先祖龍山君。夢得句云。山路嶄有壁。松風清無塵。先子夢中詩云。落月浸天池。余幼年夢中亦作詩云云。如鬼語也。

杜仁傑

仁傑。字仲梁。又字善夫。濟南長清人。不仕。以子貴。贈官。諡文穆。

遺山集。麻信之。杜仲梁。張仲經。正大中。同隱內鄉山中。以作詩爲業。予嘗竊評之。仲梁詩。如偏將軍將突騎。利在速戰。屈於遲久。故不大勝。則大敗。仲經守有餘。而攻戰不足。故勝負略相當。信之如六國合從。利在同盟。而敵於不相統一。有連雞不俱棲之勢。雖人自爲戰。而號令無適從。故勝負未可知。

又仲經有詩云。寒客遠峯猶帶雪。暖私幽圃已多花。仲梁雖有暖散春泉百汨流之句。亦自以爲不及也。

謝嚴相

高臥東窗興已成。簾鉤無復挂冠聲。十年恩愛淪肌髓。只說嚴家好弟兄。

絕句

高燒銀燭照雲鬢。沸耳笙歌徹夜闌。不念征西人萬里。玉關霜重鐵衣寒。

山房隨筆。杜善甫不屑仕進。遊嚴相之門。嚴迺濟南望族。善甫爲所敬重。一日。讒者閒之。情分浸乖。杜謝以詩云云。嚴悟。款密如初。時有掌兵官遠戍於外。其妻宴客。笙歌終夕。善甫詩云云。聞者快之。有薦之於朝。遂召之。表謝不赴。中二聯云。俾獻言於乞言之際。敢盡其忠。若求仕於致仕之年。恐無此理。不能爲白居易。漫法香山居士之名。惟願學陸龜蒙。拜賜江湖散人之號。

楊鵬

鵬字飛卿。汝海人。在金爲詳議官。

困學齋雜錄。紫羅凡。凡道人楊鵬。字飛卿。一名雲鵬。少梁人。北渡後終於東平。有陶然集。

句

樹古葉黃早。僧閒頭白遲。

遺山集。其死生於詩者。汝海楊飛卿一人而已。李內翰欽叔工篇翰。而飛卿從之遊。初得云云之

句大爲欽叔所推激。從是遊道日廣。而學亦大進。客居東平將二十年。有詩近二千首。所賦青梅瑞蓮餅聲雪意。或多至十餘首。

楊果

果字正卿。祁州蒲陰人。金正大初登進士第。國初起爲幕官。官至參知政事。謚文獻。有西菴集。元史類編參政李蹊行大司農於許昌。果以詩送之。蹊大稱賞。歸言於朝。用爲偃師令。

題趙輔之樊川圖

一賦阿房萬古傳。而今還有趙樊川。謝公墩上王公住。異代風流各自賢。

牧庵集。趙樊川集序。中舍杜牧名其集爲樊川。公居二曲之間。余少之時屢至焉。其地先甚荒棄。由爲公有歲新而月盛之。泉石巖洞池塘林木。出沒窈窕。魁奇繁薈。凡可娛心而駭目者。悉甲其鄰。人亦目公樊川。中統之初。京師諸貴。詩其圖者。惟楊公西菴爲絕倡云云。案困學齋雜錄第二句。作豈知今有趙樊川。

趙衍

元史。耶律希亮。楚材之孫。師事北平趙衍。

案元文類。宋子貞中書令。耶律公神道碑。稱進士趙衍。

七真洞題壁

紛披容與縱笙歌。蕙轉光風豔綺羅。露溼桃花春不管。月明芳草夜如何。璫珠浩蕩隨蘭橈。雲旆低徊射

玉珂深入醉鄉休秉燭。盡情揮取魯陽戈。

四溟詩話。予客京師。遊翠巖七真洞。讀壁上詩云云。耶律丞相門客趙衍所作。清麗有味。頗類唐調。惜乎大元風雅不載。故表而出之。

案詩亦見雙溪醉隱集。題作遊玉泉瑤珠作靈珠。雲旆作雲錦。未注云。桃花夫人。事見洛陽耆舊傳。劉伯壽二侍妾名萱草芳草。

徐世隆

世隆字威卿。陳州西華人。金正大四年。登進士第。世祖在潛邸。召見之。官至山東等道按察使。有威卿集。

元朝名臣事略。丞相安圖再相。欲得老成人共政。奏公雖使之坐而策國事。亦尙有賴。召之。公老病辭不能行。附奏便宜九事。賜田十頃。時八十。其秋疾增劇。作八十可老歌以自遣。

哭文丞相

當今不殺文丞相。君義臣忠兩得之。義似漢王封齒日。忠如蜀將斬顏時。乾坤日月華夷見。嶺海風霜草木知。只恐史官編不盡。老夫和淚寫新詩。

雪舟證語。文山在獄中時。北人有詩云云。

七修類稿。此作膾炙人口久矣。但文山集與輟耕錄作徐世隆。史鑑與風化錄作王磐。然二人皆元學士。無文集可查。國史中又不載也。

案庶齋老學叢談亦作徐威卿。

王磐

磐字文炳。廣平永年人。登金正大四年進士第。中統元年擢益都等路宣慰副使。官至翰林學士承旨。諡文忠。有鹿菴集。

題三陪圖

寺主善爲無米飯。病人要喫沒錢鍼。皇都詩老多才思。收拾酸寒入笑林。

困學齋雜錄。中朝名士有以木庵陪飯。寶太師陪針。王狀元陪口。作三陪圖徵詩。當代名勝爲一矧者。鹿庵先生題云。

姜里城文王廟

姜水淺且清。姜里餘荒城。文王德如日。曾此夷其明。陝樹憩召伯。箕山栖許生。後人起敬愛。木石含芳榮。嗟爾一坏土。耕犁未全平。千秋不磨洗。永被囚聖名。我行蕩陰道。過之爲停征。念昔有殷季。虐主方狂醒。銛鋒戮賢聖。若刈寸草莖。左啖鄂侯脯。右啖鬼侯羹。茲時無姜里。何以紓淫刑。姜里深杳杳。姜城高亭亭。君王在縲紲。不異南面聽。淑氣發神慮。淳和助心靈。演開伏羲畫。剖出天地精。一時雖冥昧。萬古垂日星。若無姜里拘。易經何由成。易經在所重。姜里那可輕。

河朔訪古記。姜里城文王廟。在湯陰縣北六里。門榜題曰。姜里城周文王之廟。大元至元六年夏十有二日。建廟壁龕。翰林承旨永年王磐五言古詩。石刻一通云云。

題嵇侍中廟

十載家艱恨未消。又持手版事昏朝。已知定亂功難就。猶幸臨危節可要。忠血數斑霑藻火。英名千古迫雲霄。一杯欲酌祠前土。野鶴昂藏未易招。

河朔訪古記。晉嵇侍中廟墓。湯陰縣西南一百二十步。曰浣衣里廟。有國朝翰林承旨鹿庵王磐律詩一首云云。余嘗讀松雪齋集。有紀夢嵇侍中曰。延祐元年十一月十九日。彰德朱長儒道其邦人之意。求書晉嵇侍中之廟六字。余敬其忠節。不辭而書之。運筆如飛。若有神助。是夜京口石民瞻館予書室中。夢一丈夫。晉人衣冠。蓬首玄衣。流血被面。謂民瞻曰。我嵇侍中也。今日趙子昂爲余書廟額。故來謝之。民瞻既覺。猶汗流。亦異事也云云。

一庵

慶王承旨八秩

人材落落自天成。千佛經中第一名。已令貳膳常珍入。但入朝行以杖行。

商左山

句

藥裹封災隨臘去。酒杯稱壽逐年新。

胡紫山

慶王承旨八秩

堅辭不允老而傳。几杖恩光又十年。勇折桓文匡弊政。力扶周孔上經筵。
塞破乾坤享重名。玉堂東觀又尊榮。香山如礪瀘溝帶。才與斯文作主盟。
玉堂嘉話。王承旨慶八秩詩。一庵云云。商左山云云。胡紫山云云。

李冶

冶字仁卿。號敬齋。真定欒城人。登金正大末進士第。北渡後。世祖在潛邸。被徵。官至翰林學士。
元朝名臣事略。屏山李先生。令代作墓銘數篇。一夕而就。屏山大加賞異。
又四賢堂記。遺山敬齋。自南都時。才名已相埒。北渡後。嘗往來西州。廣唱迭和。世亦謂之元李。

贈李之和

元牝機關不死根。自消自息自氤氲。暖於餵餒九微火。輕似飄飄三素雲。白玉池心流曉潤。紫金爐口裊
餘熏。未知與道相應否。試作新詩一問君。

敬齋古今註。予少小多疾。故常求所以攝養之方。雖不得升堂。亦竊得其藩籬。鄒寓崑山之
桐川。嘗與李鼎之和。論及於此之和。遂於性命者也。似有印可意。予因贈之以詩云云。

元詩紀事卷四

郝經

經字伯常澤州陵川人憲宗元年世祖在潛邸召見留王府官至翰林學士諡文忠有陵川集

帛書詩

霜落風高恣所如歸期回首是春初上林天子援弓繳窮海蠻臣有帛書

宋學士集霜落云云中統十五年九月一日放雁獲者勿殺國信大使郝經書於眞州忠勇軍營新館右郝文忠公帛書五十九字博二寸高五寸背有陵川郝氏印方一寸文透於面可辨識蓋中統元年三月辛卯元世祖登極欲告即位定和議於宋四月丁未授公翰林侍講學士佩金虎符充國信使以行宋相賈似道拘留儀真不遣至元十一年六月庚申下詔伐宋問執行人之罪時公在儀真已十五載以音問久不通乃於九月甲戌用蠟丸帛書親繫雁足祝之北飛十二月丙辰伯顏南征之師竟渡大江十二月庚午似道懼送公歸國三月虞人始獲雁於汴梁金明池四月公至燕師而七月辛未遂卒年僅五十三爾其書中統十五年卽至元十一年南北隔絕但知建元爲中統也十三年正月宋亡帛書爲安豐教授王時中所得延祐五年春集賢學士郭貫出持淮安使節獲見焉遂奏於朝勅中使取之仁宗詔裝潢成卷翰林集賢文臣各題識之藏諸東觀或謂世祖見書有四十騎留江南曾無一人如雁之歎遂興師伐宋皆好事者傳會之談

梧溪集先是有以雁四十餉公。內一雁體質稍異。命畜之。雁見公。輒張翮引吭而鳴。公感悟。手書尺帛。親繫雁足。人雲而去。未幾。虞人獲之苑中。以所繫帛書。託近侍以聞。上惻然曰。四十騎留江南。曾無一人雁比乎。遂進師南伐。

緯亢行

歲臨鶉火斗插子。稗陽欲復老陰死。朱靈南極元龜首。望舒北至明堂裏。乾坤翻覆變已窮。氣數朝元將有啓。旄頭日沒正當中。五緯將且躔蒼龍。羣陰已伏衆星沒。玄天變白生清風。兩角在南大角北。龍頭半妥朝上宮。誰知總向亢中聚。同舍參差不同度。歲鎮熒惑共光明。金水煌煌俱不怒。東西絡繹似連珠。色正芒寒共昭布。往年長星掃金源。前年孛入紫微垣。機槍妖客不時出。天狗枉矢還驚傳。今朝太平有此象。不久再見成康年。昔時曾聞入房駟。兆啓金商六百祀。同來東井漢元年。四百年中稱帝制。後來丁卯煥文章。二百餘年方季世。曾逢丙午當百六。今日重逢又重六。五星忽來會辰前。不知誰禍誰爲福。綱紀梁棟兩攝提。招搖玄弋動光輝。馬祖直欲飲亢池。星翁曆史休相欺。正是君臣會合時。

陵川集附注。丙午冬十有一月。越十有五日辛未。五星會於亢。太陽躔斗十九度。太陰經心五度。木星躔亢二度八十三分十秒。在辰前逆行。六日行一度。土星躔亢宿一度三分。在辰前順疾。十日半行一度。金星躔亢一度六十四分四十六秒。在辰前順疾。一日行一度。火星在亢東五度六十二分半。在辰前順疾。二日行一度。水星躔亢三度三十二分三十秒。在辰前順疾。一日行一度。以其五緯皆躔于亢。故謂之緯亢云。

巴陵女子行并序

己未秋九月王師渡江大帥拔都及萬戶解成等自鄂渚以一軍覘上流遂圍岳岳潰入於洞庭俘其遺民以歸節婦巴陵女子韓希孟誓不辱於兵書詩衣帛以見意赴江以死其詩悲婉激切辭意壯烈有古義士未到者今并其詩錄於左方嗚呼宋有天下文治三百年其德澤龐厚膏於肌膚藏於骨髓民知以義爲守不爲偷生一時計其培植也厚故其持藉也堅乃知以義爲國者人必以義歸之故希孟一女子而義烈如是彼振纓束髮曳裾峨冠名曰丈夫而誦書學道以天下自任一旦臨死生之際操履云爲必大有以異於希孟矣余旣高希孟之節且悲其志作巴陵女子行以申其志云

北來諸軍飛渡江突騎一夜滿岳陽樓頭火起入閭巷曹逃偶走如牛羊巴陵女子尙書婦生平不識門前路亂兵驅出勢倉皇夫婿翁姑在何處吞聲掩淚行且嘯嘯痕沾溼越羅衣此身忍使人再辱裂帛暗寫臨終詩上言社稷安危事下說投江誓天志一回宛轉一悲辛心折魂飛不成字詩成淚盡赴江流蛾眉蕭颯天爲愁芙蓉零亂入秋水玉骨直葬青海頭古來烈婦纔一二誰似巴陵更文理名與長江萬里流丞相魏公還不死元詩體要

陵川集附注巴陵女子韓希孟魏公五世孫嫁與賈尙書男璵爲婦岳州破被虜之明日以衣帛書詩願好事君子相傳知吾宋家有守節者其詩云宋未有天下堅正臣禮秉開國百戰功每陳唯雄整及其侍幼主臣心常炯炯帝曰卿北伐山戎今有警死狗莫擊尾此行當繫頸卽日陛辭

行盡敵心欲逞。陳橋兵忽變。不得守箕顙。禪讓法堯舜。民亦普安靜。有國三百年。仁義道馳聘。未改祖宗法。天何賜太管。細思天地理。中有幸不幸。天果喪中原。大似裂冠衽。君誠不獨活。臣實無魏邴。失人與得人。垂誠常耿耿。江南無謝安。漠北有王猛。所以戎馬來。飛渡巴陵境。大江限南北。今此一舴艋。本期固封守。誰知如畫餅。烈火燎崑岡。不辨金與礦。妾本良家子。性僻守孤梗。嫁與尙書兒。含香署蘭省。直以才德合。不棄宿瘤癭。初結合歡帶。誓比日月昞。鴛鴦會雙飛。比目願長並。豈期金石節。化作桑榆景。旄頭勢正然。蚩尤氣先屏。不意風馬牛。復此逸鄒郢。一方遭劫虜。六族死俄頃。退鷁落迅風。孤鸞弔空影。簪堅折白玉。瓶沈斷青綆。死路定冥冥。憂心常炳炳。妾心堅不移。改邑不改井。我本瑚璉器。安肯作溺皿。志節能轉石。氣噎如吞鯁。不作燭火然。願爲死灰冷。舍生念麴蛾。乞憐羞虎甕。借此清江水。葬我全首領。皇天如有知。定許血面請。願魂化精衛。填海使成嶺。

武昌詞三首并序

王師圍鄂。遊騎於金牛鎮。得一婦人。欲侵之。厲聲曰。我夫壻翁姑皆死。目前未卽死。又可受辱邪。速與我死。遂置之。自稱梅溪主人張素英。作歌詩數篇以見志。尋以疾卒。於湖中得一路分妻。一日。以無夫選賜有功軍人。卽以掌批其頰。對今上大呼曰。妾夫將千五百人。扼敵沅州。妾命婦也。豈可辱於是。乞速賜死。上矜其志。賜之衣糧。使有司存恤之。以俟其夫。亦尋以疾卒。又有漢陽教授之妻。爲一兵所掠。義不受辱。投於沙湖。三人者。僕親見之。皆可附希孟之義。各爲賦詞以寓意。

云。

巴陵女子韓希孟。梅溪主人張素英。解作歌詩還死節。不論傾國與傾城。
烏鬼山頭鬧鼓鼙。武昌恭人攜孺兒。黃鬚回鶻便批頰。義感萬乘真英奇。
漢陽宣教是妾夫。妾身未死緣事姑。騎士朝來強擁去。抱石半夜投沙湖。
陵川集

青城行

壤山壓城殺氣黑。一夜京城忽流血。弓刀合沓滿掖庭。妃主喧呼總狼籍。
驅出宮門不敢哭。血淚滿面無人色。戴樓門外是青城。匍匐赴死誰敢停。百年涵育儘塗地。
死霧不散昏青冥。英府親賢端可憐。白首隨例亦就刑。最苦愛王家兩族。
二十餘年不曾出。朝朝點數到堂前。每向官司求米肉。男哥女妹自夫婦。
靦面相看冤更酷。一旦開門見天日。推入行閒便誅戮。當時築城爲郊祀。
卻與皇家作東市。天興初年靖康末。國破家亡酷相似。君取他人既如此。
今朝亦是尋常事。君不見二百萬家族盡赤。八十里城皆瓦礫。白骨更比青城多。
遺民獨向王孫泣。禍本骨肉相殘賊。大臣蔽君尤壅塞。至今行人不歎承天門。
行人但嗟豪利宅。城荒國滅猶有十仞牆。牆頭密匝生鐵棘。

元詩選陵川集詩。敘金亡事最詳。又有金源十節士歌。序金源氏播遷以來。至於國亡。得節義之士王剛忠公等十人。皆死事死國。有古烈士之風。可以興起末俗。振作貪懦。其名字官階。始終行業。自有良史。其大節之嶽嶽磊磊。在人耳目。雖耕夫販婦。牛童馬走。共能稱道者。作歌以歌之。庶幾揄揚激烈。由其音節見其風采云。天興諸臣。國亡無史。不能具官。故皆祇以當世所稱者。如郭

蝦蟇仲德行院等書之。俟國史之出，當爲釐正云。十節士謂王子明移刺都，郭蝦蟇合答平章，陳和尚馬烏古孫道原，仲德行院，絳山奉御，李豐亭，李伯淵也。

許衡

衡字仲平，河內人。世祖出王秦中，徵授京兆提學，官至集賢大學士，兼國子祭酒，諡文正。學者稱魯齋先生，有魯齋集。

西軒客談：許魯齋仕元世祖朝，以哈麻短毀漢法，不得行其學，力求歸田，觀其與人書，有春日池塘云云。

許魯齋集：若夫春日池塘，秋風禾黍，夏未雨，蠶老麥收，冬將寒，困盈箱積，門喧童稚，架滿詩書，山色水光，詩懷酒興，是以心思意向，日日在此，言亦此，書亦此，百周千折，必期得此而後已。元朝名臣事略：先生疾甚，曳杖於門，曰：予心忤忤然，瞑目坐久之，歌朱子睡起床風瑟瑟，覺來山月團團，身心無累，久輕安，況有清涼池館，小詞歌罷，奄然而逝。

辭召命作

一天雷雨誠堪畏，千載風雲漫企思。留取閒身臥田舍，靜看蝴蝶挂蛛絲。

山房隨筆：許仲平學問文藝爲世所尊，稱爲夫子，有辭召命詩云云，可以觀其志矣。

崔斌

斌字仲文，馬邑人。世祖在潛邸，召見，應對稱旨，官至江淮行省左丞，爲阿合馬所害，追諡忠毅。

弔李肯齋

一夕司空撫御床。祖龍未死國先亡。只緣西楚無堅壁。致使南州總戰場。湘水一川骸骨滿。肯齋千古姓名香。我來不見先生面。猶對西風酹一觴。

隱居通議相士葉秋月誦北人崔參政弔潭帥李肯齋詩云云。

庶齋老學叢談左丞崔公仲文斌弘州人資兼文武重道崇儒統兵平湖湘時潭帥李肯齋蒞城將破舉家自刑繼之以火忠義大節天下咸知公弔以詩云云。

案叢談缺第三句據通議補。

金山

浩浩長江天際來。中流砥柱獨崔巍。風搖萬壑秋聲動。潮捲千堆雪浪迴。山勢參差現靈鷲。海波遶閣隔蓬萊。夕陽不盡登臨意。倒瀉滄溟入酒盃。

庶齋老學叢談左丞崔公仲文題金山詩云云。

高鳴

鳴字雄飛。崑崙人。元初官至吏部尙書。

獨石

一塊蒼頑石。頽然半水濱。可憐閭立本。徒寫五湖真。

題杜莘老華山圖

上方可望不可到。今日興來時臥游。須信丹青有神化。世間隨處是同州。

困學齋雜錄。高雄飛獨石詩云云。題杜莘老華山圖云云。

石國英

國英。號月澗。宿州靈璧縣人。元初官至福建宣慰。

雁蕩能仁寺遺詩

我行天下山水半。側身西望長嗟嘆。山到蜀川方絕奇。世殊久被微官絆。萬里提兵雁蕩來。高牙一展嵐霧開。松風吹騎聯鑣入。高日下照繡經臺。老僧振錫去何所。香篝寂寂佛無語。山鳴谷應應者誰。似有秦民宅幽阻。姑休爾旅枕爾鋌雲深。不得驚龍眠。水晶一派瀉瑤玉。歲與清氣中洄沿。二三溪碓長林下。人力能春天所借。草香花淨太古春。虎嘯猿吟明月夜。幽尋靜勝登嵯峨。鸞旗柱筆光影摩。詩成寫破峭壁翠。稽首巖前諾巨那。

梧溪集題石安撫雁蕩能仁寺遺詩後。公會孫宣武將軍松江萬戶瓊。嘗乘遵道經寺。得是詩於老僧。今年春訪予風雨下。因出卷誦之。殆見公存心仁。律下嚴。悠然雅歌而神采炳如也。

張弘範

弘範。字仲疇。河內人。蔡國公柔第九子。中統初授行軍司馬。官至蒙古漢軍都元帥。薨諡文略。贈太師。至大開改諡忠武。延祐六年加封淮陽王。諡獻武。

讀韓信傳

一怒燕齊楚趙收。將軍今古果誰儔。後來肯爲陳豨計。先日何辭蒯徹謀。自是多能慙噲等。何能輕舉學留侯。可憐一片肝腸鐵。卻使終遺萬古羞。

讀李廣傳

弧矢威盈塞北屯。漢家飛將氣如神。但教千古英名在。不得封侯也快人。

淮陽集。許從宣序。王以事業之餘。適其情性。而聊以見之吟詠。雅韻清辭。雍容諧協。固非服介冑者所及。至其讀韓信李廣傳諸作。英氣偉論。卓犖發揚。又豈區區律度之所能道哉。

王惲

惲字仲謀。衛州汲縣人。中統元年。由詳議官。授中書省詳定官。官至翰林學士。諡文定。有秋澗集。玉堂卽事。

陰陰槐幄幕閒庭。靜似藍田縣事廳。細草近緣春雨過。映階侵戶一時青。日長上直玉堂廬。思入閒雲待卷舒。重爲明時難再遇。等閑羞老蠹魚書。

玉堂嘉話。宋相李昉。春日玉堂卽事有云。一院有花春晝永。四方無事簡書稀。予夏日玉堂卽事。亦有二絕句云云。

口號

隔夜端門分板位。平明簪笏列鴛行。紫雲低覆千官入。潤作金爐百和香。

玉堂嘉話。至元十五年。戊寅正月甲寅。乙酉朔。同李侍講德新。應奉李謙。陪百官就位。望拜行在。

所凡七拜其侍儀司先一日於端門兩闕間灰界方所以板書百官號隨各司依品秩作等列班定以次入宮行禮禮畢由左掖門出風埃大作所謂出門塵漲如黃霧始覺身從天上歸曾有口號云云

李夫人畫蘭歌爲郎中孫榮甫賦

清閨堂深不知暑。瑤草佳期夢玄圃。孫郎笑折紫蘭來。素影盈盈映修渚。李夫人澹丰容。天然與蘭相始終。刻藤一筆作九畹。落墨不減江南工。芳姿元與凡卉異。曄曄況是湘纍聚。離騷不復作。遺恨千古沈幽宮。君看此花有深意。似寫靈均幽思悲回風。君家大雅堂。文彩東野翁。併入慘澹經營中。秋風拂簾秋日長。芳霏霏兮汎崇光。淡妝相對有餘韻。畫欄桂子空秋香。淡軒託物明孤潔。五十年來抱霜節。固知色相皆空寂。妙得於心聊自適。仿佛湘娥倚暮花。黃陵廟前江水碧。生平佩服眞賞音。升聞紫庭非素心。喚起謫仙搖醉筆。爲翻新曲瀉瑤琴。

秋澗集右夫人名至規號澹軒亡宋狀元黃朴之女長適尙書李珣子早寡今年七十有二善畫蘭撫琴近爲郎中孫榮父作九畹圖若與蘭爲知聞也且自敘其後云予家雙井公以蘭比君子父東塾翁甚愛之予亦愛之每女紅之暇嘗寫其眞聊以備閨房之玩初非以此而求聞於人也郎中以蘭省之彥一日來徵予筆遂誦點汚亦何忍但覺難爲辭之詩以應之孫求歌詩於予因樂爲賦此者正取其節而不以其藝故也秋七月初吉秋澗老人題

張之翰

之翰字周卿邯鄲人。中統初任洛磁知事。官至松江府知府。

檢荒租二首

頭田亂插白紅牌。翁媼相看不敢猜。十八年愁今日散。愛民使者檢荒來。
三載徒勞三載過。旁人休笑拙催科。浙西儘有荒閑地。不似松江分外多。

松江府志。之翰當知府事。行視荒租。遂有斯作。後租獲免。民懷之。書石以介上海縣庠壁。至今比甘棠之愛。

鏡中燈

孤影徘徊入照臨。西風不動竟沈沈。一池沿水一作承銘一作藏真火。半夜金星犯太陰。雞翅舞一作拍時紅焰歇。一作息蛾頭撲一作觸處碧光深。縱渠百鍊千燒後。依舊剛明一片心。

元詩癸集。嘗作鏡燈詩。贈炙人口。時呼爲張鏡燈。典郡日自題府治春帖云。官清瑩澈三江水。民樂和薰兩縣春。或曰如何不見府。明年詔罷府立庸田司。

梁曾

曾字貢父。燕人。中統四年薦辟中書左三部令史。官至集賢侍講學士。

悼鮮于伯幾鶴

翠柏屏前竹闌曲。幾見韃靼雪衣舞。平生風雲萬里心。零落湖山一邱土。世間萬事不可虞。奇禍何由也。到渠不見嵇康遭殺戮。令人空歎養生書。

西湖志餘伯幾有鶴死非命瘞之西湖士夫多有詩悼之梁曾詩云

徐琬

琬字子方號容齋又自號汶叟東平人至元初薦爲陝西行省郎中官至翰林學士承旨諡文獻

題萊州海神廟

龍宮高拱六鼉頭六合乾坤日夜浮貝殿走珠蛟構室戟門烘霧蜃噴樓中原右顧眞孤島外域東漸更九州咫尺琛航倭濊近好將風浪戒陽侯

庶齋老學叢談中丞容齋徐公人物偉岸襟度寬洪文學吏才筆不停思題萊州海神廟云云通之狼山僧舍有墨蓮公肆筆成長篇尤工綴建臺揚州日確齋荀公雪樓程公校官胡石塘倡和無虛日亦一時之文會也

句

一竅鬼工開混沌八竈神繭墮扶桑

玉堂嘉話徐子方繭瓶詩云云

姚燧

燧字端甫柳城人後遷洛陽文獻公樞之姪至元八年爲秦王府文學官至翰林學士承旨諡曰文有牧菴集

題園肚詩

八十年來遇此春。此春遇後更無春。縱然不得扶持力。也作墳前拜掃人。

草木子。牧菴學士致政於家。年八十時。夏日沐浴。有侍妾在側。因私焉。公起。妾前拜曰。主公年老。賤妾倘有娠。家人必見疑。願賜識驗。公因捉其圍肚。題詩於上云云。公薨後。妾果有子。家人疑其外通。妾出詩遂解。

案至正直記亦載此事。謂係宋末一老儒。語尤猥瑣。今不取。

贈相師

淵澄如止水。泉活有餘波。梅到清香處。君應風味多。

至正集。牧庵姚先生贈相師梅淵泉詩云云。商得符既爲畫之。且求予詩云。

盧摯

摯字處道。一字莘老。號疎齋。涿郡人。至元五年進士。官至翰林學士承旨。

題夷齊采薇

服藥求長年。孰與孤竹子。一食西山薇。萬古猶不死。

詩藪。虞伯生題宣和雪竹。洒墨寫琅玕。深宮春晝閒。蕭條數枝雪。不似紇干山。盧處道題夷齊采薇云云。雖語意新警。然已落議論關。

閻復

復字子靜。其先平陽和州人。徙居高唐。至元八年。薦爲翰林應奉。官至翰林學士承旨。諡文康。有

靜軒集

元史扈駕上京賦應制詩二篇。寓規諷意。世祖顧和禮。霍孫曰。有才如此。何可不用。

梅枝拄杖

斫取江南萬玉柯。春風入手慣摩挲。較清邛竹能香否。鬪品鳩藤奈俗何。聲破夢寒霜滿戶。影隨詩瘦月橫坡。人言功在調羹上。不道扶持力更多。

吳禮部詩話。閻子靜初挾其鄉人書。如京謁賈仲明。以梅枝拄杖爲獻。適姚公茂諸人至。賈因見閻道其故。諸公令賦梅杖詩。閻因賦云云。諸公延譽。遂知名。

句

羣材方用楚。一士獨辭燕。

危素纂吳文正公年譜。程公疏上所薦士以復命。終不忍舍公。公力以母老辭。遂治任南歸。公卿大夫多中原老成。而宋之遺士亦有留燕者。皆知公之不可留。而惜其去。賦詩送別。閻文康公復之詩云云。

伯顏

伯顏。蒙古巴林部人。至元十一年。拜中書左丞相。總兵伐宋。官至開府儀同三司。薨。贈太師。封淮安王。諡忠武。

玉堂嘉話。初。宋未下時。江南謠云。江南若破。白雁來過。當時莫喻其意。及宋亡。蓋知指丞相巴延。

也。

過梅嶺岡留題

馬首經從庾嶺回。王師到處悉平夷。擔頭不帶江南物。只插梅花一兩枝。
七修類藁伯顏下江南。過金陵梅嶺岡詩云云。所以著名。亦有是善。

王思廉

思廉字仲常。真定獲鹿人。至元十年。世祖召見。官至翰林學士承旨。諡文恭。

壽陽梅圖

一聲白雁渡江湖。便覺金陵王氣銷。畫史不知亡國恨。猶將鉛粉記前朝。

西湖志餘錢選字舜舉。宋末時人。入元。以工畫花鳥名江南。王思廉題其壽陽梅圖云云。

王宥

宥字口口。東平人。官中書省郎中。

歸婦吟

烈火都將玉石焚。死生契闊憶中分。信音一絕思青鳥。望眼雙穿見白雲。殘日鵲鴿還有難。北風鴻雁正離羣。新詩送爾還家去。重續當年織錦紋。

山房隨筆。北方王郎中宥。有歸婦吟。其序曰。天馬浮江。兵強將銳。所征無敵。所掠無遺。俘戮之民。奚啻億萬。然生死存亡。悲歡聚散。豈無數存乎其間。夫劉氏者。吉之永豐人也。問其父母兄弟舅。

姑夫與子皆在焉。夫我不知則已。既知之。何獨不令其歸寧於父母乎。嗚呼。不幸之幸。莫大於斯。故不可無一言以送之。案亦詳輟耕錄。

信世昌

世昌字雲甫。東平人。官至翰林學士承旨。

樂府

東風吹落花。紛紛辭故枝。莫怨東風惡。花有再開時。

句

宗廟有靈賢相出。黔黎無患太皇明。

歸田詩話。信雲父山東人。元兵南下。爲張宏範元帥館客。文山被獲。宏範命雲父款待之。日侍談論。頗有向南之意。贈文山詩。宗廟云云。文山因教以詩法。卽領悟作樂府云云。文山稱賞。

陳伯通

伯通字口口。雲中人。

海青馬生肝

金符飛下渥注龍。鞭影輕擲六翻風。耳竅風聲聞鬪蟻。眼花雲影疾驚鴻。未容駿骨遶東老。已得英名冀北空。一縷紅塵江漢捷。天庭不爲荔支紅。催薦廚中語未闌。控拳豪客簇雕鞍。翠翻雲葉并刀亂。冰透霜花楚玉寒。一吮味甘牙齒滑。十分香徹鼻

頭酸夢魂不到鱸魚膾。醉眼江湖特地寬。
驚呼乳盞意匆匆。便覺餘香鼻觀通。露滴冰盤藍玉軟。風生霜刃碧囊空。舞娃驚濺羅衣綠。酒客潛消醉
臉紅。若使昔人知此意。羊頭爛熟不成功。

句

肢傷一體婁師德。目眇三分李雁門。

庶齋老學叢談。陳伯通宣慰雲中人。跛而眇。自述云云。有海青馬生肝詩云云。

李庭

庭字顯卿。

咸陽懷古

連雞勢盡霸圖新。兀兀宮牆壓渭濱。指鹿只能欺二世。沐猴那解定三秦。倚天樓觀餘焦土。落日河山幾
戰塵。今古悠悠同一轍。不須作賦弔前人。

庶齋老學叢談。安西府諮議寓菴李顯卿庭。咸陽懷古云云。語意格筆俱妙。有唐體。

耶律柳溪

柳溪名未詳。楚材孫。

剪子

體出并州性自剛。篋中依約冷光芒。雙環對曲蜂腰細。疊刃齊開燕尾張。慣愛分花沾雨露。偏憎裁錦破

頭酸夢魂不到鱸魚膾。醉眼江湖特地寬。
驚呼乳盞意匆匆。便覺餘香鼻觀通。露滴冰盤藍玉軟。風生霜刃碧囊空。舞娃驚濺羅衣綠。酒客潛消醉
臉紅。若使昔人知此意。羊頭爛熟不成功。

句

肢傷一體婁師德。目眇三分李雁門。

庶齋老學叢談。陳伯通宣慰雲中人。跛而眇。自述云云。有海青馬生肝詩云云。

李庭

庭字顯卿。

咸陽懷古

連雞勢盡霸圖新。兀兀宮牆壓渭濱。指鹿只能欺二世。沐猴那解定三秦。倚天樓觀餘焦土。落日河山幾
戰塵。今古悠悠同一轍。不須作賦弔前人。

庶齋老學叢談。安西府諮議寓菴李顯卿庭。咸陽懷古云云。語意格筆俱妙。有唐體。

耶律柳溪

柳溪名未詳。楚材孫。

剪子

體出并州性自剛。篋中依約冷光芒。雙環對曲蜂腰細。疊刃齊開燕尾張。慣愛分花沾雨露。偏憎裁錦破

鴛鴦可憐。戍婦寒窗下。一剪邊衣一斷腸。

庶齋老學叢談。宣慰耶律柳溪詠剪子詩云云。

句

角端呈瑞移御營。搃亢問罪西域平。

庶齋老學叢談。耶律柳溪詩集云云。注云。角端。日行萬八千里。能言曉四夷之音。昔我聖祖皇帝。出師問罪西域。辛巳歲夏。駐蹕鐵門關。先祖中書令奏云。五月二十日晚。近侍人登山。見異獸。二目如炬。鱗身五色。頂有一角。能人言。此角端也。當於見所備禮祭之。此天降神物。預言吉徵也。

員炎

炎。字善卿。衛州人。卒年六十七。秋澗集。有員先生傳。

洛陽懷古分韻得髮字

東洛打空城。北邙連廢闕。懷古動悲吟。遠客生華髮。

隆德宮

林花細妥胭脂色。水荇輕淤翡翠泥。歌舞留連嫌晝短。樓臺縹緲覺天低。

讌集東平湖亭

北海尊前人似玉。東原城下水如天。滿眼荷花三百頃。采蓮人語隔秋烟。

高唐道中

影孤海內干戈滿。愁入天涯草樹低。桑柘影空蠶已老。陂塘涸盡燕無泥。

扇尾羊

馮翊春草香芊綿。柔毛飽飲苦泉。臥沙稀肋瓊筋細。帶霜小耳春繭圓。扇尾一方移種類。風頭萬里搖腥羶。吾生本無食肉相。不煩挽手愁烹煎。

馬酮

漫說千杯不醉人。清光壓倒洞庭春。攜行可用紫絲絡。渴飲不煩烏角巾。搖動革囊成醞釀。封藏花盎作逡巡。坐中一混華夷俗。或有豪吞似伯倫。

句

宿雨乍收雲葉斷。猶疑電影掣湖心。濟南金線泉宿雨。

秋澗集。故人楊奐。主漕洛師。愍其窶。用監嵩州酒。時兵後邑居榛荒。日與鹿豕伍。而隨所徵上謁。奐方據案坐堂上。吏臆雁行立。炎挂布囊。掖下杖巨挺。直前曰。楊使君不相知。置我於此。幾爲老熊所噬。吾不能爲汝再辱。遂揖而去。自是長遊河朔。以詩鳴諸公間。其洛陽懷古各云。濟南金線泉宿雨云云。扇尾羊各云云。予時能憶者止此。

撤傘 一作撒舉

撤傘字彥舉。陝人有函谷道人集。

案元遺山有爲撤子醺金詩云。秋來聞說酒杯疎。卻爲窮愁解著書。與困學齋雜錄合。惟撤字又

作橄

無題

誰家金鴨暖梅魂。繡戶春風半掩門。桃葉等閒留暮雨。梨花寂寞過黃昏。盤盤鸞髻堆雲影。澹澹蛾眉掃月痕。常似謝家銀燭底。鳳凰釵影落瑤尊。

記夢

千里崤函楚客行。關河西上鐵牛城。申湖亭下月初上。召伯堂前草自生。十里杏園紅雨暗。一條春水碧羅平。覺來半壁寒燈底。吹落風簷暮雨聲。

過沙井

沙沈石馬廢城秋。劍鉞寒生古戍樓。平日只疑無蜀道。此行何處問荊州。山連海塞從西斷。水界龍荒盡北流。一曲商歌才夜半。朔風吹雪望牛頭。

遊香山

石棧天梯落日紅。誰開青壁削芙蓉。捫參歷井來何暮。佩玉鳴鑾更不逢。僧去古潭雲渡水。鶴陰清露月平松。世間骨相誰潘閔。誤打金陵半夜鐘。

送郭祐之

南口青山北口雲。天涯何地又逢君。陌頭楊柳西行馬。畫角三聲不忍聞。

困學齋雜錄。詩人撒舉。性嗜酒。工於詩。客京師十餘年。竟流落而死。今得逸詩數篇。信手錄之云。

云。

句

氣凌太華五千仞。詩繞國風三百篇。贈王秋澗。

秋澗集。橄条字彥舉。少爲里耆夫。初不解文字。一日忽能作詩。吐奇怪語。嘗贈詩云云。

鄭雲表

句

形如槁木因詩苦。眉鎖蒼山得酒開。

困學齋雜錄。撒舉同時有鄭雲表者。慕彥舉之爲人。作詩挽之云云。人以爲寫真云。

元詩紀事卷五

劉因

因字夢吉。保定容城人。初名駟。字夢驥。表所居曰靜修。至元十九年。徵拜右贊善大夫。二十八年。召爲集賢學士。固辭不起。諡文靖。

滋溪文藁。獨好長嘯。嘗遊西山。當秋風木落時。作一曲而感慨係之。王師伐宋。先生作渡江賦。以哀之。嘗愛諸葛孔明。靜以脩身之語。表所居曰靜脩。閒遊郎山。號雷溪真隱。林泉隨筆。劉靜修詩。古選不減陶柳。其歌行律詩。直遡盛唐。其爲文章。如田孝子碑。輞川圖記等作。皆正大光明。

讀史

紀錄紛紛已失真。語言輕重在詞臣。若將字字論心術。恐有無邊受屈人。

薛文清公集。道盡作史之弊。

詠會點

獨向舞雩風下來。心齋門外欲生苔。歸時過著顏家巷。說與城南花正開。

庶齋老學叢談。靜修集讀史詩云云。殊非確論。修史自有定例。謂如其人功十而過一。本傳不書其過。十功豈不能贖一過。其過必於他傳見之。其人過十而功一。傳必書其功。謂其人豈無一善。

可書或有當書之事。本傳不載者。必於他傳見之。其例甚多。未易縷陳。又詠曾點云云。此猶非也。坐忘乃莊子之說。借孔顏之名。以形容道妙。非孔門實事。以此求顏子。則誤矣。未可以私意立說。輕於訾毀聖賢。況顏子與聖人僅隔一壁。城南之花。豈足動其心。語意大欠持擇。

書事三首

當年一線魏瓠穿。直到橫流破國年。草滿金陵誰種下。天津橋上聽啼鵑。

升庵詩話補遺。劉文靖公。因書事絕句云云。宋子虛詠王安石亦云。投老歸耕白下田。青苗猶未罷民錢。半山春色多桃李。無奈花飛怨杜鵑。二詩皆言宋祚之亡。由於安石。而含蓄不露。可謂詩史矣。

臥榻而今又屬誰。江南回首見旌旗。路人遙指降王道。好似周家七歲兒。

南濠詩話。劉靜修書事詩云云。周公謹雜識。載北客詩。憶昔陳橋云云。二詩皆爲宋太祖作者。若出一機軸。而辭意嚴正。可謂詩之斧鉞矣。

馮道

亡國降臣固位難。癡頑老子幾朝官。朝梁暮晉渾閒事。更捨殘骸與契丹。

筆精。馮道歷事四朝。後世羞之。歐公作史。謂無廉恥。史斷諸賢。紛紛訾議。不如元劉靜修一絕。約而盡也。云云。

宋理宗南樓風月橫披二首。元音作煙波橫披圖。

試聽陰山勅勒歌。朔風悲壯動山河。南樓煙月無多景。緩步微吟奈爾何。物理興衰不可常。每從氣運見文章。誰知萬古中天月。只辦南樓一夜涼。

元音。太祖嘗詠月云。才到中天萬國明。理宗和云。併在南樓一夜涼。步故以寓其意云。西湖志餘。理宗嘗畫南樓風月橫披。有併作南樓之句。靜修題詩云云。蓋才到中天。宋太祖月詩也。

白雁行

北風初起易水寒。北風再起吹江干。北風三吹白雁來。寒氣直薄朱崖山。乾坤噫氣三百年。一風掃地無留殘。萬里江湖想瀟灑。佇看春水雁來還。

西湖志餘。先是臨安有謠云。江南若破。白雁來過。蓋伯顏之讖也。劉靜修白雁云云。蓋寓言也。

登鎮州隆興寺閣

大行鱗甲搖晴空。層樓一夕蟠白虹。天光物色驚改觀。少微今在青雲中。初疑平地立梯磴。清風西北天門通。又疑三山浮海至。載我欲去扶桑東。雲華寶樹忽當眼。拍肩愛此金仙翁。金仙一夢一千載。騰擲變化天無功。萬象繞口恣噴吐。坐令四海皆盲聾。千池萬沼盡明月。長天一碧無遺蹤。我生玄感非象識。此眼此臂將安庸。海岳神光埋禹鼎。人間詭態何由窮。金天月窟爾鄉國。玉毫萬丈須彌峯。一杯徑欲呼與語。爲我返駕隨西風。堂堂全趙思一豁。江山落落吾心胸。中原左界此重鎮。形勢彷彿餘兵衝。歌舞遺臺土花碧。旗幟西山霜葉紅。乾坤割裂萬萬古。烏鳶螻蟻爲誰雄。漳水悠悠自東注。落日渺渺明孤鴻。

詩數劉夢吉古選學陶冲淡有句無篇歌行學杜隆興寺明遠堂等作老筆縱橫雖閒涉宋人然不露儒生腳色

金太子允恭墨竹

黑龍江頭氣鬱蔥武元射龍江水中江聲怒號久不瀉破墨揮灑餘神功天人與竹皆眞龍墨竹以來凡馬空人間只有墨君堂何曾夢到瓊華宮瑤光樓前月如練倒影自觀河山雄金源大定始全盛時以漢文當世宗興陵爲父明昌子樂事孰與東宮同文采不隨焦土盡風節直與幽蘭崇百年圖籍有蕭相一代英雄誰蔡公策書紛紛少顏色空山夜哭遺山翁我亦飄零感白髮哀歌對此吟雙蓬秋聲蕭蕭來晚風極目海角天無窮

靜修集自注黑龍江見金史幽蘭軒義宗死所汴亡張蔡公以金寶錄歸遺山嘗就公謄錄此軸亦公得於汴之中祕者公之子仲仁持以求予詩故終篇及之

方回

回字萬里號虛谷徽州歙縣人宋景定壬戌別省登第知嚴州元兵至迎降卽以爲建德路總管尋罷有桐江集

秋晚雜書十首錄六

堂堂陳去非中興以詩鳴曾呂兩從囊殘月配長庚尤蕭范陸楊復振乾淳聲爾後頓寂寥草蟲何薨薨永嘉有四靈詞工格乃平上饒有二泉旨淡骨獨清學子孰取舍吾非私重輕極玄雖有集豈得如淵明

竊嘗評少陵。便生太宗時。豈獨魏鄭公。論諫垂至茲。天寶得一官。主昏事已危。脫命走在所。窮老拜拾遺。卒坐鯁直去。漂落西南陲。處處苦戰鬪。言言悲亂離。其閒至痛者。莫若八哀詩。我無此筆力。懷抱頗似之。人言太白豪。其詩麗以富。樂府信皆爾。一掃梁隋腐。餘編細讀之。要自有樸處。最於贈答篇。肺腑露情愫。何至昌谷生。一一雕麗句。亦焉用玉溪。纂組失天趣。沈宋非不工。子昂獨高步。畫肉不畫骨。乃以帝閑故。六經天日月。諸子如四時。史自班以上。語奇文亦奇。踵武蔚宗輩。語有文無之。小宋刊新唐。不悟宵寐規。以藝傳李杜。待之無乃卑。他人有遺集。一覽不再窺。惟此與韓柳。咀嚼無厭期。俯彼楓落生。吾欲鐫此碑。道自漢魏降。裂爲文與詩。工詩或拙文。文高詩或卑。香甌假山序。不妨自一奇。鮪橘多骨核。乃至肆詆訾。恭維陳無已。此事獨兼之。五七掩杜集。千百臻秦碑。四海紫陽翁。歸美豈其私。所以此虛叟。取爲晚節師。世稱陶謝詩。陶豈謝可比。池草故未凋。階藥已頗綺。如唐號元白。白豈元可擬。中有不同處。要與分朴訥。鄭圃趙昌父。潁川韓仲止。二泉豈不高。顧必四靈美。鹹潮生蠶門。蜚蜚以爲旨。未若玉山雪。空鐫煮荒蕘。隱居通議方。紫陽序羅壽可詩曰。詩學晚唐。不自四靈始。宋刻五代舊習詩。有白體。崑體。晚唐體。白體如李文正。徐常侍。昆仲。王元之。王漢謀。崑體則有楊劉西崑集傳世。二宋。張乖崖。錢僖公。丁厓州。皆是晚唐體。則九僧最逼真。寇萊公。魯三交。林和靖。和仲先父子。潘逍遙。趙清獻之徒。凡數十家。歐公出焉。一變爲李太白。韓昌黎之詩。蘇子美。二難。相爲頡頏。梅聖俞。則唐體之出類者也。蘇長公。踵歐公而起。王半山。備衆體。精絕句。五言。或三謝。獨黃雙井。專爲少陵。秦晁莫窺其藩。張文潛。自然有唐風。別成一宗。惟呂居仁。克肖。陳后山。棄所學。學雙井。黃致廣大。陳極精微。天下詩

人北面矣。立爲江西派之說。銓取或不盡然。陳簡齋。曾文清。爲渡江之巨擘。乾淳以來。尤范楊陸。蕭其尤也。高古清勁。盡掃餘子。又有一朱文公。嘉定而降。稍厭西江。永嘉四靈。復爲九僧。晚唐體。日淺日下。然尙有餘杭二趙。上饒二泉。典型未泯。今學詩者。不於三千年間。上溯下沿。窮探邃索。往往追逐近世六七十。年間之所偏向。非區區之所敢知也。

雨夜雪意

洶湧風如戰。蕭騷雨欲殘。遙峯應有雪。半夜不勝寒。吾道孤燈在。人寰幾枕安。何當眩銀海。清曉倚樓看。瀛奎律髓。予丁丑之冬。在桐江賦雨夜雪意云云。魯齋趙君與東。字賓陽。和予此詩。哦詩字欲安。佳句也。尾句亦活動。勝予所倡。

初夏書事

平生萬事鳥飛空。綠鬢蒼顏俛仰中。醉若山頽無舊侶。坐如泥塑有新功。詩成不覺窗移日。心定何煩扇引風。結網小蛛恣來往。忘機應亦識衰翁。

新安文獻志。賢良阮公秀實。亟取此詩。

久雨

元胡不出積雨予尼。意彌八紘。膝此一席。誰具烝徒。假予楫航。一往滄海。觀波茫洋。掩關晝眠。胡寧不暇。魯叟攸戒。敢視不夜。寂寂疎簾。幽幽空階。鳥下啐薜。傷予之懷。悠悠古道。溢溢行潦。豈無岑樓。送目遙草。心之憂矣。莫或予知。彼其之子。謂予寒饑。

新安文獻志陳定宇批云陶體

舟行青溪道中入歙三首

夜寒如覺有猿吟。積翠重蒼萬壑深。下水輕舟弦脫箭。盤山細路線穿針。
刺桐花發草如藍。欲卸綿袍翦紵衫。一夜春霜忽如雪。江南天氣不宜蠶。
巖峯欲動茗抽芽。節近清明路近家。五日緩行三百里。夾溪隨處有桃花。

桐江集陸州青溪本歙州歙縣之東鄉。吾遠祖東漢賢良方公儲墓在焉。汭流而上。湍石奇怪。沈約所謂新安江水至清是也。陸改爲嚴州。歙州改爲徽州。青溪縣改爲淳安縣。而歙縣獨存漢時舊名。

聽航船歌十首錄二

南到杭州北楚州。三江八堰水通流。牽板船篙爲飯碗。不能辛苦把鋤頭。

桐江集自注舊航船不過揚子江。今直至淮河。三江者。錢塘江。吳淞江。揚子江。八堰者。杭州蕭公閘。北關堰。常州犇牛堰。呂城堰。潤州海鮮河堰。揚州瓜州閘。而召伯堰小不與。其一楚州北神鎮堰。

南姚村打北姚村。鬼哭誰憐枉死魂。爭似梢工留口喫。秀州城外鴨饅飩。

桐江集自注秀之南門至海鹽縣古塘八十里。人人帶刀讎劫。十二年間。私殺官誅。骸骨如丘。春半久雨走筆二首

萬事心空口亦籍。如何感事氣猶炎。落花滿硯慵磨墨。乳燕歸梁急卷簾。詩句妄希敲月賈。郡符深愧釣灘嚴。千愁萬恨都消處。笑指鄰樓一酒帘。

桐江集自跋。回二十學詩。今七十六矣。七言決不爲許渾體。妄希黃陳老杜。力不逮則退爲白樂天。及張文潛體。樂天詩山谷喜之。口口口者在集。文潛詩自然不雕刻。山谷不敢口也。五言回慕後山苦心久矣。亦多退爲平易。中有閨仙之敲。而人不識也。

次韻張耕道喜雨見懷兼呈趙賓陽

疲氓多菜色。去守乏棠陰。屬慮千峯旱。俄聞六月霖。麴灘船欲澁。茗務井還深。香潤迴瓜圃。聲酣起蔗林。炎官初恣肆。道暘稍侵尋。畏日方焦野。油雲忽冒岑。此涼甦萬病。厥價倍千金。解郡雖逾歲。留家尙至今。田登欣米賤。屋老懼書淋。遙念兒衣醲。兼虞婦竈沈。淒清傳古調。憂悶豁煩襟。拭汗紕練帨。搔頭斷玉簪。卻思穿石罅。共坐聽泉音。韭脆鮮鱗縷。梅芳煮醞斟。一江同照影。兩地隔論心。疑雪佳公子。輸君日對吟。桐江集自注。陸有近城灘民以船載磨治麵。城中茶場大井。汲者衆。故有麵灘船。茗務井之句。趙賓陽和予雨夜詩。兒童疑有雪。頻起穴窗看。故有疑雪佳公子之句。

挽委順子王防禦

溫飽逍遙八十餘。稗官元自漢虞初。世閒怪事皆能說。天下鴻儒有弗如。聳動九重三寸舌。貫穿千古五車書。哀江南賦箋成傳。從此韋編鎖蠹魚。

研北雜志。方萬里挽委順子王防禦詩云云。

甲午元日

端平甲午臣八歲。甲午今年又一周。六十八年多少事。幾人已死一人留。

悵惋詩二首

鸚鵡籠開綵索寬。一宵飛去爲誰歡。早知黠姬心腸別。肯作佳人面目看。忍著衣裳辜舊主。便塗脂粉事新官。丈夫能舉登科第。可得妖雛膽不寒。一牝猶嫌將兩雄。趨新背舊片時中。陡忘前主能爲叛。乍事他人更不忠。玉腕空亡無易馬。絳桃猶在未隨風。何須苦問沙吒利。自是紅顏薄老翁。

句

菊花與汝作生日。螃蟹喚吾入醉鄉。諸公未許子爲政。萬事無如髯絕倫。糟薑三盞酒。柏燭一甌茶。跳上岸頭須記取。秀州門外鴨餛飩。

癸辛雜識方回徽人也。其父南遊。殂於廣中。回廣婢所生。故其名及字如此。喜作詩。以放肆爲高。有菊花云云。又與伯機爲壽諸公云云。糟薑云云。又行杖云云。甲午元日云云。其處鄉專以騙脅爲事。鄉曲無不被其害者。怨之切齒。遂一向寓杭之三橋旅樓。而不敢歸。老而益貪淫。凡遇妓則跪之。略無羞恥之心。有二婢曰周勝雪。劉玉榴。方酷愛之。而二婢實不樂也。既而方遊金陵。寄二婢於其母周姬之家。恣開杜陵之門。勝雪者。竟爲豪客挾去。方歸。惟有悵惋而已。遂作二詩云云。自刻之梓。揭之通衢。無不笑者。

句

何許中原惟雁見，不多吾輩只鷗知。人生不作湖州守，亦合移居住霅濱。

梅磻詩話：方回吟稿中有云云之句，寄興甚遠。又舟行苕霅間，嘉其景勝，賦詩云云。後德祐改元，爲吳興倅貳，雖少酬所願，亦應不作守之讖。

方存心

存心回子

句

村酒僅數行，野蔬不盈掬。

新安文獻志：秀山在嚴陵郡城之內，舊有亭曰秀亭。辛巳十一月二十七日，賓陽適至，黃應蟾惟月授小學于塾，三人各攜稚子，挈繩床，命酒至暮，雪後霜晴，送目無極，乃以回兩日前屋宇古詩爲韻，回首倡焉，秉燭繼之，各聳肩索筆，書數十聯，明日再集，又明日復集，而一百八十韻成。用昌黎鄜城夜宿體，長兒存心亦獻數十句，惟云云一聯可取，而以其儉也，不以入篇。時至元十八年嘉平朔旦，方回萬里序。

劉光

光字元輝，生宋季，有曉窗吟卷。

問田夫

清晨出柴扉。偶遇耕田夫。爲問爾田閒。近曾得雨無。田夫欣欣言。旱勢早已蘇。昨午雲四合。一雨半日餘。高下粗沾漑。兀然藹菑畲。老夫聞此言。欣懌當何如。

新安文獻志方虛谷曰。此詩絕好。玄暉學陶。故於短篇尤佳。

楊公遠

公遠字叔明。歙縣人。

回溪道中

山東溪流窄徑迂。眼前景物入詩無。田中科斗古文字。柳下春鉏春畫圖。巨室藏茶供客販。小旗誇酒誘人沽。行行不記幾多里。回首林端日又晡。

野趣有聲畫。方回跋野趣。楊叔明舊與倡和。閱前作。倏十三年矣。叔明能畫能詩。筆愈益老。而鬚髮如漆。獨道貌猶未老也。豈胸中有所養而然乎。其無聲之詩。當求米元章張彥遠輩評之。其有聲之畫。如回溪道中云云。此五十六字。溪山村落圖也。起句便能摹寫草徑溪流偃側之勢。科斗春鉏兩句。生逼江西。自是兩幅奇畫。儲茶誇酒一聯。村落中賈區飲肆。在紙上歷歷可數。尾句收拾。卻少留不盡之意。全篇熟而不腐。新而不怪。詩妙至此。非胸中有所養不能也。余老矣。不能悉爲提掇佳處。舉其一足以知其餘焉。至元乙酉月良之朔。謹書于孚舟亭。

葉梅嶠

荷花辭

未花葉自香。旣花香更別。雨過吹細風。獨立池上月。

新安文獻志。曹弘齋云。此詩故是幽遠。

唐元

元號筠軒。

藝圃

小園僅百步。花竹藝兩行。垂垂結夏實。蕭蕭吹晝涼。盆池曉更靜。照我鬚鬢長。復有青青蒲。風至互低昂。人生百歲中。弱草棲螢光。亮無貞堅節。何以禦雪霜。達人豈求名。進善貴自強。用世苟不能。退居固其常。舊種竹數十。生筍已滿園。今年筍更繁。觶觶穿隣垣。山童斲煙雨。便欲供朝餐。獨不忍饑口。保此青琅玕。物微志則遠。當異今日觀。平生遲暮心。與爾同歲寒。種莧甲已坼。苦菜行亦秀。耄耋不憚勤。常恐地力瘦。旦旦望其長。灌溉那敢後。牆頭有蓬蒿。不種而自茂。此意定如何。爲爾吟清晝。

新安文獻志。筠軒以所作謁虛谷。虛谷讀此三詩。亟加嘆賞。

許古清

先生命題追和古柏行

夔府羈懷悲病柏。更尋廟柏摩牲石。惠陵遺恨國三分。丞相英姿身八尺。伊人雖往寸心在。大義未伸千載惜。月暗叢祠鬼火青。霜寒薜樹龍鱗白。巴江滔滔日夜東。荆榛蕭瑟永安宮。虎蛇行陣頑不動。魚水際。

會俱成空。老柯暗泣英雄雨。香葉尙鼓旌旗風。乃知扶持殆天意。未必呵護勤神功。侯生合作明堂棟。侯沒猶爲雪山重。魏宮晉殿總銷沈。楚舞巴歌代迎送。悠悠華表愁歸鶴。黯黯蒼梧棲老鳳。猶恐風霆撼石根。臥龍奮起當天用。

新安文獻志吟社司盟黎芳洲廷瑞批云。和者百餘人。此卷韻妥意貫。結語亦奇。殊不易得。

程鉅夫

鉅夫名文海。以字行。其先徽州人。宋末家建昌。元兵南下。從季父入覲。授管軍千戶。官至翰林學士承旨。諡文憲。有雪樓集。

送程君儒學正歸潯陽

五老催歸客。天寒道路長。殘冬涉易水。幾日到潯陽。學見吾宗盛。身隨聖道昌。未應嗟晚達。松菊近柴桑。新安文獻志。道園虞氏曰。雪樓詩冲淡悠遠。

贈汪郎中

此老今年八十三。江濱獨擅漢衣冠。文章啣袖龍蛇字。鬚髮如霜虎豹顏。耆舊於今足塵土。典型留此重家山。醴牢略具高年禮。萬一神丹乞九還。

雪樓集自跋。余解官歸省。舟過吳城山下。耆舊雕落。有慨其歎。忽老人龐眉皓髮。衣冠偉然。惠詩一卷。問之年。曰。八十三矣。復遺瓜三枚。不一語而去。余意其異人也。坐有潘俊卿。謂余曰。此盧潭老人汪郎中也。屬余西泝。未暇細論。令人餽以羊酒。將以此詩。至元二十八年。龍集辛卯。十月十

日

七賢過關圖

長庚自是謫仙人。子美逢時稷契臣。風雪茫茫五君子。醉吟猶得繼清塵。

懷麓堂集論七賢過關圖者多矣。霏雪錄所載差詳。蓋黃山谷嘗題之曰。眉山老書生作此圖。人物各有意態。又謂七子者。皆詩人。不指爲誰某也。予觀雪樓程鉅夫集有詩云云。又嘗聞吾友倪文毅公岳稱其父嘗見舊圖。人各有標目。有王維者。而不能悉記也。

葉李

李字太白。號亦愚。杭州人。至元十四年。舉授浙西道儒學提舉。官至尙書右丞。諡文簡。癸辛雜識。葉亦愚名李。先爲葉山所攻。後爲李性學所窘。遂以此飲恨而死。蓋二人正寓其姓名云。

口占

如今便一似麻糊。也是人間大丈夫。筆裏無時那解有。命中有處未應無。百千萬世傳名節。二十三年非故居。寄語長安朱紫客。盡心好上帝王書。

輟耕錄。中書右丞葉公李。宋太學生。上書詆賈似道。公田關子。不便專權誤國。似道怒。嗾林德夫告公。泥金飾齋扁不法。令獄吏鞠之云。只要你做一個麻糊。公卽口占一詩云云。遂遭黥流嶺南。及蒙恩放還。與似道遇諸道。以詞贈之云。君來路。吾歸路。來來去去何時住。公田關子竟何如。國

事當時誰汝誤。雷州戶。匡州戶。人生會有相逢處。客中頗恨乏蒸羊。聊贈一篇長短句。

夢中詩

通明殿逼紫微垣。一朵紅雲擁至尊。下土小臣勤稽首。願將惠澤溥元元。

紀夢

宋時豪士石曼卿。帝命作主芙蓉城。我才比石十無一。半世虛負狂直名。年來似有喪心疾。薦共引繇辜蒼生。天誅未加公論沸。日夕惟待鼎鑊烹。何哉異夢出非想。忽遇仙老談真情。謂予夙是文昌相。漏泄輕舉遭彈抨。帝令墮謫飽憂患。且使兩足蹢躅行。追思善步不可得。飛昇妙術矧敢輕。當時廷議祇如此。汝悔當復惟相迎。稽首老仙謝慈愍。臣罪當死天子明。久之寂滅一大樂。蓋棺待盡無他營。老仙笑許汝可教。引領直上朝玉京。通明大明二宮殿。林本蒼葦階瑤瓊。芙蓉爛熳錦欲似。帝皇錫以主殿名。賦詩奏謝九拜起。玉音嘉獎旁觀榮。癡人說夢聊一快。我獨知命不少驚。只恐才非曼卿敵。相見慚汗應如傾。從今閉目需帝召。玉樓續記時當成。兒孫自有兒孫福。與農報國須勤耕。

癸辛雜識。葉亦愚右丞。辛卯八月初四日夜。忽夢老人曰。汝前爲文昌相。坐漏泄天機遭謫。能悔過當復職。引之至通明大明二殿。俾爲主殿之職。於是賦詩四章以謝。及覺。僅記其一云云。於是作詩以紀其事云云。明年壬辰二月初六日卒。

元淮

淮。字國泉。別號水鏡。臨川人。

立春盛雪戲作

玉漏城頭報打春。連宵積雪蔽園林。願春亭畔千夫掃。鼓角樓前五尺深。老守拈香幾墜笏。營軍攘土勝爭金。擊鞭不見牛踪跡。旋叱衙兵撥雪尋。

人日書懷

麗日池塘凍水消。嫩紅嬌白見芳苗。郊原雪霽東風軟。籬落梅殘碧玉凋。便好踏青穿細草。不妨攜酒驟鳴鑼。遙憐九曲沙堤畔。多少鵝黃上柳條。

昭君出塞

西風吹散舊時香。收起宮裝換北裝。絨帽貂裘同錦綺。翠眉蟬髻怯風霜。草白雲黃金勒短。舊愁新恨玉鞭長。一天怨在琵琶上。試倩征鴻問漢皇。

楊妃入蜀

楊妃亡國禍根芽。剛道宮中解語花。慣得祿山謀不軌。釀成中國亂如麻。馬嵬坡下東風惡。龍鳳旂前戰士譁。吹落海棠紅滿地。至今猶作畫圖誇。

句

問歸行理輕如羽。沿路吟詩有一船。渭川湘水多煙雨。我欲垂釣過一生。

金困集謝卓序玩夫立春人日之句。而變調氣象寓焉。味夫昭君楊妃之什。而公感奮情思發焉。至於問歸云云。則識公之廉介。渭川云云。又知公功成身退之志。

絕句

截髮搓繩聯斷鎧。捲旗作帶繫金創。臥薪嘗膽經營了。更理毛錐治溧陽。

元史類編以軍功顯閩中官至溧陽路總管嘗有詩云云溧陽爲金陵上邑至元十三年升爲溧州繼改溧陽府已升爲路淮到省乞改作直隸州小蘇民力及去任作詩云云其廉退之風可想見。

李思衍

思衍字昌翁號兩山餘千人至元間授袁州治中官至南臺御史。

弔李肯齋

天地由來有廢興。義無兩大一身輕。封疆社稷若不死。婦女鬚眉安用生。紐解三綱重接續。灰寒萬劫獨光明。便當配食三閭廟。啓迪民彝見太平。

庶齋老學叢談。潭帥李肯齋。葦城將破。舉家自刑。繼之以火。李兩山使交趾。道由長沙。弔云云。

句

土暗塵昏天水碧。風驚雨過女真黃。鬼火光中遺石馬。仙盤柱下泣銅人。

吳禮部詩話。劉因夢吉詠薔薇詩。色染女真黃。露凝大水碧。又薔薇酒亦用下六字。常愛其佳對。李思衍昌翁亦有一聯云云。未知孰先後也。李又有云云。句對亦工。

董恢

僦居

白髮蒼頭一腐儒。行無轍跡住無廬。鄧林萬頃青青木。肯爲鷦鷯借一株。翠閣朱樓鎖揜扉。尋巢燕子不能歸。落花吹泥東風雨。遶遍芳簷無處依。

山房隨筆至元戊寅己卯閒有董恢者江陵人後居太原任丁角酒稅副使僦屋以居詩云云。

湯仲友

仲友名益以字行更字端夫吳郡人宋亡浪迹湖海自號西樓有壯游詩集。

過賈相宅

檀板歌殘陌上花。過牆荆棘刺簷牙。指麾已失鐵如意。賜予寧存玉辟邪。破屋春歸無主燕。曲池雨產在官蛙。木綿庵外尤愁絕。月黑夜深聞鬼車。

齊東野語賈氏當國十有六年近世以詩弔之者甚衆吳人湯益一詩頗爲人所稱云云。

龔開

開字聖予號翠巖淮陰人。

宋遺民錄附錄居吳之日高郵龔璚爲忘年友時人謂之楚兩龔以比漢之兩龔。又吳萊桑海遺錄序坐無几席一子名浚每令俯伏就其背按紙作唐馬圖。

瘦馬圖

一從雲霧降天關。空盡天朝十二閑。今日有誰憐瘦骨。夕陽沙岸影如山。

畫鑒近世龔聖予先生身長八尺碩大美髯讀書爲文能成一家法畫馬尊師曹霸得神駿之意但用筆頗竊此不足耳畫人物亦師曹韓畫山水師米元暉梅菊花卉雜師古作卷後必題詩或贊跋皆新奇嘗自畫瘦馬題詩云云六研齋筆記聖予作瘦馬圖自題一從云云經言馬肋貴細而凡馬僅十許肋過此卽駿足惟千里馬多至十有五肋假令肉中有骨詎能令十五肋畢現於外非瘦不可因成此相以表千里之異冠劣非所諱也淮陰龔開水木孤清書

自題中山出遊圖

髯君家本住中山駕言出遊安所適謂爲小獵無鷹犬以爲意行有家室阿妹韶容見靚妝五色臙脂最宜黑道逢驛舍須少憩古屋無人供酒食赤幘烏衫固可烹美人清血終難得不如歸飲中山釀一醉三年萬緣息卻愁有物覩高明八姨豪買他人宅侍口君醒爲掃除馬嵬金馱去無跡

鐵網珊瑚翠巖自記人言墨鬼爲戲筆是大不然此乃書家之草聖也豈有不善眞書而能作草者在昔善畫墨鬼有嬖頤眞趙千里千里丁香鬼誠爲奇特所惜去人物科大遠故人得以戲筆目之頤眞鬼雖甚工然其用意猥近甚者作髯君野溷一豪豬卽之妹子持杖披襟趕逐此何爲者耶僕今作中山出遊圖蓋欲一洒頤眞之陋庶不廢翰墨清玩譬之書猶眞行之閒也鍾馗事絕少僕前後爲詩未免重用今卽他事成篇聊出新意焉耳

于石

石字介翁婺之蘭溪人宋亡隱居不仕自號紫巖

元詩選紫巖讀史七首中云首錄鄼侯忘紀信不誅項伯戮丁公鄼君不肯更名藉項伯胡爲賜姓劉對仗極工惜全首未稱案尙有百二山河秦地險八千子弟楚天亡亦工

嚴陵釣臺

拋卻羊裘入漢庭偶然高臥兩忘形先生無處可伸足太史何煩奏客星

吳禮部詩話先大父嘗言吾鄉有楊某者好爲詩多俚率獨釣臺詩可喜云虹作長竿雲作餌纖月沈鉤在江底巨鱗入手還縱之漢家鼎小難調理紫巖于介翁予早歲所師嘗記其作云云

紫霞洞

洞門相對是吾家朝看煙雲暮看霞鐵笛一聲山石裂老松驚落半岩花

句

一局殘碁雙鶴去石枰空倚白雲寒白雲洞

詩藪勝國吾鄉詩人若于介翁李坦之皆新拔多奇句于在元頗知名如紫霞洞云云白雲洞云云雖自元人語亦豪爽可觀

杜伯高

句

山園花柳春風地水浸樓臺夜月天

紫巖集鄉人杜伯高昔與諸公飲于湖上得風月一聯予愛其語因爲足成之

呂起猷

起猷字徽之天台人宋亡隱居

詠雪用滕字韻

天上九龍施法水人閒二鼠嚼枯藤。鵝鵝聲亂功收蔡。蝴蝶飛來妙過滕。

又用曇字韻

萬里江河凍欲含。渾如天地尙函三。橋邊驢子詩何惡。帳底羔兒酒正酣。竹委長身寒郭索。松埋短髮老瞿曇。不如乘此擒元濟。一洗江南草木慚。

貧士傳呂徽之天台人居萬山中綜博述詠安貧逃名常漁以自給一日攜弊楮詣富家易穀露頂短褐布襪草履值大雪立門下人弗之顧徐至庭前聞閣中語貴遊子弟詠雪苦吟弗就徽之哂焉迺出侮之徽之口占以答無不精美問其姓字終不言諸子弟曰嘗聞吾鄉有呂處士者欲一見而不能先生豈其人耶曰吾農家安知呂處士因惠之穀怒曰不義之貨我何庸取遂去諸子弟瞰識其所雪霽覓訪惟草屋壁立忽米桶內有人乃徽之妻也天寒無衣坐爲障耳因問先生何在答曰溪上捕魚乃至彼見之徽之臨溪曰少需之得魚易酒飲諸公也俄頃攜魚酒至盡歡散別翼日復躡其蹤則已行矣

函史一日攜薪芻詣富家易穀值大雪集客閣中分韻賦詩一人得滕字苦吟弗就徽之寒坐因失笑坐客詢之曰何笑也曰偶憶滕王蛺蝶事耳衆知其能詩邀入坐卽席賦有云云之句坐客

歎服。隨限韻強之賦。又立就。時宋南多故。兵革方始。徽之詩有不如乘此云云之語。
許獻臣

案庶齋老學叢談有許獻臣僉事云云。

賓月堂詩

人生自是人閒月。客亦天邊寄此身。彼此虛空無着處。誰歟是主復誰賓。

七修類稿此詩乃元人梁隆吉者。而同時許獻臣集中亦有之。此必二人友善。一時不知何人誤寫。後人因而誤刊耳。

元詩紀事卷六

葉林

林字儒藻一字元文一作去文號本山錢唐人生宋末隱大滌山沖天觀大德間卒衆稱高行先生

至道宮

猶存鼎鑊記熙豐翠籥春深古路通千百春鉏一株樹野田吹下雪花風

洞霄圖志至道宮在餘杭縣北三十里曹橋西唐文明元年建前有古松一圍兩合抱後有苦杏二大與松埒鸞鶴巢集其上廚院有宋熙寧間所鑄巨鑊四畔識歲月及施錢姓氏隱士葉元文詩云云

絕句

金粟花前風細細寶階地上月輝輝夢回不屬紅塵境涼露滿衣人醉歸

句

芙蓉搖風柳挂月醉來健倒梨花堆

吳禮部詩話葉公詩如金粟云云他警句如芙蓉云云千百春鉏云云皆佳

鄧牧

牧字牧心。錢唐人。隱大滌山中。人稱文行先生。著有洞霄圖志。雜文稿名伯牙琴。

寄友

我在越。君在吳。馳書邀我遊西湖。我還吳。君適越。遙隔三江共明月。明月可望。佳人參差。笑言何時。寫我相思。知君去掃嚴陵墓。祇把清尊酌黃土。浮雲茫茫江水深。感慨空勞弔今古。孤山山下約陳實。聯騎須來踏春色。西湖千樹花正繁。莫待東風吹雪積。有酒如澠。有肉如陵。鼓趙瑟。彈秦箏。與君沈醉不用醒。人生行樂耳。何必千秋萬歲名。

吳禮部詩話。李坦之早歲入道洞霄宮。學文於隱者鄧牧。有葉林者。亦隱山中。坦之出山時。時誦葉鄧詩。鄧有寄友云云。

陳觀國

癸辛雜識。陳觀國字用賓。永嘉勝士也。丙戌之夏。寓越。夢訪予於杭。壁間有古畫數幅。巖壑聳峭。竹樹茂密。瀑飛絕巘。匯爲大池。池中菡萏方盛開。一翁曳杖坐巨石上。仰瞻飛鶴。翔舞烟雲空濛中。髣髴有字數行。體雜真草。其辭曰。水聲兮激激。雲容兮茸茸。千松拱綠。萬荷淩紅。爰宅茲巖。以逸放翁。屹萬仞與世隔。峻一極而天通。予乃控野鶴。追冥鴻。往來乎蓬萊之宮。披海氛而一笑。以覩九州之同。傍一人指云。此放翁詩也。用賓驚寤。急書以見寄。詩語清古。非思想所及。異哉。

送鄧牧心出陶山

青山無送迎。幽人自來去。落葉若相送。卷卷及行屨。簷端有孤雲。仍爲守其處。落葉惜人不在山。孤雲尙

期人再還。斯人可期。復可惜。我處落葉孤雲間。

吳禮部詩話。牧心嘗客會稽。王脩竹監簿所。有陳觀國用賓送其出陶山詩。亦佳。

劉壘

壘字起潛。號水村。南豐人。宋亡十餘年。薦署昭郡學正。又十餘年。命爲延平教授。有水雲邨稿。

補史十忠詩

知潭州湖南安撫使李公帶。

三已甘退休。十連起遲暮。伊誰急求子。流落乃不怒。黑雲來如山。殺氣震平楚。恭惟君父命。封疆以身護。闔門義不辱。呼卒汝善處。飛魂隨劍光。自己投火去。天泣鬼神愁。地搖山岳仆。吾非莒柱厲。敢以死醜主。正自常事耳。命義逃安所。冲遠誰與儔。睢陽有張許。吉愷字祖冲。丁穆字彥遠。皆晉忠臣。

池州通判權州事趙公卯發。昌州人。妻雍氏。

若人作何狀。立節乃殊偉。人言此蜀珍。位卑名未起。坐分秋浦月。攝此千里寄。沙頭風色惡。寒城凜弘峙。吾聞開關迎。棄遁亦復恥。茲惟城郭臣。大義吾知已。間道走帛書。灑血別玉季。細君絕可人。雙飛同一死。南八彼男兒。此婦乃如此。骨朽香不廢。吾詩當青史。

丞相都督信國公文公天祥丙辰狀元。

時平輒棄置。事迫甘前驅。嗚呼忠義臣。匪直科目儒。江寒朔吹急。列城同一趨。豈不寄便安。網常乃當扶。移檄倡諸鎮。奮袂躬援枹。川決莫我回。萬險棲海隅。天乎復不濟。道窮竟成俘。一死事乃了。吾頭任模糊。

悠悠譏好名。責人無已夫。三衢有魁相。投老作尙書。三衢魁相謂留夢炎。

參政行丞相事陸公秀夫。

天地無託足。海天同隰光。明知復何爲。不忍墜三綱。裸薦覲少延。謳歌寧遠忘。或者莒在齊。聊且帝一方。竭蹶竟委頓。臣謀非不臧。運去天莫留。力盡心彌強。終不負吾主。名義天地長。懷爾隨龍遊。舉室水中央。斯人文華士。乃爾百鍊鋼。機雲儻通譜。應羞朝洛陽。

前左丞相江文忠公萬里弟萬頃。

匡廬雲錦屏。鴻儒產其下。風神儼如龍。天矯莫可駕。卷懷經濟具。娑婆洛中社。怪事玉牀搖。清晝天忽夜。突騎從何來。陰風飄屋瓦。大臣義有死。欲避吾不暇。庭前環止水。萬事付一捨。從容友靈均。朝野動悲咤。愍章極哀榮。汗簡誰記者。倘有南熏書。季方足堪亞。

江西制置司都統密公侑。

臣有致身義。豈計官崇卑。偏將知死忠。不曰天下奇。漢節旣披靡。失位趨江西。閫帳駐臨汝。招徠樂其歸。雪寒南浦愁。羽檄斬濟師。一將奮風虎。鼓行亟飄馳。踰嶺疾戰苦。裹瘡呼健兒。坐縛膝不屈。伏鎖甘如飴。小臣裨校耳。職也宜死綏。廬州大將在。白首豎降旗。

淮東制置使知揚州李公庭芝。

淮海接風塵。胡乃似鐵壁。臥護有天人。十載藉福力。重來人未老。愁絕事如昔。苦戰孤城危。痛哭天柱折。夢遊三山上。人倫浮海出。突圍志南征。吾欲重建極。天弗鑒臣忠。冥冥墮叢棘。先軫面如生。萇弘血化碧。

臣死誰復知。臣忠終不易。一將更大事。嚼舌死罵敵。

樞密閩廣宣撫使陳公文龍戊辰狀元。

淳熙名宰孫。比德粹如玉。決科魁偉英。駸駸冠冠肅。類田煩諫疏。相噴俄喉逐。補郡仍免歸。黃流已漫陸。天族日光薄。力疾支顛覆。蹉跎南冠繫。道病死不辱。往昔五峯堂。傾蓋語跋燭。斯人真妙人。哀哉慳厚祿。長揖丙辰魁。各天並黃鵠。不有二忠存。千古笑科目。

少傅樞密使張公世傑。

士有守節死。豈以責武夫。武夫尙能奇。消得銀管書。何許熊虎英。鐵面美髯須。護寒久枕戈。赴難甘捐軀。金山定活著。志願嗟違初。江心集羣策。炎精回一噓。間關障海濱。萬死存趙孤。時也可奈何。北風散檣烏。漂漂竟何之。無乃膏鯨魚。渭濱多貴將。反笑斯人迂。

四川制置使知重慶府張公珏。

坤維拓提封。形勝古天府。血戰五十秋。零落餘八柱。江南傳箭急。誰暇此回顧。落日古渝城。杖鉞乃甚武。天東甌雖墮。吾自強支柱。渡瀘躬討逆。歸來戰彌苦。蕭條下夔門。機穽伏中路。咄咄快敵仇。誰歟掩坏土。哀哉關西雄。國亡猶不負。同時督軍將。腰金插雙虎。

符遂撰水村先生傳。年三十七而宋亡。時多死節之臣。恐其名行不傳。作補史十忠詩。

水雲邨吟稿自跋。右襄園以來。死忠者蓋不止此。然多所不知。知其詳且顯者。莫如此十公。故先賦此十詩。尙竣續書。以著大節。噫。十詩存。卽十忠不亡。十忠不亡。吾十詩亦永存矣。

賈似道

三百餘年曆數更。東南萬里看昇平。黃金臺上麒麟閣。混一元勳是賈生。

隱居通議一代之亡。必有一誤國者。爲人所指目。見於吟詠。自唐以來。賦者多矣。雖機軸不免相同。然誅姦諛於既死。誠千古之一快。不可議其蹈襲也。如唐彥謙詠文惠宮人云。認得前家令。宮人淚滿裾。不知梁佐命。全是沈尙書。李太白觀詠漢宮云。哀平外立國權分。只爲當時乏嗣君。試問莽新誰佐命。祇應飛燕是元勳。鄭毅夫獬詠范蠡云。十重越甲夜成圍。宴罷君王醉不知。若論破吳功第一。黃金只合鑄西施。趙漢宗詠張麗華云。陳事分明屬綺羅。香塵吹盡井無波。行軍長史何勞怒。次第論功妾更多。予叔長秋麓翁詠陳後主亦云。晉王前殿賀平陳。從此江南雨露均。四百年間重混一。誰知江令是勳臣。宋之失國。賈似道爲之也。余竊嘗爲之詩云云。

王義山

義山字元高。富州人。宋景定壬戌。廷試乙科。授永州司戶。入元。行中書省聘教授路學。掌江西學事。有稼村類稿。

句

詩思已隨春意動。夜衾不怕曉寒新。一枝瀟灑無塵滓。半夜高寒對月明。滿斟綠甌安排醉。牢裹烏紗照願吹。

元詩選。如齋居雜興云云。贈陳梅垣云云。和紫極登高韻云云。亦復刻意求新。

傅定保

定保字季謨號古直晉江人宋咸淳中禮部奏賦第四大德初薦授漳州路學正

四賢祠次韻

四傑唐遺跡千年此妥靈草荒丞相冢雲鎖隱君亭助教衣猶綠翰林山尙青因懷水南令愁思遶春汀
泉州府志四賢祠祀唐姜公輔秦系韓偓席相按詩中助教衣猶綠句疑所祀乃歐陽詹非席相也

張伯淳

伯淳字至道杭州崇德人宋舉進士除太學錄入元用薦官至侍講學士有養蒙先生集

句

瘦筇支子狹路寫之玄纔從國子先生出曾是分司御史來一廉宜得能官譽垂去還如始至時
曾觀海者難爲水自出山來無此遊幕中頗見此客不江左喧傳某掾來

元詩選佳句頗多如出郊云云送王士能赴衢州同知云云望梅樓云云送張從之臺郎云云覺
意深語健耐人吟諷也

洪德章

德章字巖虎

句

有子定知吾事足。貧家頗覺此聲佳。風露對檠逼詩父。雲煙落紙凜羣兒。

續軒渠集。王鳳靈敍。吾鄉先正教諭洪吾圃先生。常有宋末運。不樂仕進。遞肥蓄識。以詩律自鳴。所著有軒渠集若干首。其仲子訓導希文。號去華山人。妙承宗旨。嘗與夜半談詩。渠然樂適。故其詩有云云。集之名軒渠。以此。惜今散落。不見其全。其所存者。惟去華山人續軒渠集而已。

尹廷高

廷高字仲明。別號六峯。遂昌人。遭亂。宋亡二十年。始歸故鄉。嘗掌教於永嘉。有玉井樵唱正續集。遊太虛觀臨池賦。

路入煙蘿別有天。我來散髮坐風軒。玉峯積翠花香潤。石洞藏丹雲氣溫。水影倒棲松頂鶴。谷聲遙答嶺頭猿。箇中妙處誰能畫。寫入篇章當草元。

玉井樵唱自注。水影一句。竟不能偶。大兒祖憲。以谷聲云云爲對。亦粗可用。因足成篇。

趙棠

棠字國炎。

弔瓊花

名擅無雙氣色雄。忍將一死報東風。他年我若修花史。合傳瓊花烈女中。

山房隨筆。揚州瓊花。天下祇一本。士大夫愛重。作亭花側。扁曰無雙。德祐乙亥。北師至。花遂不榮。趙棠國炎賦絕句弔之。

連文鳳

文鳳字伯正三山人

春日田園雜興

老我無心出市朝。東風林壑自逍遙。一犁好雨秧初種。幾道寒泉藥旋澆。放犢曉登雲外壘。聽鶯時立柳邊橋。池塘見說生新草。已許吟魂入夢招。

月泉吟社第一名。評曰。衆傑作中。求其粹然無疵。極整齊而不窘邊幅者。此爲冠。

月泉吟社序。浦江吳渭。宋時嘗爲義烏令。元初。退食於吳溪。延致鄉遺老。方韶父與閩謝臯羽括。吳思齊。主於家。始作月泉吟社。四方吟士從之。三子者。乃爲其評較揭賞云。

又送詩賞小劄序。預於丙戌小春望日。以春日田園雜興爲題。至丁亥正月望日收卷。月終結局。收二千七百三十五卷。選中二百八十名。三月三日揭榜。

送詩賞劄。伏以月泉吟社。久盟湖海之交。春日新題。賸寫田園之興。得周南而正始。可冀北之空羣。執事振響武林。舒翹文苑。種秧澆藥。已朝市之無心。放犢聽鶯。更池塘之入夢。杼機自別。冠冕爲宜。某心所甚欣。手之不釋。詩成奪錦。誦珠玉者翕然。禮以爲羅。愧瓊瑤則多矣。餘如元穎并致。篋篋。

回送詩賞劄。讀淵明詩。久識田園之趣。從夫子學。願爲農圃之民。未敢望其下風。胡遽延之上座。執事雅懷月霽。清思泉寒。某羨珠玉之在側。忝糠粃之播前。舊擬秋聲。曾占桐江之風景。新題春

日又分婺女之星輝。豈好爲朱公之變易姓名。深恐蹈柳子之召閹取怒。慙非重寶。俾獲與錦囊之榮。賜修香羅。復喚起青衫之夢。受絲毫而皆感。與筆墨以忘言。謹述謝私。伏祈鑒在。案來往小劄各二十餘首。錄一首以概其餘。

馮澄

澄字澄翁義烏人。

前題

編闌春思倩吟鞭。著面和風軟似綿。黃犢烏犍秧穀後。雄蜂雌蝶菜花天。把鋤健婦踏煙壘。抱甕丈人分野泉。忙事關心在何處。流鶯不聽聽啼鵲。

月泉吟社第二名起善包括兩聯說田園的而雜興寓其中。末語亦不泛。

楊本然

本然字舜舉金華人。

前題

春風建業馬如飛。誰肯田園拂袖歸。栗里久無彭澤賦。松江僅有石湖詩。踏歌槌鼓麥秧綠。沽酒褰鹽菘芥肥。吳下風流今莫續。杜鵑啼處草離離。

月泉吟社第七名起敍石湖出處善黏綴本題。領聯引淵明爲對。語有斟酌。頸聯就范詩狀田園。結有悠揚不盡之興。此詩若止如前半篇。則於義當屬賦矣。

又

露畦煙陌裏。名利等秋毫。引犢隨牛放。祈蠶望繭縲。和根挑薺菜。帶葉摘櫻桃。讀罷歸來賦。臨風欲和陶。
月泉吟社第三十六名。有點檢無疎漏。二聯能以俗爲雅。和根帶葉。雖只舊對。卻轉移得好。末押和陶更佳。

全璧

璧。字君玉。杭人。

句前題

晉氏衣冠門外柳。幽人風俗屋邊桑。未分東風欺老眼。一編牛背臥斜陽。
月泉吟社第九名。見趣高。格調別。觀前題八字及末句語。可想其人。

呂文老

文老。字澹翁。東陽人。

前題

月笛紀閨附青燐。民野陶然化日熙。祀備枌榆祈稔歲。宴酣花柳樂清時。洛中富貴斜陽恨。錦上勦勞千古思。浩興歸來吟不盡。陶詩和後和幽詩。

月泉吟社第十名。引用田園事。全與諸作不同。覃思一至於此。末句亦縝密。

方德麟

德麟字藏六桐江人

前題

繞畦晴綠弄潺湲。倚杖東風卻黯然。往夢更誰憐秀麥。閒愁空自託啼鵑。犁鉏相踵地力盡。花柳無私春色偏。白髮老農猶健在。一簑牛背聽鳴泉。

月泉吟社第十一名。送詩賞劄。執事望聳東安。羣稱北冀。晴畦自繞。鵑聲謾寄於閒愁。春色雖偏。牛背獨誇於老健。細觀妙格。知出清芬。云云。

劉汝鈞

汝鈞字君鼎三山人

句前題

草坪閒見烏犍點。畚水飛來白鷺雙。

月泉吟社第十二名。意圓語妥。五六善寫物態。用韻尤工。

翁合老

合老字仲嘉建德人

前題

韶華到處入冥搜。郭外人家事更幽。土脈正融催穀棘。林陰微合聽鉤輅。誰家酒熟社公醉。明日桑空蠶妾愁。祇恐春工忙裏度。又吟風雨滿城秋。

月泉吟社第十五名。春日雜興意已具首句。二聯工緻。後聯句更高。結句所引與興字相關。尤有深味。

林子明

子明號東岡分水人。

前題

一點陽和薰萬宇。最饒佳致是山莊。雞豚祝罷成長席。爲燕聽來隔短牆。嗜酒不嫌多種秫。無襦長恨少栽桑。東郊勸相何煩爾。農圃吾生自合忙。

月泉吟社第十六名。前聯細玩見田園。次聯較分曉。結意尤有含蓄。

劉蒙山

蒙山字口口崑山人。

句前題

村婦祈蠶分麪親。老農占歲說泥牛。田烏飛逐耕煙犢。桑扈鳴隨喚雨鳩。

月泉吟社第十七名。此真雜興。二聯組織甚工。

周陳

陳字伯陽。泰州人。

前題

蛙聲似吹雨初足。桑椹欲紅風始和。少婦每憂蠶利薄。老夫惟喜秫苗多。舊栽花木山爲識。新買陂塘野鷺過。此境東風元自好。當年金谷事如何。

月泉吟社第十九名。不事排纂。而意語新妥。自是佳作。

趙必范

必范。號古一。宋太宗十世孫。桐江人。

句前題

卜歲聊憑六壬課。有生未識五辛盤。元日幸有漁樵同此樂。苦無車馬自相諠。元夕幾點飛花芳徑雨。一雙新燕荻簾風。社日菱白生苗藏蛤地。桑黃含椹浴蠶天。清明

月泉吟社第二十名。此卷八詩。一起一結。中六篇分詠三春節序。曲盡田園間景態。如云云。皆佳句也。

姚潼翔

前題

壁寫新年百事昌。春盤次第蓼芽香。燒燈過了爭挑菜。祭社歸來便撒秧。布穀幾聲催耜畝。吳蠶三伏正條桑。一春忙過無多日。又聽鸚鵡報麥黃。

月泉吟社第二十一名。送詩賞劄。執事氣孕蒼泱。學宗葩正。以俗爲雅。一年先百事之書。因險出奇。八句盡三春之景。云云。

胡南

南字景山義烏人

前題

世數有遷革田園無古今。鳥喧爭樹暖牛倦憩牆陰。水活土膏動風微花氣深。淵明千古士佇立此時心。
月泉吟社第二十四名二聯俱入細末意尤永

姜霖

霖字仲澤金華人

前題

老盆傾酒試新嘗。社鼓村村鬧夕陽。麥隴風微牛睡穩。芹塘泥滑燕歸忙。半村飛雨斷煙濕。一徑落花流水香。鼎貴安知此中意。徒能學犬吠村莊。

月泉吟社第二十六名領聯妥帖五六語尤勝末不雷同

東必曾

必曾字孝先杭人

前題

嚶綠郊原春事深。治生幽趣豁塵襟。聲禽語耕人意。種種花開老圃心。桑葉漸舒梯欲整。麥苗暗長路難尋。日長雖有荷鋤倦。薄暮歸來常醉吟。

月泉吟社第二十七名終篇可謂清新之作三四尤有味。

方子靜

子靜字口口桐江人。

句前題

秧水平疇蛙開閣。菜花滿稜蝶飛飛。比鄰社酒歡猶在。牆壁農書事已非。

月泉吟社第二十八名領聯停當五六有感觸三四字尤警。

朱孟翁

孟翁字口口東陽人。

前題

飯釘蔬槃已竹萌。如何布穀未催耕。牧兒嬾散騎牛過。遊子牽連信馬行。秧際窺魚翹白鷺。花間捎蝶下黃鶯。東風歲歲添新綠。獨我霜髯多幾莖。

月泉吟社第二十九名平安中用字有工二聯不拘體貼而題自見末感興尤深。

趙必拆

必拆字口口杭州人。

前題

一段佳山水。芳時事正妍。犢耕青燒雨。鶴臥碧桃煙。社老邀嘗煮。鄰僧伴摘鮮。莫嫌陶令拙。農圃得餘年。

月泉吟社第三十名。送詩賞劄。執事愛雲自命。與世相遠。臥碧耕青。慣尋幽趣。摘鮮嘗羹。閒對芳時。宛如驢上風雪詩。不帶人閒煙火氣。云云。

劉時可

時可字口口。雙溪人。

前題

土膏初動雨初收。草逕茅亭趣最幽。坐睡略無朝市夢。踏歌時有里閭遊。半邱秧秫醉堪酒。五畝樹桑寒可裘。老圃老農誠足學。不成吾道付滄洲。

月泉吟社第三十二名。前聯語圓味永。後四句婉順而有結束。

許元發

元發字口口。義烏人。

前題

片雲豈是出山時。曾被東風誤一吹。歸意不煩啼鵲勸。閒情只許落花知。桑麻窮巷扉常掩。煙火空林黍自炊。栗里輞川非謬計。晴窗仔細味渠詩。

月泉吟社第三十四名。起善摹寫。五六用淵明摩詰語。卻以第七句承之。可謂得格。

洪貴叔

貴叔字口口。義烏人。

前題

棄官杜甫罹天寶。辭令陶潛歎義熙。暖日浣溪仍舊迹。春風栗里只前時。苗生阡陌培嘉種。花繞林塘發故枝。佳興二公能領會。可能胸次太多詩。

月泉吟社第三十五名。全倣坡體。

徐端甫

端甫字口口。義烏人。

句前題

犬依桑下烏犍臥。鳩雜花閒黃鳥呼。楊柳嫩搖風氣力。稻秧新著雨工夫。

月泉吟社第三十七名。如是而後爲雜興詩。中二聯尤得趣。末無奇。

朱釋老

釋老號龜潭。金華人。

前題

家山萬象春歸好。詩筆拈來感物情。泉脈動時毋待灌。土膏起處正宜耕。無窮懷抱風和暢。不盡形容雨發生。試問封侯萬里客。何如守拙晉淵明。

月泉吟社第三十八名。前聯說田園輕快。第二句體貼興字。五六帶春景。體貼雜興二字更工。然而氣格不高亦坐此。

李萼

萼字□□桐江人

前題

村居只是舊衣冠。北墅南園熟往還。雨外泥深牛穀棘。花邊風暖鳥間關。躬耕自得莘郊樂。日涉誰知陶徑閒。只說桑麻元自好。不須釋耒歎時艱。

月泉吟社第三十九名。全篇辭氣雍容。末韻哀而不傷。怨而不怒。深得詩人之旨。

陳君用

君用字竹隱。

前題

春風冗我田園務。野思芳情約不齊。檢點瓜邱仍芋壘。按行桑墅更秧畦。偶陪靈運山前屐。或學東坡雨外犁。薄暮倦歸專一事。旋誅生菜甕黃齏。

月泉吟社第四十名。雜興甚工。但失之刻露。然其好處亦在此。

句前題

芽穀驗仁脈。澆花趨化工。

月泉吟社第四十六名。前聯平。後聯有思索。

蔡潭

潭字熙山杭人

前題

雲過催花雨。風收困麥煙。一鋤天地裏。三月翠紅邊。朝市雖無夢。郊墟似有緣。種瓜何代叟。豈識趣熙然。

月泉吟社第四十一名。詩人詩韻度自別。起聯甚工。

俞自得

自得號吟隱金華人。

句前題

白鷺時窺秧刺刺。黃鶯頻說柳依依。幾回野水聞姑惡。數樹春陰叫姊歸。

月泉吟社第四十二名。語新而對巧。所謂多識於鳥獸草木之名。但末二句不過敷衍起句耳。

王進之

進之字口口建德人。

句前題

桑田滄海幾興亡。歲歲東風自扇揚。細麥新秧隨意長。閒花幽草爲誰芳。

月泉吟社第四十七名。有悠長味。無艱澀語。後半篇視前略不及。

又

物意豈知滄海變。曉風依舊語流鶯。

月泉吟社第四十九名。以雅健語。寫高潔操。悠然之興。見於篇末。

陳希聲

希聲字□□義烏人。

前題

香紅眩眼纈蕤英。竹杖扶吟縱步行。桑眼蟆含青蕾小。麥鬚蝦磔翠芒輕。黃花菜圃午風軟。綠水秧畦春野平。芳樹幾聲鳩雨過。蒼蒼柳色弄煙晴。

犁鉏徧野涕耕農。血吻鵲聲一樹紅。畦蟲秧針青刻刻。隴翻麥浪翠茸茸。雞鳴晝寂花村雨。蛤吠朝寒草岸風。溪外雲過橫笛亂。微煙野色樹龍蔥。

月泉吟社第五十名。回文二首。俱妥順。亦出苦心。又第五十一名。三春分作三首。曲盡變態。非苟爲敷演者所能及。

陳堯道

堯道字景傳。義烏人。希聲子。

前題

化日村田樂。春風耕織圖。秧肥料斗動。桑暗鵲鳩呼。社罷翁分胙。蠶占媼得符。傍花隨柳處。此事不關吾。

陳舜道

月泉吟社第八名。起聯有力。五六亦新。傍花隨柳。人多正說。此乃翻用之意。新。

舜道字景宗堯道弟。

前題

春來非是愛吟詩。詩是田園樂興時。清入吟懷花月照。紅生笑面柳風吹。村聲盪耳烏鹽角。社酒柔情玉練槌。閒悶閒愁儂不省。春來非是愛吟詩。

月泉吟社第三十一名。此卷首尾吟十篇。題上生題。摹寫各極其妙。與其他畫蛇添足者不同。姑置諸此。以爲手抄之冠。紙價當爲高矣。

案今錄一首。

升庵辭品。曲名有烏鹽角。江鄰幾雜志。始教坊家人市鹽。得一曲譜於角子中。翻之。遂以名焉。戴石屏有烏鹽角行。元月泉吟社詩。山歌聒耳烏鹽角。云云。

蠶尾集。村歌聒耳云云。宋末月泉吟社中佳句也。山居雜志。載杭人徐炬酒譜。乃引作少陵詩。

吳珞

珞字貴叔。義烏人。

前題

野水渾邊戲乳鵝。疎籬缺處曬耕簑。草青隨意牛羊臥。門靜無人燕雀多。夫倦倚犂需婦饁。翁歡擊壤和孫歌。新來別有營生計。又喜巡檐住蜜窠。

月泉吟社第二十三名。全篇是雜興本色。而田園參貫其中。且無一語塵腐。

黃景昌

景昌字清遠浦陽人

浦陽人物記晚自號田居子述田閒古調辭九章賓客至輒揭甕取酒共飲酒酣取辭歌之以筴擊几爲節音韻激烈聞者自失不知世上有貴富也

前題

野色搖春麥正肥煙村閒寂往還稀未多桑葉蠶初浴更小茅茨燕亦飛行市綠蛆花潑眼臥依黃犢草侵衣數聲桐角歸來晚楊柳移陰月半扉

月泉吟社第二十五名細潤中見雜興若知田園傳亭則有當進盧前矣

劉應龜

應龜字元益義烏人宋咸淳間游太學至元二十八年部使者起主教鄉邑官至杭州學正黃文獻集所著爲夢稿六卷癡稿六卷聽雨留稿八卷識與不識者皆稱之曰山南先生潛之蒙鄙劣弱弗失身負販者先生教也

句

耕餘樹有牛磨癢稅足溪無人照癡青春卻付鳴鳩管白日全輸臥犢閒月泉吟社第五名此卷七言凡六首律細韻高如云云等語魯未易及鼎嘗一爵餘可概知

劉邊

邊字近道。建安人有自家意思集。

句

耕鋤曉雨有餘地。應接東風無暇時。

月泉吟社摘句圖聯句云云。

戴東老

前題三首錄一

飲了椒盤收了燈。翁攜稚子步新晴。茅柴初熟勝臘醞。萊菔久齋宜晚羹。伏卵雞留上春種。出欄牛試吉辰耕。去年官賦今年罷。寂甚柴門犬吠聲。

月泉吟社第五十二名。三詩狀三春之景。得處亦多。起頭一句欠嚴重。

陳文增

文增字□□。茗水人。

句前題

熙熙壟畝扇和風。簇簇人煙野意濃。飲牛澗暖山搖影。接果枝青薜坼封。

月泉吟社第五十四名。起見題意。兩聯中五六尤工。

劉存行

句

麥苗花下綠，犢子草邊黃。

傅宣山

又

生意滿腔秧出穀，飛花有絮柳飄綿。

柳耆

又

野犢正忙犁曉雨，谷鶯纔出管東風。

俞如山

又

鳥隨牛後窺秧穀，蝶趁蜂來戀菜花。

翁自適

又

鴉趁犂翻爭啄食，蜂黏絮落苦貪香。

郭建德

又

煙連草色迷平野，雨趁鳩聲過別村。

賂僞賓

又

烹罷籜龍新上筴。修來秧馬尙依牆。

陳帝臣

又

清曉蛙聲引啼鳩。夕陽牛背立歸鴉。

俞埜山

又

郎罷耕田呼囷牧。阿翁眠起問姑蠶。

林泉生

又

桃李公門者。將蕪胡不歸。

傅九萬

又

笑他思著蓴鱸者。卻感秋風始去官。

月泉吟社摘句圖起句云云。聯句云云。結句云云。

章彬

彬字口口吳人

白鵬詩

草暖蘋香月上遲。白鵬黃鶴往來時。雲山隔斷一千里。日日相過人不知。

晉安逸志。宋咸淳間。福州進士陳嘉言。號書隱。以對策忤賈似道。斥授建州司戶。嘗畜黃鶴白鵬。出入與俱。銜書往來。景炎丙子。元師入建州。書隱遂歸福州。去建州千里而遙。二禽傳命。不閒晨夕。時章彬避地建州。慕書隱之風。託詩以交。一日書隱待月江上。忽白鵬至。得詩云云。神交二十餘年。彼此不識面。

彭九萬

九萬字好古。崇安人。至元二十年。黃華作亂。遇害。

凌波辭賦水仙花

歲芳兮婉冉悲。江空兮蘭樾歸。人嬋媛兮何來遲。憺風魂兮佩誰思。素衣兮儼黃裏。玉襦兮明翠被。明波
渟渟兮渺愁予。含香懷春兮中心苦。昔遺襟兮今契闊。佇佳期兮宵修絕。幻塵緣兮蹇中憂。時旣晏兮不
可留。汎雲輶兮水裔。紉余瑟兮難理。人笑歸兮路蒼茫。湘有皋兮春綠起。

萬姓統譜。蓋淪淪有楚騷風調焉。

元詩紀事卷七

戴表元

表元字帥初。慶元奉化人。宋咸淳中登進士乙科。官臨安教授。入元爲信州教授。剡源集自序。執政者薦授一儒學官。因起教授信州。大德丙午。歸自信州。自號曰剡源先生。因以名其集。或稱質野翁。充安老人云。

感舊歌者

牡丹紅頭豔。春天檀板朱絲錦。色賤頭白江南一尊酒。無人知是李龜年。

西湖志餘。戴帥初湖上贈歌者一絕。有故國之思焉。

熊朋來

朋來字與可。豫章人。宋咸淳登進士第。入元仕爲教授。

豫章鐵柱宮

九牧失貢金。司空不行水。蛟龍弄波濤。魍魎入城市。吁嗟清談者。萬事謾不理。遂令千載人。稽首旌陽子。

江西通志。豫章鐵柱宮井中鐵柱。歷代名賢多有題詠。熊朋來詩云云。

吳澄

澄字幼清。撫州崇仁人。宋末領鄉薦。至元二十三年。徵至京師。以母老辭歸。後官至翰林學士。諡

文正有草廬集。

揭傒斯撰神道碑。皇元受命。天降真儒。北有許衡。南有吳澄。

道園學古錄。嘗作草屋數間。而題其牖曰。抱膝梁父吟。浩歌出師表。程文憲知其意。題之曰草廬。學者稱之曰草廬先生。詩法正論。郝伯常有言。自李杜蘇黃。已不能越蘇李而追三代。矧其下者乎。於是近世不復知有李杜。又焉知三代性情風雅之作哉。草廬吳先生感興詩亦云。周詩三百餘。離騷二十五。自從蘇李來。萬變不復古。皆謂是也。

題簡齋陳參政奏橐後

君臣密勿紹興中。文物依稀貞觀風。三幅奏篇存雅製。諸家題字總名公。已聞玉匣人間見。空想銀鈎天上工。百八十年如一夢。摩挲遺墨視夢夢。

吳文正集。紹興參政簡齋陳公奏橐三幅。其一。謝御賜臨王羲之玉潤帖。其二。爲奉旨辨歐陽詢書真僞。淳熙紹熙葛周洪尤謝楊章樓以至慶元嘉泰開禧諸名公題跋者凡十八人。蓋百八十年于茲矣。澄得肅讀。感慨繫之。臨川吳澄謹書。

詠雪

臘轉鴻鈞歲已殘。東風剪水下天壇。臙添吳楚千江水。壓倒秦淮萬里山。風竹婆娑銀鳳舞。雲松偃蹇玉龍寒。不知天上誰橫笛。吹落瓊花滿世間。

疊葉梅

羅浮夢斷杳無蹤。冰雪仙姿兩兩逢。縞袂怯單寒後襲。彩妝嫌薄曉來濃。迎風一笑知顏厚。臨水相看見影重。道眼只將平等視。玉環飛燕總天容。

句

百年竹木青春在。一院香花白晝閒。屋頭月上元無夜。樹杪風來若有期。花香靜晝微風裏。草色深春一樹餘。金鏡南飛光欲半。銀潢西去寂無聲。定非戰國談天衍。疑是仙家縮地房。秋隴故園迷蝶夢。曉窗客枕壓雞聲。

筆精。吳草廬專志理學。而詩亦多巧思。詠雪云云。疊葉梅云云。又如云云等句。皆超脫理學蹊徑者也。

又

浩歌歸去渾無事。栖碧山前月上東。

吳文正集。龔舜咨一旦幡然而去。別予於禁林。曰。吾欲歸玩栖碧山中之月。予甚高之。贈之以詩。末句云云。

倪南杰

南杰字君立。上饒人。咸淳間秋貢興選。至元間。省差徽州路學正。官未滿歸。

句

夕陽影裏行人遠。春鳥聲中歸興忙。

吳文正集吟詠自適爲佚老計尤樂佳山水嘗游盱有云云之句繼游淞徧覽奇勝成詩一帙曰淞水漁歌

胡長孺

長孺字汲仲號石塘婺州永康人咸淳中授迪功郎至元中世祖召見官至寧海主簿有石塘稿元儒考略胡長孺與高彭李湜梅應春等號南州八士

題段郁文雪石

白雲飛來著春空翕霍變化生奇峰朝曦照耀舒復卷碧華忽擁玻璃宮秋潮初壯明於雪千雷動地吳山裂濤頭出海夕陽微百煉青銅浮玉玦雲容濤勢偉且奇乍出乍沒須臾時乾篤雪山白盈尺晴天萬里窺蛾眉似識詩翁作詩苦獨擁清妍照環堵河翻月落夜未央如虹光氣飛屋梁詩藪雄渾流麗步驟中程

句

薄糜不繼襖不裘謳吟猶是鐘球鳴

東園友聞汲仲先生送蔡如愚歸東陽云云語惟善曰此余祕密藏中休糧方也

黃泰亨

泰亨字亨叔臨川人咸淳間補國學弟子員

句

久約竹松堅晚節。病逢蒲柳望秋時。

吳文正集。皇慶癸丑疾。猶娛書不輟手。寫邵子觀易吟。又自吟云云。此其絕筆也。

龍仁夫

仁夫字觀復。永新人。薦爲浙江儒學副提舉。不就。

江西通志。學者稱麟洲先生。

題琵琶亭

老大蛾眉負所天。尙留餘韻入哀絃。江心正好看明月。卻抱琵琶過別船。

隱居通議諸呂家於江州。仕宋累朝窮富極貴。及北兵至。自文煥而下。相率納款。無一人抗節報國。其後有題詩於琵琶亭者云云。一日呂老見之。揮淚語意深婉。信佳句也。或云燕五峯右丞偕龍麟洲謁呂文煥。酒酣命賦詩。以琵琶亭爲題。麟洲賦此譏之。呂老納賄請改賦。旣而好事者流傳。

詩藪。自義山牧之用晦。開用事議論之門。元人尤喜模倣。如夜深正好看明月云云。如何十二金人外。猶有當年鐵未銷。卻愛曹瞞臺上瓦。至今猶屬建安年。中郎有女能傳業。傳得胡笳業不如。皆世所傳誦。

卽席作

菡萏池邊風滿衣。木樨亭下雨霏霏。老夫記得坡仙語。病體難禁玉帶圍。

輟耕錄。龍麟洲先生過福建。憲府設燕。命官妓小玉帶佐觴。酒半。憲使舉杯謂曰。今日之歡。皆玉帶爲也。願先生酬之以詩。時先生負海內重名。雅畏清議。又不能違憲使之請。遂書一絕句云。於時舉席稱歎。盡歡而散。

羅志仁

志仁字壽可。號壺秋。涂川人。元初。薦授天長書院山長。

絕句

囑雪蘇郎受苦辛。庾公老作北朝臣。當年龍首黃扉客。猶是衡門一樣人。

山房隨筆。三衢留中齋。甲辰大魁。文山宋瑞。丙辰大魁。中齋作相。身享富貴。壽考三十年。仕北爲尙書。文山纔登第。丁父憂。仕途亦坎壈。乙亥。糾義兵。勤王。終以罔功。患難中倚之爲重。雖名爲黃扉之貴。萬鍾之奉。無有也。江西羅壺秋詩云云。中齋物色。將羅織之。亟歸而免。

題水村圖

長愛秦郎絕妙詞。荒寒暗合輞川詩。斜陽萬點寒雅處。流水孤村又一奇。詳錢仲鼎下。

白珽

珽字廷玉。錢唐人。入元。薦授江浙儒學副提舉。有湛淵集。

湛淵靜語自序。湛淵姓名爵里。不聞於時。家西湖西。有泉自竺山來。及門而潞。潞然下見白石。若隔一膜。客至呼坐楊就洲。

剡源集其賦銅浮漚一篇尤清馴可念詩甚似渡江陳去非而管諱言陳去非
宋濂撰墓誌銘長於詩文紫陽方回稱其冠絕古今有英雄大丈夫氣廬陵劉辰翁又言其不爲
雕刻苛碎有雲山韶濩之音

春日田園雜興

雨後散幽步村村社鼓鳴陰晴雖不定天地自分明柳處風無力蛙時水有聲幾朝寒食近吾事及躬耕
月泉吟社第十八名唐楚友孤山社白湛淵名珽字廷玉前聯不束於題而柳處蛙時一聯題意
俱足格調甚高結亦不浮

送詩賞小劄田園春日偶爾分題湖海名流翩其入社其楚波之及於晉有堯風而謂之唐云云
回送詩賞劄木鐸采詩喜三百篇之典型復見達圖結社數十八人之地位偶同云云

續演雅十詩

海青羽中虎燕燕能制之小隙沈大舟關尹不吾欺
草食押不蘆雖死原不死未見滌腸人先聞棄簣子
誰令珠玉唾出彼藜藿腸仁人不爲寶良賈宜深藏
嬰啼聞木枝羝乳見茅茹何如百年身反爾無根據
西狩獲白麟至死意不吐代北有角端能通諸國語
纔脫海鶴啄已登方物輿仰面勿啾啾我長非僑如

羯尾大如斛，堅車載不起。此以不掉滅，彼以不掉死。
八珍殺龍鳳，此出龍鳳外。荔枝配江瑤，徒誇有風味。
灤人薪巨松，童山八百里。世無奚超勇，惆悵渡易水。
兩駝侍雪立，終日餓不起。一覺沙日黃，肉屏那足擬。

輟耕錄續演雅十詩發揮海青云云者海青俊禽也而羣燕緣撲之卽墜物受於所制者無小大也草食云云者漠北有名押不蘆食其汁立死然以他藥解之卽蘇華佗洗腸胃攻疾疑先服此也誰令云云者和林有尼能吐珠玉雜寶也嬰啼云云者漠北種羊角能產羊其大如兔食之肥美嬰啼木枝見山海經所載西狩云云者角端北地異獸也能人言其高如浮圖纔脫云云者小人長僅七寸夫婦二枚形體畢具也羯尾云云者西漢有羯尾大於身之半非車載尾不可行也八珍云云者謂迤北八珍也所謂八珍則醍醐醍醐野駝蹄鹿脣駝乳糜天鵝炙紫玉漿元玉漿也元玉漿卽馬奶子灤人云云者取松煤於灤陽卽今上都去上都二百里卽古松林千里其大十圍居人薪之將八百里也兩駝云云者沙漠雪盛命兩駝趺其旁終夜不動用斷梗架片氈其上而寢處於下煖勝肉屏且不起心兵也

武陵勝集得春字

今日知何日談詩得偉人閉門方掩雪老硯自回春湖海清尊樂乾坤白屋貧時時看雲色吹落紫綸巾
滿淵遺稿補引珊瑚屑大風振屋積雪壓頭余方撥棹拙課二雛讀袁汝南傳聞戶外策策有除

雪聲。吾西溪子顧余曰。王馬曹中夜思戴安道。便擎舟規往。及門而返。何其興之易盡也。我則不然。不見不止。俞伯奇北道主人。在上人方外友。聞而載酒肴來。相與賞會。臨簷弄翰。雪聲聲著腕。不暇顧。計勝踐一時。不多見於世間也。因折飛入園林。總是春爲韻。人賦五言。仇仁近。張仲實。鄧善之。皆周旋人。聞此亦爲我助。喜用餘三韻徵之。鮮于伯機。樂西溪山水。因以自號云。至元丁亥十有二月二十。錢唐白珽序。

四季六言詩

紅杏綠楊永盡。野服柴門散仙。莫道無人知處。東風都在吟箋。
蓮葉吹香澹澹。扁舟撐影斜斜。驚散一行白鷺。東風捲起梨花。

至正直記。石莊史道原。款接鄭禾子實於家。賦詩作畫。以習文采。白湛淵一日賦六言四季詩意。道原愛之。求子實爲作圖。湛淵題詩于上。蓋湛淵翁也。子實壻也。詩云云。後二首忘之。

張瑛

瑛字仲實。

武陵集得飛字

雪天縱游集。四顧娛清輝。豪家挽不去。悠悠款柴扉。青陽時未來。乃見花絮飛。歡顏旣一破。酒至不復回。客馬儼在門。主歌毋庸歸。古來盡簪地。荊棘牽人衣。詳白珽下。

俞伯奇

案湛淵遺稿補引珊瑚屑伯奇詩下名爛係存亻之二字而清河書畫舫有元人俞行之題燕穆之楚江秋曉圖詩清江人字缺疑卽伯奇

武陵勝集得是字

朔風何崩騰大雪午未止高人乘興來遠自數千里解纜敝四齋風采照屏几新詩一揮灑遑惜雪到紙
僻居寡賓送俎豆聊復爾樂我山林友政爾不在是詳白垠下

仇遠

遠字仁近一字仁父錢唐人至元中爲溧陽州儒學教授自號近村又號山村有山村遺稿

春日田園雜興

一灣新綠護茅廬草細泥鬆已可鋤野老但知分社酒地官寧復進農書鶯花眼界人煙外蠶麥生涯穀
雨餘我愛賦歸陶令尹柳邊時見小籃輿

月泉吟社第四十四名社酒農書一聯厥有深意不但全篇清婉而已

同段吉甫泛湖

西湖春碧淨無泥畫舫珠簾傍岸移寒食清明初過後杏花楊柳乍晴時從教西日催歌鼓莫放東風轉
酒旗只恐明朝成雨去暗驚濃綠上高枝

秋日西湖園亭

西湖一曲百泉通漠漠青山繞梵宮故園園林春色淨明朝風雨桂花空銀笙玉笛清歌外畫舫珠簾落

照中人物風光兩相稱。兒童遮莫笑山翁。

西湖遊覽志。仁近工詩文。有同段吉甫。泛湖詩。秋日西湖園亭詩。最稱合作。

武陵勝集得林字

城中十日雪。山中三尺深。我從吳都來。頗畏寒見侵。亦念子在野。相從詎無心。緬懷梁園遊。豈不勝竹林。落落歲寒友。歷歷瑤華音。重期春日和。飛蓋西園陰。詳白珽下。

書與士瞻上人十首

我本迂疎落拓人。滿頭霜雪滿懷春。登山有屐身恆健。挂壁無弦趣更真。往歲效官殊慢浪。老來學佛離貪瞋。卻憐衛鶴齊雞輩。空費心機不庇身。

野鶴清高六翮輕。孤雲萬里去冥冥。漢科合應茂才舉。唐士曾書遺教經。好趁江南諸老在。盡看薊北衆山青。錦衣歸日春風滿。期醉沙堤雙玉餅。

嬾學羊裘漢子陵。亦非解印晉淵明。好山好水恆相對。浮利浮名不願爭。詩酒每尋朋友共。田園都付子孫耕。野心真與閒雲似。卻笑孤雲出岫輕。

末俗由來不貴儒。小夫小婦恣揶揄。束書合問山林隱。絕迹莫登名利塗。膝上有孫貧亦樂。門前無債醉如愚。咸平處士真堪羨。死守梅花住裏湖。

宦海漂流四十年。老來默默守吾玄。艱危頗得文章力。嫁娶各隨兒女緣。白飯充腸聊當肉。好書到手不論錢。閒心嬾作邯鄲夢。樂取南窗一枕眠。

筆墨生涯獨善身。一區花竹四時春。無求莫問朝廷事。有恥難交市井人。簾外烏衣飛上下。窗前絳蕊結輪囷。鑑如居士東鄰住。肯借霜毫爲寫真。

難得心交左伯桃。亦無善相九方臯。而今賤子多儒誤。自古山人索價高。衆雀豈能知鶴志。一雞何足用牛刀。獨醒獨醉俱堪樂。妙理依然有濁醪。

倦游嬾着小烏巾。短髮絲絲白滿簪。信手拈書聊慰眼。轉頭忘事太無心。笑他杜老頻看鏡。愛我昭文不鼓琴。喜有山林方外友。時攜佳紙索新吟。

北風雨後忽南風。頃刻開晴又轉東。后土未乾偏有恨。漏天難補已無功。小樓兀坐思猿鶴。好客相期避燕鴻。筆上墨蘭香可掬。令人長憶所南翁。

豪氣年來漸掃除。簞瓢自樂守臞儒。江頭盡醉唐朝士。澤畔行吟楚大夫。萬里鯢鵬何必羨。一官蟻蠶不如無。葛巾草履從人笑。莫問青山落葉枯。

江村消夏錄。士瞻上人。習定好修。與余晦翁。笑隱長老。三世交矣。求余斐章。遂信手寫七言十首。塞白上人。其爲我佛前懺綺語業。至治元年九日。山村老友仇遠。書於北橋躬行齋。

約山中友

望極秋空無片雲。前山歷歷見遙岑。新鴻漸到邊城靜。舊雨不來汀草深。仙李有時曾入夢。伯桃死後少知心。如君真是忘機者。海上鷗盟便可尋。

寄宋飲冰

欲近談詩一解頤。停雲空惹思依依。梅花賦就廣平老。楊柳門閒靖節歸。驛路數程征馬瘦。家書千里過鴻稀。思君怕倚闌干北。拄笏看山竟落暉。

北窗

北窗隱几樂吾天。莫遣新愁到耳邊。一帽好花供醉舞。半牀涼月伴閑眠。故人自欲辭文叔。明主何嘗棄浩然。留取長安遮日手。養成指甲理朱絃。

拜霞嶼待制伯祖墓下

難尋華表與豐碑。三尺墳臺三四圍。翁仲多年蒼佩剝。子孫寒食紙錢稀。瘦藤拔地長蛇走。灌木維垣野鼠肥。遠也久違鄉族去。忍將椒酒酹斜暉。

高臥

人生天地一蘧廬。耕鑿雖勞樂有餘。因閱杜詩刪舊橐。爲觀羲帖習行書。山公醉後猶騎馬。渭叟閑來只釣魚。世道秋風總蕭索。何如高臥白雲居。

雨餘

兩兩鳴鳩語畫檐。雨餘芳草欲生煙。甕頭酒熟常留客。象外詩成頗類仙。楊子有才猶執戟。淵明無事合歸田。地偏時事人傳少。收拾琴書且晝眠。

元友山南山新居

桃柳參差出短牆。小樓突兀看湖光。出門便與青山對。讀易能消白日長。硯石洗來如玉潤。藥苗曬得似

茶香鄰僧亦有通文者。常把詩來惱漫郎。

再賦

幽居穩占南山下。人迹稀疏水竹村。轉巷始知猶有路。傍湖更好別開門。酒樽盡日嘗謀婦。詩課閑時略抱孫。孤鶴不來高士少。暗香且伴月黃昏。

答胡葦杭

久矣相期物外遊。長風吹不斷閑愁。南山翼翼青如舞。雙鬢颺颺白始休。蕉鹿夢回天地枕。尊鱸興到水雲舟。舊藏方鏡明如月。看去看來又一秋。

次胡葦杭韻

曾識清明上巳時。嬾能遊冶一作隨蜂蝶步芳菲。絮花半落雨初過。一作歇杜宇不鳴春自歸。雙冢年深人祭少。孤山日晚客來稀。江南尚有餘寒在。莫倚東風褪絮衣。

送王仙麓使君赴道州暫歸三山

家山小爲離支留。征旆催行莫待秋。應有矮奴騎竹馬。相隨迓吏拜蘭舟。舜山如畫當樓見。楚水浮香繞郡流。念我有親頭雪白。雲龍追逐恨無由。

奉寄恬上人

竹筇輕健草鞋寬。野外消磨半日閑。病葉已霜猶戀樹。片雲欲雨又歸山。燈分寺塔晴偏見。水隔漁家夜不關。媿我莫如沙上鷺。霎時飛去便飛還。

閻氏園池

眞妃已返鳳臺仙。獨立池亭思愴然。海岳不傳青鳥信。石房誰伴白雲眠。宮桃移種難生實。院籊初翻又引鞭。凝碧荒涼絃管靜。萍花浮滿釣魚船。

江上送友

知爾懷親憶故州。相逢沽酒且遲留。夕陽有恨荒荒白。江水無聲泯泯流。孤鳥出潮投渚尾。野廬飛雪壓船頭。卻愁明月中秋近。不得同登庾亮樓。

送劉竹間歸廬陵

驛路梅花漠漠寒。蓑衫絮帽出長安。懸知客久歸心切。自覺交深別語難。春入西江隨馬去。山留殘雪待人看。青原白鷺如相問。十載湖濱只釣竿。

道場山

山行龜背路羊腸。伏虎禪師古道場。老木陰中安御坐。白雲堆裏撫僧牀。勺泉清徹涵秋味。尖塔孤撐界夕陽。笑月亭空人影散。松風如雨動天簷。

何山

溪轉峰回一徑平。山頭白水照人清。寺因何氏封山姓。客把坡詩證地名。蘿月長隨行道影。杉風猶帶讀書聲。雲津橋下潺湲急。僧濯袈裟客濯纓。

新安郡圃

亭榭凌空眼界寬。得閑來此獨憑闌。春浮練水蒸城潤。雪被黃山入座寒。古樹巢空羣鳥散。荒池沙滿碎
藻乾。白雲在望歸期定。不見青油護牡丹。

拜孫花翁墓下

水仙分地葬詩人。一片荒山野火焚。薦菊有亭今作圃。掃松無子漫留墳。蝸牛負殼黏碑石。老鶴攜雛入
隴雲。欲把長簫歌楚些。卻憐度曲不如君。

兵間有歌舞者

邊塵未定苦無謀。年少金多絕不憂。野戰已酣紅帕首。塗歌猶醉錦纏頭。蛾貪銀燭那知死。月戀金尊不
照愁。亦欲避秦高隱去。桃花源上覓漁舟。

寄董無益

郵鈴帶箭髮紛紛。何日山深耳不聞。遷客無鄉難避禍。飢民失業半充軍。馬蹄亂踏湖西雪。雁陣平拖塞
北雲。我亦嬾談今世事。自看弔古戰場文。

題小閣一團和氣

新窗黏紙著方牀。四面虛明取向陽。氈席坐來終日暖。皮簾揭動北風涼。挂餅水滿梅花活。折鼎湯鳴芋
子香。布被蒙頭晝眠熟。不知門外雪洋洋。

董靜傳挂冠四聖觀

靜按秋淥洗荷衣。問隱孤山隻鶴隨。得酒可謀千日醉。挂冠猶恨十年遲。雲和家有仙人譜。石鼎今無道

士詩。莫對梅花談世事。此花曾見太平時。

劉悅心入道三茅觀

鵬冠高挂九松巔。去結三茅香火緣。相國向猶爲道士。將門今又出神仙。坐看紅日生滄島。吟寄青衣入洞天。跨鶴歸來雲舍近。西風井邑只依然。

同楊心卿過孤山訪靜傳不遇自遊和靖祠下明日奉寄二高士

飛仙又向別峯遊。竹下閒房且小留。滿鬢朔風吹客帽。倚闌落日在漁舟。梅花路冷難尋冢。葑草田荒半作洲。獨往獨來沙鳥怪。山空木短使人愁。

酬鄧山房尊師

山房閒伴白雲棲。琴不須彈聽者稀。北道主人新拜號。西州隱士舊傳衣。粵亡未合鷗夷去。蜀遠難隨杜宇歸。亦欲共君聯石鼎。龍頭豕腹怕相譏。

不應聘高士

束書入谷起徵君。盥耳淵棲似不聞。知有故人來問字。喜無逋客爲移文。忍貧羞說黃金盡。愛老慵將白髮芸。獨倚高樓南北望。青天依舊有閒雲。

懷古體要下有寄劉仲鼎四字

吹殺青燈炯一作耿。不眠滿衿懷古恨。縣縣江東曾識桓司馬。一作山中空識陶弘景。滄海一作海上。難追魯仲連。吳岫一作秦樹。月明吟木客。漢宮露冷泣銅仙。何時一酌桃源酒。醉倒春一作東。風數百年。

和范愛竹三首

半生豪氣學元龍。湖海惟知敬數公。徒有貞心招隱逸。恨無巨眼識英雄。天衢騎馬衣冠異。雨屋鳴雞杼軸空。西崦東屯何日了。定應愁老浣花翁。
秉燭追遊憶盛時。歡驚終較昔年稀。柳多客折涼陰薄。薇少人餐雨綠肥。胡蝶覺來方識夢。海鷗飛去未忘機。相逢且可談風月。莫話興亡與是非。
風雨蕭蕭白晝昏。蕭條受此一涼恩。丘園不作軒裳夢。陵谷空遺斧鑿痕。乍可扣舷歌楚澤。何堪抱瑟立齊門。有時散步西原上。共醉田家老瓦盆。

問趙元父病

裹飯無因絕往還。惟應帖子報平安。山公馬上花前放。岐伯書從枕上看。貿易近來多北藥。支持強欲著南冠。有時泥醉西園月。只尺梅花共倚闌。

贈金蓀壁

黃紙紅旗事已休。莫思入谷有鳴騶。天開東壁圖書府。人立西湖煙雨樓。林淺易尋和靖隱。菊荒空憶魏公遊。客來把玩新題扇。半似鍾繇半似歐。

再答元父

腰裏龍媒去未還。獨騎款段客長安。青黃誰采溝中斷。黑白當從局外看。尊俎風流陳日月。山林人物古衣冠。桂花滿袖王孫遠。空倚天風十二闌。

寄趙春洲莫兩山

湖山滿目舊遊空。風景荒涼客路窮。雨意忽生桐葉外。秋光多在木樨中。乾坤混混多遊騎。江漢寥寥有斷鴻。自古隱人多嗜酒。卻憐無酒醉新豐。

和兩山二首

世事枰碁入角危。有人袖手只攢眉。路通巴蜀那須檄。馬立澶淵更要詩。公竟醉邪從汝笑。樹猶如此信吾衰。傳聞雙珥消兵氣。猶把葵心向鬱儀。窮鄉何處覓新豐。身世悠悠醉夢中。未學伏波尸馬革。且隨甫里問龜蒙。檐頭喜有桑榆日。兵後那無草木風。亦欲飛神遊八極。扁舟坦臥不須篷。

讀陳去非集

簡齋吟冊是吾師。句法能參杜拾遺。宇宙無人同叫嘯。公卿自古歎流離。窮塗劫劫誰憐汝。遺恨茫茫不在詩。莫道墨梅曾遇主。黃花一絕更堪悲。

自跋詩卷後。近世習唐詩者。以不用事爲第一格。少陵無一字無來處。衆人固不識也。若不用事云者。正以文不讀書之過耳。暇日與里人盛元仁言之。余與元仁俱以筆墨受兩山先生知。余之心。元仁之心。先生之心。同矣。元仁歸十錦將束書渡淮。輒錄小卷贈行。以寄君思。若元仁小好詩錄以教我。以寄余思。明月天涯。千里對面。稽不孤矣。戊寅七夕前三日。武林仇遠。頓首再拜。

閒居十詠

階前紫蔓金絲草。籬角紅垂錦帶花。梓澤平泉易銷歇。春留富貴與詩家。
樹隔殘鐘遠欲無。野雲漠漠雨疏疏。飛蚊盡逐南風去。父子燈前共讀書。
仰屋著書無筆力。閉門覓句費心機。不如花下冥冥坐。靜看蜻蜓蛺蝶飛。
鶯花韋曲舊時遊。老去閑情已五休。卻笑東風無檢束。又隨飛絮過南樓。
烏雀喧秋未肯棲。狂風吹樹影離披。屋邊尚有斜陽在。更看山人一局棋。
風挾濃雲起礮車。捎窗雨脚亂如麻。山中茆屋應安穩。不向溪聲送落花。
新竹脩脩綠覆牆。讀書門外亦陰涼。道人清福不肯受。卻入西山看夕陽。
翠袖佳人倚暮寒。雙禽踏破玉闌干。空山月落春風換。直作羅浮夢裏看。
茶甌紗帽慣迎賓。不是詩人卽道人。細雨斜風君莫出。綠雲門外有紅塵。
珠簾玉柵綺羅叢。猶有承平京洛風。飲罷歸來遊騎少。一庭明月夜方中。

蟬精雋。仇山村閒居絕句。優游自得。以避亂世。氣和詞平。若不與世故者。在易。蠱之上九。所謂高
尚其事。先生有焉。

紀事

圩田平沒石田枯。秋暑如蒸雨竟無。六十年前曾記得。步行一直過西湖。

金淵集自注。淳祐丁未。亦旱。余始生。

句

姓名不入六臣傳。容貌堪傳九老碑。老何留樊素。貧休比范丹。

癸辛雜識。方回年登希歲。適牟獻之與之同庚。其子成文與乃翁爲慶。且徵友朋之詩。仇仁近有句云云。且作方句云云。方嘗有句。今生窮似范丹。於是方大怒。褒牟貶己。遂撫六臣之語。以此比今上爲朱溫。必欲告官殺之。諸友皆爲謝過。不從。仇遂謀之北客侯正卿。正卿訪之徐扣曰。聞仇仁近得罪於虛谷。何邪。方曰。此子無禮。遂比今上爲朱溫。侯笑曰。仇亦止言六臣。今比上爲朱溫者。執事也。方色變。侯遂索其詩之元本。手碎之。乃已。

魯仕能

句

萬劫灰中藏世界。千層浪裏惜儒珍。

吳鉞

句

籍糜望 青眼舊。鄒陽感慨白頭新。

李應春

句

象繪耆英希五老。鶴歸華表認千年。

羅太岳

句

素絲不改衣冠舊，黃道從教日月新。

羅太亨

句

且追白社爲耆會，縱買黃金肯少年。勢利朋儔隨處有，詩章我輩逐年無。

湖南通志：元九老題名詩石在平江道巖，葆真觀宋遺民魯仕能年七十三，吳鉞魯仕行，鄧希恕年七十七，方采李應春年六十九，張萬全年六十七，羅太岳年六十二，羅太亨年六十，皆平江人。於至元間擇山水勝處更迭主會，凡歷十二年，各題姓名及詩刻於石。仕能句云云，鉞句云云，應春句云云，太岳句云云，太亨句云云，太亨因會散悼諸友句云云。

林清

八音詩

金紫何曾一掛懷，石田茅屋自天開。絲竿釣月江頭住，竹杖挑雲嶺上來。匏實曉收栽藥圃，土花春長讀書臺。革除一點浮雲慮，木筆題詩酒數盃。

百可漫志：禮侍蔀齋林先生誌祖清避元不仕，變易姓名，匿居山寺。會府君檢冊寺中，見清詰問，且曰：能詩乎？卽以冊號八音，命爲詩，應聲云云。府君驚羨，遂與爲友。

元詩紀事卷八

趙孟頫

孟頫字子昂。宋秦王德芳之後。湖州人。宋末用父蔭補官。至元二十三年。薦授兵部郎中。官至翰林學士承旨。卒。追封魏國公。諡文敏。有松雪齋集。

楊載撰趙文敏公行狀。程公鉅夫奉詔搜訪江南遺佚。得廿餘人。公居首選。又獨引公入見。公神采秀異。珠明玉潤。照耀殿庭。世祖皇帝一見稱之。以爲神仙中人。使坐於右丞葉公李之上。仁宗聖眷甚隆。字而不名。嘗詔侍臣曰。文學之士。世所難得。如唐李太白。宋蘇子瞻。姓名彰彰。然常在人耳目。今朕有趙子昂。與古人何異。閒與左右論公。人所不及者數事。帝王苗裔一也。狀貌映麗二也。博學多聞。知三也。操履純正。四也。文詞高古。五也。書畫絕倫。六也。旁通佛老之旨。造詣玄微。七也。

湖州府志。鷗波亭。在今旗纛廟。

至正直記。一日有二白蓮道者。造門求字。門子報曰。兩居士在門前求見相公。松雪怒曰。甚麼居士。香山居士。東坡居士。邪。箇像吃素食的風頭巾。甚麼也。稱居士。管夫人聞之。自內而出。曰。相公不要恁地焦躁。有錢買得物事。少頃。二道者入謁罷。袖出鈔十錠。曰。送相公作潤筆之資。有庵記。是牟教授所作。求相公書。松雪大呼曰。將茶來與居士喫。卽歡笑逾時而去。蓋松雪入國朝後。田

產頗廢家事甚貧。

詩數元名家稱趙子昂。虞伯生。楊仲弘。范德機。揭頤外。如元好問。馬伯庸。陳剛中。李孝光。楊廉夫。薩天錫。傅若金。余廷心。張仲舉輩不下十數家。視宋人才力不如。而篇什差盛。步驟稍端。又元五言古率祖唐人。趙子昂規陳伯玉。

剡源集。古詩沈潛鮑謝。自餘諸作。猶傲睨高適李翱云。

清容居士集。松雪翁詩法。高踵魏晉。爲律詩則專守唐法。故雖造次訓答。必守典則。

佩楚軒客談。趙子昂論作詩用虛字。殊不佳。中兩聯填滿。方好。出處纔使唐以下便不古。

木天禁語。詩之氣象。猶字畫然。長短肥瘦。清濁雅俗。皆在人性情流出。得八法。便成妙染。而洗吾舊態也。此趙松雪翁與中峰和尚述者。

詩家一指綺麗。趙松雪神存富貴云云。

松雪齋集。延祐五年四月廿七日。上御嘉禧殿。集賢大學士臣邦寧。大司徒臣源。進呈農桑圖。上披覽再三。問作詩者何人。對曰。翰林承旨臣趙孟頫。作圖者何人。對曰。諸色人匠。提舉臣楊叔謙。上嘉賞久之。人賜文綺一段。絹一段。

南濠詩話。元盛時。揚州有趙氏者。富而好客。其家有明月樓。人作春題。多未當其意。一日趙子昂過揚州。主人知之。迎至樓上。盛筵相款。所用皆銀器。酒半。出紙筆求作春題。子昂援筆書云。春風閨苑三千客。明月揚州第一樓。主人得甚喜。盡徹席間銀器以贈。

岳鄂王墓

鄂王墳下草離離。秋日荒涼石獸危。南渡君臣輕社稷。中原父老望旌旗。英雄已死嗟何及。天下中分遂不支。莫向西湖歌此曲。水光山色不勝悲。

輟耕錄。岳王墓詩不下數百篇。其膾炙人口者。莫如趙魏公作。

麓堂詩話。南渡云云。句雖佳。而意已涉秦越。

謾留夢炎詩

狀元曾受宋家恩。國困臣強不盡言。往事已非那可說。且將忠直報皇元。

楊載撰行狀。上問留尙書。葉右丞二人優劣何如。公對曰。夢炎向與臣父同在宋朝。是時臣甫數歲。其或忠或佞。臣所不能知。今幸得與夢炎同事天朝。夢炎爲人性重厚。篤於自信。思慮甚遠。善斷國事。有大臣之器。李所讀之書。卽臣所讀之書。李所知所能。臣亦無不知。無不能。上曰。卿意豈以夢炎賢於李哉。夢炎在宋。狀元及第。位至丞相。賈似道懷譏誤國。罔上不道。夢炎徒依阿取容。曾無一言以悟主聽。李布衣士。乃能伏闕上書。請斬似道。是李賢於夢炎明矣。李論事厲聲色。盛氣凌人。若好已勝者。剛直太過。故多怨焉。卿以夢炎父執友。不敢斥言其非。今朕旣見卿之情。可爲朕賦詩以譏刺夢炎。公賦詩云云。上善卒章之意。歎賞不已。

癸辛雜識。子昂入覲之初。上命作詩嘲留忠齋云云。留以此銜之終身云。

丰齋集。公進詩云云。上深善卒章之意。出見奉御撒里于幄殿側。告之曰。上論賈似道誤國之罪。

責留夢炎不能言。今桑哥誤國。甚于似道。我輩緘默。他日何以道此責乎。
風月堂雜識。帝雖異裔。亦知厭薄夢炎之爲人。然孟頫之詩。實所以自嘲耳。

贈子敬

吾愛子姚子。風流如晉人。白眼視四海。清談無一塵。

研北雜志。趙子昂嘗謂人曰。姚子敬天姿高爽。相見令人怒。不見令人思。又嘗贈詩云云。其爲子昂敬畏如此。

懷德清別業

楊林堂下百株梅。傲雪凌寒次第開。枝上山禽曉咽。啭定應喚我早歸來。

山堂肆考。元趙孟頫有別業在湖州德清縣。有詩云云。

水東日記。趙松雪集。懷德清別業第二詩。唐錢起詩也。但花盡作花落不同耳。豈公嘗手書之。編類者遂誤收入集耶。

題所畫梅竹贈石民瞻

故人贈我江南句。飛盡梅花我未歸。欲寄相思無別語。一枝寒玉澹春暉。

松雪齋集原注。伯幾有詩見寄云。寄聲雪上佳公子。飛盡梅花不見君。

萬柳堂卽席

萬柳堂前數畝池。平鋪雲錦蓋漣漪。主人自有滄洲趣。游女仍歌白雪詞。手把荷花來勸酒。步隨芳草去。

尋詩誰知咫尺京城外。便有無窮萬里思。

青樓集解語花姓劉氏。尤長於慢詞。廉野雲招盧疎齋趙松雪。飲於京城外之萬柳堂。劉左手提荷花。右手舉杯。歌驟雨打新荷曲。諸公喜甚。趙卽席賦詩云云。

題圓澤三生公案

川上清風非有着。松閒明月本無塵。不知二子緣何事。苦戀前身與後身。

五雜俎嘗愛趙子昂有題圓澤三生公案詩云云。此千古第一議論也。惜不爲屠黃二公誦之。

題陶潛歸去來圖

生世各有時。出處非偶然。淵明賦歸來。佳處未易言。後人多慕之。效顰惑媼妍。終然不能去。俯仰塵埃間。斯人真有道。名與日月懸。青松卓然操。黃花霜中鮮。棄官亦易耳。忍窮北窗眠。撫卷嘗三嘆。世久無此賢。筆精趙子昂。題陶潛歸去來圖云云。觀此詩。子昂之慕淵明至矣。然身事虜朝。貽譏後世。信能言而行不逮也。

絕句

輕輕踏破白雲堆。半爲尋僧半探梅。僧不逢兮梅未放。野猿笑我卻空迴。

七修類稿予過演福寺僧房。見趙子昂親書探梅訪僧一絕句云云。惜公松雪集中失載。今寺已爲墳地。不知此紙存亡也。噫。

題息齋竹

李侯寫竹有清氣。滿紙墨光浮翠筠。蕭郎已遠丹淵死。欲寫此君惟此人。

六研齋筆記。李息齋爲吳興別駕。喜寫墨竹。用文與可法。動筆鬱然。非涼薄者可窺。余得其一幅。作老木二尺。叢篠擁之。葉皆焦墨所成。略不露罅。而神韻變動。真奇作也。趙松雪竹法疎逸。與公殊調。然亦雅重。公其題此幅云云。

題商德符學士桃源春曉圖

宿雲初散青山溼。落紅繽紛溪水急。桃花源裏得春多。洞口春煙搖綠羅。綠羅搖煙挂絕壁。飛流淙淙一作直下三千尺。瑤草離離滿澗阿。長松落落凌空碧。雞鳴犬吠自成邨。居人至老不相識。瀛洲仙客知仙路。點染丹青寄輕素。何處有山如此圖。移家欲向山中住。

詩藪雄渾流麗。步驟中程。

絕句

溪頭月色白如沙。近水樓臺一萬家。誰向夜深吹玉笛。傷心莫聽後庭花。

詩藪趙子昂云云。虞伯生。高秋風起玉關西。蹄鐵歸朝十萬蹄。貌得當時第一匹。昭陵風雨夜聞嘶。范德機。中年江海夢靈皇。夜半聞鐘似上陽。一百八聲猶未已。更兼雲外雁啼霜。楊仲弘。四面青山擁翠微。樓臺相向闢天扉。夜闌每作遊仙夢。月滿瓊田萬鶴飛。陳衆仲。東華塵土滿貂裘。芍藥闌邊繫綵舟。二十四橋春似海。教人腸斷憶揚州。李季和。西風烏帽髻鬢髮。拂袖長吟倚暮酣。得句不衝京兆尹。蹇驢行遍大江南。薩天錫。道人已跨龍潭鶴。童子能煎雀舌茶。一夜山中滿林

雪客來無處覓梅花。郝伯常只見星簾挂月鉤。銀河依舊隔牽牛。遙憐玉雪佳兒女。淚滿西風乞巧樓。潘子素江上青山日欲晡。幽花小紙墨模糊。華清宮殿生秋草。零落滕王蛺蝶圖。張仲舉雲巖巖下聘君家。長記宵談到曙霞。今日隴頭誰洒飯。鷓鴣啼老白桐花。等作皆元絕妙境。第高者不過中唐平者多沿晚宋耳。

老態詩

老態年來日日添。黑花飛眼雪生髯。扶衰每藉過眉杖。食肉先尋剔齒籤。右臂拘攣巾不裹。中腸慘感淚常淹。移床獨就南榮坐。畏冷思親愛日簷。

七修類稿。非身處老境。不能言之如此真切。悲夫。

江花江草詩千首。老盡平生用世心。

歸田詩話。山谷題浣花醉歸圖云。中原未得平安報。醉裏眉攢萬古愁。能道出少陵心事。趙子昂云云。亦髣髴得之。

又

錦纜牙檣非昨夢。鳳笙龍管是誰家。

麓堂詩話。趙子昂谿上詩云云。意亦傷甚。

又

雲端雙鳥冷。花底一琴閒。

詩數元五言律可摘者。趙子昂云云。

又

千里湖山秋色淨。萬家煙火夕陽多。

詩數七言律可摘者。趙子昂云云。鄧文原云云。虞伯生云云。馬伯庸云云。范德機云云。楊仲宏云云。揭曼碩云云。陳剛中云云。吳成季云云。李子飛云云。雅正卿云云。甘久從云云。貢秦甫云云。柯敬仲云云。余廷心云云。薩天錫云云。薛玄卿云云。李子搆云云。王尙志云云。吳楚望云云。丁守中云云。涂守約云云。等皆句格莊嚴。詞藻瑰麗。上接大歷元和之軌。下開正德嘉靖之途。今以元人一概不復過目。余故稍爲拈出。以俟知者。

鮮于樞

樞字伯機。漁陽郡人。至元間爲浙江行省都事。官至太常典簿。有困學齋集。

道園學古錄題鮮于伯機小像。斂風沙裘劍之豪。爲湖山圖史之樂。翰墨軼米薛而有餘。風流擬晉宋而無忤。是以吳興公運畫沙之錐。刻希世之玉云云。

題屏

解舍如僧舍。官曹似馬曹。頭巾終日岸。手板或時操。

吳禮部詩話鮮于伯機初至婺。題詩於屏云云。佳句也。

湖邊曲

湖邊蕩槳誰家女。綠慘紅愁問無語。低回忍淚並人船。貪得纏頭強歌舞。玉壺美酒不須憂。魚腹熊蹯棄如土。陽臺夢短恩恩去。鴛鴦鎖生寒愁日暮。安得義士擲千金。遂令桑濮歌行露。

輟耕錄。浙省廣濟庫歲差杭城殷實戶若干名。充役庫子。以司出納。比一家中侵用官錢太多。無可爲償。府判王某素號殘忍。乃拘其妻妾子女於官。又無可爲計。則命小舟載之。求食於西湖。以費納官。鬼妾鬼馬不肖輩羣趨焉。鮮于伯機先生作湖邊曲云云。後王之子孫有爲倡者。

武陵勝集得總字

窮冬十日雪。戶外曾未踵。念我平生友。欲往恨不勇。茲晨劇命駕。相對腹一捧。促招東林遠。共念北海孔。把酒望六合。瓊瑤紛總總。興極不知休。嚴城鐘鼓動。詳白珽下。

題高房山墨竹

添陰生研池。葉葉秋可數。京華客夢醒。一片江南雨。

江村消夏錄。鮮于伯機題高房山墨竹。有詩最工。余故不能忘。詩云云。世人但知鮮于善書。而不知其吟詠之工。故錄而出之。以示人耳。梅道人戲墨。

王大令保母帖四首

撞破煙樓固未然。唐摹晉刻絕相懸。莫將定武城中石。輕比黃閨墓下磚。姜侯才氣亦人豪。辦折區區漫爾勞。不向驪黃求駟駿。書家自有九方皋。

臨摹舊說范新婦。古刻今看李意如。卻笑南宮米夫子。一生辛苦學何書。千年鬱鬱閼重泉。暫出還隨劫火煙。靳惜乾坤如有意。流傳君我豈無緣。

元詩選按蘇天爵題鮮于伯機詩帖云。鮮于公蚤歲學書。媿未能若古人。偶適野。見二人輓車行。淖泥中。遂悟書法。今讀論書諸作。可以知其所從入矣。

寶璧詩

誰言河水濁。鳴鏑約秦境。官軍鬧如蟻。城守申嚴警。寶璧一匹夫。欲汲困短綆。慷慨願自効。行臺可其請。從徒二十八。設伏獨園靜。邏騎百蹄翻。倏來落電影。勇士貴一決。猶豫失馬猛。賞功不踰日。簫鼓喧市井。英風激衰輓。胡以倍淒冷。

困學齋雜錄京兆分司劉御史請予作寶璧詩云云。

句

鳥飛青嶂裏。人語翠微中。

詩藪元五言律可摘者。鮮于樞云云。

吾邱衍

衍字子行。錢唐人。竹房。竹素。貞白。皆其號。有竹素山房集。

西湖遊覽志。隱居教授。居一樓。坐學童樓下。遣高弟子遞授之。客至。童子輒止其登。使登乃登。廉訪使徐琰聞衍名。訪之。衍從樓上呼曰。此樓何敢當貴人登也。願明日走謁謝。琰笑而去。明日竟

不謝。

山居新話。黃子久公望。一日與客遊孤山。聞湖中笛聲。子久曰。此鐵笛聲也。少頃。子久亦以鐵笛自吹下山。遊湖者吹笛上山。乃吾子行也。二公路不相顧。笛聲不輟。交臂而去。

絕句

烹茶茅屋掩柴扉。雙聳吟肩更撚髭。策杖逋仙山下去。騷人正是興來時。

閒居錄。晚宋之作詩多謬句。出游必云策杖。門戶必曰柴扉。結句多以梅花爲說。塵腐可厭。余因聚其事爲一絕云云。

別仇仁近

劉伶一鎔事徒然。蝴蝶飛來別有天。欲語太元何處問。西泠橋外斷橋邊。

輟耕錄。初先生年四十未娶。宛邱趙天錫爲買酒家孤女爲妾。年飢。女嘗事人。後夫知妻在先生所。訟之。因逮妾父母。父母至。客先生家。又僞楮幣事覺。因言舍主人。先生固弗知。因遷粹辱。先生南出數百步。錄事張君景亮識先生。叱邏曰。是不知情。攝之何爲。卽解縱遣歸。先生不勝慚。明日持玄絛緇笠詣仇山村別。值晨出。因留詩一章云云。意將從靈均於斯。明日有得遺履於橋上者。後衛大隱以六壬筮之。得亥子丑順流象。曰。是其骨朽淵泥。九十日矣。多寶院僧可權從先生學。聞先生死。哭甚哀。乃葬先生遺文於後山。與其師骨塔相對。曰。皆吾師。乞銘於胡石塘先生。鐵網珊瑚。余自至元元貞間客杭。得交子行父。雖齒在余先。甚款密也。予往來於杭有年。間歸吳。

門每承以詩或書尺見寄。今猶有存者。其過山村翁訣別之詩。案胡汲仲先生塚銘。迺至大四年也。越三十一年。爲至正改元。始見其手跡於廬山甫家。感悼之餘。爲作七言一首。以附於後。亦挽之意云。時余六十又四。良右。

桃花雨樂府一章寄翼之

秦源春夢陽臺晚。風散驚紅作秋苑。閒陰碧樹搖暖雲。茸苔羅水香氤氲。蝶飛不溼煙綿路。吳娥怨澀鶯階步。參差海羽雙燕來。依微石舞瀟湘回。

古詩一首送翼之回吳

游子動歸思。南風起秋聲。我亦當此時。相送難爲情。交朋尙如斯。況爾懷父兄。三吳亦鄰邦。一水非遠程。君還姑蘇臺。我留鳳凰城。兩地各相望。馳心互奔傾。流光若頽波。彼此卽寓萍。浮世苦離散。輾轉百慮縈。何能慰予懷。握手徒營營。

次韻謝錢翼之

筆翰西臺妙。文章五鳳樓。美才須比玉。直道豈如鉤。吳苑辭春色。江風散旅愁。吾廬正蕭颯。二仲得羊求。

菌耳徧沃野

菌耳徧沃野。瓊芝亦芬芳。羣陰掩其茨。誰復知爾良。我願得此草。移根植崇岡。閒攀紫金蕤。挹露晞朝陽。服食換綠髓。輕舉過紫皇。招攜三辰游。與之同輝光。

與鄰寓人隔屋對月夜話

禦寇連牆屋。神交得謝瞻。謝有隔屋夜語事。偶逢吾所契。共語月當檐。微祿終何補。良才尙此淹。憑君縱元論。未怪發幽潛。

鐵網珊瑚。右故人吾子行手蹟十二紙。皆前後得之于書夾所藏。復恐散落。集而存之。其爲人見。石塘胡先生所爲墓銘。茲不書。後三十年。爲至元五年乙卯九月九日。江村民錢良佑識。

柳枝詞

一逕梨花過雨霑。日華浮動碧絲簾。軒前插徧垂楊柳。看舞春風又畫簷。

答沈堯道贈梨花

山中折花搖白雲。一枝贈我寒食春。薄簾隔晴不須捲。恐隨蝴蝶飛成塵。
七修類稿。吾杭吾子行。予於舊杭誌中。得其詩二首。今錄示人。則又惜死於無窮也。

陳儼

儼字口口口口人。至元間召用。官至翰林直學士。

錢舜舉畫花

雪翁夙號老詞客。亂後卻工花寫生。寓意豈求顏色似。錢唐風物記昇平。
西湖志餘。錢選。雪川人以工畫花鳥名。江南陳儼題其畫花云云。

黃玠

玠字伯成。四明人。有卞山集。

湖州府志樂吳興山水因卜居卜山

浙江通志與趙文敏游文敏稱許之

趙碧瀾妾詩

感之以誠感必深應之以真應必捷真情一合了弗離聽我長歌碧瀾妾碧瀾亦是諸王孫世殊事異老且貧少陵尚愛燕玉暖況是當時真貴人春衣典盡春寒峭二妾朱顏正姝好忍將羅帶折同心懊惱浮生頭白早珠釧翠鬢幸僅存此時猶及嫁夫君十二樓頭燕子去揮手不可留仙裙去妾相悲兩相約既去猶煩送肴酌主君詎忍覆棄之見此翻令心緒惡一心專天天得知忍著主衣還事誰遂攜衾襖與俱來後君死者當爲尼碧瀾堂下雙溪水使客往來豈知此不願新歡戀舊恩千萬人中兩人耳

輟耕錄吳興趙公碧瀾宋宗室也老而益貧二妾方少艾因遣之去咸弗肯嫁數獻肴酒致殷勤焉公於卒也覆諸水曰慎毋再見昔吾割情忍愛以去爾爾弗我忘祇攪我心耳既而各與其父母俱至泣而言之妾家每歲請給足可養贍願執事終身爲尼以報主恩公遂復留之他日公死果如所言公有寡女復資育之四明黃伯成先生玠嘗有詩云云

急江山歸興圖

秦望東南遠欲無依稀禹穴向姚虞幾時把酒鄞江上卻對鄉山看此圖

弁山小隱吟錄自序雪水之陽弁山之下有丘岑蔚思構數楹以寄朝夕浮遊江海不能自還或斬之曰桑蠶作繭猶知纏裹其身子漫不爲計空言何裨應之曰余游者也某水某山遊之寓也

苟寓矣。又何營之有。云云。是余所題江山歸興圖詩也。嘗求之。則隱之意可見矣。

方夔

夔一名一夔。字時佐。淳安人。生宋季。自號知非子。有富山嬾橐。

句

自鄮有謀歸華氏。舍湘無地託王琳。爾身不卹無埋地。此恥奚容更戴天。春盤脆響供雷筍。夜焙芳鮮摘露芽。蠶老任眠催作繭。燕來新乳賀成家。畫角吹殘低戍火。暮鴉橫斷遠煙村。

元詩選集中所載。閔忠詩云云。謂文文山也。誅姦云云。謂賈似道也。其忠義之感。凜然言外。他如云云。亦多雅秀之句。

劉詵

詵字桂翁。廬陵人。宋亡。年十二。以處士終。有桂隱集。

哭蕭孚有四首

去年九日共登高。絕嶺長歌意頗豪。今日送君誰共哭。一間殯屋大江皋。畫圖摩詰神情遠。詩律蘇州句意清。身後生前千古恨。荒荒白日下高城。翰墨周旋二十春。莫年卜宅遂爲鄰。永新門外雙松樹。無復相攜踏月人。螺湖橋外草如煙。螺子山前水接天。應有故人來下馬。愁雲深處是新阡。

桂隱集原注。孚有方厓御史之季子。少甚穎異。從余游。其爲詩。短篇高古幽淡。追逼韋王。長篇豐

瞻逸宕。別自風致。皆欲與古人爭衡。至元三年丁丑。七月一日病死。士友傷之。以其有才而未著。其可憾如逢原敦夫。九月九日。余既送殯城東。歸塗賦以寄感慨云爾。

句

山作登樓色。天留隔巷口。雲分潭際樹。帆上驛邊洲。落日湖陰笛。涼風水郭秋。一燈遺老髯。四海後元春。樹懸山雨白。門掩佛燈紅。村煙茅店午。籬蝶棘花晴。燕子樓臺人影瘦。海棠池館月痕孤。桃花浪起春風闊。燕子寒生社雨多。鳥斷空山孤樹悄。馬嘶小驛一燈昏。江湖宦客孤舟夜。城郭詩翁白髮春。燕子池塘詩句好。蒲花簾幕酒杯深。君如礪刀千牛解。我似車輪四角方。刺繡簾櫳鶯語倦。讀書庭院絮飛忙。草意欲供新得句。桃花猶記舊來人。

元詩選律詩多佳句。如云云。當時諸老宿評以爲高逼古人云。

劉彥章

彥章。吉水人。

題廬陵義士傳

淮海風迴吹血腥。青原不改舊時青。中朝將相論功賞。不及江南一白丁。

江西通志。劉彥章與劉桂隱。劉申齋講學。有詩名。其題廬陵義士傳絕句云云。爲時傳誦。

陸文圭

文圭。字子方。江陰人。宋咸淳初。以春秋中鄉選。延祐設科。再中鄉舉。以老疾不應召。卒於家。

挽貢仲章學士

才優如貢禹，經行復精純。海內多知己，江東尙有人。林泉隱君子，臺閣古名臣。九轉丹成去，青山宰木春。

鹿葱絕句

丹葩信不類，萃蒿雨後常抽綠。玉條此草豈宜充鹿食，瘦莖卻比沈郎腰。

牆東類藁自注：沈約作鹿葱詩云：爾非萃與蒿，豈充麋鹿食。譏者取此詩以白梁武帝，大怒，約以憂死。今按此詩亦未見顯然譏刺，何爲得罪？但此花丹色，略有斑點，似鹿紋，所以得名，非謂可以充鹿之食也。

黃庚

庚字星甫，天台人，有月屋漫稿。

枕易越中詩社試題都魁

古鼎煙銷倦點朱，翛然高臥夜寒初。四簷寂寂半牀夢，兩鬢蕭蕭一卷書。日月冥心知代謝，陰陽回首驗盈虛。起來萬象皆吾有，收拾乾坤在草廬。

月屋漫藁考官李侍郎應祈批詩題莫難於枕易，自非作家大手筆，詎能模寫。蓋以其不涉風雲雨露江山花鳥，此所以爲難。予閱三十餘卷，鮮有全篇純粹，正如披沙揀金，使人悶悶。忽見此作，若紛紛盆盎中得古轡洗，把玩不忍釋手。此詩起句倦字，便含睡意，領聯氣象優游，殊不費力。曲

盡枕易之妙。頸聯冥心回首四字。極其精到。結句如萬馬橫奔。勢不可遏。且有力量。全篇體製合法度。音調諧宮商。三復降歎。此必騷壇老手。望見旗鼓。已知其爲大將也。冠冕衆作。誰曰不然。

秋色 山陰詩社中選

憑高望不及。望斷動愁情。落日淒涼處。西風點染成。丹楓明野驛。白水浸江城。馬上人回首。戎戎踏客程。案以上二詩中選及評語。既見月屋漫藁。復見張觀光屏巖小稿。未知孰是。

張觀光

觀光字直夫。東陽人。

梅魂

夢覺羅浮迹已陳。至今想像事如新。相思一夜窗前月。似見三生石上春。的的孤芳冰氣魄。疎疎冷蕊雪精神。料應楚些難招至。欲倩花光爲寫真。

屏巖小稿。武林試中選。

虞德觀

德觀名未詳。集從兄。

句

我因國破家何在。君爲脣亡齒亦寒。

道園遺稿從兄德觀父與集同出榮州府君宋亡隱居不仕而歿集來吳門省墓從外親臨邛韓氏得兄遺蹟有云云不知爲誰作也撫誦不覺流涕

元詩紀事卷九

陳孚

孚字剛中，台州臨海人。至元中，以布衣上賦江浙行省，聞於朝。後以禮部郎中使安南，官至台州路總管府治中。有剛中觀光等稿。

題壁

我不學寇丞相，地黃變髮髮如漆。又不學張長史，醉後揮毫掃狂墨。平生紺髮三千丈，幾度和雲眠石上。不合感時怒衝冠，天公罰作圓頂相。肺肝本無兒女情，亦豈惜此雙髯青。只憶山間秋月冷，搔首不見鬢鬆影。

江州

老母越南垂白髮，病妻塞北倚黃昏。蠻煙瘴雨交州客，三處相思一夢魂。

輟耕錄：吾鄉陳剛中先生，國初時嘗爲僧以避世變。一日大書所作詩於父執某之粉牆上云云。父執見之曰：此子欲歸俗也。呼來館穀之，命養髮。經半年餘，謂曰：汝當娶。吾將以女事汝。先生辭謝再三，旣而命寓他所，遣媒妁行言，擇日迎歸。父執喜曰：五馬入門矣。先生雖獲佳偶，自妻母以至妻之兄姊弟妹皆不然，遂挈家入京。館閣諸公交章薦舉，入翰林會朝廷遣使交趾。先生副之，至交州，嘗有詩云云。

銅雀臺

古臺百尺生野蒿。昔誰築此當塗高。上有三千金步搖。滿陵寒柏園鳳綃。西飛燕子東伯勞。塵開泉下路。迢迢龍輅銀筵紫。檀槽怨入漳河翻。夜濤人生過眼草。上露白骨何由見。歌舞獨不念漢家長陵一抔土。玉柙珠襦鎖秋雨。

詩藪雄渾流麗。步驟中程。

鳳凰山

浮屠百尺聳亭亭。落日鴉啼野蔓青。故國盡銷龍虎氣。荒山空帶鳳凰形。金根輦路迎禪一作神駕。玉樹歌臺語梵鈴。惟有錢塘江上月。年年隨鴈過寒汀。一作空汀

金山寺

萬頃天光俯可吞。壺中別有小乾坤。雲侵塔影橫江口。潮送鐘聲過海門。僧榻夜隨蛟室湧。佛燈秋隔蜃樓昏。年年只有中泠水。不受人間一點塵。

泊安慶府呈貢父

共擁旒幢度百蠻。今朝忽遇一作過皖公山。幸承乙夜君王問。更喜丁年奉使還。舊夢未迷天祿閣。新愁猶憶鬼門關。塵纓笑濯滄浪水。一作小伴沙鷗半日閒

詩藪全篇整麗。首尾勻和。

白門

布死城南未足悲。老瞞可是算無遺。不知別有三分者。只在當年大耳兒。

歸田詩話。陳剛中白門詩云云。詠曹操殺呂布事。

鸚鵡洲

大江東南來。孤洲屹枯蘚。中有千載人。殘骨寄偃蹇。惟漢黨錮禍。薦紳半摧殄。況復啖葛奴。盡使羽翼翦。天乎鸞鳳姿。乃此侶狹犬。想當落筆時。酒酣玉色洗。鸚鵡何足詠。僅以雕蟲顯。我來策蓬艸。清淚淒以泫。尙恨迷幾先。不爲無道卷。賢哉龐德公。一犂老襄峴。

歸田詩話。崔塗鸚鵡洲詩云。曹瞞尙不能容物。黃祖何由解愛才。後無繼之者。陳剛中一篇云云。詞語跌宕。議論老成。誠佳作也。

題和靖墓

北邙翁仲拱朱門。玉盃時驚古帝魂。爭似孤山一坏土。梅花依舊月黃昏。

筆精古今。題和靖先生墓者。不下百篇。悉梅鶴封禪故事而已。陳剛中一絕云云。亦可掩諸作者也。

瀟湘八景

遠浦歸帆

日落牛羊歸。渡頭動津鼓。煙昏不見人。隱隱數聲櫓。水波忽驚搖。大魚亂跳舞。北風一何勁。帆飛過南浦。藝林伐山。元陳孚遠歸帆絕句云云。識者以爲不減王維。

案伐山止引首四句也。

統幕

千里茫茫草色青。亂塵飛逐馬蹄生。不知何代開軍府。猶有當年統幕名。

叩舫憑軾錄統幕之地。在北直隸隆慶州西南八十里。相傳遼主遊幸。嘗張大幕於此。因名統幕。俗訛爲土幕。又名土墓。又名土木。皆訛也。元陳孚詩云云。

安南卽事

聖德天無外。恩光燭海隅。遂頒南越詔。載命北門儒。萬里秋持節。千軍夜執戈。前驅嚴弩矢。後纛擁樵蘇。瞻彼交州域。初爲漢氏區。樓船征旣克。徵側叛還誅。五代顏王紐。諸方裂霸圖。遂令風氣隔。頓覺版章殊。丁璉前猖獗。黎桓後覬覦。一朝陳業構。八葉李宗徂。安南本漢交州。唐立都護府。梁貞明中。土豪田承美。據其地。楊廷藝結洪吳昌岌昌文互相爭鬪。宋乾德初。丁公著之子部領立。傳子璉璉大將黎桓篡之。桓子至忠。又爲李公蘊所篡。公蘊德政日尊。乾德楊煥天祚龍翰吳玘凡八傳。至宋嘉定乙酉歲。陳氏始奪其國。陳本閩人。有陳京。僞諡文王。增子李。值龍翰昏遽。不恤政事。京與弟本僞諡康王。盜國柄。吳玘沖幼。其子承基立。僞號太上皇。死。子光炳嗣。在宋名威晃。上表內附。國朝封爲安南王。死。子日烜立。在宋名日照。死。今日燁代領其衆。於是有國六十九年矣。下俗澆浮甚。中華禮樂無。諱嫌訛氏阮。託制僭稱孤。國諱李字。姓李者皆易以阮。臨文爲字不成。以父死自稱孤子。表疏文移。及對其羣臣皆然。祭祀宗祊絕。婚姻族屬汙。雖有廢廟。無歲時祀禮。惟供佛最謹。國族男女與同姓爲婚。互相匹偶。以齒不以昭穆。今會之妻。

其叔興道女也。盜竊囚于李，懲創而然。尊卑雙跳足。老幼一圓顛。民皆徒跣。間有臨革履。至殿則去之。郊迎之際。袍笏百人皆跣而已。男子悉髡。有官則以青巾霧之。民悉僧也。陟嶠輕于鹿。洄波疾似兔。足皮厚甚。登山如飛。芒刺悉無所懼。父子男女同川而浴。冬夏皆然。善水。有潛行數百里者。斜鉤青緡帽。曲領黑羅襦。巾色深青。繫緡爲之。貫額以鐵線。前高一尺。而屈之及頸。以帶束反結其後。頂有鐵鉤。有職掌則加帶于鉤。家居囚首。見客乃巾。遠行則一人捧巾以從。惟僧髻以阜羅包束。遠望如道家綸巾。而益廣出。其旁髮皆露垂。國皆衣黑。阜衫四襦。盤領以羅爲之。婦人亦黑衣。但白裏廣出。就以綠其領。博四寸。以此爲異。青紅黃紫諸色絕無。語笑堂前燕。趨踰屋上烏。語音侏離。謂天曰勃未。地曰燭。日曰扶勃未。月曰勃又。風曰教雲。曰梅山曰幹隈。水曰掠。眼曰未。口曰皿。父曰吒。母曰娜。男子曰千。女曰于。多蓋。夫曰重。妻曰陀。被好曰領。不好曰張領。大率類此。聲急而浮。大似鳥語。趨進輕佛。往來如風。深黑一色。如寒鴉萬點。抵鴉身。偃豕。羅我背拳狐。其昇人用布一匹。長丈餘。以圓木二。各長五寸。挈布兩端。更以繩挈圓木上。以大竹貫繩。兩人昇之。人側其中。若舉羊豕然。名曰抵鴉。貴者則以錦帛。扛用黑漆。上拖黑油紙。屋高四尺許。銳其脊而廣其檐。檐廣約四尺。雨則張之。晴則徹屋而用傘。傘出入以紅氈朱屏。八人昇之。甚麗。象背上施鞍轡。凡座名曰羅我。人坐其上。拳屈如狐。象額編鈴數十。行則琅琅然。寺號千齡。陋州名萬劫。愚使者館于太師府。左有小刹。曰天啓千齡寺。前有碑。載建中八年壬辰歲造。乃其祖僧號。爲母李氏追悼冥福。李氏僞諡慈順太后。龍翰女也。僞興道王陳峻。據萬劫府。卽唐浪州。馬援駐兵浪西里地。甚重佛。故州名曰萬劫。笙簫圍醜妓。牢醴祀淫巫。嘗宴于其集賢殿。男優女倡各十人。皆地坐。有琵琶樂第一絃之屬。其臨

與絃索相和歌則先哩喻而後調殿下有賜弄上竿杖頭傀儡又有錦褥保其上體跳擲號嗽婦人赤腳十指爪槎枰起舞醜態百出人家門首必有小祠其神曰馬大人刻木象狼惡不可名狀朔望則陳于庭老稚羅拜之國尉青盤護軍振白梃驅當國二人其叔爲太師陳啓弟爲太尉陳暉國事巨細暉啓皆專之每至殿門下與則二人各執二大木圓如鏡色青廣六尺上畫日月北斗二十八宿意以自障也每州縣有官曰將掇司巡徵之事兼領土兵有警則盡驅丁壯以往器械悉自備無弓矢惟持藥弩標鎗亦有操白梃者閱條親獄訟明字掌機樞官自司尉而下有檢法明字皆執政官今丁公文杜國器黎克復等爲之次有尙書亞卿翰林奉旨判首三司又有關係則掌法令刑獄其族有昭明興道昭惻昭文佐天皆僧王號正月四日椎牛饗其官屬以七月十五日爲大節人家相問遺官屬各以一口獻其會十六日開宴酌之勃窣官中客鬚髻座上奴奴皆溷其類有曰官中客則官奴也曰座上奴則可至會左右餘皆白臺章中贊糾邑賦大僚輸置御史臺中贊卽中丞也刑法酷甚盜及逃亡斷手足指其人甘心或付象蹴殺之國有大鐘樓民訴事扣鐘州設安撫通判縣有大僚箕歛煩重魚鰕蔬果悉以充歛皆大僚主之吏權橫榔稅人收安息租產橫榔最多其稅亦重專立官權之安息木取其津及葉揉爲小團大數寸歲收租利甚厚然與西域安息不類黃金刑莫贖紫蓋律難踰民間金銀雖銖兩悉徵送官有私服用者即死官品崇卑視傘爲差卿相則用三青傘次二傘一傘若紫傘惟親族用之他人不敢用安化橋危矣明靈閣岌乎自館行六十里過安化橋復一里至青化橋北其上爲屋十九間至會所居門曰楊明門上有閣曰朝天閣左小門曰日新門右小門曰雲會門內天井廣袤數十丈升自阼階閣下扇曰集賢殿上有大

閤曰明靈閣道右廡至大殿曰德輝殿左門曰同樂門右門曰橘應門其間皆金書曲歌嘆時世樂奏入
皇都男子十餘人皆裸上體鬬臂頓足履繞而久歌之各行一人舉手則十數人皆舉手垂手亦然其歌
有莊周夢蝶白樂天母別子章生玉簫踏歌浩歌等曲惟歎時世最愴然漫不可曉大宴殿上大樂則
奏于廡下之後樂器及人皆不見每酌酒則大呼曰樂奏某曲廡下諸而奏之其曲曰降黃龍曰入皇都
曰宴瑤池曰一江風音調亦近古但短促耳龍藥常穿壁蔓藤不離盂以龍花藥和安息香油揉爲小錠
如筋長尺許插壁上然之終日不絕香甚清馥閩廣人榴櫛皆陷乾者以蕤蔕石灰和之交人惟啖櫻櫛
櫛取新採嫩者以蕤葉二寸塗蛻灰裹而食貴者以黃銀槌值擲之不離左右終日咀嚼不少休玳簪穿
短髮蟲紐刻頑膚婦人斷髮留三寸束於頂上屈其杪再束如筆無後鬢髻亦無背沐環珥之屬富者玳
瑁耳餘骨角而已鑷銖金珠無有也人皆文身爲鉤連屈曲之文如古銅鑪鼎款識又有涅字於胸曰義
以捐軀形於報國雖有子姓亦然有室皆穿竇無牀不尙爐屋無折架法自棟至簷直峻如傾棟雖至高
簷僅四五尺又有低者故皆黑暗則就地開窗如狗竇然人用蒲席地坐而向明睡榻之側必有爐熾炭
盛暑亦然以辟溼蒸之氣星華舟作市花福水爲郭星華府卽唐驪州去交州城二百餘里海外諸番舟
航輻輳就舟上爲市甚盛曾叔昭文祖廟與其重寶皆在實大鎮也交州無城壁土牆睥睨而已西有花
福州以水圍繞前有莫橋西陽麻地老邊四橋以通出入突兀山分臘汪茫浪注瀘其國四面皆山惟寄
狼寶壑物跡馬鞍於境內爲高西南善汝縣有赤土山萬仞插天縣數百口口口口口口口口口口
南珊江以筏渡行四十里至富良江水湍急不甚闊江之南名橋市居民雜衆又四十四里曰歸化江曰

瀘江。關與溪鄂等江自大理西下。東南入於海。卽諸葛武侯渡瀘之下流也。有四津。潮汐不常。鼠關林巖
密。狼塞澗縈紆。丘溫東南行十數里。陟岡度嶺。西南行兩山間。初所見黃茅修竹。旣而深林茂樹。水闊不
數尺。然周遭百折。或百步一涉。或半里一涉。凡六七十復。度一嶺。夾道皆古木蒼藤。有巨石挺出。篋竹叢
薄。最爲嶮。名老鼠關。西行有山峯秀拔。縣亘不絕。是爲寄狼山。翠壁蒼崖。異木翳密。鸚鵡孔雀。飛鳴互答。
猿猱無數。凡三十里。抵刺竹關。下有兵守之。關上兩山相交。僅通馬道。大竹皆圍二尺。上有芒刺。蓋其國
控扼之地也。士燮祠將壓高駢塔未蕪。吳士燮。蒼梧人。兄弟四人。一爲合浦太守。一爲九真。一爲南海土
獍。爲交趾太守。有惠政。死葬焉。土人祠之甚謹。高駢旣定交州。遂於富良江上。橋市之左。立石塔。歸然猶
存。鐵船波影見。銅柱土痕枯。馬援征徵側。造鐵船四隻。沈於海。今水清猶彷彿可見。銅柱。援所立也。在乾
地鋪。其刻有云。銅柱折。交人滅。今陳日烜以土埋之。上建伏波祠。墟落多施楊。顛崖屢改途。村落有墟。每
二日一集。百貨萃焉。五里則建屋三間。四面置榻。以爲聚墟之所。使臣至其國。不復行舊徑。皆鑿山開道。
策迴跋涉。意以示險遠也。千艘商斥鹵。四穫粒膏腴。國無儲蓄。惟恃舟航賈販。稻歲四熟。雖隆冬苗芄芄
然。短短桑苗圃。叢叢竹刺衢。桑椹逐年種。以供蠶。每家三五畝。竹籬環之。刺竹大者。徑七八寸。刺堅如鐵。
斬而插之。則活。牛蕉垂似劍。龍荔綴如珠。芭蕉極大者。冬不凋。中抽一幹。節節有花。花重則幹爲所墜。結
實下垂。一穗數十枚。長數寸。如肥阜。去皮。輒爛如綠柿。極甘冷。一名牛蕉。龍荔實如小荔枝。味如龍眼。木
與葉亦相似。二果古名奇果。有波羅蜜。大如瓠。膚彌彌如佛髻。味絕甘。人面子。肉甘酸核兩目口鼻皆具。
又有椰子。膚都子。餘甘子。皆珍味可食。寶玕羅鸚鵡。名香屑鸚鵡。鸚鵡。色紅如雲母形。嘴翅似鸚鵡。故

名香材最多。水沈旃檀亦有之。似鷓鴣斑者爲貴。揭旌圖鬼像。擊柝聚兵徒。旌旗黃黑青紅。饒色四腳中。置星官天神。或如羅刹之狀。呼集儻類。則以大竹截爲筒。叩之。雖遠亦聞。鼻飲如瓠。頭飛似轆轤。習以鼻飲。如牛然。酒或以小管吸之。嗣民頭有能飛者。以兩耳爲翼。夜飛往海際。拾魚蝦而食。曉復歸。身完如故。但頸下有痕。如紅線耳。蚌皮爲鼓。擊蝦蟇作筇扶。蚌蛇大者如合抱之木。長稱之。腊其皮。刮去鱗以鞣。面闊數尺。但用背皮。腹皮不與也。向明視之。黑質白章。如方勝。交人樂以爲前列。巨鰓大如柱。鬚有長十八尺者。海濱之人。以爲挂杖。甚佳。家必烹蛇。虺人能幻虎。獮山蛇水虺。乃其常膳。間以充脯醢。嗣民有妖術。誦呪修煉。則幻形爲虎。搏獐鹿。生陷之。然不常有也。魚鱗簪粲瓦。鵲尾海浮桴。瓦形如板。上正方而銳。其下之半。如古圭然。橫半竹以爲棧。以竹釘釘其瓦於棧上。自簪以次相壓。至屋脊。宛如魚鱗。舟輕而長。板甚薄。尾如鷗鷺之翅。兩旁翹起。操以三十人。多有至百人者。其疾如飛。水弩含沙。擲山獐出穴。鐵水弩。二曰含沙射工。以氣射三十步。射中其影。但覺紅痒。卽以刀抉去肉。不爾必死。大率毒蟲毒藥。廣以南多有之。中州人至此。不善寶護。必爲所害。山獐。一曰山都。居在大木爲巢。或居巖穴。獨足跳躑。能眩惑人。蓋山鬼水怪類云。鰐魚鳴霹靂。蜃氣吐浮屠。鰐魚大者三四丈。四足似守宮。黃色修尾。口森鋸齒。一名忽雷。其聲如霹靂。鹿走崖上。聞呼吼則怖而墜。多爲鰐所啗。海中大魚多有之。惟海鰐最偉。小者亦數千尺。吞舟之說非虛也。蜃於春夏間吐氣蔽天。如樓臺宮室。亦有如七級塔者。人往往見之。壽縣傷分阻。生靈困毒痛。舞階猶未格。折簡豈能呼。大社初傳禡。轅門合受俘。貔貅微偃戢。蛇豕偶逃逋。天已殂渠惡。民猶率僇難。勢如純據隴。政以皓亡吳。鳳札重宣令。狼心更伏辜。幸能寬斧鑕。猶自戀泥塗。獻頌尊天子。騰章

遣大夫象鞅言可訂蠶冊事非誣。功欲收邊徼。威須仗廟謨。沐薰陳此什。禮部小臣孚。

剛中交州橐。至元壬辰秋九月朔。詔命吏部尙書臣梁曾。禮部郎中臣陳孚。奉璽書。問罪于交趾。越翌日。召至便殿。賜金符襲衣乘馬。弓矢器幣。諭遣之。明年正月二十有四日。至其國。三月望日。世子陳日煚。遣陪臣明字陶子奇。奉旨。梁文藻等奉表請命。以九月至京師。行李之往來。及期。凡駐僞境五十有二日。其山川城邑風俗。爲圖一卷。諭以順福逆禍。爲書人筆。悉已上于史館。茲不敢述。姑卽道中所得詩一百餘首。目之曰交州橐。以示同志云。癸巳除夕孚敬書。

七修類稿。元詩人陳孚出使安南。有紀事之詩云。鼻飲如瓠。頭飛似轆轤。予見螺蟲集中所載。老撾國人鼻飲水漿。頭飛食魚。近汪海雲亦能鼻飲酒。頭飛則怪也。昨見星槎勝覽。亦言占城國人有頭飛者。乃婦人也。夜飛食人糞云云。作書者自云。目擊其事。予又考古城正接安南之南。而老撾正接安南西北。陳詩信不誣也。

瀛涯勝覽。占城有號屍致魚者。乃婦人也。夜寢則頭飛。入人家食小兒。穢氣侵兒腹必死。頭返合體如故。移其體則不合而死矣。

句

亂山空北向。大火已西流。

詩數。元五言律可摘者。陳剛中云云。

又

櫓聲搖月過巫峽。燈影隨潮過漢陽。僧榻夜隨蛟室湧。佛燈秋隔蜃樓昏。
詩藪句格莊嚴。詞藻瑰麗。

徐明善

明善字芳谷。鄱陽人。至元間。任江西等處提舉。

席上口占

乘傳入南中。雲章照海紅。天邊龍虎氣。南徼馬牛風。日月八荒燭。車書萬里同。丹青入王會。茅土胙無窮。
中洲野錄。徐芳谷嘗奉使交趾國。其王子陳日炫聞公善詩。舉卮酒立索吟。公口占云云。日炫遂納款奉貢。公聲名大振。

馮子振

子振字海粟。攸州人。自號怪怪道人。仕爲承事郎。集賢待制。投匭隨筆。元世祖時。馮子振嘗爲詩譽桑哥。且涉大言。及桑哥敗。卽告詞臣撰碑。引喻失當。國史院編修官陳孚發其姦狀。帝曰。詞臣何罪。使以譽桑哥爲罪。則在廷諸臣誰不譽之。朕亦嘗譽之矣。吁。帝所以諱子振之罪者。正所以諱己用桑哥之失也。

傘州山人四部稿。朱氏在勝國時。有虹月樓。畫壁冠東南。楊鐵史爲之記。馮海粟係之詩。爲一時勝事。今所謂樓與畫壁俱漫滅。而朱氏子孫尙能守海粟詩蹟。

梅花百詠錄二

全開梅

玉臉盈盈總是春。都將笑色媚東君。道人放鶴歸來晚。月下看花似白雲。

疎梅

數個冰花三五枝。東君點綴特稀奇。黃昏照影臨清淺。寫出林逋一句詩。詳明本下

塔燈

擎天一柱礙雲低。破暗功同日月齊。半夜火龍蟠地軸。八方星象下天梯。光搖滌瀨沿珠蚌。影落滄溟照水犀。文焰逼人高萬丈。倒提鐵筆向空題。

詩藪全篇整麗。首尾勻和。

曹伯啓

伯啓字士開。陽山人。至元中。爲蘭溪主簿。官至御史臺侍御史。諡文貞。有漢泉漫稿。

七賢過關圖

清譚飄逸事凌遲。七子高風世所師。公室傾危無砥柱。服牛乘馬欲何之。

七修類稿。七賢過關。人多謂唐人。蓋春秋有七人。建安有七子。未嘗稱賢也。惟晉竹林諸人稱賢耳。又考王戎嘗乘小馬山。濤乘驢。劉伶乘鹿車。餘則乘馬。正符七人之騎鹿車。後或訛盡牛也。且接離烏帽。皆晉人所戴。唐則巾矣。元曹文貞公伯啓集。有七子圖詩云云。又一證也。

舟至常德出陸由辰抵沅書事三首

盤礴崎嶇力不任。遐方風景變鳴禽。舟浮湖面波瀾闊。馬憩山腰澗壑深。千里曉煙炊紫葛。一春寒霧鎖青林。紛紛寇盜何時靜。翼遂登車是好音。

蘭澧分歧望芷沅。渡頭楊柳欲飛綿。囊無蕝苳防私論。茶有茱萸敵瘴煙。心定漸忘行役苦。愁濃不覺歲時遷。從今暴殄爲明誠。曾見山頭火種田。

武陵回首望巴陵。檣退舟師就馬程。湔湔青溝穿路過。峨峨蒼嶺送人行。廟堂任使誰能避。簪麓猖狂只自驚。欲爲伏波尋勝跡。草間聞有鷓鴣聲。

元詩選延祐中湖廣諸獠以前帥失馭西南多擾伯啓爲刑部侍郎承命偕兩臺御史本省參政賈馴蒞鞫之行次沅州道且梗伯啓曰進非兵衛不可惟彼諸番酋長萬一驚疑狙候爲患不細若馳一介與之議靡不有濟衆然之乃遣監察御史揚鵬單騎詣之果得要領以歸此三詩卽是時所作

句

溪山新月上江海故人同。

仲弘集士開燕岳氏溪堂有云云句邀予及張仲實曹克明同足成之云置酒秋風裏憑闌野色中溪山新月上江海故人同縱浪情何極留連燕未終三鱸來上客五馬會羣公積水輸清氣微霞銜近空將昏林尚白及早稻先紅極論追遐古深情念困窮尙觀儀秩秩未遂樂融融才著當朝傑文誇命世雄數君今日選宜爾集南宮

又

露坐分藜榻。郊行解葛衣。村居澹煙新店舍。斜月舊河山。宿呂梁立談千古意。坐占一生閒。贈周可山積水不勝流水碧。遠山還比近山青。嘉祥道中。十年人事成今古。數老天留載典型。鄉飲禮罷次諸公韻。去歲關心如昨日。平明回首又東風。除夜山色欲冥知雨信。岸痕齊剝記潮生。江陰詠懷。

元詩選。宦轍所至。多寄寓紀述之辭。如云云。歐陽文公以爲思致敏贍。襟韻朗夷。臨文抒志。造次天成。斯足以稱其爲人矣。

鄧文原

文原字善之。綿州人。至元二十七年。行中書省。辟爲杭州路儒學正。官至集賢直學士。諡文肅。有素履齋集。

武陵勝集得入字

雨雪正紛紛。氣壓后土溼。大梁雄豪士。衝寒策馬急。欣然款柴門。稍稍冠蓋集。酒酣歌白雪。頗覺春風入。塞予守空巷。歲暮憂思積。念有流離子。飢寒夜中泣。詳白珽下。

陪高彥敬游南山

不到南山又二年。離離秋草映寒泉。東林蕭散開蓮社。西晉風流櫂酒船。古寺雲煙終日合。長松風雨半空懸。謝公未了登臨興。故向禪房借榻眠。

詩藪全篇整麗首尾勻和。

句

平生修月斧，萬里御風翰。

詩藪元五言律可摘者，鄧文原云云。

又

客舍張燈浮大白，禁鐘和漏隔華清。

詩藪句格莊嚴，詞藻瑰麗。

宋无亦作無

无字子虛，舊以晞顏字行。世家晉陵，以兵亂遷吳，冒姓朱，有子虛翠寒集、吮墨集、鯨背吟。

詠史

函谷關中富列侯，黃童亦僭上卿謀。當年園綺猶年少，甘隱商山到白頭。甘羅

紅粉捐軀爲主家，明珠六斛委泥沙。年來金谷園中燕，銜取香泥葬落花。綠珠

滄溟幾度見揚塵，曾醉堯家丙子春。近日喜無天使至，蹇驢留得載閒身。張果

化作遼東羽翼回，適逢沙苑獵弦開。寧知萬里青城客，真待他年箭主來。徐左卿化鶴

詔下東山感泣來，謫歸門巷鎖蒼苔。奉天以後誰持筆，不用當時陸九才。陸贄

貞烈那堪點虜求，玉顏甘沒塞垣秋。孤墳若是鄰青冢，地下昭君見亦羞。宋宮人王婉容

藝林伐山，宋子虛詠史凡百餘首，其佳者如詠甘羅云云、詠綠珠云云、詠張果云云、詠徐左卿化

鶴云云詠陸贄云云詠宋宮人王婉容云云王婉容隨徽欽北去粘罕見之求爲子婦婉容自刎車中虜人葬之道旁可謂英烈矣

烏夜啼

露華洗天天墮水燭光燒雲半空紫西施夜醉芙蓉洲金絲玉簫清咽秋鼙鼓鞭月行春雷洞房花夢酣不迴宮中夜夜啼棲鳥美人日日歌吳歎吳王國破歌聲絕鬼火青燐生碧血千年壞塚耕狐兔烏銜紙錢挂枯樹燭髀無語滿眼泥曾見吳王歌舞時烏夜啼啼爲誰身前歡樂身後悲空留瑟怨傳相思烏夜啼啼別離

公無渡河

九龍爭珠戰淵底洪濤萬丈涌山起鱷魚張口奮靈齒含沙射人毒如矢寧登高山莫涉水公無渡河公不可止河伯娶婦蛟龍宅公無白璧獻河伯恐公身爲泣珠客公無渡河公不然髮公老命沈黃泉公沈黃泉公勿怨天

戰城南

漢兵鏖戰城南窟雪深馬僵漢城沒凍指控絃指斷折寒膚著鐵膚皸裂軍中七日不火食手殺降人吞熱血漢懸千金購首級將士銜枚夜深入天愁地黑聲啾啾鞍下燭髀相對泣偏裨背負八十創破旗裹尸橫道旁殘卒忍死哭空城露布獨有都護名

公莫舞

公莫舞。公莫舞。鴻門王氣歸眞主。何人睚眦赤龍子。手循玉玦目相語。令公莫舞公楚舞。劍光射日白虹吐。人發殺機天不與。撞斗帳中啖亞父。霸業明朝棄如土。

長門怨

金壺咽淚蓮花澀。銀箭浮遲渴烏泣。知更阿監羅襪冰。暝對星河玉階立。內官唱漏催曉籌。芙蓉夢破燕支愁。起來妝罷窺繡戶。三十六院殘燭幽。建章風傳鳳吹遠。翠華晨幸昭儀館。笙篴不語心自語。愁長如天恨天短。紅裯暖踏楊花雪。絳縷閑封守宮血。鸚鵡空猜警蹕聲。春寒緊護流蘇結。

枯魚過河泣

北溟有鯤。飲薄崑崙氣。吞積石。摧禹門。過河河水枯。蹤跡困泥塗。垂涎向海若。能濟涓滴無。中流有魴鯉。不貸斗升水。巨口走噉嚼。逆遊莫若魴。鯉兮鯉兮。爾泣何由龍伯知。決雨津。倒天池。涖水橫行。隨鯉所之。揚鰭爲謝魴與鯉。還有桃花春漲時。

妾薄命

雲母屏。琢春冰。蛟女織綃蟬翼輕。比妾妾薄命。比君君薄情。紅綿拭鏡照膽明。還疑妾貌非傾城。傾城從來有人妒。況復君心不如故。故人心尙峯九疑。新妾那能無故時。補天天高。填海海深。不食蓮葯。不知妾心。

古硯歌

神媧踏雲補天去。遺下一團蒼黑天。千年萬年乾不得。長帶盤古青紫煙。玉工剖天天化石。石內星精有

餘魄。珞光發。爛成。禹壁。海王川。后輸玄液。青帝呵霧。坤倪溼。匣月不開。太陰泣。破天殘缺。無人補。一穴絲絲。漏春雨。空藏老石磨。今古補天。何時與天語。

馮海棠云。子虛烏夜啼。公無渡河。戰城南。公莫舞。至妾薄命。古硯歌。諸詩。皆古錦神林鬼塚。外帶三分鳳麟洲。上飛仙羽。副格力。

次友人奉別

波流雲散。碧天空。魚雁沈沈。信不通。楊柳昏黃。晚西月。梨花明白。夜東風。秋千庭院。人初下。春半園林。酒正中。背倚闌干。思往事。畫樓魂夢。可會同。

元詩選。子虛律詩。工絕。海粟盛稱此詩。中聯。高季迪評其詩。謂澹澹遒逸。于虞楊范揭外。別樹一宗。亦篤論也。

鯨背吟

梢水

拔釘張篷。豈暫停。爲貪薄利。故輕生。幾宵風雨。船頭坐。不脫蓑衣。臥月明。

鰲遊山

崖向波濤。頂接空。黃鰲遊處。樹成叢。莫言山上人。希住。多少樓臺。煙雨中。

日出

金烏搖上浪。如堆萬象。分明海色開。遙望扶桑岸。頭近。小舟撐出柳陰來。

東洋

東溟雲氣接蓬萊，徐福樓船此際開。應是秦皇望消息，采芝何處未歸來。

撈沙

萬乘龍驤一葉輕，逆風寸步不能行。如今開在沙灘上，野渡無人舟自橫。

海鷗

羣飛獨宿水中央，逐浪隨波羽半傷。莫去西湖花裏睡，菱荷翻雨打鴛鴦。

乳島

遠望渾如雨乳同，近前方信兩高峯。端相不似雞頭肉，莫遣三郎解抹胸。

沙門島

積沙成島浸蒼空，古祀龍妃石崦東。亦有遊人記曾到，去年今日此門中。

萊州洋

萊州洋內浪頻高，釘鐵千尋繫不牢。傳與海神休恣意，二三升水作波濤。

水程

九日灘頭不可移，九灘一日尙嫌遲。何須頻問程多少，路上行人口是碑。

尋鯨

萬艦同鯨在海心，一時相離不知音。夜來欲問平安信，明月蘆花何處尋。

拋碇

千斤鐵碇繫船頭，萬丈灘中得挽留。想見夜深拋擲處，驚魚錯認月沈鉤。

出火

前船去速後艖忙，暗裏尋艖認火光。何處笙歌歸棹晚，高燒銀燭照紅妝。

落篷

潮信篷留風力慳，落篷少歇浪中間。殷勤爲向梢人道，又得浮生半日閑。

走風

夜颶顛狂浪卷天，深淵多少走風船。一宵行盡波濤險，只在蘆花淺水邊。

櫓歌

浪靜船遲共一艖，櫓聲齊起響連空。要將檀板輕輕和，又被風吹別調中。

大浪

吞天高浪雪成堆，搖蕩驚心眼怕開。深謝波神費工力，幾回風雨送將來。

探淺

探水行船逐步尋，忽逢沙淺便驚心。蓬萊近處更難徧，揚子江頭浪最深。

討水

海波鹹苦帶流沙，島上清泉味最佳。莫笑行人不風韻，一瓶春水自煎茶。

討柴

海樹年深成大材。一時斧伐作薪來。山人指點長松說。盡是劉郎去後栽。

直沽

直沽風月可消愁。標格燕山第一樓。細問花名何處出。揚州十里小紅樓。

自題

乘興風波萬里遊。清如王子泛扁舟。早知鯨背推敲險。悔不來時只跨牛。

鯨背吟原序。僕初涉詩書。薄遊山水。偶託迹于胄科。未忘情于筆硯。緣木求魚。乘桴浮海。觀千艘之漕餉。勢若龍驤。受半載之奔波。名如蝸角。碧漢迢遙。一似桴槎于天上。銀濤湧洶。幾番戰慄於船中。今將所歷海洋山島。與夫風物所聞。舟航所見。各成詩一首。詩尾聯以古句。蓋滑稽也。非敢稱于格律。然而風檣之下。柁樓之上。舉酒酌月。亦可與梢人黃帽郎同發一笑云爾。至元辛卯中秋。蘇臺吟人朱晞顏名世序。

艾性夫

性夫字天謂。江西撫州人。元初官江浙道提舉。有剩語二卷。江西通志稱撫州三艾。叔可字無可。憲可字元德。性夫字天謂。皆工於詩。

哭北谷羅先生

死到先生世道衰。忍彈雙淚看銘碑。動隨天去心無愧。視得官輕事敢爲。他日史書廉太守。四方人哭老

宗師無人描畫無人詠。始是梅花自在時。

剩語自注。先生詩無人描畫云云。蓋自況也。故及之。

贈趙太史

輕柔楊柳挾春妍。孤梗梅花結雪緣。此是乾坤大消息。相逢切莫說流年。

剩語自注。此予三十年前贈先見趙太史二絕之一。予亦不復記憶矣。後三十五年。太史訪予山中。恨詩不存。惟爲余誦此。而亦忘其一。竟莫省爲何等語也。

句

安得天上蓬萊宮。卻住人間馬嵬鬼。

謂言長語。文人詞勝於理者多。白樂天長恨歌。敍明皇貴妃。天上人間會相見云云。人讀之不覺可喜。元艾性夫作臨邛道士招魂歌云云。

朱浚

浚字口口。臨川人。

贈賣墨呂雲叔訪陳煙山

僊宗傳訣自分明。未數當年老樹精。一片紫雲光滴滴。丹墀成就幾公卿。蓬萊僊子世偏珍。琮璧多攜問楚津。若向積煙峯下過。殷勤傳語臥樓人。都城初秋和趙京倅

從來美玉價連城。結佩乘風十二京。攜上嵒嶠今有約。好留彩筆調清平。
宇宙清愁望眼中。誰將涼雨借龍公。秋風夜入關河迴。破賊紅旗翥曉空。

句

西風落葉長安夢。晚節寒花老圃心。京師九日玉帳分兵賦采薇。梅華吹雪上戎衣。將軍意氣中流楫。丞相功名采石磯。送人巡江金塞霜氣山無虎。劍動星光水有龍。平江虎邱山皇帝當年第九春。宮符仍詔刻麒麟。軍咨祭酒金臺夜。國子先生鐵壁人。送吳制參赴麟州落花水煖千船聚。芳草春深一鶴歸。南浦夜泊米車已過塵迷路漁網纔收月滿船。枇杷亭海燕故人意。杜鵑游子心。次韻故里千山隔終年一字無。訪舊谿月知相憶。江雲約共吟。夜船書一紙。飛過赤楓林。寄友

隱居通議頃壬辰癸巳歲。有臨川朱兄浚過訪。出其詩曰。梅邊集。以惠教。予愛其流麗穩熟。不作寒乞語。爲跋其後。已而與之庶酬。則與集中作大異。豈謀野則獲。與蒙被作文。性情各有所宜耶。然極愛之。爲摘其句。七言律有西風各云云。五言不多。海燕各云云。絕句云云。

元詩紀事卷十

高克恭

克恭字彥敬其先西域人後居燕之房山初仕爲省郎官至刑部侍郎卒追贈刑部尙書諡文簡有房山集

過京口

北來朋友不如鴻幾個西飛幾個東多少登臨舊樓閣闌干閒在夕陽中

過信州

二千里路佳山水無數海棠官道旁風送落紅攬馬過春光更比路人忙

鐵網珊瑚王士熙題高房山畫云詩甚有唐人意度作樂府止記兩句曰無限飛紅隨馬足春光更比路人忙

弋陽

雷聲驅雨轉山西山腹雲根似雪齊日暮牧兒歸不得料應白水漲前溪

拍洪樓

仰有嵐光俯有溪軒窗初不計東西雲峯雨岫安排定松竹林林自整齊

其二

山腰澗曲繚短垣，百怪老樹龍蛇蜿蜒。山翁有時抱琴至，雪霽月明開北軒。
滿目雲山樓

溪頭白鷺來相安，溪上紅桃雨打殘。滿目雲山爲誰好，一川晴色上樓看。

卽事

古木陰中生白煙，忽從石上見流泉。閒隨委曲尋源去，直到人家竹塢邊。

鐵網珊瑚水村圖卷跋。大德八年五月，還自江西，過虎邱，舟中子敬攜此卷見示。俗客以惡酒相撓，情況構詩不成，遂書途中所作。少答雅意。房山高克恭。

其二

雞鳴上馬戴星還，鄰近人家見面難。一度相思一回首，二千里外得相看。

寄友

並行沿堤步晚晴，野香牽引過林垌。誰知卻是江南夢，尋到西曹夜直廳。

濟州道庵

草色琅玕逼兩楹，早陰纔過午陰晴。斜陽又送西軒影，一就移床待月生。

吳禮部詩話：吳興姚子敬手寫高彥敬尙書絕句一卷，皆佳。云云：子敬爲人修潔，詞翰皆工。此卷作行草，尤可愛。

案以上十首皆見詩話，前七首見鐵網珊瑚。

句

雲山隨處覺。風雨興中孤。

好古堂書畫記。高房山雲山大幅自題云云。高克恭併題。案高常侍詩云。雲山行處合。風雨興中秋。此略改之。

李材

材字子構。京兆人。

海子上卽事

馳道塵香逐玉珂。彤樓花暗鼓雲和。光風漸綠瀛洲草。細雨微生太液波。月榭管弦鳴曙早。水亭簾幕受寒多。少年易動傷心感。喚取蛾眉對酒歌。

句

劉郎再來歲云暮。王母一笑天回春。

松雪齋集。海子上卽事。與李子構同賦。原注。李詩云云。子構名材。京兆人。年十七。賦此詩。不幸早亡。雜於唐人詩中。未易辨也。客有賦十月桃者。子構云云。衆皆鉗口不作。亦奇句也。因附此。

又

天入五溪無雁到。地經三峽有猿啼。

詩藪。李子構云云。詳趙孟頫下。

姚式

式字子敬號筠菴吳興人善書畫高克恭薦爲校官

趙子昂畫謝幼輿邱壑圖

黃塵汚人廊廟具蕭散風流誰比數清言善畫浪相傳遺恨千年機上女

珊瑚網趙文敏畫謝幼輿邱壑圖吳興姚式題云云鄧楡木之云云虞集云云宋光云云趙雍跋云右先承旨早年作幼輿邱壑圖真跡無疑拜觀之餘悲喜交集不能去手無言師宜寶之倪瓚云云

珊瑚木難趙魏公畫幼輿邱壑圖跋予自少小愛畫得寸縑尺楮未嘗不命筆模寫此圖是初傅色時所作雖筆力未至而粗有古意邇來鬚髮盡白畫乃加進然百事皆嬾欲如昔者作一二圖亦不可得右之要予再跋故重書以識之孟頫又趙雍跋右先平章初年所作雍至正十七年春至錢塘鄒伯常復以見示拜觀之餘悲喜交集展玩不能去手伯常宜寶藏之又趙麟跋此圖乃先大父早年所作真跡無疑至正丁酉四月拜觀於會稽之寓舍又宇文公諒詩云云又楊維禎詩序伯常避難東徙家資如山委棄不復顧戀獨珍惜此畫不忍使失去客中時一展玩輒欣然自慰雅好異於流俗深可敬也

題水村圖

問君何許水邊村亦有扁舟乘興人無限好山茆屋外他年倘許我爲鄰

珊瑚木難。息齊居士。舊嘗爲隱釣作水村圖。題云云。旣還吳興。復來見子昂。此圖意象融會。令人應接不暇。又何暇詩。非德鈞詎能領會耶。姚式書于姑蘇寓館。

鄧榆

榆。字木之。

題趙文敏畫謝幼輿邱壑圖

一邱一壑絕塵坌。坐看前山出白雲。可使玉堂揮翰手。卻疑大小李將軍。見姚式下

趙孟頫

孟頫字子俊。

題水村圖

暖暖水邊村。蕭條絕塵滓。錢君智者徒。而後能樂此。平生丘壑情。所向政在是。問誰爲此圖。吾兄能固爾。
詳錢仲鼎下

李淦

淦字性學。建昌南城人。官揚州儒學正。升江陰路教授。

癸辛雜識。葉李爲李性學所窘。飲恨而終。

元史葉李傳。揚州儒學正李淦上書。言人皆知僧格用羣小之罪。而不知葉李舉僧格之罪。宜斬李以謝天下。李南還尋卒。

雪樓集李性學官國子助教一食能盡肉數斤不娶善談論不知有男女事或端坐至旦

句

天下今無讀書者人間惟有作詩人

癸辛雜識李性學之爲吾教也有詩云云其後得罪於巨室故遭完顏御史之怒杖幾及身閤子靜援之而免

李孟

孟字道復上黨人至元中裕宗召見東宮不及用成宗立薦爲太子師傅官至中書平章政事賜爵秦國公改封韓國公諡文忠有秋谷集

贈黃秋江處士

君釣秋江月我耕秋谷雲逃名君笑我伴食我慙君老我素多病壯君高出羣何時各歸去雲月總平分黃文獻集秋江黃君墓誌銘一清字清夫休寧人入京師謁李公君古貌長身鬚髯如戟寬衣高冠容止簡率又作吳語左右多目笑之公望見大驚異卽下執其手延之上座名動京師君以秋江自號而李公自號秋谷遣君詩有云云之句朝野傳誦滿口趙文敏公寫以爲圖君辭歸築山房摘李公詩語爲扁名以見志公欣然遣以錢助之

吳文正集平章政事李公以公輔之尊而友處士之賤贈之以詩章重之以序引可謂忘勢謙己者矣然公之詩云云亦一時姑爲是言而已晚節而踐斯言也豈不高出一世也哉定宇先生文

集。清夫素志乎秋江釣月。然結知大臣者數年。雖欲曩一絲風於見底江上而不可得。秦國公嘗欲以詞翰薦之力。以養母辭歸。又將築釣耕山房。與母偕隱。秦國公以當世大臣。乃肯下友一士。圖其秋谷耕雲。與秋江釣月四詩。且序之。以雲月平分爲約。此盛德事。古今寡二。

袁易

易字通甫。吳郡人。署徽州路石洞書院山長。有靜春堂集。

靜春堂詩集。郭麟孫序。及歸隱於松江之濱。築室治圃。種花藝竹。繞舍芙蕖數十畝。雜植菱芡蓴菜。於其閒扁其堂曰靜春。聚書萬卷。暇則具筆床茶竈。扁舟五湖。盡取乾坤清氣以充其詩。

又附干文傳記。與郭祥卿龔子敬相友善。趙文敏公稱爲吳中三君子。嘗作袁安臥雪圖以贈之。

杭州道中書懷四首

涉世恆多故。謀身轉益迂。馬周聊逆旅。阮籍豈窮途。鷺宿依船尾。楓彫落酒壺。遠行慄慄意。對此不能無。白露籠舟楫。青山失畫圖。往來迷只尺。收歛忽斯須。野曠連飛鶴。江清映浴鳬。還將明媚色。且復慰征途。堤柳欹招攬。汀花笑入舟。高歌鳬鵲起。闊視水雲流。牢落江淹恨。飄零庾信愁。都將付尊酒。短髮得禁秋。憂患看飄瓦。浮沈任轉蓬。題詩霜葉赤。對酒燭花紅。嵇阮情何曠。陶韋意未窮。前賢負高興。不必萬人同。

重午客中三首

往恨湘纍遠。他鄉楚俗同。流傳存弔祭。汨沒見英雄。竹葉於人綠。榴花此日紅。未須嗟旅泊。吾道豈終窮。湖上冥冥雨。和愁細似塵。翠嵐沾玉塵。清潤逼綸巾。他日看濃抹。茲晨傲淺顰。遂諳山水意。有爲苦留人。

令節殊方客。虛樓暮雨時。何心吟鑄鏡。予髮欲成絲。昌歎誰浮玉。芳醪且滿卮。今朝羈旅思。更用獨醒爲。

寄吳中諸友六首

錢德鈞

風雨蕭齋裏。雞鳴夜向晨。簡編心力盡。燈火鬢毛新。餘地知游刃。何人解斲輪。煩君無割席。漂轉暫埃塵。

蕭子中

並馬春風陌。高歌夜雨牀。遨遊前夢失。漂泊此身忙。綠酒西湖色。冰肌六月涼。難招髣髴似。戟來對玉成行。

湯師言

卓行拘常調。微官更數移。君懷同棄屣。吾道歎如絲。濩落才高世。飛騰命與時。晚成梁棟器。剩破十年遲。

唐希賢

枉策招尋密。高談謔浪俱。他鄉懷楚奏。何日攬桓須。白月垂文練。青天落酒壺。看君話心事。餘子盡崎嶇。

趙明仲

共話巴山雨。曾題華步秋。儒官雖寂莫。公子是風流。卽擬同吳詠。焉知效楚囚。江南新作賦。寄爾恐添愁。

馮景說

之子華簪裔。簞瓢祇晏如。爲郎應駐輦。延客愧無車。早託襟期合。能容禮法疎。一燈何日共。料理讀殘書。鐵網珊瑚右十三詩。命意閑遠。下語清麗。可謂不流于俗矣。然少加精密。杜少陵黃山谷不難到也。困學民漁陽鮮于樞題其後而還之。大德辛丑冬至前一日。

戴天錫

天錫一名錫字祖禹山陰人官會稽學正。

次韻王理得往昔行

美人昔愛唱伊州。少年未解人閒愁。五侯繫馬春日暮。白雲遶梁花滿樓。同遊星散樂難得。重逢卻怪旁人識。花隨塵土暗芳菲。鳳閉樊籠摧羽翼。不須感舊爲淒然。夢境悲歡能幾年。君看古來歌舞地。梁園金谷成荒田。

吳禮部詩話讀此可信。

句

乘閒爲我弔李白。醉臥江邊不復醒。當時錦袍照綠水。今日孤墳秋草生。當時超逸真絕倫。儗如玉龍上天門。朝馳峻坂飛正練。暮浴深淵浮素雲。四蹄飽踏咸陽月。滿身猶帶燕山雪。祇愁元霧閼雄姿。未許清塵汗血。去年別爾雁南征。今年迎爾春水生。我心思爾如江水。回波相續無窮已。君如鴻雁早驚霜。方逐長風度千里。

吳禮部詩話戴錫祖禹能詩。因牧心推獎。遂知名。送白湛淵教授宣城云云。人呼戴綠水。天馬圖云云。人呼戴白馬。送牧心云云。

盛彪

彪字元仁號虎林臨安人官至鎮江學正。

挽陸秀夫

紫宸黃閣共樓船。海氣昏昏日月偏。平地已無行在所。丹心猶數中興年。生投魚腹不見水。死抱龍髯欲上天。板蕩純臣有如此。流芳青史更無前。

吳禮部詩話。陸秀夫抱幼主沈海。諸公作挽詩。惟盛元仁一章爲冠云云。盛號虎林。

盧亘

亘字彥威。汲郡人。元貞閒。姚燧薦爲國史院編修。官至翰林待制。

送侍講學士鄧善之辭官還錢塘

一作送鄧善之提舉江浙十首

北門古深嚴。論思寄籌度。自非鴻才士。一作世訓詰何由作。夫君出巴蜀。文采動京洛。十年掌絲綸。摘藻揚景鑠。荆璞抱瑾瑜。龍淵淬鋒鏑。肯獻上林賦。寧居天祿閣。卽今觀浙江。眷戀睇金雀。黃圖鬱紫氛。絳節生一作森碧落。依然難爲情。清霜養一作捲飛藿。

春秋嚴筆削。凜若執玄鉞。君獨抱遺經。結髮飽剗劓。明剖是非心。微探義理窟。下視羣兒愚。爭端王正月。揭來奮直筆。浩然心思竭。一作絕王功與帝德。昭昭日月揭。胡爲厭詞林。南一作擬欲觀溟渤。榮華若浮煙。汗簡青不滅。

詞林富聲華。幾人得精悍。悠悠三百年。篇翰孰承續。夫君清廟器。裸薦盛圭瓚。五就惜鯨纓。九旂載雲罕。依依風向羽。忽忽月新滿。泠然時雨情。一作晴短章不可斷。

風雨妒芳華。稂莠深嘉穀。天地豈不仁。盛德稟命獨。明廷萃羣英。四門延穆穆。旣卜渭水釣。又起傅巖築。

聲華何岌岌。衆輻輳一轂。鑿坡儼清韻。碩人歌在軸。願言往從之。星駕命宜夙。豈知彼玄鳥。戢翼辭雲屋。
幸無素絲悲。庶免窮途哭。
離離天星高。皓皓雲月光。候鴈過楚澤。蟋蟀鳴中堂。天時諒難測。徒然多感傷。念子去意遠。沈憂結衷腸。
憶昔初奉歡。露白春蘭芳。清尊罷新製。妙趣深濠梁。飛景急西匿。川流浩湯湯。玄髮淒歲晚。木脫天雨霜。
蔓草豈容惜。松柏在高岡。
翰林子元子。武庫森戈矛。英聲邁千古。逸韻橫九州。與君契金蘭。投分何綢繆。清和謝夷惠。典刑追韓歐。
坐令人文煥。允塞昭王猷。念君獨遠邁。寥落行人愁。木瘦楚山曉。風靜寒江流。何當駕飛車。卻憶昆侖丘。
塵埃滿腥腐。朝莫同蜉蝣。
陽谷上寒日。影射扶桑枝。瞬息及中天。流光迅難持。人生百年內。昂昂何所施。孤鴻東南征。浮雲西北馳。
可憐萬感身。會合須臾期。安得弄明月。皎皎遠憂疑。折花芙蓉浦。蕩槳江潢涯。優游以卒歲。身名良不墮。
雲鱗游蒼穹。閭闔不可叫。徒令虎豹關。日月近輝耀。濛濛八表塵。隱隱萬彙竅。泯然一歸途。伊誰執其要。
栖栖聖者徒。禮樂懷幼眇。閉門忍朝飢。風雨深蓬蓼。今年江海去。光景短螢爝。禾黍滿故墟。閭巷餘返照。
揮絃送飛鴻。古今入長嘯。
昔我適吳會。日夕承歡顏。高堂樂起舞。綵服何焜爛。東海洶波濤。西湖翠煙疊。北歸餘十年。謬蹟通朝班。
家禍一朝集。音容何可攀。悲號蒼穹迴。往事思日艱。命窮時亦迫。志弱體自孱。安得騰化術。從君超人寰。
執手不忍訣。臨風涕空潛。

我留君勿思。君歸我當憶。十年膠在漆。一旦各異域。吳江激微波。震澤起暝色。鵲鵲隔天地。雁鶩雜南北。念我平生友。愴恨摧胸臆。獨看燕山雲。歲莫日初昃。永言長風翔。情寄南風翼。

詩數。盧彥威送鄧文原十首。雖格調規倣唐人。而氣骨成就。意象老蒼。其中合作數篇。足爲元五言翹楚。而不甚知名。

袁桷

桷字伯長。慶元人。大德初。薦爲翰林國史院檢閱官。官至侍講學士。諡文清。有清容居士集。研北雜志。袁伯長學士博聞洽識。江左絕倫。謂張伯雨曰。宋東都典故。能以歲記之。渡江後事。能月記之。

子昂逸馬圖

神駿飄飄得自閒。天池飛躍下塵寰。青絲絡首誰收得。留與春風十二閑。

清容居士集。通叟狀元。以祕書滿職言歸。泊然若無營者。桷舊與廬詳定得通叟卷。氣完以充。議者爭絨口。今其南歸。以子昂畫馬求言。愴然以別。吾徒之責。深缺然矣。至治元年八月二十九日。桷書。

昌上人游京師。欲言禪林弊事。甫入國門。若使之去者。昌余里人。幼歲留吳東郡。遺老及穎秀自異者。多處其地。以予所識聞。若承天了。天平恩。穹窿林開元茂。皆可依止。遂各一詩以問訊。虎邱永從游尤久。聞其謝世。末爲一章以悼。六首。

人說江湖少舊僧。懸崖高挂一枝藤。采苓欲取千年魄。擊石曾烹六月冰。天上星辰端歷歷。胸中樓閣自
層層。相逢止說前朝事。知是松源第四鐙。

青巖高挂天平壁。指點雲門三兩峰。禪榻已容黃葉覆。詩瓢從把碧苔封。曉風殘月千村杳。細雨疎燈隔
水春。我向京城疑老盡。吳山清淺越山濃。

獨木山寮不出門。一餅一鉢送朝昏。巖迷鳥跡千崖泣。松吼龍吟萬壑奔。掩息端如雞抱子。愛閒屢見竹
生孫。海門月落寒潮急。準擬乘槎與共論。

玉几峯頭第一枝。老禪吃吃我深知。曾將鐵杆敲冰骨。似怪鉛刀割蜜脾。法外無心猶涉解。句中有眼即
成疑。加沙不展蒲團穩。此是開元妙總持。

我識虎邱三十年。精神霄漢鶚張拳。機當危處即燒印。語到盡時難續弦。路涉兩歧空有泣。溪流一滴竟
無傳。雙峰古樹蒼筤冒。時有子規啼徹天。

山人歸去意何如。八尺方牀自卷舒。側岸採茶敲石火。隔峰剪竹溜清渠。碧潭印月菱花鏡。白雁橫空貝
葉書。後日相逢定何處。不于吳下卽康廬。

戴九靈集此六詩。袁文清公爲商隱師作也。元之盛際。文清以學問詞章名震天下。而片言隻字。人視之如圭璋珠貝。願一觀之而不可得。然獨於商隱無所愛吝。如此則商隱必有大過人者。按商隱乃龍山永樂寺僧。文清嘗與同參橫川和尚。橫川時住玉几山之育王寺。雲頂源師。虎邱永師亦與之同參。詩中所言玉几雲頂虎邱者。蓋指此三人也。此詩今爲商隱法孫本歸所蓄。間出

以相視。余視之。使藏諸名山。庶千百年知商隱之結交文清。猶如佛印之於東坡。靈源之於山谷。文清與商隱同里閭。

觀真文忠公畫像

翠賢輔絕學。嵯峨武夷峰。熒熒方瞳光。汲汲汗簡中。緬冀文明初。蒼珮極匪躬。執筆侍玉署。妙語工彌縫。飛塵變蒼狗。潛淵閤游龍。空餘經濟心。勞徠飢飛鴻。濁水投神膠。揚清乃奇功。喬松不並世。寒飈轉秋蓬。生世我已後。正緒遺顒蒙。惕然拜公像。斯道非終窮。

曾大父樞密越公嘉定辛未與先生同官奉常寶慶初同爲侍從先生被黜先公亦以論邊事去國獲拜遺像并識于后

王忠簡公嘉定入朝曾大父越公獲隨班著暨端明公嘉熙間以西山先生門人敬歷麾節先公則已捐館櫛向遊學婺女得拜端明公之次子令尹道家世遺事纒纒不絕口今復見其孫申伯于鄞喬木摧落櫛深爲此懼瞻仰西山先生遺像因敘事契并以自勵亦以勉夫申伯

仲章詩律大進數日道中論詩亦頗相合復次前韻以勉之

氣劇屈賈欲平揮格律論詩要有歸石髓定成千歲乳藕絲空綴五銖衣寒原草盡蒼鷹攫涼月松陰白鶴飛從此窮河天已近還家何用詫支機

元詩選此下尚有次韻詩三首題云仲章詩律已入唐人風調而下語猶未馴妥殆類唐人過橋斷橋之意近世學者類有此失仲章德業遠大當不若是此殆其弄翰也其詩中警句如苦心欲

寄千年簡。妙語誰傳半夜衣。麒麟瑞世非關走。鵬鷃呈空不爲飛。俱見古人相勉之意。

袁哀

哀字德平。與桷爲族兄弟。善書法。隱居沙家山。常作求志賦。以敍次先世遺業。詩多失傳。有聯句諸作。

東湖聯句

舊學蕪三史。新居隘一廛。煎熬魚煦轍。奔竄鳥驚弦。擬整登山屐。伯長須乘破浪船。出關塵已遠。德平過
埭意爭先。歸舶攢桅聚。伯長浮梁斷鎖懸。潮渾江葑沒。德平塍破岸。藤纏戍柵依。樟密。伯長官堤砌石平。
機閒蠶喚織。德平砧響雁傳箋。乍靜喧煩耳。伯長猶欣輾轉眠。鵲橋華屋廢。德平鵝雁曲河連。稠實閑農
具。伯長巖巖絕竈煙。急裝紅蔽膝。德平辮髮黑垂肩。估客編文具。伯長邨家緯木棉。生涯疲剝割。德平世
路窘連遭。龕室休行客。伯長郵亭歎逝川。鞞鷹圍獵罷。德平聯騎縱遊旋。路轉分支港。伯長川明幻別天。
鄮城花已暗。德平甬水恨空傳。數堠搜唐刻。伯長題詩紀宋編。會堂夫子像。德平汲井隱居泉。海眼藏龍
窟。伯長山心射鹿田。水鳴知櫂急。德平岸走訝途遷。隱見岡嵒近。伯長低昂橘柚鮮。青山猶五里。德平綠
樹已千年。歸犢如雲擁。伯長閑花似火然。苧裳遊女淨。德平蘆管野伶妍。繫纜披團毼。伯長循溪舍竹簷。
徑香幽菊傲。德平土薄假山偏。鐙火精廬古。伯長衣冠故物全。登門論子姓。德平對坐敍姻聯。金魄篩窗
影。伯長丹砂養井淵。螢飛光熠燿。德平鶴唳翼涓涓。斗室橫烏几。伯長方牀藉素氈。魂清時入夢。德平意
得竟忘筌。過墓成局戶。伯長遵湖復扣舷。滄洲迷秀麥。德平真隱拱朱椽。碧洞諸天杳。伯長蒼珉帝畫鐫。

梯危頻縮武。德平像寂且擎拳。紫府商霖歇。伯長丹書漢澤宣。銅鋪苔暗蝕。德平經皮燕新穿。倦鳥辭枯柳。伯長游龜戴旱蓮。古奩開激澗。德平斜穀縐漪漣。淤塞菱排劍。伯長洲乾蓼糝鉤。官徵都尉粟。德平漁納水衡錢。王絕山靈泣。伯長祠荒野老憐。紙旗鄰社鬧。德平草廣曲河填。此去真聊爾。伯長斯行信偶然。柏幽藏烟翹。德平潭黑袞蜿蜒。雅興呦呦鹿。伯長勞生跼跼驚。芳真昭蔗。德平寫絕擬和鉛。轍跡蕪菁翳。伯長麻菰泉耳緣。貞娥鬱龍虎。德平胄相紹貂蟬。宰木分神隱。伯長思亭列石筵。風霜翁仲老。德平香火釋迦專。楚些招歸魄。伯長王宮慨昔賢。拜峰誰控勒。德平篆水自書玄。屈曲東西路。伯長縱橫南北阡。僊華昨轉電。德平得失口垂涎。絮酒悲宗老。伯長囊經想地僊。房溫連梵唄。德平市近接腥膻。破露生衣溼。伯長登坡弱足胼。臥牛遺扁暗。德平眠鹿繪容虔。金利從茲訪。伯長塵纓合少蠲。伐山鑿運蹀。德平街雪子猷顛。檜煖蜂偷蜜。伯長蘆寒鳥喙綿。蟹稀螯數百。德平樵夥斧論千。淡日收人影。伯長空嵐漲土塹。蒲葵遮望眼。德平繭紙論吟篇。除道家僮嬾。伯長偷程地主僊。蟻封徒曲折。德平駒隙漫拘攣。碎石行行直。伯長修篁个个圓。深叢驚雉翠。德平夾徑聳楠楸。濯錦芙蓉艷。伯長飄香桂子駢。雕楹回複道。德平斜開布陶甑。刻畫功難盡。伯長蜚勢欲翩。奉常陳劍履。德平尙服錫紱綬。憶轍鮫人網。伯長帷凝闕國旂。妖姝汙粉頰。德平土偶聳高顙。祛石當時力。伯長臨淵背日權。只今留舊業。德平何處覓幽禪。燕領風雲會。伯長龜趺日月躔。蛛窠綠袞服。德平鼠跡上朱籬。累僕供朝沃。伯長因僧進午餐。佳城蹲五鳳。德平素業廢三鱣。勝己窮蘭若。伯長名猶慕偃佺。臺空霞珮冷。德平殿寂羽幢蕪。觀主何年住。伯長真官永世鍵。畫梁誰復葺。德平美蔭久頻廢。木已非真李。伯長僧宜賤壽錢。悲來雲霧羃。德平恨極水潺湲。重嶺藏椒

屋。伯長斜暉指蕙楊。暫歸心未穩。德平欲去眼空眩。憶昔窮誅闢。伯長如今猛棄捐。慈山名轉赫。德平因
壘恥誰湔。積翠林霏悄。伯長流波海月娟。遠鐘催宿鳥。德平橫笛挂烏韃。拄笏風騷發。伯長攜壺主僕牽。
情懷同黍醴。德平臭味比香荃。圓澤休論舊。伯長華胥復記前。乳彪號澗側。德平哀狢嘯雲巔。倬族盤餐
盛。伯長通家笑語閒。鳩鵲歸槩熟。德平舴艋逆風沿。濟勝應難促。伯長臨流且賦遄。鳴夷歌逝矣。德平漁
父卜終焉。紫槿遮籬角。伯長丹楓壓廟堧。鍊形金骨化。德平團礎土砂堅。破屋啼山鬼。伯長荒碑立老鷗。
歲時羞野賽。德平水旱禱靈輦。西帝澄金字。伯長東湖鑄玉璫。涼颼舟泛泛。德平晴日草芊芊。射鴨繁長
弋。伯長叉魚擊短艇。酒廬橫矮甕。德平屠几斫肥脰。街市僧袍麗。伯長招盧販鼓簫。登臨難婉戀。德平想
像費平銓。更欲南窺海。伯長誰能北跨燕。同心雙繭緒。德平狗俗走珠蟻。朗鑒詞聯寫。伯長玄談茗更煎。
翺翔誠放浪。德平匍匐類狂孱。已乏凌雲句。伯長時思縮項鰻。還家如夢寐。德平共點曉霞邊。伯長

清容居士集。九月望日。送姊歸余氏先塋之廬。登其高祖少師墓。相傳爲外高祖忠定王所相。余
氏之興兆于此。支壘爲尙書公墓。亦爲佳兆。十六日早發。遵山行一二里。拜外舅之考待制公。守
墓僧畏祇迎。閉關叩之。終無人聲。山勢左行。清興未已。借余庵舟過東湖。上外曾祖忠宣公滄洲
堂故基。悽惋久之。舟上埭。余與德平行。至月波忠定王所建寺。後有洞像。補陀示相。舍舟登葉夫
人入行太師墓。又上五祖堂觀招魂辭。莫抵鹿野。拜正肅公祠。奠永州几筵。行久殊爲疲勞。是夕
德平抱兒相示。眉宇修廣。予許以永大。十七日平明。過種德。拜正獻公墓。讀楊文元公碑。庵僧洒
然。非鄭氏庵比。是日德平攜壺同庵僧指游領大慈七山。有僧年七十餘。能道嘉定紹定閒事。示

忠宣公所製滄洲堂上梁文益重遠想拜忠獻王墓歸復宿鹿野嚴君命以十八日歸歸游鮑王祠日已昃余親翁病瘡復留宿詩成凡一百二十韻縣華感慨悉紀于詩詞雖不工然二人綴緝之勤有不可不示于好遊者用識于後云己丑十月某日柄書

鄧椿

椿號覺非叟

題水村圖

向來寓意思卜居住處只今成畫圖胸中本自渺江海主人相浼寫分湖
鷗鳥難渝舊約湖山不改清秋人自與波上下我其卒歲優游

珊瑚木難題前詩竟復得六言一首併書其後餘詳錢仲鼎下

吳延壽

延壽號梅塘

前題

村南村北樹濛濛秋水清涵野色空道外俗塵飛不到似移家住畫圖中詳錢仲鼎下

顏天祥

前題

疎柳平蕪落雁飛斷橋斜日釣船歸江天萬頃秋如畫一笑人間醉墨非同上

錢資深

資深字原父仲鼎子

前題

屋後青山門外溪疎疎蘆葦壓漁磯地緣清絕人堪愛長是三春雁不歸同上

林宏

前題

青山橫陳水縈浦饑鴻高超漁設罟中有幽人坐環堵晚風吹斷蘆花舞同上

葉齊賢

齊賢字□□松陵人

前題

坐牕不遯呻蠹竹兀兀那知脾生肉眼明見此水邊村浣我胸中塵百斛荒山寂歷蒼煙斜驚風颯颯鳴
兼葭平沙暮寒羣雁起垂柳掩映幽人家風流王孫摩詰手妙處端如神所授等閒點綴皆精妍怪底秋
光生戶牖我家本住松江濱恍然一見融心神他年卜築遂君志留取青山容散人同上

陸桂

桂字□□吳郡人

前題

牛馬百川獨渚。烏鳶羣木西村。天地四方黃鵠。先生秋雨柴門。
忽有滄浪鳴笛。飛鴻黃葉雲深。想望美人秋水。卷簾隱几何心。同上

從大

從大姓未詳。元詩癸集戊上有潘從大。宛陵人。不知卽此人否。

前題

錢子守道殊自適。某水某丘藏袖中。有時對客且舒卷。坐我絕境煙波空。參差老雁忽飛起。微風欲拂蘆葦叢。灣埼寂寥懸網罟。夕陽隱約歸漁翁。遠山近山雲漠漠。前村後村水重重。適從何來蕩雨漿。岩崖浦溆遙相通。深林蔽虧八九家。竹籬茅戶旣不同。青天白日機事息。樂此耕飲得古風。誰言見畫獨幻影。我欲振衣卽往從。因思輞川著摩詰。復想嵩山棲盧鴻。只今好事空見畫。山川緬邈悽遺蹤。同上

黃肖翁

前題

幽人心地本脩然。此境相諧七十年。茅屋數椽依約外。雲山一抹有無邊。眼前生意今林屋。筆底秋風古輞川。勝景有餘描不盡。歸鴻幾點落寒煙。聚山黃肖翁

東南仲

前題

空林有影連山遠。流水無聲帶雁寒。自是漁樵真樂處。不知圖屋與誰看。東南仲

孟淳

淳字口口漢東人

前題

茅舍竹籬山掩映。蒹葭楊柳水縈紆。漁人定指扁舟路。歌客應尋隱者徒。漢東孟淳以上錄勗湖木齋

元詩紀事卷十一

虞集

集字伯生，蜀郡人。宋丞相允文五世孫。父汲，僑寓臨川之崇仁。大德初，薦授大都路儒學教授。官至翰林直學士，兼國子祭酒。奎章閣侍書學士，諡文靖。有道園學古錄。

元史：早歲與弟槃同闢書舍爲二室。左室書陶淵明詩於壁，題曰陶菴；右室書邵堯夫詩，題曰邵菴。故世稱邵菴先生。

東山存稿：嘗欲取太原元公中州集遺意，別爲南州集。惜篇目雖具，而書未及成。

五雜俎：虞集未遇時，爲許衡門客。虞有所私，午後輒出。許每往不遇，病之。因書於簡云：「夜夜出游，知虞公之不可諫。」虞歸見之，卽對云：「時時來擾，何許子之不憚煩？」許大歎賞，因薦於朝。

滄浪詩法：李元仲御史云：「豫章三日新婦揭，浦城百戰健兒楊。」蜀郡唐臨晉帖：虞清江漢法令師范馬仲常云：「揭君典重，楊君雄渾，虞君雅麗，范君清高。」

詩藪：虞文靖學杜，閒及六朝。

詩話類編：伯生在宜黃時，嘗倚樓吟詩。有五更鼓角吹殘雪句，忽隔溪一童，掛而言曰：「角可吹，鼓不可吹。」亟命召之，已失所在。蓋詩鬼也。

送袁伯長扈從上京

日色蒼涼映赭袍。時巡毋乃聖躬勞。天連閣道晨留輦。星散周廬夜屬櫜。白馬錦韉來窈窕。紫駝銀瓮出蒲萄。從官車騎多如雨。祇有楊雄賦最高。

蜀中詩話。虞伯生先生。楊仲宏先生。同在京日。楊每言伯生不能作詩。虞載酒請問作詩之法。楊酒既酣。盡爲傾倒。虞遂超悟其理。繼有詩送袁伯長先生扈駕上都。以所作詩介他人。質諸楊先生。先生曰。此詩非虞伯生不能也。或曰。先生嘗謂伯生不能作詩。何以有此。曰。伯生學問高。余曾授以作詩法。餘莫能及。又以詣趙魏公。詩中有山連閣道晨留輦。野散周廬夜屬櫜之句。公曰。美則美矣。若改山爲天。野爲星。則尤美。虞深服之。嘗有問於虞先生曰。仲宏詩如何。先生曰。仲宏詩如百戰健兒。德機詩如何。曰。德機詩如唐臨晉帖。曼碩詩如何。曰。曼碩詩如美女簪花。先生詩如何。笑曰。集乃漢廷老吏。蓋先生未免自負。公論以爲然。

案此則詩話。本輟耕錄。與李元仲說小異。

送程以文兼簡揭曼碩

故人不肯宿山家。夜半驅車踏月華。寄語旁人休大笑。詩成端的向誰誇。

堯山堂外紀。揭開三日新婦之語。不悅。嘗中夜過伯生。問及茲事。一言不合。揮袂遽去。後以詩寄伯生。奎章云。伯生得詩。謂門人曰。揭公才力竭矣。就答以詩。故人云云。并題其後云。今日新婦老矣。揭召至都。果疾卒。

江西通志。虞文靖公嘗作范德機詩序有云。當時中州人士謂清江范德機。浦城楊仲宏。豫章揭

曼碩及集四人詩爲四家。且以唐臨晉帖喻范。百戰健兒喻楊。三日新婦喻揭。而喻集爲漢廷老吏。序出。適揭公歸省墓。見之大不悅。遂往臨川訪虞公。既相見。言及茲事。虞公曰。誠有之。非集之言。中州人士之言也。非惟中州人士爲然。亦天下之通論也。揭公拂然。遂卽席告別。虞公堅留。不得。竟駕小車而還。既別去。揭公乃於天歷年間。以四詩寄虞公。中有奎章分署隔窗紗。學士詩成。每自誇之句。公得詩。謂諸門人曰。揭公此詩甚佳。然才竭已。就以所寄詩題其後。答云。今日新婦老矣。復因送人。有寄揭公云云。案通志。本堯山堂外紀。而小異。但德機詩序。實揭所作。述虞評云爾。

訪杜宏道長史不值道中偶成

雨浥輕塵道未乾。朝回隨處借花看。牆東千樹垂楊柳。飛絮來時近馬鞍。

與趙子期趨閣

日出風生太液波。畫橋影裏綵船過。橋頭柳色深如許。應是偏承雨露多。

歸田詩話。邵庵退朝口號云云。少日在四明。從王未載先生學詩。先生舉此詩數首云。細讀而詳味之。與醉後厭飫珍羞。而食宣州雪梨相似。爽口可愛也。

聽雨

屏風圍坐鬢毵毵。銀燭燒殘照暮酣。京國多年情盡改。忽聽春雨憶江南。

歸田詩話。虞邵庵在翰林。有詩云云。又作風入松詞云。畫堂紅袖倚清酣。華髮不勝簪。幾回晚直

金鑾殿。東風軟。花裏停驂。書詔許傳宮燭。輕羅初試朝衫。御溝冰泮水拖藍。紫燕語呢喃。重重簾幙寒猶在。憑誰寄錦字泥緘。報道先生歸也。杏花春雨江南。蓋卽詩意也。但繁簡不同爾。曾見機坊以詞織成帕。爲時所貴重如此。張仲舉詞云。但留意江南杏花春雨。和淚在羅帕。卽指此也。

挽文丞相

徒把金戈挽落暉。南冠無奈北風吹。子房本爲韓仇出。諸葛安知漢祚移。雲暗鼎湖龍去遠。月明華表鶴歸遲。何須更上新亭飲。大不如前灑淚時。

輟耕錄讀此詩而不泣下者幾希。

元詩選楊鐵崖洪武初不赴召詩。子房本爲韓仇出。諸葛寧知漢祚開。全用此詩領聯。列朝詩集所載一本云。商山本爲儲君出。黃石終期孺子來。豈鐵崖知襲用前人之非。後乃自改耶。鐵崖豔詩有全寫韓冬郎者。英雄欺人。不可以訓。偶因此詩而并及之。

滕王閣

天寒高閣立蒼茫。百尺闌干送夕陽。秋雨魚龍非故物。春風蛺蝶是何王。帆檣急急來彭蠡。車蓋童童出豫章。燈火夜歸湖上路。隔離呼酒說干將。

麓堂詩話。虞伯生滕王閣詩。其曰天寒云云。曰燈火云云。信非伯生不能作也。

三鳳行贈海東之還江南

海東之。兄弟三人如鳳凰。胸臆羽翮皆文章。九年三入天門翔。伯冲天。季驚人。一日四海皆知名。東之之

文五色雲。見者眩晃生眇昏。三進三已之。了若耳不聞。二人得之喜。未足云東之。不慍乃可尊。束書江上還。見親君子之樂。樂足真。君不見匡廬之山。曾萃而嵯峨。左界豫章渚。川匯爲蠡鄱。其陰浩浩源。導岷經潛沱。山氣鬱蓄不得去。上衝爲紫蓋。直與天相摩。爲雲覆八極。爲雨漲九河。海東之子。能觀山以成德。其進蓋未可量也。偶爾小屈奈爾何。

詩法正論。此以比興爲轉者也。

次韻竹枝歌答袁伯長三首

沙禽東去避網羅。蕩舟相逐如遠何。越山青青越女白。從此勞人魂夢多。春江風濤苦欲歸。東盡滄溟南斗低。明年白日百花靜。憶爾琴中烏夜啼。燕姬當爐玉雪清。簫中吹得鳳凰聲。不及晴江轉柁鼓。洗盞船頭沙鳥鳴。

西湖竹枝集。雖不爲西湖而賦。而其音節興喻。可以爲竹枝之則云。

陳可復爲予寫戴笠圖賦詩四首

浮雲滿空無所依。高岡獨行來者稀。仙人冉冉遺松老。鳴鹿呦呦生草肥。伐木遠聞何處谷。頃筐近得故時薇。山中雨來霧先合。此日先生戴笠歸。南園多竹暑氣微。始來結屋相因依。掛巾石壁晝霧溼。沐髮池水朝陽稀。頻年車馬殘霜雪。六月裳衣無綵絺。鄰翁問舊坐來久。此日先生戴笠歸。老去懸車百慮灰。西風獨愛菊花開。田家酒熟邀皆去。茅屋詩成懶更裁。欲及天清淩沆瀣。要觀日出上

蓬萊赤松有約應相待。此日先生戴笠來。
拾卻鄉人驢馬車。老身全不要人扶。雲霄一羽山頭杜。風雨孤村海上蘇。薄命長錢隨積雪。多情破帽落輕烏。莫園玉帶垂朱紱。此是先生戴笠圖。

東山存稿。邵菴先生戴笠圖。畫者陳可復。先生表姪也。所題詩四章。後既改第二章。好事者復請先生小字別書。以刻諸石。流傳頗多。而行字韻一章。則傳者未之見也。第四章結句云。此是先生戴笠圖。是字闕下半體。由懸手書筆不著紙。病日後作字。若此者多矣。先生家素貧。仕雖顯。因食指衆。俸入初不自給。所居臨川之崇仁。負郭有田一頃餘。迺夫人趙氏存時。蠶績奩具所置者。懸車後。歲收僅支數月。鸞服犀帶金帶各一。時入鄰里質庫中。四方來見之士。道路相望。坐上常滿。其束修乘壺之入。羔雁之贄。與夫碑版之義取。還以爲賓客費。雖空乏弗恤也。每風日清好。則傾賓客。從以門生子弟。山僧野老。徜徉山水間。一日出游遇雨。借笠田家。戴之乃得還。戴笠有圖。以此先生平居口未嘗言貧。而詩中微字絺字二韻。頗紀其實。

題高彥敬尙書趙子昂承旨共畫一軸爲戶部楊侍郎作

不見湖州三百年。高公尙書生古燕。西湖醉歸寫古木。吳興爲補幽篁妍。國朝名筆誰第一。尙書醉後妙無敵。老蛟欲起風雨來。星墮天河化爲石。趙公自是真天人。獨與尙書情最親。高懷古誼兩相得。慘淡酬酢皆天真。侍郎得此自京國。使我觀之三歎息。今人何必非古人。淪落文章付陳迹。

輟耕錄。高文簡公一日與客游西湖。見素屏潔雅。乘興畫奇石古木。數日後文敏公爲補叢竹。後

爲戶部楊侍郎所得。虞文靖公題詩其上云云。此圖遂成三絕矣。

題東坡墨蹟後

祇今誰是錢塘守。頗解湖中宿畫船。曉起鬪茶龍井上。花開陌上載嬋娟。
老卻眉山長帽翁。茶煙輕颺鬢絲風。錦囊舊賜龍團在。誰爲分泉落月中。
三生石上舊精魂。解后相逢莫重論。縱有繡裳留別恨。已無明鏡着啼痕。
能言學得妙蓮華。贏得春風對客誇。乞食衲衣渾未老。爲題靈塔向金沙。

鐵網珊瑚。丹邱柯敬仲多蓄魏晉法書。至宋人書。殆百十函。隨以與人。弗留也。他日獨見此軸在。几格間。甚怪之。及取觀。則吾坡翁書。蔡君謨夢中詩。及守居閣中舊題也。第三詩以爲不知何人作。其軒轅彌明之流與。陳太守放營妓三詩。亦辱翁翰墨。流傳至今。亦有緣耶。卷後多佳紙。敬仲求集作詩識其後。賦此四首。是日試郭杞墨。但目疾轉深。不能復作字。又知年歲後。雖若此者。亦尙能作否。臨楮慨然。至順辛未二月望日。蜀人虞集書。

贈朱萬初四首

霜雪摧殘澗壑非。深根千歲斧斤違。寸心不逐飛煙化。還作玄雲繞紫微。

道園學古錄。自註。近世墨以油煙易松。滋媚而不深重。萬初旣以墨顯。得真定劉法石刻墨法。以爲劉之精藝。深心盡在於此。必無誤後世。因覃思而得之。蓋取千百年摧朽之餘。精英之不可泯者。乃用之。非常松也。嗚呼。孰肯舍易而求難。必求古人之成法。而後盡其心者乎。

珥貂鳴佩入明光。新墨初成進御床。草野小臣春夢短，猶懷染翰侍君王。

道園學古錄自註：天歷己巳，天下大定，中外又安。天子始作奎章之閣，於宮廷之西，日親御翰墨，時榮公存初、康里公子山皆近侍閣下，以朱萬初所製墨進，大稱旨，得祿食藝文之館，其名藉甚，邈在草野，豈勝千古之思乎？

延閣晨趨接佩聲，又紆朱紱向江城。丹心要似東陽水，釀作宮壺徹底清。

道園學古錄自註：朱萬初以藝文直長，以年勞恩賞，出佐帥幕南海，轉丞東陽。東陽，文物之邑，俗第以名酒歸之，豈其山川之望哉？韓文公譏丞不負，余負丞，今丞凡邑之風俗教命刑獄科賦，無不得言，言之當無不可行，存乎其人而已。萬初勉之。

頗愛燒香是鼻塵，不應緣鯁又勞人。方床石鼎過清晝，一縷山靈伴老身。

道園學古錄自註：深山高居，爐香不可闕，退休之久，佳品乏絕，野人爲取老松柏之根枝葉實，擣治研楓肪和之，每焚一丸，亦足以稍助清苦，久亦不復爲。今年大雨時行，土潤溽暑特甚，萬初袖致土速數斤，空齋蕭寒，遂得爲一日之供，亦可喜也。

次韻陳溪山紅梅

冰雪肌膚染絳雲，歲寒林下對吟身。先天氣至渾如醉，初日光融轉更新。白髮無能酬造化，金丹有道駐長春。少年莫笑詩成處，傾倒相歡忘主賓。

春曉紅生島嶼雲，此中儘著兩閒身。不愁花笑髮鬚白，漫詫人閒句法新。曲水徘徊天上日，深杯斟酌自

家春繁英未落須頻到。翠實金盤尙及賓。

雪後孤根發暖雲。栽培本是一人身。紫薇遺意成千古。絳萼深期又一新。忠厚敢忘嘉樹賦。沖和思廣北枝春。若爲穉子猶堪教。三祝三加望大賓。

道園遺稿原註。來章末句。有屬幼兒之意。先生屢言。先君子植紫薇于堂前。賦詩屬望小子。時人不之許也。頽仰五十年。委身田野。莫稱先志。集感歎成賦云。

書蘇公帖後

蘇木空閒蜀賈舟。艤材還復望袁州。畫叉猶是黃岡竹。細和陶詩飽卽休。

道園遺稿原註。坡翁謫黃州時。月用四千五百錢。日用不過百五十。而猶有餘以待賓客。蓋歲六十千耳。今謫惠。歲用須二百千。蓋三倍矣。日食萬錢者何人哉。士君子不以窮乏累其心。而區畫亦盡人事。皆中禮之所爲也。夫子在陳蔡。以子路之賢。不能無慍見。然處約之道。君子小人之分見焉。微子路。無以發聖言矣。觀蘇公此帖。思當時之爲此厲階者。爲之三歎。

題贈葉梅野原序

近代楊補之作梅。自負清瘦。有持入德壽者。內中頗不便于逸興。謂曰。村梅補之。因自題曰。奉勸卹梅。集嘗見故家有藏徐熙墨杏花者。用筆圓潤。有篆籀法。亦恨楊不能如此也。今監書博士丹邱生。忽用此法寫生。大快人意。存渾厚之意于清真。去衰陋之氣于纖弱。所以爲佳也。譬如少陵繁花晴昊之雄壯。視昏月淺水爲如何耶。樂平鍊師葉凱翁。舊號野梅。予曰。以野標梅。未足盡梅。

之趣。以梅名野。庶乎廣莫之風。請更曰梅野。而以丹邱之畫冠之。永作證據。使錢塘臨江二君。聞予此論。猶當俯首嘆服也。虞集書。

昔結絲絢侍帝宸。青鞋今許向江津。憑君先對梅花說。白髮相看意更深。

道園遺稿自註。初。凱翁先欲南還。欲僕作詩送行。而僕今先有行色。故爲題此。爲他日一笑之資也。

題胡徵君器之和陶軒

春木晨榮。秋華夕滋。流雲行天。逝者如斯。柴車葛巾。曷能歸來。我懷古人。徒誦其詩。有美君子。尙友先覺。靡觴不詠。無詠不屬。豈無他人。孰此追躅。優哉遊哉。君子之樂。吾儕小人。力絀乃休。猶可以馳。曷其停輟。卷舒無悶。入聖實優。敢以未成。竊方前修。祖德之述。尙論其世。我獨何無。夙墜羈繫。聞君贊歌。祇以生愧。旣曰知非。請勛餘歲。

道園遺稿自註。集讀書中山時。草屋三間。以紙糊其壁。舍弟仲常。爲書邵子諸詩于東。謂之邵菴。書陶詩于西。謂之陶菴。吳先生見而歎之。以爲世內無窮之悲。世外無窮之樂也。

朱秀之杞菊軒

高軒何所植。杞菊交根枝。紫實旣秋熟。黃花亦晚滋。嘉名信共愛。何以療予飢。此邦號富庶。士賈志懷資。蕭條山石閒。誰復見惻嫠。遺脫兼并餘。椎剝無完飢。縱彼百畝受。豈得安耘耔。種此跬步內。庶無征奪思。探擷勿違節。烹芼貴有宜。三咽可千歲。逍遙奉天隨。

道園遺稿自註集游吳中因省墓山閒頗見田野有可念因贊高軒之樂而及之庶觀風者之有采而知之者

予少年過薊門酒樓賦此題曰連十八書郡人疑其爲呂洞賓作也謾記於此

耳目聰明一丈夫飛行八極隘寰區劍吹白雪妖邪滅袖拂春風槁朽蘇氣似酒酣雙國士情如花擁萬天姝如今一去無消息只有中天月影孤

草木子當時皆以爲呂洞賓作也爭傳誦之

記夢

夢行衡廬間千仞過蒼壁崇高仰神明深廣下不測雲雨蓄盤礴時至如欲出細縷尙回旋揮霍忽奔逸物怪匿巖穴懷若俟霹靂黑波汎高樹木葉走崩石升身登玄閒縱觀龍變迹俯視九州野草木有輝澤乃在風雨外手畫素三尺揮毫極動盪落墨更沈鬱圖成示坐人共笑不可得顧瞻以踟躕恍惚增歎息因之命肩輿出門聊有適大術何舒舒白鶴從數客略經幽澗濱便上青松側憑高望遠水雙景蕩虛碧拂石共客坐芳草藉尻膝忽然聞鐘聲睡覺北窗席

元詩選道園外祖楊文仲守衡州并齋依之時未有子文仲爲禱於南岳遂生道園文仲夢一牙兵持刺入曰南岳真人來見既覺聞兒啼聲因命小字曰衡道園自言少時嘗夢遊南岳歷覽其奇勝頗能記憶焉

金人出塞圖

海風吹沙如捲濤。高爲陴磧深爲壕。築壘其上嚴周遭。名王專居氣振豪。肉食漣飲田爲遨。八月草白風颼颼。馬食草實輕骨毛。加弦試弓復置櫜。今日不樂心慄慄。什什伍伍呼其曹。銀黃兔鶻明繡袍。鷓鴣小管隨鳴鞞。背孤向虛出北皋。海東之鷺王不驕。錦韞金鏃紅絨條。按習久蓄思一超。是時晶清天翳絕。鵝東來雲帖帖。去地萬仞天一瞥。離婁屬望目力竭。微如聞音鷺一掣。束身直上不回折。遂使孤飛一片雲。頃刻平蕪灑毛血。爭誇得雋頓足悅。挂兔懸狼何足說。旌旗先歸向城闕。落日悲風起蕭屑。煙塵滿城鼓微咽。大會要王具甘歆。王亦欣然沃焦熱。闕支出迎騎小鐵。琵琶兩姬紅頰頰。歌舞迭進醉燭滅。穹廬斜轉艷餘月。

詩藪雄渾流麗步驟中程

題柯敬仲雜畫十首

北苑今仍在。南宮奈老何。青山解浮動。端爲白雲多。
雨過蒼苔石。雲生野岸泉。幽懷春冉冉。穉子秀娟娟。
鐵石餘生色。冰霜作曉妍。春雷明日起。何處尙龍眠。
昔過篋簾谷。鈎衣石角斜。擬尋龍作杖。拾得上天槎。
黃金千瑣甲。瑀玉六簾鉤。雨送鴛鴦夢。煙籠翡翠愁。
娟娟生玉潤。楚楚作金聲。羽扇迎風定。羊車過月明。
峽口春雲重。江南夜雨多。水深桃葉渡。風急竹枝歌。

平陸蒼龍起。近山生遠煙。前村三萬頃。明日水平田。
莓苔生石路。翠竹自交加。不惜青鞵溼。臨流踏白沙。

昨夜採蓮去。偶逢三尺枯。山人不到海。不識是珊瑚。

詳丁鶴年下

句

古來篆籀法已絕。祇有木葉雕蠶蟲。畫竹貌得常時第一匹。昭陵風雨夜聞嘶。畫馬賴得鄆筒酒易醉。夜歸衝雨漢州城。成都

麓堂詩話。真得少陵家法。世人學杜。未得其雄健。而已失之粗率。未得其深厚。而已失之臃腫。如此者未易多見也。

又

對竹聽湘雨。開簾看岳雲。春雲山對屋。夜雨水平橋。挂冠俄去國。連舸總盛書。天光臨閣道。雲氣轉蓬萊。

詩藪元五言律可摘者。虞伯生云云。

又

雲橫北極知天近。日轉東華覺地靈。帆檣星斗通南極。車蓋風雲擁豫章。
詩藪句格莊嚴。詞藻瑰麗。上接大曆元和之軌。下開正德嘉靖之途。

王克敬

克敬字叔能大寧人官至參政。

題一錢太守廟

劉寵清名舉世傳。至今遺廟在江邊。近來仕路多能者。學得先生要大錢。

輟耕錄一錢太守廟在紹興錢清鎮王叔能參政過廟下賦詩云。

謝文質海牙

題酒家壁

修雲淡淡抹山眉。野水人家半酒旗。應是小梅開未已。小舟撐月過前溪。

吳禮部詩話大德中有謝文質海牙者爲浙東廉訪僉事性嗜酒不飲則臨政精明市日者某形貌長大每飲引與對坐不交一談亦不與之酒醉則取劍舞弄衆避匿乃已嘗分司舟回二書吏從未至城數里宿舟中月明興動潛起登岸題一詩酒家壁云云去入山麓小寺登樓撞鐘僧皆驚起謝踞禪床大呼索酒貯以木桶跪僧於前以一白酌竟擊僧頂置其上酒盡困睡僧不敢去天明舟中失謝所在遙見堊壁題字書吏識之迹其所往逢道上樵者言寺中擾擾狀趨視則謝猶未醒須臾騶從至迎之乃去。

范玉壺

錄鬼簿范居中字子正冰壺其號也杭州人父玉壺前輩名儒假卜術爲業居杭之三元樓前每歲元夕必以時事題於燈紙之上杭人聚觀遠近皆知父子之名其妹亦有文名大德年間被旨

赴都公亦北行。

上都

上都五月雪飛花。頃刻銀妝十萬家。說與江南人不信。只穿皮襖不穿紗。

山居新話。范玉壺作上都詩云。余屢爲灤陽之行。每歲七月半。郡人傾城出南門外祭奠。婦人悉穿金紗。謂之賽金紗。以爲節序之稱也。

小雲石海涯

小雲石。阿里海涯之孫。父名貫只哥雲石。遂以貫爲氏。號酸齋。官至翰林學士。諡文靖。有酸齋集。西湖游覽志。貫雲石隱居錢塘。一日郡中數衣冠士人。游虎跑泉。飲閒賦詩。以泉爲韻。中一人但哦泉泉泉。久不能就。忽一叟曳杖而至。問其故。應聲云。泉泉泉。亂迸珍珠個個圓。玉斧斫開頑石。隨金鈎搭出老龍涎。衆驚問曰。公非貫酸齋乎。曰。然。然。然。遂邀同飲。盡醉而去。

蟬精雋。酸齋貫學士。有蘭房六謔詩題曰。柳眉星眼。檀口酥乳。纖指香鈎。香鈎謂足也。其意本東坡六憶詩來。而酸齋則太淫麗矣。

蘆花被井序

僕過梁泊。有漁翁織蘆花爲被。僕尙其清。欲易之以綢者。翁曰。君尙吾清。願以詩輸之。遂賦果卻綢。

探得蘆花不涴塵。翠簾聊復藉爲茵。西風刮夢秋無際。夜月生香雪滿身。毛骨已隨天地老。聲名不讓古

今貧青綾莫爲鴛鴦妒。歟乃聲中別有春。

圭齋集。雲石嘗過梁山。灤見漁父織蘆花絮爲被。愛之以綢。易被。漁父見其貴。易賤。異其爲人。陽曰。君欲吾被。當更賦詩。公援筆立成。竟持被往。詩傳人閒。號蘆花道人。公至錢唐。因以自號。

鳳凰山休暑

路隔蒼苔卒未通。泉花如髮玉濛濛。蛟游海近雲窗溼。蚊怯山寒葛帳空。高枕不知秋水上。開門忽見暮帆東。物華萬態俱忘我。北望惟心一寸紅。

辭世詩

洞花幽草結良緣。被我瞞他四十年。今日不留生死相。海天明月一般圓。

七修類稿。貫雲石生而神彩秀異。膂力絕人。及長。折節讀書。遂仕爲翰林侍讀學士。後稱疾還江南。賣藥於吾杭。人無識者。嘗休暑鳳凰。有詩云云。又臨終作辭世詩云云。洞花幽草。乃妾名也。予舊有其集。詩不滿百。前律所未載也。今北山棲雲庵。乃藏修之所。

王士熙

士熙字繼學。東平人。翰林學士承旨搆子。官至南臺御史中丞。有江亭集。

竹枝詞

居庸山前澗水多。白榆林下石坡陀。後來纔度槍竿嶺。前車昨日到灤河。車簾都卷錦流蘇。自控金鞍捻僕姑。山間白雀能言語。莫學江南唱鷓鴣。

西湖竹枝集。竹枝本在灤陽所作者。其山川風景。雖與南國異焉。而竹枝之聲。則無不同矣。

題鮮于伯機與仇廉訪帖

三生文采趙公子。四海聲名仇使君。彈琴不作廣陵散。焚香遙駐博山雲。玉署春來鶯漫語。繡衣人去雁空聞。龍蛇兩紙光如玉。卽是安西與右軍。

元文類原註其帖之語曰。趙公子明日欲過寒舍看書畫。廉訪相公能一來焚香彈琴亦佳。趙公子子昂也。後亦有跋帖。廉訪字彥中。今其子公哲御史寶藏此帖。

柳貫

貫字道傳。浦陽人。大德間用察舉爲江山教諭。官至翰林待制。自號烏蜀山人。

黃文獻集公之生也。外大父俞公葵。暨泗州府君同擢右科進士第。因命之曰贊。義取兩文易兩武贊於今文爲貫。故公自署其名爲貫云。

龍門

一溪瓜蔓流。渡者云可亂。屢涉途已窮。前臨波始漫。嚴嚴龍門峽。石破兩崖半。沙痕深尺餘。灣洄觸垠岸。它山或澍雨。湍漲輒廉悍。頃刻漂車輪。羈絡不能絆。其源想非遠。衆水自茲濫。濟淺抑何艱。慮盈疑及患。峯陰轉亭午。出險馬蹄散。草路且勿驅。煙開望前館。

望李陵臺

平沙北流水。青山在其上。李陵思鄉臺。駐馬一西向。草根含餘淒。峯尖入寒望。俚言雖莫稽。陳跡尙可訪。

想其深入初。步卒亦材壯。手張天子威。氣奪名王帳。覆車陷囚虜。此志迺大安。一爲情愛牽。皇恤身名喪。縷縷中郎書。挽使同跌踴。安知臣節恭。之死不易諒。河梁執別處。出語謾惆悵。家聲故煒赫。三世漢飛將。兵法有死生。人運迭休旺。忠回在信史。豈沒功罪狀。馬遷當腐刑。強欲雪其謗。士思豈能無。屑雲塞亭障。千年麒麟圖。吾將執玄鬯。

觀失刺幹耳朵御宴回

霓幕承空柱繡楣。綵繩亘地掣文霓。辰旂忽動祠光下。甲帳徐開殿影齊。芍藥名花圍簇坐。蒲萄法酒折封泥。御前賜酺千官醉。恩覺中天雨露低。車駕駐蹕。卽賜近臣灑爲妳子。御筵設罷。殿失刺幹耳朵。深廣可容數千人。上京五月芍藥始花。

還次桓州

塞雨初乾草未霜。穹廬秋色滿沙場。割鮮俎上薦黃鼠。獻獲腰間懸白狼。別部烏桓知幾族。他山稽落是何方。長雲西北天如水。想見旌旗瀚海光。

午日雪後行失八兒禿道中有懷同館諸公

尖峯猶是漠南山。駝褐蕭蕭午日寒。艾葉漫將頭上插。榴花應許夢中看。馬前砂雪行初隱。鵬背荒雲落更盤。王事獨賢吾敢憚。重煩同館勸加餐。

過長城

道德藩墉億萬年。長城謾與朔雲連。秦人骨肉皆爲土。漢地封疆已罷邊。飲馬窟深泉動脈。牧羝沙煖草

生煙。神京近在玄溟北。九域開荒際幅員。

李老谷聞子規

老杜聞子規。近在東西川。猶云感時物。收淚寫幽悵。今我行塞徼。子規相後先。時夏雲景晦。鳥呼搖空煙。響入樹宵宵。啼垂血濺濺。想知歧路難。不惜軀命全。千聲復萬聲。喚我歸言遄。苟非木石心。豈免腸內煎。江南叢薄閒。有花名杜鵑。開時是鳥至。相戒治春田。不歸如江水。負此今五年。風土孰云異。物情要有遷。寄巢勿浪出。祝爾還自憐。嚴程趣行邁。且復揮吾鞭。

待制集上京紀行序。延祐七年。貫以國子助教北都生。始出居庸。踰長城。臨灤水之陽。而次止焉。自夏涉秋。更二時。乃復計其關途覽歷之雄。宮籞物儀之盛。凡接之于前者。皆足以使人心洞神竦。而吾情之所觸。或亦肆口成詠。第而錄之。總三十二首。噫。置竄家之子。于通都萬貨之區。珍怪溢目。收攬一二。而遺其千百。雖欲多取。悉致力何可得哉。貫越西之鄙人。少長累遭家難。學殖荒落。志念迂疎。顧父師之箴言在耳。嘗慙焉弗勝。乃茲幸以章句訓故。間廁西離之武。以竊竊陪衆臣之末。龍光炳煥。照耀後先。山川閎奇。振發左右。則夫紀載而鋪張之。有不得以其言語之蕪拙。而併廢也。今朝夕俟汰。庶幾退藏田里。以安遲暮。而諸詩在橐。懼久亡去。吾友薛君宗海。雅善正書。探囊中得舊紙數板。因請宗海爲作小楷。聯爲卷。豈直歸誇田夫野老。以侈幸遇之萬一。而顧瞻鼎湖。薄天萬里。遺弓之痛。有慨于心。尙何時而可忘耶。後三年至治三年十一月五日。柳貫自序。

荆門

河塘底里通涵管。宣泄隄防計未迂。大抵成功搖末議。卻將失得較錙銖。

待制集自註。張子仁爲都水監丞。日作涵管。疏泄積潦。一時以爲便。而今或有非之者。

奉陪侍御金源公虎邱之游。閱數日乃能成詩。以紀覽歷。凡二十五韻。

閭閻藏窳處。白虎臥其丘。殉葬劍已化。金精猶上浮。秦強事穿伐。鬼功叶人謀。剝腸裂青壁。瀝髓發寒流。樹色不知古。蛟龍鬱相樛。蛻影入深窈。鐵花繡吳鉤。供庖綆汲餘。千人宜浣漱。生公昔講經。聚石石點頭。至今盤石上。法雲垂蔭稠。宅坊何年建。凌虛出飛樓。北牖俯平楚。西軒延廣疇。登臨小吳會。萬象一目收。韋白題詩後。物華壓雕鏤。胡哉幽獨君。眇然遺清謳。茲山起原隰。山形如覆甌。我疑星游空。墮地得長留。不然駕海來。六鼉爲載輶。現成般舟臺。不以聞思修。客過閭門西。看山幾迴眸。是節風日美。招攜有扁舟。旋權午景停。繫籬野陰稠。行酒進熟啜。飲闌歸意遒。詞客思如雲。尙書氣橫秋。吾衰落人後。技癢紀斯遊。謬語尙可芟。蕪穢焉能度。

元明事類鈔。柳道傳貫行書虎丘詩一卷。縱橫遒逸。亦鮮于之亞也。詩語宏麗。手錄之。

浦陽十詠

仙華巖雪。縣北有仙華巖。翠掉浮空。雪景尤奇。

冰柱浮空曉色蒙。海波搖動玉玲瓏。九清內景游終外。五嶽眞形太素中。微月升壇初映鶴。長雲連野不驚鴻。仙姬宴坐瑤池上。催捧蟠桃獻木公。

白石湫雲 白石龍湫在縣東南能出雲爲雨。

白石靈山望贊皇。湫潭此復見蒼蒼。飄揚直欲陵三際。膚寸猶能雨八荒。空外金精縣太白。泉中虬彩化長黃。傳芭奏罷神絃曲。松蓋成陰澤氣涼。恒州贊皇縣有白石靈山漢碑在焉。

龍峯孤壙 縣東龍峯古壙實爲蒼龍左角。

兩環日月似飛梭。鼇背稜稜宰塔坡。朱鳥前頭森最顯。蒼龍左角見嵯峨。玉函舍利朝光現。珠斗闌干午影過。浩劫浮雲開萬象。寶華雜遯散芬陀。

寶掌冷泉 寶鑾山唐千歲和尚道場有看經得道洞巖竄出泉極甘寒。

一勺曹谿未是甘。刺山容易出飛泉。消融太古岷峨雪。澄映中秋沆瀣天。挂樹青猿窺洗鉢。眠沙白鹿伴安禪。巖龕無縫身如石。逆數高僧入定年。

月泉春誦 縣西有泉隨月盈虧泉上精舍祠文公成公。

有盈有泚卽寒泉。猶隔蘆峯道里千。嶽麓雲深藏策處。匡山人老讀書年。松楠疊影青浮几。華樹生香晚入筵。稽首堂中兩夫子。六經言遠視如天。

潮溪夜漁 去縣五十里溪流始大有魚蟹之產。

溪水添流到石缸。小家殘戶占漁商。蛟龍未解乘雲氣。魚鼈安能避澤梁。兩岸櫟林藏曲折。一簞松火照微茫。淮夷固有蜃珠顆。往往鈎深夜得光。

南江夕照 南江橋西望原麓返照如畫圖中。

千峯不盡夕陽孤。斂翠浮丹入畫圖。塢廟傍連山影直。石梁中亘水痕枯。白魚在汕將踰尺。紅稻登場稍似珠。玉露金風秋最爽。跳身何用市間壺。

東嶺秋陰 縣東東山嶺平林廣野秋常多陰。

半里官橋出市閭。一團秋色破屏顏。雲開浩蕩初疑曙。日出蒼涼不見山。斷雁殘鴻飛杳杳。綠蕪紅葉映斑斑。去年菊蕊今年發。拾得籬邊句子還。

深禡江源 浦陽江原出深禡山在縣西三十里。

濫觴初不滿瓶盆。百谷渾渾一壑吞。自此安流諭渤澥。放渠高浪蹴崑崙。出山未適帆檣便。竭澤毋庸罔罟繁。謝客題詩曾宿處。孤雲落日是何村。

昭靈仙迹 昔黃帝少女于仙華巖上升仙下有昭靈廟水旱禱之輒應。

芝掌中開顥氣青。雲輶雙駕鳳凰翎。因山不啓軒轅鼎。化石猶聯婺女星。磴道芳春琪樹長。巖扉清晝碧華零。眞仙帝遣司風雨。喚起淵龍聽指令。待制集。

句

羲和白日經天近。勅勒陰山度幕遙。雪華遙映龍旗動。日色纔臨鳳蓋閑。

詩藪元葵若黃文憲柳文肅皆以文名而詩亦華整黃如揮毫云云柳如云云置之作者奚讓。

句

大暑無蒙給。輕寒已御貂。

詩藪元五言律可摘者元裕之云云楊仲宏云云虞伯生云云薩天錫范德機云云揭曼碩云云趙子昂云云陳剛中云云楊煥然云云程彥明云云鄧文原云云鮮于樞云云薛玄卿云云吳立夫云云柳道傳云云皆句格閎整大歷元和閒殊不多得也

元詩紀事卷十二

梁相

相字必大杭州人大德末官紹興路儒學教授。

春日田園雜興

膏雨初晴布穀啼。村村景物正熙熙。誰知農圃無窮樂。自與鶯花有舊期。彭澤歸來惟種柳。石湖老去最能詩。桃紅李白新秧綠。問著東風總不知。

月泉吟社第三名。前聯妙於組合。後聯引陶范不爲事縛。句法更高。末借言雜興的是老手。

又

麥疇連草色。蔬徑帶蕪痕。布穀叫殘雨。杏花開半村。吾生老農圃。世事付兒孫。但遇芳菲景。高歌酒滿尊。月泉吟社第十三名。前四句詠題。後乃述意。末二句亦不離春興。格韻甚高。五言中未易多得。

吳元德

元德字子高江夏人。大德末薦爲奎章僚屬。

次韻馬伯庸遊玉泉山

飛絮晴絲絡馬頭。春風常記侍宸游。牙樯映日開龍艦。天樂連雲上翠樓。楊柳盡隨堤北偃。芙蓉不礙水東流。遙瞻玉輦時巡處。千里風煙紫塞秋。

興聖宮退朝口號

蹀躞青驄白玉珂。百官朝會日相過。天臨奎壁星辰近。雲覆蓬萊雨露多。壽岳倚空開寶殿。御溝流水繞金河。微臣稽首無封事。願進清平第一歌。

詩數全篇整麗首尾勻和

何中

中。字太虛。臨川人。江西行省聘爲書院山長。有知非堂稿。

句

燕來春已去。花少雨偏多。漢殿金人別。唐陵石馬嘶。落花繁樹轉。幽鳥過林鳴。山圍雙鷺曉。門閉一蟬秋。烏語前林日。雞鳴曲巷煙。年華流水在。春事落花知。日明山氣改。江靜水痕歸。赤壁驚鳥飛。夜月衡陽歸。雁落秋風。兩澗寒聲通法席。數峰秋影上香臺。隔水歸樵分路散。衝嵐飛鳥認林還。冰寒古道鳴駝外。雪暗空村落雁邊。馬嘶平野呼鷹吏。犬吠寒沙射雁人。

筆精。元季詩人踴出。知名者無論已。予家藏何中知非集六卷。佳句疊見。如云云。中集中所往還者。吳澄。劉會孟。揭傒斯。程鉅夫。諸人。至大皇慶間。寄寓閩中。賦詩頗多。胡元瑞詩數拈拔元人佳句。無遺亦不及太虛。真有幸有不幸也。

又

聊隨碧溪轉。忽與白鷗逢。小雨十數點。淡煙三四峯。落葉半藏路。清風時滿溪。寒沙梅影路微雪。

酒香村。湖雪殘波岸。船燈獨夜人。西風一夜雨。丹桂滿林花。

蠶尾集元何中太虛集吳草廬序吳與何中表兄弟也中善五言詩如云云皆有唐境。

周權

權字衡之號此山處州人袁桷薦諸朝弗就。

句

風細晨氣潤。月澄夜香寒。鶴行松逕雨。僧倚石闌雲。斷猿明月曙。疎雨碧梧秋。橋斷春隄多積雨。溪深野碓自春雲。竹深四壁生虛籟。山近半村無夕陽。芳朮旋收同茗煮。落花閒拾和香燒。鳩雨欲晴桑葉晚。燕泥新溼杏花餘。

元詩選衡之句法實多可觀如荷亭云云邨溪卽事云云倦遊云云邨行云云訪陳子高云云又如云云衆仲所謂簡淡和平而語多奇儻者也。

任士林

士林字叔寔四明人至大初舉爲安定書院山長尋卒有松鄉集。

海扇

漢宮佳人班婕妤。香雲一篋秋風初。網蟲蒼蒼恩自淺。猶抱明月馮夷居。至今生怕秋風面。三月三日織一見。對天搖動不如烹。肯入五雲清暑殿。

霏雪錄海中有甲物如扇其文如瓦屋惟三月潮盡乃出名海扇四明任松鄉嘗有詩云云。

滕斌

斌一名賓，字玉霄，黃岡人。或云睢陽人。至大間，官翰林學士，出爲江西儒學提舉。

訪隱

西風短褐飛黃埃，何不從我游蓬萊。狂歌醉舞下山去，後夜月明騎鶴來。

草木子：白雲平章求仙於燕京西山頂，一日適出，滕玉霄訪之，不值，因戲題於壁云：「竟不留名。」白雲公疑呂仙過之，朝野輻輳，寵賚山積，後知其玉霄題，白雲公戒以勿泄，厚賂之。

絕句

吟人瘦倚玉闌干，酒醒香消午夢殘。燕子不來春社去，一簾疎雨杏花寒。

筆精：趙子昂絕句云：「春寒惻惻掩重門，睡鴨香殘火尚溫。燕子不來花又落，一庭風雨自黃昏。」滕玉霄絕句云云，二首頗相似，皆詩餘中絕佳句也。唐人無此纖弱之作。

龔璚

璚字子敬，高郵人。徙平江，用薦官江浙儒學副提舉，有存悔齋集。

書閣以下九首，俱宣城詩。

年華荏苒故客況，寂寥新雪融疑是雨。風和欲近春，疎梅縈小鳳。宿藻負潛鱗，書閣閒登望。時煩載酒人，偶題。

宿雨池館淨，閒官造請稀。石榴朱夏色，山鵲青雲飛。遐矚臨風檻，沖襟散暑衣。陳編撫芳潤，脈脈髮初稀。

郡樓

久客有遠思。肩輿登郡樓。聊爲避暑飲。更學御風游。疊翠城南面。雙虹水北流。流將五湖去。葉葉采蘋舟。

述懷二首

古道直如矢。古心能斷金。今人思古人。寥落誰知音。旭日臨前除。暄風散幽襟。相彼好鳥鳴。擇陰嘉樹林。豈無念朝飢。漑之釜與鬻。大川無停波。高山上嶽岑。白髮何由玄。寒暑日夜侵。叔孫獨楚製。莊生常越吟。載歌行路難。歌闋意彌深。

葺荷不用織。采蓮尙可食。芳時安可常。秋風鳴械械。美人明月璫。青霓以爲裳。手攬北斗柄。低昂挹天漿。天漿解渴心。下土何茫茫。九牡閭闔開。寸誠函綠章。焉得飛仙術。與陪鸞鶴翔。所憂歲年駛。敢畏道阻長。啓戶辨夜色。驅車遡晨光。終然江海滯。臨路空徬徨。

次韻劉景初偕陳元佐見訪

松閣啓晨眺。東雲白英英。空尊媿坐客。幽道聞屐聲。郊墟地自局。林樾暑逾清。官居屬冗散。朋從多澹成。拂塵急雨過。聯鑣去隄平。書味一何長。襟期浩已盈。挑鐙展篇什。寤寐山中行。

楚雲湘水圖歌謝張師夔教授

離騷之國幾千里。十幅蒲帆順風駛。順風猶須兩月程。伊誰移來墮書几。張君墨妙遊戲爾。亂峯因君接天起。蒼然古木摧不死。君應曾隱茅屋底。得非是閒種蘭芷。慘澹經營那及此。松連閣上聽秋聲。讀書眼花字如蟻。玉立長身挾童子。披圖置我平生喜。憶昔詩家愛許渾。凌歊荒臺尋舊址。云何姑孰大江邊。望

湘潭雲尺有咫。我今識君意。總爲詩料理。雲兮楚之雲。水兮湘之水。迴雁夕陽銜一葦。山高見衡岳。江遠會南紀。君兮君兮可奈何。我詩敢劖屈賈壘。

老錢折枝

桃似胭脂梨似雪。折花人是惜花人。折枝圖上堪腸斷。忍更題詩破費春。

泊舟

小舟尋夜泊。明月散風瀾。故人相別處。雙鷺立前灘。

句
自跋予歸京口省墓。天錫出此紙。徵予書宣城詩。記憶不甚真。天歷二年孟夏二日。龔璘識。

文若縱存猶九錫。孔明雖死亦三分。

元詩選嘗有詠史詩云云。爲一時所傳誦。

郭天錫

天錫名昇。以字行。一字祐之。號北山。丹徒人。江浙行省辟充掾史。有快雪齋集。雲煙過眼錄。所藏晉右軍得告帖。又快雪時晴帖。皆真蹟。有米老跋。遂以名齋。

宿焦山上方

揚子江頭風浪平。焦山寺裏晚鐘鳴。爐煙已斷燈花落。喚起山僧看月明。

客杭日記。至大二年己酉二月初九日。趙伯可相約早飯。飯已。發書請虎林首座。引領作焦山之

行虎林間呼卽至。是日春色佳麗。江靜無風。晚陪尊長老虎林。淡雲到海門邊看日落。一瞬萬頃。金波蕩搖。可謂奇觀。拉虎林巽中。踏月上羅漢巖禪房。佛燈熒然。爐香未過。具茗果閒話。俯視棲鵲危巢。皆在窗下。與二僧月下聽江聲。倚樹清論久之。一洗城市之塵俗也。夜宿巽中房。虎林共榻。

又厲鶚跋天錫有詩云云。妙甚。卽此時作也。

句

世人但解比龍眠。那知已出曹韓上。

輟耕錄趙文敏公題所畫馬云。吾自幼好畫馬。自謂頗盡物之性。友人郭祐之嘗贈余詩云云。曹韓固是過許。使龍眠無恙。當與之並驅耳。

張菊存

客杭日記。省西見張菊存下龔子敬書。

孝梅

南風吹南枝。一白點萬綠。歲寒誰知心。孟宗林下竹。

輟耕錄龍廣寒江西人。移居錢塘挾預知之術。游湖海間。事母至孝。六月一日母生日。方舉鰲爲壽。忽見北窗外梅花一枝盛開。人皆以爲孝行所感。士大夫遂稱之曰孝梅。贈詩者甚多。惟張菊存一篇最可膾炙云云。

何失

失字得之昌平人。

元文類王士熙撰張進中墓表。進中字子正。善爲筆。何失家善織紗縠。最能爲詩。日出賣絲。常騎驢歌吟道中。指意良遠。

句

一井當門凍。寒光照四鄰。我住東街北。鐘樓在屋西。

秋宜集。過何得之先生故居詩。可憐古井門外。依舊鐘樓屋西。何處高吟痛飲。黃華翠竹都迷。自注。先生有詩云云。又云云。

汪炎昶

炎昶字懋遠。婺源人。有古逸民詩集。

案。炎昶作定字先生行狀。在元統二年。

句

待成竿後節方露。自作笋時心已空。新竹椎金鍛鐵作硬語。意氣硤硤真丈夫。

東山存稿。省汪古逸先生墓詩注。先生年十六賦詩云云。

陳森

森字茂卿。婺州人。

黃文獻集。茂卿既死。訪遺稿其家。亦竟無得。蓋以殉葬焉。

句

古來賢達士。不靳當世知。勗哉保令德。千載以爲期。

黃文獻集。茂卿贈予詩云云。嗚呼。其望予至矣。而固茂卿所自志也。攬卷及此。流涕而已。

段天祐

天祐字吉甫。

案圭塘款乃集跋。稱汴段天祐。

送妓入道

歌舞當今第一流。洗妝拭面別青樓。便隨南嶽夫人去。不爲蘇州刺史留。瑤館月明簫鳳下。綺窗雲散鏡鸞收。卻嫌癡絕潯陽婦。嫁得商人已白頭。

輟耕錄。李當當者。教坊名妓也。忽翻然若有所悟。遂著道士服。江浙儒學提舉段吉甫先生贈詩云云。

西湖志餘。孫花翁送女冠還俗云云。段吉甫云云。事相反而語皆工。

趙由儕

由儕字與儕。南豐人。

述祖詩

悠悠我祖。始於軒邱。撫歷高陽。秩秩大猷。爰自伯益。舜錫阜旂。中衍事商。造父御周。征彼徐方。熊熊有功。邑於趙城。大河之東。建氏晉國。耿先其封。成宣喻日。畏夏愛冬。岸賈作難。嬰曰立孤。襄子始大。常山得符。於赫列侯。懋建丕圖。肅矣武靈。兆配有虞。西漢子都。生長河間。暨於唐末。合族居燕。卜遷大梁。世系縣縣。厚德豐功。宜永其傳。中罹多難。南歷江沱。眷焉吾宗。豐水居多。百川有源。衆條有柯。庸修家牒。克俾無訛。固余伯仲。憂患多更。瞻歎古烈。自憐其生。其生豈偶。三辰垂精。德業未進。敢不戰兢。我心伊何。常念厥初。感彼霜露。愴焉踟躕。奉先如在。宗戚相於。亦有萱草。高堂可娛。惟忠惟孝。立身有本。嗟爾後進。勗哉自勉。萬有能銷。斯道無泯。溫恭朝夕。云胡不謹。顯親揚名。俾昌俾熾。善保家聲。期於勿替。尙念前人。留心譜系。受天之慶。遠及苗裔。

思親詩并序

余讀魯齋許文正公七月望日思親詩。因念其天理沛然。自胸襟流出。永感者聞之。必增其悲。具慶偏侍者。由此寧不加敬。自思兄弟往來。當喪亂之餘。不幸失怙。藉慈母教育成人。真昊天罔極之恩也。輒推廣其意。而述五言古詩一篇。五十二句。以紀平居之懷。納之書藏。將示後人。俾知所自云爾。庚戌歲二月望日。中山居士趙由儕識。

一自先君逝。行將四十春。音容尋舊夢。感慨試詳陳。已歎生緣淺。還思故國屯。吳江悲血戰。粵嶠困車麟。共叱艱危甚。尤驚賦斂頻。朔風吹廣野。赤日照流塵。旣灑呼天淚。方爲辟地民。撫時非往昔。感憤竟湮淪。翁霍傳梅外。倉皇問水濱。諸孤隨弱母。大慟向秋旻。越歲寧戈甲。歸鄉辦夢袍。酌觴號雪夜。扶柩履霜晨。

家緒中微甚。人間事一新。孩提慚不肖。操守賴慈親。絡緯燈前教。襜褕膝下馴。田廬勤保任。門戶幾憂辛。文獻由先德。扶持荷化鈞。萱華明晚景。荆樹際芳辰。眉壽樹瓊蟻。春暉奉繡茵。雖非登執要。自不厭清貧。努力尊天爵。勤心報大倫。歸全期不忝。化俗冀還淳。信墨存家乘。傳芳待後人。年年思雨露。歲歲省松筠。至念通天地。長歌感鬼神。珍藏歸韞匱。大孝慕終身。

元風雅後集。虞伯生曰。與儕有千載世外之交。信其內行淳備。故知其事親者。非止甘旨之奉。溫清之儀而已。臨川吳草廬先生。讀其述祖思親之詩而嘆曰。直哉所發。哀而不傷。此古之作者。非常人所及也。

孫轍

轍字履常。臨川人。元統間卒。

句

自是難容力。那堪預作期。勿忘仍勿助。非速亦非遲。

道園學古錄。君有近體詩云云。可以見其學之所至矣。

郭道卿

道卿字景仁。莆田人。至大中布衣。旌表孝子。

亂後謁母墓

欲從泉下拜遺音。亂草及春零露侵。一坏荒山終歲土。百年貧子此生心。悲風動樹嗟無死。高祀望雲凍。

不沈。自是儒生多積戾。墓前帶甲未全禁。莆風清額集

蘭陔詩話。公與曾祖義重子延煒。稱郭氏三孝祠。在郡城北魏塘。雙闕巍然。門臨孔道。過者必立馬徘徊而後去。其亂後謁墓一詩。出自至性。可以感鬼神而泣風雨。

林以辨

以辨。原名井。以字行。更字子泉。莆田人。皇慶中布衣。

過浮山贈陳克甫

偶一作夜。過浮邱月滿山。一樽相對夜一作坐。漫漫門臨大海風濤壯。家有小天星斗寒。玉蛤吠田秧正綠。江豚吹浪蕩初丹。懸知別後相思意。著就玄言幸寄看。

閩書。陳紹叔字克甫。興化人。居靈川里浮山下。洞達性理。至於河圖雒書。太極通書。律歷制度。靡不研究。有外集百餘卷。題曰浮邱集。因與學者說璇璣玉衡。遂揉木像示之。既鑄銅仿古制。又別制器象天體。虛中而髹之上。刻周天度數。填以鈿羸。揭南北二極。凡天河星宿。皆列其中。其制度精微。名小天。有友人贈詩云。

蘭陔詩話云。子泉湛深經術。講學泉山。學者稱玉井先生。其贈陳紹叔一詩。莆陽全書逸其半。作無名子詩。今依林氏家譜正之。

劉鶚

鶚。字楚奇。永豐人。皇慶間。薦充楊州儒學錄。官至江西行省參政。贛寇亂。被執不屈死。有惟實集。

絕筆

生爲元朝臣。死作元朝鬼。忠節旣無慚。清風自千古。

乾坤正氣集

江西通志。公被執至贛。賊幽之慈雲寺。仲子述亦在焉。公作詩付述。不食六日而卒。

王振鵬

振鵬字朋梅。永嘉人。侍仁宗於東宮。延祐中。官祕書監典簿。道園學古錄。嘗爲大明宮圖以獻。世稱爲絕。

自題蜻蜓畫卷

露涼芳草曉風吹。紗翼輕明水影欹。莫便臨平山下去。眼睛雙眩碧琉璃。

七修類稿。王振鵬。元世祖時人。善詩畫。仁宗賜號孤雲處士。予幼時見有蜻蜓詩畫卷。於里中旌德觀。誠妙筆也。詩有黍離之哀。想宋季之遺黎。其卷多人題識。今亡矣。今以記憶者錄之於左。其自題蜻蜓詩云云。末二句。意其寫圖之時。必伯顏駐師皋亭之日。不忍故國垂亡。而虜騎之覘杭。得詩人之比也。

陳櫟

櫟字壽翁。自號定宇。休寧人。延祐間。舉鄉貢。不就禮部試。歸。元統間卒。

汪炎昶撰行狀。鄉先達方公回。曹公涇。皆號文場老手。先生相與切磋。甚爲二公所敬服。

和方虛谷上南行十二首錄八

濟世萬古航。乃今橫野渡。由此訪故人。勝著沙隄步。我傳紀行作。冠珮與薇露。何當參詩禪。一澆石頭路。

右古航渡

又過分流岑。行行足聊休。流品分良難。感此胡分流。大雅久不作。梁棟儕薪樗。蝸鳩笑鵬鵬。一是逍遙遊。

右分流嶺

南山得宣平。名字可千載。世無死仙人。花瓢今定在。家山有此逢。何必跨瀛海。下視白雲衣。蒼狗須臾改。

右過南山

疇昔飲雙橋。獨木寬法程。如今過雙橋。無復糟床聲。橋外吏人稀。飲徒常二更。追詠承平事。略此記西京。

右過雙橋舊官權酒或城十里始飲村膠雙橋酒稍佳今復無有

扁舟泛古航。昔常閱此奇。盤屈公詩中。眼明再見之。二孤恐飛來。或乃巨靈移。甚勿訛爲姑。又須訂菱茲。

右岑山渡

杏花富趙村。佳名昉唐代。酣酣紅雨春。芳葩誰不愛。轉眼鐵爐步。發問莫能對。杏村無杏花。趙村亦安在。

右過杏村

坡覓牛矢路。公渡牛矢嶺。遂令污穢地。居然化清境。今代曹子方。陳三延癩頸。何時躡吾履。迢迢山路永。

右過牛矢嶺

我未讀公詩。久矣知葉有。地非產此人。人知此地否。當與君子鄉。俱傳千載後。風饕閼春陽。高節且堅守。

右過葉有嶺

和方虛谷二首

後漢袁與楊世公五或四。衰衣苟有愧。不如安楚製。我不識斯人。聊復視其世。不有此翁賢。安得賢主器。

又

天壤一虛叟。見之夢寐中。豈必真及門。私淑恩何窮。易說曉樞白。詩編夜檠紅。終然欠參請。小草依松風。

寄曹宏齋

我不識宏齋。識之文字間。古風久蕭瑟。一筆獨追還。恨如東魯人。未得登東山。振衣不自勇。路亦非阻艱。

寄王教授

書堂名博士。得見未恨晚。發揮紫陽論。登峯造其巔。仕得四十強。程方九萬遠。北山勿移文。秋桂芳風遣。

定宇先生文集。方公上南行詩。予嘗和寄宏齋。宏齋達之方公。公選五首。附刊於集。

吳彬

彬字仲文。

句

雨添新水半篙綠。風減殘花幾片紅。淡勻姑射仙人貌。清奪林逋處士魂。

勤有堂隨錄。程斗山雪詩云。良謀雖已禽元濟。勝賞無如得李狸。誠齋雖嘗借李狸。言牛尾狸。然恐不可止作如此用之。又古詩云。欲騎揚州鶴。不食武昌魚。揚州猶可上。武昌不可居。對巧意未

粹。吾甥仲文詩云云。工而妥。梅花詩云云。奪字未妥。當改作返。

貢奎

奎。字仲章。寧國路宣城人。延祐初。由儒學提舉。入爲翰林應奉文字。泰定中。官至集賢直學士。卒。諡文靖。有雲林詩集。

馬祖常撰神道碑。還自會稽。涉吳中。以疾歸。臥於家。至十月朔。謂其姪師文曰。吾夜夢賦詩有云。竹樹蕭蕭夾泉石。又九轉丹成生羽翼。不祥奈何。語竟。溘然以沒。

夜坐二首

京國雨初霽。虛堂夜氣涼。新月上團團。坐久流清光。露葉閃明晦。河雲互飛揚。機籟發天祕。起弄琴與觴。千里同今夕。幽愁結中腸。溼螢低復舉。栖鳥亦驚翔。適時物乃貴。人生何慨慷。夜久境逾靜。居然庭樹秋。氣機發羣動。時節無淹留。涼露浴蟾彩。浮雲澹河流。微生競如髮。瀟思志常周。精爽一以竭。榛煙蔽前丘。道貴善持養。日入當偃休。寄言學仙子。文字徒冥搜。

九靈山房集。尙書貢先生晨坐公堂。及公館夜坐二詩。甚有陶韋思致。予時病脾。踰月。偶讀數過。不覺栩栩然去體。乃知檄愈頭風。古誠有是事哉。

案仲章未嘗官尙書。官尙書者。乃其子師泰。九靈誤稱。

張養浩

養浩。字希孟。號雲莊。濟南人。官至陝西行臺中丞。諡文忠。有歸田類稿。

晨興用俞立之韻

寒碧洲痕淺。深青地勢平。昂姿呈雅淡。樹影碎空明。牕納一天曉。人懷千古榮。移床高處坐。遙看白東生。歸田類稿附跋。擬雅古詩二篇。晨興五言今律一篇。先文忠公所遺翰墨也。引恐其久或摩滅。命工磨勒如上。嗚呼。先公遂閑之情。取友之誼。於此庶見其一端矣。至正十四年甲午春三月良日。朝請大夫陝西諸道行御史臺監察御史。嗣男引百拜謹識。石刻。

次馬伯庸少監贈經筵官虞司業詩韻

簪紳星聚掖垣西。芸簡含光動列奎。日上嵎夷鳴綵鳳。春生靈囿育斑駁。寬仁自引桑林異。濬哲誰云大麓迷。佔畢小臣叨進讀。涓埃無補愧栖栖。

文忠集自注。伯庸內翰繼學中郎。唱酬河字韻詩。往返數四。愈出愈奇。然兩軍相薄。短兵相接。鏖戰爭勝。未遑退舍。魯仲連之徒聞之。故特射一矢以解其紛。

馬祖常

祖常字伯庸。世爲永古特部。居靖州之天山。高祖爲鳳翔兵馬判官。子孫因號馬氏。延祐初。鄉貢會試皆第一。廷試第二。官至御史中丞。諡文貞。有石田集。

和王左司竹枝詞二首

日邊寶書開紫泥。內臣珠帽輦步齊。君王視朝天未旦。銅龍漏轉雞人啼。金爐寶薰留篆雲。花間百舌鳴早春。五坊戲馬賽爭道。傳聲催賜十流銀。

西湖竹枝集中承詩名敵虞王西夏氏之詩振始於石田集也竹枝蓋和繼學之作其音格矯健類山谷老人云

龍虎臺應制

龍虎臺高秋意多翠華來日似鸞坡天將山海爲城塹人倚雲霞作綺羅周穆故慚黃竹賦漢高空奏大風歌兩京巡省非行幸要使蒼生樂至和

元史文宗嘗駐蹕龍虎臺祖常應制賦詩尤被歎賞謂中原碩儒惟祖常云

駕發上京

蒼龍對闕夾天關秋忽凌晨出國門十里貔貅騎腰褭一雙日月繡旗旛講蒐獵較黃羊圈賜宴恩沾白獸尊赫奕漢家人物盛馬卿有賦在文園
詩藪全篇整麗首尾勻和

句

吳娃蕩槳潮生浦楚客吹簫月滿樓詳趙孟頫下

李河

河字溉之滕州人姚燧薦於朝官至翰林直學士

舞姬脫鞵吟應制

吳蠶八繭鴛鴦綺繡擁彩鸞一作繡園花金鳳尾惜一作昔時夢斷一作啼曉妝慵一作殘滿眼春嬌

扶不起。侍兒解帶羅襪鬆。玉纖微露生春紅。翩翩白練半一作輕舒卷。筍籜初抽弓一作翻宮樣軟。三尺春雲入手輕。一變新月凌波淺。象牀舞罷嬌無力。雁沙踏破參差迹。金蓮窄小不堪行。自一作獨倚東風玉階立。

案一作凌波曲。見薩都刺雁門集。然一時和者皆稱和旣之作。

黃潛

潛字晉卿。義烏人。登延祐二年進士第。官至侍講學士。諡文獻。有日損齋集。

元史文辭譬之澄湖不波。一碧萬頃。同郡柳貫與潛及臨川虞集。豫章揭傒斯齊名。人號爲儒林四傑。

宋濂撰行狀。嘗著弔諸葛武侯辭。劉君應龜見而歎曰。吾鄉以文辭鳴者。喻叔奇兄弟爾。稍加工。不與之抗衡乎。因留受業。從仙華山隱者方君鳳游。爲歌詩相倡和。絕無仕進意。

危素撰神道碑。延祐元年貢舉法行。縣長吏強起就試。作太極賦。傳於世。世之議者謂公操行孤潔。類陳履常。文辭嚴簡。類王介甫。筆札俊逸。類薛嗣通。

詩數元五言古。率祖唐人。黃晉卿倣孟浩然。

上京道中雜詩十二首

發大都

辭親獨行邁。遙遙抵京國。胡爲突不黔。驅馬更遠適。至尊有時巡。樹羽殷阡陌。宿衛必近臣。顧問須耆德。

陋儒亦何知。冗從同執戟。草深原野青。雨暗關塞黑。寥寥盛年意。眷眷游子色。一身萬人中。敢不思努力。

劉蕢祠堂

劉君古遺直。祠堂在邱園。嗟此豪傑窟。文雄歛孤騫。平生二三策。匪微明主恩。瑣瑣談得失。無乃市井言。憑高一長望。若厭車馬喧。微風過疏雨。青山滿前軒。陰晴倏異態。浮雲實無根。悠悠千載心。去去勿復論。

居庸關

連山東北趨。中斷忽如鑿。萬古爭一門。天險不可薄。聖人大無外。善閉非鍵鑰。車行已方軌。關吏徒擊柝。居民動成市。廬井互聯絡。幽龜白雲聚。石磴清泉落。地雖臨要衝。俗乃近淳朴。政須記桃源。不必銘劍閣。僕夫踣謂我。無爲久淹泊。山川豈不好。但恐風雨惡。

榆林

崇崇道旁土。云是古長城。卻尋長城窟。飲馬水不腥。斯人亦何幸。生時屬休明。向來邊陲地。今見風塵清。禾黍被行路。牛羊散郊坰。儒臣忝載筆。帝力猗難名。

槍竿嶺

憶昔賜第歸。吾母適初度。蹉跎歲月晚。今辰乃中路。居人誇具慶。游子慙叱馭。茲山稱最高。揚鞭入煙霧。巖巖多峭峯。濛濛饒雜樹。崎嶇共攀援。躑躅頻返顧。陳情未成表。登高詎能賦。獨憐山下水。遠向盧溝去。

李老谷

緣崖一徑微。入谷雙崦窄。密林日易曛。況及雲雨積。行人望煙火。客舍依山色。家僮爲張燈。野老煩避席。

未覺風俗殊。祇驚關河隔。嚴程不可緩。子規勿勸客。

赤城

雞鳴秣吾馬。晚飯山中行。何以慰旅懷。赤城有嘉名。灘長石齒齒。樹細風泠泠。時見巖壁間。粲若丹砂明。溫泉發其陽。攜訶勤百靈。前峯指金閣。真境標殊庭。白道人跡稀。青崖雲氣生。信美無少留。緬焉起深情。

龍門

竦身望龍門。緩轡行兀兀。溪迴愁屢渡。雨橫驚暴溢。兩岸儼相向。百水怒爭出。人言馬上郎。快意每多失。自非渥洼種。不得矜捷疾。飄飄蟻蝨臣。凜凜鼉鼉窟。皇靈重覆冒。利涉用終吉。迴睨向所經。千嶂隱朝日。青林外盤紆。黃流中蕩潏。後來渠未央。君子宜戰栗。

獨石

解鞍及亭午。稍欣煙霧收。蒼然衆山出。歷歷如雕鏤。前瞻一石獨。靈宮居上頭。頗聞去年夏。水激龍騰湫。走避登屋上。夜半齊呀咻。幸茲溪澗中。今作清淺流。宴安不可懷。變化誠難求。翠華渺在望。行矣毋淹留。

擔子窪

自從始出關。數日走崖谷。迢迢度偏嶺。險盡得平陸。坡陀皆土山。高下紛起伏。連天暗豐草。不復見林木。行人煙際來。牛羊雨中牧。颯然衣裳單。咫尺異寒燠。佇立方有懷。相逢仍問俗。畏途宜疾驅。更傍灤河宿。

李陵臺

日暮官道邊。土室容小憩。漢將安在哉。荒臺猶髣髴。低徊爲之久。懷古增歔歔。長風吹曠野。飛雨千里至。

蕭條蒼山根。草木餘爽氣。常憐司馬公。予奪多深意。奏對實至情。論錄存大義。史臣司述作。遺則敢失墜。

上都分院

晨興過桓州。旭日生蒼涼。舉頭見觚稜。金碧何巍煌。洪河貫其前。青山環四傍。暮投玉堂署。鼇峯屹中央。升階旅羣彥。官燭分餘光。琴冊森在側。談笑來清觴。列坐無所爲。陳詩詠黃唐。帝鄉豈不樂。父母遠莫將。起視雲漢低。垂星爛寒芒。南飛有冥鴻。邈哉天際翔。

危素撰神道碑。至順二年。用馬文貞公之薦。召爲應奉翰林文字。同知制誥。扈從至開平。作紀行詩十有二篇。世盛傳之。草堂雅集。右紀行詩十二首。虞伯生題曰。少陵入蜀路崎嶇。故有淒涼五字詩。應奉爲官隨翠輦。固應同調不同辭。

偶成

漢室需材訪隱淪。販繒屠狗各求伸。豈知風雪南山下。別有當年射虎人。

詩藪黃晉卿偶成一絕云云。吳正傳和云。一壑風煙自可留。十年湖海漫曾遊。短衣射虎真堪樂。莫恨將軍老不侯。二作皆有深致。第稍涉議論耳。

句

揮毫風雨傾三峽。聽履星辰接兩朝。扶老未須蒼玉杖。行春聊過赤欄橋。北尋海濱瞻恆岳。南涉江

淮上會稽。山下靈風吹桂棹。雲邊仙樹拂丹梯。詳柳貫下

許晉孫

晉孫字伯昭建昌人延祐二年登進士第官至茶陵州判官

句

至道難開歲年晚聖賢不作後世亂

黃文獻集君筮仕後始學於臨川吳公每以及門晚爲憾其爲詩尙醞藉未病前一月夢爲詩云
云詰旦語人曰吾詩詞意甚悲殆不類平生作

元詩紀事卷十三

楊載

載字仲宏。建之浦城人。延祐初登進士第。官至寧國路總管府推官。有仲宏集。黃文獻集年幾四十不仕。賈戶部國英數言其材能於朝。遂以布衣召入。擢翰林國史院編修官。其文如長風怒帆。一瞬千里。至於畸岸之縈折。絃欹柁側。亦未始有所留礙。楊載詩法家數。予於詩之一事。用工凡二十餘年。乃能會諸法而得其一二。睽車志。楊仲宏以下詩文多殺機鬼氣。

仲弘集。范梈序。大德間。余始得浦城楊君仲宏詩。讀之恨不識其爲人。皇慶初。仲宏與余同爲史官。會時有纂述事。每同舍下直。已而猶相與回翔留署。或至見月月盡。繼燭相與刻苦澹泊。寒暑不易者。唯余一二人耳。仲宏之天稟曠達。氣象宏朗。開口論議。直視千古。每大衆廣席。占紙命辭。敖睨橫放。盡意所止。衆方拘拘。已獨坦坦。衆方紆徐。已獨馳駿。馬之長坂。而無留行。故當時好之者雖多。而知之者絕少。要一代之傑作也。仲宏有子尙幼。其殘藁流落。未有能爲輯次者。友人杜君伯原。自武夷命僕曰。將就其平生所得詩。刻諸山中。此誠知仲宏者。詩藁元五言古。率祖唐人。楊仲弘。滕玉霄。薩天錫。誦法青蓮。

宗陽宮望月分韻得聲字

老君堂上涼如水。坐看冰輪轉二更。大地山河微有影。九天風露寂無聲。蛟龍並起承金榜。鸞鳳雙飛載玉笙。不信弱流三萬里。此身今夕到蓬瀛。

西湖游覽志。宗陽宮。本宋德壽宮後圃也。內有老君臺。得月樓。杜道堅號南谷。當塗人。風度清雅。嘗以中秋集儒彥。登老君臺玩月。分韻賦詩。楊仲宏爲首唱。

紀夢

海上垂綸有幾年。平居何事夢朝天。蒼龍觀闕東風裏。黃道星辰北斗邊。治世祇今逢五百。前程如此隔三年。楊雄解奏甘泉賦。應有聲名達帝前。

歸田詩話。蒼龍觀闕東風裏。黃道星辰北斗邊。日照九衢平似水。胡兒吹笛內門前。此宋龐右甫過汴京詩也。甚感慨有味。仲宏作紀夢詩。乃全用其一聯。何也。

寄劉師魯

想君游宦處。正值洞庭湖。落日波濤壯。晴天島嶼孤。舟航通漢沔。風物覽衡巫。天下文章弊。非公孰起予。詩法正論。此以興爲承。賦爲轉者也。

古牆行

建炎白馬渡江時。循王以身佩安危。疏恩治第壯輿衛。縮板載榦絲偏裨。下錡江城但沙鹵。往夷赤山取焦土。帳前親兵力如虎。一日連雲興百堵。引錐刺之鐵石堅。長城在此勢屹然。上功幕府分金錢。歡聲如雷動地傳。爾來瞬息踰百年。高崖爲谷驚推遷。華堂寂寞散文礎。喬木慘淡棲寒煙。我入荒園訪遺古。所

見惟存丈尋許。廢壤終嗟鹿游。飄零不記商羊舞。王孫欲言淚如雨。爲言王孫毋自苦。子孫再世墮門戶。英公尙及觀房杜。如君百不一二數。人生富貴當自取。況有長才文甚武。公侯之後必復初。好把家聲繼其祖。

梅梁歌酬鄭集之

大禹之功及天地。廟有梅梁何足異。奈何過用鐵索纏。太祝爲之欲微利。每言變化失其所。去作老龍治風雨。一聲霹靂震巖扉。千尺蜿蜒辭殿戶。七月煬苗沾塊土。憂殺村中老農父。買羊沽酒祭梅梁。祭罷祠官傳好語。吁嗟老農無爾恩。大禹有神焉可誣。汝曹淫祀欲求福。此物爲妖常伏誅。

歸田詩話長篇如古牆行。梅梁歌皆爲時所推許。夫人瞿氏予祖姑也。嘗以仲宏親筆草稿數紙授予。字畫端謹。而前後點竄幾盡。蓋不苟作如是。

次韻虞彥高遊陽明洞

憶昔神禹奠九州。茲山會計功始休。諸侯玉帛渺何許。但見萬水從東流。衣冠永閉陽明洞。夜聞鬼哭巖之幽。珠宮貝闕號龍瑞。天造地設非人謀。槎牙怪樹凍不死。化作十丈蒼玉虬。丹洞呀然仙掌裂。翠峯巧矣蛾眉修。梅梁飛去鐵鎖斷。往往雷雨生靈湫。軒轅縱神極祕怪。海上笙鶴時相投。平生閉門讀史謳。子乃探穴先吾遊。明當挾子期汗漫。題詩更在最上頭。不妨山水樂吾樂。豈有飢溺憂民憂。故家喬木尙可求。有子有孫百世留。臥橫玉簫泛歸舟。吹散萬斛江南愁。

詩數雄渾流麗。步驟中程。

句

落日波濤壯。晴天島嶼孤。風塵惟短褐。江漢自扁舟。磧迴沙如雪。河窮浪入天。山開棲越迹。水泝入吳程。

詩數元五言律可摘者。楊仲宏云云。

又

風雨五更雞亂叫。江湖千里雁相呼。挾書萬里求明主。仗劍三年別故鄉。窗間夜雨消銀燭。城上春雲壓綵旗。空桑說法黃龍聽。貝葉繙經白馬馱。

歸田詩話。楊仲宏以宗陽宮玩月詩得名。然他作如云云。沈雄典實。先叔祖每稱之。

范梈

梈字亨父。一字德機。清江人。薦爲佐衛教授。官至湖南嶺北廉訪司經歷。人稱文白先生。所著有燕然東方等稿。

揭文安公文粹。與浦城楊載。仲宏。蜀郡虞集。伯生。齊名。而余亦與之游。伯生嘗評曰。楊仲宏詩如百戰健兒。范德機如唐臨晉帖。以余爲三日新婦。而自比漢廷老吏也。聞者皆大笑。余獨謂范德機詩。以爲唐臨晉帖。終未逼真。今故改評之曰。范德機詩。如秋空行雲。晴雷卷雨。縱橫變化。出入無朕。又如空山道者。辟穀學仙。瘦骨峻嶒。神氣自若。又如豪鷹掠馬。獨鶴叫羣。四顧無人。一碧萬里。差可彷彿耳。案百戰健兒各評。與輟耕錄李元仲說。皆小異。

詩藪百戰健兒，悍而蒼也。三日新婦，鮮而麗也。唐臨晉帖，近而肖也。漢法令師，刻而深也。又右四家評語，元人所載亦互異。一云清江漢法令師。

詩家一指洗鍊，范德機如鑛出金云云。清奇，范德機娟娟羣松云云。

詩學禁樹，清江范德機以詩名天下，編集唐人之詩，具爲格式。

詩法正論，我朝有亘古所無之混一，故有亘古所無之氣運。一時文人如劉靜修、姚牧庵、盧疎齋、元復初、趙子昂諸先達，固已名世矣。大德中，清江德機先生獨能以清拔之才，卓異之識，始專師李杜，以上遡三百篇，其在京師也，與伯生虞公、子昂趙公、仲宏楊公、曼碩揭公諸先生倡明雅道，以追古人，由是而詩學丕變。范先生之功爲多。曼碩嘗語人曰：近年詩流善評者，無如劉會孟，能賦者僅見范德機。熊雪嶠曰：范詩如絕色婦人，洗淨脂粉，與人鬪妍，故無有及之者。周靖之謂余曰：范公踐履不愧古人，故其詞翰亦不愧於古人。要皆自其胸次流出，不可彊學而能也。且范先生嘗曰：吾平生作詩，稿成讀之不似古人，卽削去改作。

四溟詩話，范德機曰：絕句則先得後兩句，律詩則先得中四句，當以神氣爲主，全篇渾成，無餽釘之迹。唐人間有此法。

詩藪，范德機傳與礪，張仲舉步趨工部。

蒼山感秋

蒼山秋意長，池館靜而闕。雨止修竹間，流螢夜深至。皇羲世云遠，雅頌日凋弊。舉手過頽波，誰識作者志。

烏啼魯東門。泗水不染袂。後去三十年。直可肩聖知。機關繫風化。詞語特細事。月落閉虛籬。坐夢太古帝。揚眉頰玉色。盡發養生祕。勿謂學仙難。此道可立致。

詩法正論。如德機范先生感秋詩云云。觀於此詩。意義深遠矣。

草木子。昔危太朴與德機同晚步。德機得雨止二句。喜甚。既而曰。語太幽。殆類鬼作。

閩州歌

閩州土俗戶不分。生子數歲學繡文。圍紉坐肆雜男女。誰問小年曾識君。古來夜行須秉燭。今者衢路走紛紛。那更誅求使者急。鞭笞一似雞羊羣。古來閨閣佩鉞管。今者女工徵六軍。雖復太平少征戰。設有備豫將何云。去年居作匠五千。耗費府藏猶煙雲。官胥拊克常十八。況以鳩斂奪耕耘。祇今棄置半不用。民勞竟是誰歡忻。歲歲條章省煩費。幸且不省無方殷。唐虞在上儉且勤。後王猶復錦繡焚。豈有夔龍讓姚朱。不言忍使憂心熏。觀風自是使者職。作歌雖遠天應聞。

元史改擢福建閩海道知事。文繡局取良家子爲繡工。無別尤甚。梓作歌詩一篇。述其弊。廉訪使取以上聞。皆罷遣之。其弊遂革。

掘塚歌

昨日舊塚掘。今朝新塚成。塚前兩翁仲。送舊還迎新。舊魂未出新魂入。舊魂還對新魂泣。舊魂丁寧語。新魂好地不用多。子孫子孫綿綿如不絕。曾孫不掘元孫掘。我今掘矣良可悲。不知君掘又何時。

七修類稿。掘塚歌。清江范德機作也。范以閩州歌并此。皆爲風俗所興。而閩州者。因得上聞。故著。

名史冊。且爲一代詩人。不知掘塚歌。則繆理太甚。歌云云。據歌。則人決不用子孫。亦不用墳墓矣。予意換中二句數字。如曰好地還用好子孫。子孫綿綿多頑劣。曾孫不掘元孫掘。斯義方妙。

奉寄翰林鄧侍講

韞承持節江之東。騎驢再上蓬萊宮。蓬萊仙人歌白鶴。聲落五湖煙雨中。世間爵祿不易致。何獨去就如飄風。朝廷禮樂須制作。六經隱義資發蒙。論思廟堂集耆碩。啓沃寧讓前諸公。閉門讀書古都市。四輩冠蓋方隆隆。我生生長在窮谷。那有文字爭人雄。謬蒙引譽百僚上。負祿府署慚無功。一別十年今又五。昔者少壯今成翁。誰知復客七閩下。隔二千里來詩筒。羸軀頓醒瘴癘惡。賴以慰此心忡忡。粵王城南浪自白。粵王城西花自紅。

詩法正論。此以興爲合者也。

郡中卽事十二韻

儻耳九州外。邈然在南荒。周回數千里。大海以爲疆。古來非人居。禽獸相伏藏。自從中世來。貢賦登明堂。其或失撫馭。山藪更陸梁。聚則成蜂蟻。散卽驅牛羊。高結舞大鹵。上衣不備裳。殺戮乃酬勸。誅之仁者傷。吾嘗七八月。持節泛滄浪。一旬錄郡獄。詢事考纖芒。問之守郡人。莫識爲治方。但見西風多。靡宇秋蕪長。聖哲戒忠信。勿謂不足行。及茲蠻貊邦。始見斯道臧。

清江楊暉云。文白先生詩。性情所宗。一以少陵爲歸。海外諸作。杜之悲壯也。

王氏能遠樓

游莫羨天池。鵬歸莫問遼東鶴。人生萬事須自爲。跬步江山卽寥廓。請君得酒勿少留。爲我痛酌王家能遠之高樓。醉捧勾吳匣中劍。斫斷千秋萬古愁。滄溟朝旭射燕甸。桑枝正搭虛窗面。峴崙池上碧桃花。舞盡東風千萬片。千萬片。落誰家。願傾海水溢流霞。寄謝尊前望鄉客。底須惆悵惜天涯。

詩數雄渾流麗。步驟中程。

句

不眠聽戍鼓。多病憶歸舟。疎雨從昏過。繁星達曙流。

詩數元五言律可摘者。范德機云云。句格閎整。在大曆元和間。

句

黃河西去從天下。華岳東來拔地高。詳趙孟頫下

揭傒斯

傒斯字曼碩。龍興富州人。延祐初。薦授翰林國史院編修。官至翰林侍講學士。諡文安。有秋宜集。黃文獻集。程鉅夫。盧摯。前後持湖北使者節。程公奇其才。妻以從妹。盧公尤愛其文。表薦之。李韓公孟以政府兼史館。觀公所撰功臣傳。撫卷歎曰。此方謂之史筆。他人真膽吏牘耳。文宗聚勳戚大臣子孫於奎章閣。教之擢公授經郎。開在興聖殿西。公早作。必徒步先至。諸貴游受業者。謀合錢爲賃馬。公微聞之。輒自置一馬。尋復鬻之。上有所咨訪。恆以字呼之。而不名。木天禁語。編修楊仲宏曰。五言短古。衆賢皆不知來處。乃只是選詩結尾四句。所以含蓄無限意。

自然悠長。此論惟趙松雪翁承旨深得之。次則豫章三日新婦曉得。清江知之。卻不多用。揭曼碩詩宗正法眼藏。學詩以唐人爲宗。而其法寓諸律。心神節制。字數經緯。小能使大。大能使小。遠能使近。近能使遠。我法如是有謂。不必然者。卿用卿法。

詩家一指典雅。揭曼碩玉壺買春云云。

月山詩話。揭曼碩一絕句云。步出城南門。悵望江南路。前日風雪中。故人從此去。此本古詩。曼碩嘗書以寄太虛。後人因誤刻入秋宜集中。南字古詩作東。曼碩改之。取其切合順承門耳。曼碩集中。此詩題作曉出順承門有懷太虛。此題亦後人所爲。詩藪揭曼碩師李旁參三謝。

寄伯生

奎章分署隔窗紗。不斷香風別殿花。留守日頒中賜果。宣徽月送上供茶。諸生講罷仍番直。學士吟成每自誇。五載光陰如過客。九疑無處望重華。事見虞集下

女兒浦歌二首

女兒浦前湖水流。女兒浦前過湖舟。湖中日日多風浪。湖邊人人還白頭。
大孤山前女兒灣。大孤山下浪如山。山前日日風和雨。山下舟船自往還。

西湖竹枝集。文章居虞之次。如歐之有蘇。曾云。其竹枝詞爲女兒浦歌。其風調不在虞下也。
高郵城

高郵城。城何長。城上種麥。城下種桑。昔日鐵不如。今爲耕種場。但願千萬年。盡四海外爲封疆。桑陰陰。麥茫茫。終古不用城與隍。

秋宜集。過何得之先生故居詩。膝下中郎小女。曾聽唱我高郵。自注。先生嘗喜余高郵城詩。相見卽呼高郵城來。每相對酒酣。則朗誦數過。

秋雁

寒向江南暖。飢向江南飽。莫道江南惡。須道江南好。

山居新話。揭曼碩學士有題秋雁云云。按此詩大有寄託。

至正直記。揭曼碩題雁云云。蓋譏色目北人來江南者。貧可富。無可有。而猶毀辱罵南方不絕。自以爲右族身貴。視南方如奴隸。然南人亦視北人加輕一等。所以往往有此誚。

送涂雲章訪舊武昌卻入京師

垂雲厲驚風。萬里摩高圓。蟠泥鼓巨浪。豈顧九重淵。毛生入楚庭。脫穎俄頃間。粲粲涂公子。長嘯起邱樊。朝辭豫章臺。暮過匡廬山。大帆割鸚鵡。極目空波瀾。黃鵠錦袍仙。吹笙紫霞端。相顧一笑粲。青春滿南天。黃金築高臺。更覺郭隗賢。聯翩樂劇輩。相逐入幽燕。平明九門開。劍佩踰五千。豈無一字薦。傾倒平生言。東風杏花開。待我薊門前。

詩法正論。此以比興爲起者也。

李宮人琵琶引并序

鄂縣亢主簿言有李宮人者善琵琶。至元十九年以良家子弟入宮得幸。上比之昭君。至大中入事興聖宮。比以足疾。乃得賜歸侍母。給內俸如故。因亢且乞詩於余。遂作李宮人琵琶引。其辭曰。茫茫青塚春風裏。歲歲春風吹不起。傳得琵琶馬上聲。古今只有王與李。李氏昔在至元中。少小辭家來入宮。一見世皇稱藝絕。珠歌翠舞忽如空。君王豈爲紅顏惜。自是衆人彈不得。玉觴爲舉樂乍停。一曲便覺千金直。廣寒殿裏月流輝。太液池頭花發時。舊曲半存猶解譜。新聲萬變總相宜。三十六年如一日。長得君王賜顏色。形容漸改病相尋。獨抱琵琶空歎息。興聖宮中愛更深。承恩始得遂歸心。時時尙被宮中召。強理琵琶絃上音。琵琶轉調聲轉一作逾。澀堂上慈親還佇立。回看舊賜滿牀頭。落花飛絮春風急。

詩藪雄渾流麗步驟中程

送王留守宣慰荆湖

舟楫連橋出薊丘。弓刀千騎入荊州。歌翻郢雪寒暄變。思逐岷波日夜流。雲雨暝連神女宅。山川晴繞仲宣樓。豈無賢士堪招隱。應向鹿門深處求。

送張真人歸上清

閉戶京城晝嬾開。初聞北觀卻南回。馮夷擊鼓乘龍出。王子吹笙跨鶴來。囊裏天書明日月。匣中神劍闕風雷。回瞻魏闕紅雲擁。應在山中看蚤梅。

詩藪全篇整麗首尾勻和

李將軍歌一首送李天民赴邵武軍口巡檢

李將軍材且武。儒冠換得兜鍪去。身疑南極老人星。氣食陰山雪毛虎。雕弧白馬金僕姑。天地昂昂此丈夫。五十方爲求盜使。人生何用苦詩書。寄言邵武諸官長。不是尋常一腐儒。

文安集自注。時中書以吏部儒選員。多有十年不得調者。奏以爲閩廣諸道巡檢。然多非其人。而天民式稱是選。老人星其常自喻。

句

大舸中流下。青山兩岸移。鴉啼木郎廟。人祭水神祠。

詩藪。元五言律可摘者。揭曼碩云云。

星臨翼軫南。陞闕神降虛。危北極遙。蒼山斜入三湘路。落日平鋪七澤流。詳趙孟頫下

歐陽玄

玄字原功。瀏陽人。延祐乙卯。以鄉貢首薦。登進士第。官至翰林學士承旨。諡曰文。有圭齋集。元史。十歲。部使者行縣。玄以諸生見。命賦梅花詩。立成十首。晚歸。增至百首。見者駭異之。

宋學士集。初虞文靖助教成均。其父汲。方教授於潭。見公文大驚。手封一帙。寄文靖。謂他日必與並駕齊驅。由是文靖薦公升朝。

題僧墨菊卷

苾芻元是黑衣郎。當代深仁始賜黃。今日黃花翻潑墨。本來面目見馨香。

七修類稿。僧舊著黑衣。元文宗寵愛笑隱。賜以黃衣。其徒後皆衣黃。歐陽原功題僧墨菊詩云云。

送振先宗丈歸祖庭

歐公孫子多。擘派以爲四。莫年歸穎陰。非無首丘志。乞洪不得請。由是懈歸計。攷公生平言。亦頗憾先世。先世多才賢。生適逢五季。幅員政分裂。盡瘁於所事。竟乏垂世名。蓋亦限地勢。況復公少孤。坎壈蜀漢裔。身當混一秋。代逢承平際。擇里審所安。實邇輦轂地。子孫託畿內。宦轍亦云易。人情曷免爾。公豈溺聲利。詎知汭簞移。南北尋睽異。一枝先南邁。司造有深意。沙溪標德里。瀧岡重塋祭。至今青原家。十世祀不替。振先吾宗英。守正恥骯髒。閭閻保家法。處約不少懟。嘉樹無由枝。嘉穀無滯穗。原本旣不凡。時需諒無棄。矧今掄俊髦。往往論根器。老夫辭冊府。多病久憔悴。徒懷薦士心。言莫士軒輊。賦詩當推轂。自愧辭已費。憧憧青雲友。誰如古人誼。

圭齋集。歐陽公晚年。乞守洪州。累表不得請。於是歸江右之志遂不果。余詩所謂其居偏方。熟於歐文者能知之。蓋公之不歸廬陵。其志深有可諒者矣。南渡以後。宋人多議公此事。洪景盧楊廷秀之賢。亦未免有此意。甚者謂公子孫居穎。爲金人所戕而遂絕。是大不然。近年奉詔修三史。一日於翰林故府中。攜金人遺書。得元遺山裕之手寫壬辰雜編一帙。中言安平都尉完顏斜烈。漢名鼎宇。國器嘗鎮商州。偶搜伏於竹林中。得歐陽子孫甚多。以歐公之故。并其族屬鄉里三千餘人。悉縱遣之。則知未嘗殲於金兵也。此好事者爲之辭明矣。元遺山金士領袖。生平極重歐公。嘗有詩云。九原如可作。吾願從歐陽。北人至今佩服其言。振先歸以似鄉先生桂隱。劉公一觀。

何貞立

貞立字□□□□人歐陽玄壻。

題墨菊卷

陶令歸來不受官。黃花采采曉靈寒。悠然一見南山後。故向東籬子細看。

山樵暇語。既舉進士。原功欲拔入翰林。於虞邵菴曼碩諸公。極稱道之。及相見。適會僧景初持墨菊卷詣翰林求題。諸公遂請貞立賦之。貞立出倉猝。且怙怯。勉強賦云云。所作殊負所聞。諸公頗不愜。貞立以詩故。竟不得入翰苑。

許有壬

有壬字可用。彰德路湯陰人。登延祐二年進士第。官至中書左丞。諡文忠。有至正集。

上京十詠

井序

元統甲戌。分臺上京。飲馬酒而甘。嘗爲作詩。丁丑分省。日長多暇。因數土產可紀者。尙多。又賦九題。并舊作爲上京十詠云。

馬酒

味似融甘露。香疑釀醴泉。新醅撞重白。絕品挹清玄。驥子饑無乳。將軍醉臥氈。桐官開漢吏。鯨吸有今年。

粍麵

坡遠花全白。霜輕實便黃。杵頭麩退墨。磴齒雪流香。玉葉翻盤薄。銀絲出漏長。元宵貯膏火。蒸墨笑南香。

至正集自注。南鄉蕎麥黑甚。熟則堅實若瓦石。可代陶甕貯膏火。

沙菌

牛羊膏潤足。物產借英華。帳腳駢遮地。釘頭怒戴沙。齋廚供玉食。毳索出毼車。莫作垂涎想。家園有莫邪。

至正集自注。此物喜生車帳卓歇之地。夏秋則環繞其地而出。

案十詠中。尙有秋羊。黃羊。黃鼠。蘆菹。白菜。地椒。韭花。七首。皆尋常之物。無自注者。未錄。

寄高元用

兩髻煙雲朝共爨。一窗風雪夜同衾。爲君拈起當時語。應見相思萬里心。

至正集題舊寄高元用小詩。至大己酉。余旅食京師。與洛陽高君元用共爨以食。天大寒。嘗複衾而寢。有兩髻云云之句。君笑曰。此他日話柄也。俄皆用茂異調校職。元用餞予北而後南焉。予於遼州倅遇便郵。繼以爲君云云寄之。後雖踈踈南北。有便必書。而迄無報章。每念一日見之當詰之後。其弟元博佐興國幕。謂予忘也。謄以見寄。予游長沙。倒指二十六年。元用奄逝。

次和可行赴圭塘

卜築何如履道坊。千紅萬綠浸銀塘。要回衰境爲全盛。卻使閒人號最忙。活水清園容膝屋。新篁高出及肩牆。煙霞遮斷塵埃路。纔覺山林白晝長。

圭塘欸乃集。周伯琦序。中丞安陽公謝事歸相州。於其第之西二里。得康氏廢園。薤灌莽。芟菑翳。鑿池其中。袤廣以步。計者千餘。深八尺。形如桓圭。雙洲右枕。孤島左峙。夷隄繚垣。崇臺在肘。夫藁楊柳。棗栗桑榆。梅榴桃杏。蒼松翠竹之屬。周於池之中外。蓋培植踰年而後成。惟二古檜歸然。乃

康氏故物。公時杖屨攜弟若子。會賓友。觴詠其閒。以池之占勝居多。故以圭塘名。此倡彼和。宮商遞宣。遂名其篇曰欸乃。若漁歌互答然。哀成巨帙。凡得詩古律五七言。總若干首。

許有孚

有孚字可行。登進士第。官至同僉太常禮儀院事。

侍兄赴圭塘

時出西門履信坊。望中楊柳是圭塘。軒車每被兒童識。風物能令杖屨忙。山客荷囊多藥草。溪人抄紙滿鄰牆。年來頗識幽棲樂。愈覺林泉興味長。詳許有壬下

圭塘雜詠并序錄二

圭塘亭臺浚築之役。經始及落成。有孚實皆與聞。吾兄時一來遊。雖乘興忘返。而芳春長夏。秋晴冬煥。有孚獨得賞玩。竟日不敢孤兄之賜。謹取日所爲事。各成小詩。題曰圭塘雜詠。用發長者一笑。塘之可咏者不止此。又當別撰拜呈。

日夕觀山

晚晴臺上看巉巖。萬壑千峯起翠嵐。恰似雲閒招五老。今宵有夢定江南。

遶隄種菊

酒熟同招隱士看。饑來忍把落英餐。春風無限閒桃李。不似黃花耐歲寒。圭塘欸乃集

許楨

楨字元幹有壬子以門功補官太祝。

和韻

清晨走馬碧雞坊。點檢西園數畝塘。花柳前川成自樂。輪蹄終日爲誰忙。釣魚岸口迎新水。沽酒鄰家過短牆。半醉莫催翁命駕。月明松影引杯長。詳許有壬下

圭塘欸乃集侍飲圭塘和楨韻序至正己丑歲相城春夏不雨六月念九日始雨入夜沾足吾兄乘機輿挈婿姪來圭塘縱觀樂甚猶子楨具饌且有詩兄謂有孚曰詩雖不高其意可取遂走筆答之有孚亦依韻

次和圭塘雜咏錄一

月下觀梅

老樹清溪映白沙。可人竹外一枝斜。黃昏信步前村去。香到松林賣酒家。圭塘欸乃集

馬熙

熙字明初衡州安仁人官右衛率府教授。

和韻

年來夢斷鳳池坊。雲影天光有此塘。夜飲不辭歸路遠。晨興更覺攪衣忙。桑麻莽蒼接平野。機杼咿啞聞隔牆。忽有好詩生馬上。眼明雙檜拂雲長。詳許有壬下

和可行圭塘雜咏錄一

開窗看雨

洞房編藥屋編荷。八面玲瓏得月多。誰遣天飄簫雲過。嫩涼扶我入無何。

圭塘欵乃集。馬熙序。欵乃既歌之明年。熙如京師。可行泊楨。日侍安陽公。觴詠圭塘。更唱迭和。詩辭凡二百四十有九。又明年。楨來京師。始得伏讀全集。大篇雲行。短章泉流。無非樂日用之常。而憂國憂民之實。亦未嘗不默寓其閒也。於是忘其燕陋。勉強補和。得詩七十八。詞八。

趙恆

讀圭塘欵乃集

細讀圭塘唱和詩。流風餘韻想當時。東山絲竹閒方得。北海樽罍老更宜。亂後池臺渾索寞。夢中松竹亦參差。櫻輿不晚歸粉社。願校園丁築舊基。

圭塘欵乃集附錄云云。至正甲辰諸生。襄邑趙恆。書於大都南城之寓館。

陸煥然

讀圭塘欵乃集

宰相歸來致政時。圭塘唱和類墳篋。好山好水天開畫。難弟難兄日賦詩。酒罍每從花塢設。釣舟時傍柳陰移。景因人勝千年暇。綠野香山未足奇。

圭塘欵乃集附錄。中書左丞安陽許公。泊弟太常。文章政事。名滿天下。每嘗想慕風采。至正甲辰。愚叨掌故。得親太常公。一日出示圭塘唱和詩集。迺左丞致政。太常以南臺御史還家。兄弟暇日。

讌集圭塘亭榭時所作也。一唱一和。珠玉輝映。奉讀之餘。則賢人君子。棣華之樂可想也。遂成俚語一章。用贊萬一云云。山東陸煥然拜。

胡井表

句

他年拂羽雲霄上。莫負當年乳哺恩。詳趙涉下

元詩紀事卷十四

丁復

復字仲容天台人。延祐初游京師。與楊載范梈同薦入館閣。不果。有檜亭稿。

李孝光檜亭集跋。至建業。見仲容已五十餘。其詩皆已絕去生獐操盛精悍。猶之宛馬不蹠不齧。不罌。而日行千里。既老。買宅建業之城北。南戶。故有兩檜樹。醉依樹而吟哦。因自名其什曰雙檜亭詩云。

李桓檜亭詩藁序。地既深僻。有園亭之勝。古檜列植左右。客至款坐亭上。壻饒介之。方集君詩。得若干首。爲一編。精麗奇偉。格超而趣遠。余識君於二十年之前。當是時。君詩酷類太白。雜而真之。集中見者。不復能辨。今其體稍變。將自爲一家。楊嗣檜亭續集序。詩必因酒而作。引觴揮毫。若不經意。而語率高絕。飲至半酣。詩愈益奇。而先生亦頽然醉矣。然往往卽書卷上。未嘗起草。故詩雖多。藁皆不存。

夏日過龍翔寺養蒙室空問琦元朴書記因讀鄭明德詩就韻奉贈

新竹滿牆雨。西隣留老翁。上人虎邱虎。作客龍河龍。及室每愛玉樹好。住屋少隔銀杏東。日不得見夜作夢。夢時一過之。但恐空百年。共秋草。兩閒同轉蓬。昨日之日我髮亦已白。明日之日子顏寧復紅。衆皆上我

固下宗石胡盧誰售價。花綠樹茂煖爲冬。葉爲松高寒入夏。南風西來卽是秋。高歌且爾鏘鳴球。一蝸舉世兩門國。六鼃何處三山洲。須君界發白毫相。放我江湖之客舟。我年五十九知命。我自信之誰與證。君今語我我卽聞。我且語君君乃聽。僦屋得園一畝耕。煮菜作羹全無成。何如寧戚扣牛角。長歌夜夜追天明。

草堂雅集。李五峯題此詩云。初讀新竹滿牆雨。意謂類馮海粟。及讀至一蝸舉世兩門國。六鼃何處三山洲。大以爲好。老賊胡不死。

題程先生西行集。程年七十餘。歸蜀改葬父母。

峽東水如箭。已行船上天。亂離葉葬後。衰老秭歸地。名邊手把西行集。心追北上年。東風故山淚。落日灑江煙。

檜亭集自注。大德丙午旱。明年浙東饑。僕因北上。茲有感焉。

九月一日遊昭亭在宣州

山色江光帶近郊。道旁楊柳舞寒條。半生九日黃花酒。多在口口白下橋。千里客遊仍暮景。疑鄉人事又今朝。老來未遣登臨嬾。盡醉東家綠玉瓢。

詩藪全篇整麗。首尾勻和。

醉歌贈雲心子陸華之

雲心子陸農師之子孫。老來賣卜錢唐門。搜元挾微擘混沌。進退五緯扶兩輪。皞父及芒兒。束手就律呂。

不敢差毫分。前身定是張博望。老樹倒騎上峴嵒。投杼機上女。飲牛河畔人。與之細說天地根。卻來人世三千歲。君平朽骨呼不聞。功名富貴無足云。祇談禍福開盲昏。得錢沽酒和天香。赤城有狂客。十年江海看浪翻。歸來黃塵中。拭目驚見君。抵掌一長笑。各拂頭上巾。別時綠髮滴可染。祇今雪繭纒吳盆。少者忽已老。老者不復存。政須日日醉倒湖邊尊。尊已倒。還可酤。不愁黃金盡。但恐清旦無。舉手招羲和。低頭喚天吳。勸爾勿東逝。止爾勿西徂。西徂不可止。東逝無時已。囑付酒家兒。明當復來此。

西湖志餘。元時陸華之。錢唐人以賣卜馳名。且通文學。縉紳多與之友。天台丁仲容贈之歌云云。

應夢一作文虎

夢虎字彥文。黃巖人。

梅魂

禹廟歸來骨已靈。風林月落見靈形。玉龍一曲香隨返。彩鳳三招夢未醒。弔影西湖雲樹黑。斂妝東閣土花馨。莫誇賦客心如鐵。楚些淒酸可忍聽。

浙江通志。嘗游京師。賦梅魂詩。虞集楊載見之。亟加歎賞。稱爲應梅魂。黃潛薦之不起。人高其行。

于文傳

文傳字壽道。號止齋。平江吳人。中延祐會試乙科。官至禮部尙書。有仁里漫藁。

題水村圖

桑梓未能忘楚甸。吾書久已寄吳門。悠悠江海風煙隔。知是夕陽何處村。詳錢仲鼎下

洪震老

震老字復翁淳安人延祐中領鄉薦官州學正學者稱石峯先生

句

通都大邑人爭馳一泉一石小亦奇雲深路絕無人處縱有佳山誰得知

升庵詩話元遺山北嶽詩東州死愛華不注向在陋邦何足數敬亭不著謝宣城斷岸何緣比天姥言山水在通都易得名也洪震老元人淳安東泉山詩云言山人在僻遠人不知也二詩意絕相類亦名言也

辛鈞

鈞字口口東平路人延祐間知單州官至嶺南廣西道肅政廉訪使

遺直軒詩

一家兄弟兩詩仙同在蠻邦豈偶然今日開軒見遺像當時美政亦相聯

山堂肆考遺直軒在雷州西湖近蘇公樓元辛鈞詩云云

陳繹曾

繹曾字伯敷口口人官國子助教

案元史列傳云處州人而靜春堂詩集後序自稱吳興陳繹曾

句

處士近來恩例別。麻鞋一對當蒲輪。

山居新話因話錄云。昔有德音。搜訪懷才抱器不求聞達者。有人逢一諸生。奔馳入京。問求何事。答曰。將應不求聞達科。因念延祐間陳伯敷。繹曾到都。每見晦跡邱園者。數多奔競。遂有云云之譏。

韓信同

信同。字古遺。寧德人。延祐四年。應鄉舉不合。歸。

題岳王墓

妖星墜地芒角赤。劍龍悲吼國蕭瑟。中原王氣挽不回。將軍一死如毛擲。秦家小兒真戲劇。播弄造化搖樞極。指讎爲親忠且逆。隻手上遮天眼碧。九重茫茫隔天日。無由下燭臣愚直。臣愚萬死不足惜。國恥未湔猶憤激。古墳埋冤血空漑。風雨年年土花蝕。我恐精忠埋不得。白日英魂土中泣。請將衰骨斲出荒苔痕。獻作吾王補天石。

筆精。古今題岳王墓者多矣。元季韓古遺一篇。岳集未收。差有溫李之調。詩云云。

汪澤民

澤民。字叔志。婺源人。登延祐戊午進士第。官至禮部尚書。致仕。長槍賊起。被執不屈死。謚文節。有宛陵遺集。

罵賊

江城欲破竟何爲，獨有孤臣謹自持。罵賊肯教雙膝屈，忠臣不顧一身危。

元詩選長槍賊攻寧國城，陷被執，大罵不屈，爲詩云云，遂遇害。

句

及瓜當此日，行李似來時。

梧溪集嘗推官平江，任法恕尤，獄多平反，垂代題春帖云云，迄今爲實錄。

吳萊

萊字立夫，浦陽人。延祐七年，有司以春秋薦，下第，後薦爲書院山長，未行卒。私謚淵穎先生，有淵穎集。

淵穎集附錄宋濂撰碑文，初盛夫人懷娠，始七月，翰林公夢西域神人飛空而來，直止夫人之寢，越翼日，先生遂生，因名曰來。七歲，巖南先生方公鳳見而奇之，曰：「此邦家材也。」取南山有臺詩中語，更今名。

宋學士集東經齊魯梁楚之郊，北抵燕，每遇中原奇絕處，昔人歌舞戰爭之地，貰酒高歌，自謂綽有司馬子長遺風。游海東洲，歷蛟門峽，過小白華山，登盤陀石，著觀日賦，以見志。至元六年，先生年四十四，棲遲衽席，忽夢作童汪錡贊，覺謂人曰：「汪錡，殤者也。今歲殆不起耶？」竟卒於家。當其賦詠捷如風雨，一日於故人家，見几上堆剡紙數十番，戲爲長歌，頃刻而盡，屬對嚴巧，文采綽麗，觀者驚以爲神。

浦陽人物記。族父幼敏。家多書。私取讀之。幼敏竊窺。漢書也。指谷永杜鄴傳。謂曰。能誦貸汝。罰立。夫琅然誦之。三易他編。皆如初。方鳳見而歎曰。汝南應世叔。不是過也。晚自號深衷山道人。人因稱深衷先生。

淵穎先生集。胡翰序。其擬論日本書。蓋其十八時所作也。人謂其有終軍王褒之風。林泉隨筆。吳立夫論倭書。規模倣司馬相如。論蜀文。其末所述。論其王之言。雖古之辨士。莫能過也。其他大游觀日雨賦。與夫形釋泰誓論。補牛尾歌辭等篇。皆雄深卓絕。詩藪。吳立夫學杜。大篇氣骨可觀。而多奇僻字。

西域種羊皮書褥歌寄李仲羽

波斯谷中神夜語。波斯牧羊俱雜虜。當道剝刀羊可食。土城留種羊脛骨。四圍築場聞杵聲。羊子還從脛骨生。青草叢抽臍未斷。馬蹄踏鐵繞垣行。羊子跳踉卻在草。鼠王如拳不同老。飫肉筵開塞饌肥。裁皮褥作書林寶。南州俠客遇西人。昔得手褥今無倫。君不見冰蠶之錦。欲盈尺。康洽年來貧不貧。

樂郊私語。楚石大師爲沙門尊宿。嘗從上都。有漠北懷古諸作。余嘗讀其自言。羊可種。不信繭成絲之句。疑以爲羊可種乎。因以問師。師曰。大漠迤西。俗能種羊。凡屠羊。用其皮肉。惟留骨。以初冬未日。埋着地中。至春陽季。月上未日。爲吹筚呪語。有子羊從土中出。凡埋背一具。可得羊數隻。此蓋四生胎外之化也。亦不足怪。特非中國所有。致生疑耳。後讀浦江吳立夫西域種羊皮書褥歌。云云。此又云以脛骨種之。與琦師目見之者不同也。蓋波斯國別有種法。如吳詩所云耳。

題趙大年林塘秋晚圖

老景青黃筆底收。晴鳬冷雁共汀洲。王孫畫學空花竹。不到銅駝陌上秋。

筆精。元吳淵穎題趙大年林塘秋晚圖云。譏刺之意。微而婉矣。

夕泛海東尋梅岑山觀音大士洞。遂登盤陀石。望日出處。及東霍山。迴過翁浦。問徐偃王舊城。八首。
山月出天末。水風生晚寒。扁舟劃然往。萬頃相渺漫。星河白搖撼。島嶼青屈盤。遠應壺嶠接。深已雲夢吞。
蟠木繫予纜。扶桑纓我冠。寸心役兩目。少試鯨魚竿。
起尋千步沙。穹石塞行路。怒濤所攔擊。徒以頑險故。卓哉梅子真。與世良不遇。上書空雪衣。燒藥迺煙樹。
玄螭時側行。縞鶴一迴顧。從之招羨門。滄海晝多霧。
茫茫瀛海間。海岸此孤絕。飛泉亂垂纓。險洞森削鐵。天香固遙聞。梵相俄一瞥。魚龍互圍繞。仙鬼驚變滅。
舟航來旅游。鐘磬聚禪悅。笑撚小白花。秋潮落如雪。
長嘯山石裂。我今在東溟。遊日出重微。舉衣窮絕徑。奇氛抱珥赤。遠影摩空青。想像陽谷水。徘徊爛龍形。
晨昏相經絡。稚耄不得寧。豈若柯斧爛。看棋了千齡。
遙觀杳無極。宛與東霍鄰。悲夫童男女。去作魚鼈民。紆嶼尙餘聚。蓬山寧爾神。古棹苔駐跡。仙杵竹祛塵。
矧褐徒爲拂。飛槎邈難親。好攜支機石。去躍織女津。
笑揮百川流。東赴無底壑。青天分極邊。白浪屹爲郭。卉裳或時采。椎髻亦不惡。投珠鮫人泣。淬劍龍子愕。
海宮眩鱗縷。商舶豐貝錯。盍不呼巨鵬。因風訴寥廓。

老篙迴我舟。沙塢晚煙起。蒼茫魚鹽場。寂歷鼓吹里。人民悲舊王。歲月祀遺趾。終捐玉几研。不抹朱弓矢。東西八駿馬。今古萬螻蟻。此事如或然。須湔會稽水。我行半天下。始到東海隅。水落焦石出。中飛兩鵜鷖。情知瓊奇產。勢與險阻俱。在夷豈必陋。雖聖猶乘桴。吭風丹穴鳳。尾雨青丘狐。幸隨任公子。不愧七尺軀。

王邦采箋本淵穎集按先生甬東記梅岑山梅子真煉藥處山梵書所謂補怛洛迦山也唐言小白花山自山東行西折爲觀音洞洞瞰海外巉中裂大石壁紫黑旁罅而兩歧亂石如斷圭積伏蟠結怒潮攪擊晝夜作魚龍嘯吼聲又西則爲善財洞峭石嚙足泉流滲滴懸纓不斷前入海數百步有礁土人云曾有老僧秉燭行洞穴且半里山石合一竅有光大如盤盂側首睨之寬弘潔白非水非土遠不辨涯際又自山北轉得盤陀石山巖怪益高疊石如垓東望窅窅想像高麗日本界如在雲霧蒼莽中日初出大如米筴海盡赤跳踊出天末六合翕然鮮明及日光照海薄雲掩蔽空水弄影恍類鋪僧伽黎衣或現或滅南望桃花馬秦諸山嵌空刻露屹立亘浸如世疊太湖靈壁不著寸土尺樹天然可愛東南望東霍山山多大樹徐市蓋駐舟此又有沙山細沙所積海日照之有芒手攬則霏屑下漸成窪穴潮過又補終不少損旁有石龍蒼白角爪鱗鬣具蜿蜒跨空亘三十里舟徑其下西轉別爲洋山中多大魚又北則爲胸山岱山石闌山魚鹽者所聚又自北而南則爲徐偃王戰洋世言偃王旣敗不之彭城而之越棄玉几硯會稽之水望馬秦桃花諸山羨門安期生隱處

此去何可極。中心忽傷悲。亂山插滄海。千疊壯且奇。信哉神仙宅。而養雲霧姿。綢緞鬼斧舐。刮濯龍湫移。坎窞森立劍。槎枒割靈旗。微涵赤岸水。暗產瓊田芝。老生今安在。方士不我欺。經過燕齊靡。出沒楚漢危。挾山作書鎮。分海爲硯池。殘花錦石爛。淡墨珠巖披。東溟地涵蓄。北極天幹維。玉鳥投已遠。桑田變難期。誓追凌波步。行折拂日枝。羽丘杳如夢。玄圃深更疑。豈無抱朴子。去我迺若遺。空餘煉藥鼎。尙有樵人知。王邦采箋本淵穎集。按甬東記盤陀石山。南望桃花馬秦諸山。嵌空刻露。屹立亘浸。如世疊太湖靈壁。不著寸土尺樹。天然可愛。定海縣志。安期先生祠。在昌國在馬秦山。舊傳安期生隱此。其鄉亦名安期鄉。桃花山解。見次定海候濤山。

句

塵飛馳馬埒。雪擁讀書氈。

詩數元五言律可摘者。吳立夫云云。

張翺

翺字雄飛。西河人。官湖南廉訪使僉事。

至正集張雄飛詩集序。延祐首科。列右榜者十六人。唐兀氏張君雄飛。右榜有聞者也。尤工於詩。往往膾炙人口。佳章奇句。不可悉舉。僉浙東憲。過錢唐。登會稽。探禹穴。天台。雁蕩之勝。舉在心目。得江山之助。故其詩益昌而奇也。移僉湖南。過余琅璦山中。出其稿古律詩若干首。屬序其端。

岳陽樓

樓上元龍氣不除。湖中范蠡意何如。西風萬里一黃鵠。秋水半江雙白魚。鼓瑟至今悲二女。沈沙何處弔三閭。朗吟仙子無人識。騎鶴吹簫下碧虛。

升庵詩話。余昔過岳陽樓。見一詩云云。視其姓名。則元人張翥字雄飛。不知何地人也。雄飛在元。不著詩名。然此詩實可傳。同時虞伯生。范德機。皆有岳陽樓詩。遠不及也。

呂權

權字子義。婺之永康人。

句

青壁雖萬里。白雲只三尋。

黃文獻集。天歷二年卒於家。得年三十有八。始君自書其夢中之語云云。莫知何義。至是以其年之修短驗之。若有數然。

韓性

句

性字明善。紹興人。延祐中。憲府舉爲慈湖書院山長。受而不赴。後卒。賜諡莊節先生。有五雲漫稿。

月上影娥池。人在衆香國。

貞居詞。王叢隱五香圖。作圓象。墨寫梅蘭水仙山礬瑞香五品。盤屈折枝於其中。韓明善有云云。一聯。

劉子郁

子郁字□□。□□人。延祐五年。官武鄉縣尹。

奉陪憲副王公謁靈潤祠

緩轡乘驄轉翠巔。偶陪憲使到龍泉。蒼松老檜參天色。碧瓦朱甍耀日鮮。救旱有靈皆樂歲。爲霖無地不豐年。爐煙禮罷香猶在。賦就新詩萬古傳。

許有壬跋。憲副長安王公。按行武鄉。聞靈潤祠雨旱有孚。且見其岡陵秀拔。林木叢茂。偕邑令劉子郁一至焉。有詩記其游。篇終意在子郁士耆石贊等。將刻諸石。以爲神宇觀美。介王希明來請敘。噫。此非欲以嚴于神而敬于上乎。發剔其休。使見之者有所欲。其事神也嚴矣。鐫刻英辭。使傳之者有所息。其事上也敬矣。世之覽者。必知之爾。余獨謂有大于是者焉。司憲之于郡邑。有不承者。則櫛楚督責。以作其怠。有善治者。則誘掖鼓舞。以盡其才。王公明以勇濟。剛以柔通。持憲之正者也。其發之翰墨者。余知其意不在神。而有取于令之賢也。取令之賢。所以誘掖鼓舞。俾進于後也。其不在彼而在此昭昭矣。余又願令之益勉于治也矣。令乎。其必有以副之矣。若夫山川梗概。則已見於詩。此在所略。延祐戊午五月二十日。遼倅許有壬識。

趙雍

雍字仲穆。孟頫仲子。以蔭守昌國海寧二州。官至翰林院待制。

古詩

西風聲蕭蕭。愁來如夢寐。鄉關萬里遙。兄弟何時會。遲此相見期。真以日爲歲。別來經八霜。朱顏久憔悴。人生宇宙間。名利何足計。何如雲中鶴。翱翔隨所至。

又

我居水精宮。遠游來朔方。離家近十載。兄弟遙相望。始見世情薄。紛紛名利場。富貴不可期。人生難付量。乾坤本無私。江山歎興亡。蟬聲噪落日。露草啼寒蟄。明月如有情。照我肝與腸。西風動林末。蕭然秋意涼。回首歲云暮。信美非吾鄉。展轉復展轉。愁多知夜長。

思歸

嫋嫋秋風動客懷。啾啾猿鶴苦相催。魯侯不遇關天意。臧氏焉能沮我才。萬里驅馳離鄉國。十年奔走在塵埃。吳興山水何清遠。一棹扁舟歸去來。

趙待制遺稿。延祐六年春正月。寄呈德璉姊丈一觀。冀改抹幸甚。書於大都咸宜里之寓舍。趙雍。又文徵明跋。楷行閒作。轉益妍美。德璉姊丈。蓋魏公長倩王國器也。國器長於今樂府。楊鐵崖亟稱之。故此卷所書樂府爲多。豈因其所好耶。

又許初跋。所書豔詞特多。或偶興爾。閒如古詩二篇。思歸一律。頗以孤忠自許。紛華是薄。而興亡骨肉之感。默寓其中。意其父子之仕當時。亦有不得已者。良可悲已。

葉森

森字景修。錢塘人。早從貞白先生游。後登趙松雪之門。

題陳涓叟紫雲編

一度詩來一見君。只應芳杜襲蘭薰。有時寫到游仙句。繞筆秋香生紫雲。
西湖志餘。陳涓叟賦詩有天然趣。隱居葛溪上。歲一來杭城中。名人勝士。爭要致之。惟恐其去也。
所著有紫雲編。葉森爲之類集。復題詩云云。

鄭采

采字季亮。溫之平陽人。

題復古秋山對月圖

天窅窅兮月朧朧。山齟齬兮水繚繚。木森森兮竹簌簌。勢瀾瀾兮墨氤氳。
清河書畫舫題語甚奇。走筆錄之。

鄭禧

禧字天趣。永嘉人。進士官黃巖州同知。

悼亡吟二首

特寫青箋幾往來。佳人何自苦憐才。傷心春與花俱盡。啼殺流鶯喚不回。
相見愁無奈。相思自有緣。死生俱夢幻。來往只詩篇。玉珮驚沈水。瑤琴愴斷弦。傷心數行淚。盡日落花前。
春夢錄。城之西有吳氏女。才色俱麗。其父早世。治命宜以爲儒家室。余今年客于洪府。一日媒姬來言。女家久擇壻。難其人。洪仲明公子戲欲與余求之。余辭云已娶。媒姬欲求余詩詞。達于女氏。

余戲賦木蘭花慢一闋。一日女和前詞。附媒姬至。乃曰。吳氏之族。見此詞喜。稱文士之美。但母氏謂官人已娶而不可。然女獨廣唱迭和。意欲雖居二室。亦不辭也。有周氏子。挾財以媚母氏。母遂納其定禮。女號泣曰。父臨終。命歸儒生。周子不學無術。但能琵琶耳。我誓不往。周氏因伴狂擲冠於地。母怒。歐之女。發憤成疾。病且篤。母乃大悔。然女病竟無起色。未幾卒。今具錄往來詞翰於後。覽者亦必昭余之悽愴也。延祐戊午。永嘉鄭禧天趣序。丁巳歲二月廿六日。余寄木蘭花慢云云。三月一日賦詩三首云云。吳氏和云云。吳氏既終。余悼亡吟云云。

黃敏

敏字子侑。

悼吳氏

春樓珠箔捲東風。幾度偷彈淚粉紅。豔質豈期黃壤隔。香魂應逐綵雲空。解將遺事留身後。盡忘前言在耳中。杏蕊梅花俱一夢。悠悠深恨鎖幽宮。

汪子才。

子才字庭材。

悼吳氏

犀心兔穎屢通津。未識嫦娥一面新。興盡故園梅已謝。情留別塢杏初春。將身輕許志雖失。在耳不忘言可遵。生死幽冥千古恨。臨風披閱爲傷情。

徐天寶

天寶字子文

和黃韻

杏花初破怯春風。未識芳心一點紅。詞翰往來傳意密。死生夢幻轉頭空。素知分淺鴛幃裏。預許名題雁塔中。杳杳幽魂何處覓。真華消息報仙宮。

沈君清

和黃韻

落花一掃夜來風。枉駕相思寄斷紅。梅信日聞魚水遠。杏香還逐燕泥空。情懷琴瑟千春恨。怨入琵琶一夢中。門掩滿庭詩思遠。令人惆悵館娃宮。

春夢錄吳氏既終。友人共閱此女詞情事迹。可傷。作詩悼之。黃子侑敏云云。汪庭材子才云云。徐子文天寶和黃韻云云。先生沈君清和黃韻云云。案餘詳鄭廡下。

胡炳文

炳文字仲虎。婺源人。官蘭溪學正。

拜岳鄂王墓

有公無此日。再拜淚交頤。大義君臣重。孤忠天地知。鳩毛何太毒。龍渡只如斯。墳畔休留棺。行人欲斧之。明休寧汪循後序。先生所學之大概。行己之大節。平生不可以告人者。偶于此洩焉。而不自覺。

句

舉頭山蒼然。一峯立雲表。

雲峯集附錄行狀所居之南。一峯高聳。有詩云云。故鄉人號曰雲峯。學者因稱爲雲峯先生。元統元年癸酉。先生忽夜夢峯頽。旦先生曰。吾壽終矣。不二日。竟以微疾奄逝。

宋本

本字誠夫。大都人。至治元年。爲廷試第一人。賜進士及第。官至國子祭酒。諡正獻。有至治集。西湖竹枝集。弟駿。泰定甲子登第。時比之宋二宋云。

船上謠送伯庸以番貨事奉使閩浙

舊時家近黑橋街。三十餘年不往來。憑仗使君一問訊。楊梅銀杏幾回開。

元文類原注。余以至元廿六年出杭。故居東廂隅四條巷。旁有橋名黑橋。居有楊梅銀杏二樹。在巨井上園。

案此詩。楊鐵崖以入西湖竹枝詞。尙有一首在前云。湧金門外是西湖。隄上垂楊盡姓蘇。作得吳趨阿誰唱。小卿墳上露蘭枯。

大都雜詩四首

拋卻漁竿滄海邊。拂衣來看九重天。畫闌九陌橋如月。綠影千門樹似煙。南國佳人王幼玉。公朝才子杜樊川。紫雲樓上如澗酒。孤負東風二十年。

繡錯繁華徧九衢。上林詞賦漢西都。朱門細婢金條脫。紫禁材官玉鹿盧。萬里星辰關上界。四朝冠蓋翊皇圖。東鄰白面生紈綺。笑殺楊雄臥一區。
盧溝曉月墮蒼煙。十二門開日色鮮。海上神仙非弱水。人間平地有鈞天。寶幢珠珞瞿曇寺。豪竹哀絲玳瑁筵。春雨如膏三萬里。盡將嵩呼祝堯年。
形勢全燕擁地靈。梯航萬國走王城。狗屠已仕明天子。牛相寧知別太平。玄武鉤陳騰王氣。白麟赤雁入新聲。近來朝報多如雨。不見河南召賈生。

詩藪全篇整麗首尾勻和

吳師道

師道字正傳。婺州蘭溪人。登至治元年進士第。官至禮部郎中。有禮部集。

集句贈潘季通

江上春風送客舟。烏啼花落水空流。勸君更盡一杯酒。與爾同消萬古愁。

月山詩話。元吳師道集句。勸君云云。極工。明安公石集句。亦以二語爲對。當是偶同耳。

揚州四首錄一

富貴驕奢志已迷。無端更欲上青梯。庭前木鶴真兒戲。況說雲中大與雞。

禮部集自注。腰纏十萬貫。騎鶴上揚州。昔人以爲戲言。譏兼得之惑。蓋誠有是事也。劉安高駢是已。

十臺懷古井序

友人自杭來，示及濟南王十臺懷古詩，讀之感慨不已。夫江山故宮，歌舞遺跡，千載之上，英雄游焉，千載之下，狐兔行焉，俛仰廢興，孰能無情？而詩人尤甚，發爲咏歌，詞雖不同，而意總合。若物之鳴，以類而應，余安得忘言哉？余生好遊，嘗聞司馬子長杜拾遺覽觀四方山川之勝，以壯其文，心竊慕之。異時浮江淮，泝湘沅，上巴峽，過秦漢故都，壓燕趙齊魯之陽，所見如十臺尙多，訪遺老，詢故實，足以發一時之興，快宿昔之願，歸而讀馬杜之詩文，以證其所得焉耳。

姑蘇臺

百花洲上姑蘇臺，吳王宴時花正開。半空畫燭西子醉，三更鐵甲東門來。吳波渺渺吳山簇，不見嬌嚬倚闌曲。丹楓落月怨啼鳥，碧草東風驚走鹿。闔閭丘墓相連處，應恨夫差迷不悟。斷指千年血未乾，游魂夜哭臺前路。

章華臺

靈王傾國崇臺宇，按劍章華睨中土。弁裳伏地走諸侯，鐘鼓凌空震三楚。騁驕不畏伍子謀，落成乞與吳兵游。孤舟竟走江上路，塊土獨枕山中愁。十年伯氣終蕭索，回首華容歸不得。飢魂漂泊啼秋煙，細腰卻舞新王前。

朝陽臺

神娥縹緲高唐上，楚宮樓閣森相向。丹楓蒼桂湧孤闕，錦石清江簇連嶂。行雲漠漠一作冥冥飛雨寒，狐

猿咽咽秋花間。翠旂龍駕杳何處。斷魂殘夢愁空山。微臣宋玉謫能賦。當日襄王豈真遇。千古秋風恨未平。高泉飛落三巴怒。

黃金臺

昭王銳志移青社。築土懸金奉賢者。四方劍佩集強燕。千里風塵馳駿馬。郭君自舉先羣豪。樂生獨步超凡曹。酬恩一雪伯國恥。建功並倚雲天高。君臣意氣千年少。落日荒墟沒秋草。黃金買貴滿長安。惆悵英雄布衣老。

戲馬臺

項王戰馬從東來。意氣蹴踏全秦摧。入關不並沛公轡。還鄉卻上彭城臺。重瞳按劍風雲靡。萬匹騰空煙霧起。淒涼垓下泣名騅。零落江邊一作濱。餘數騎。寄奴千載心爭雄。登高把酒臨秋風。詐移晉鼎非男子。君看百戰東城死。

詩藪雄渾流麗步驟中程

歌風臺

沛宮置酒君王歸。酒酣思慘風雲飛。兒童環臺和擊筑。父老滿坐同沾衣。一歌豐沛白日動。再歌淮楚長波湧。龍髯氣拂半空寒。虎士心馳四方勇。河山蕭瑟長陵荒。野中怒響猶飛揚。高臺未傾風未息。故鄉之恨那有極。

望思臺

樹人氣迫前星黯。思子宮成翠華晚。高臺有恨碧草新。大野無踪金犢遠。一朝弄兵兒罪輕。百年鍾愛天倫深。戾園魂魄夜寂寂。湖城風雨秋陰陰。漢宮樓觀連天起。方士熏香召仙鬼。望思望思終不歸。茂陵老淚如傾水。

銅雀臺

半空高棟翔金雀。玉展纔帷塵漠漠。西陵老樹暝色寒。建安殘妓春情薄。曲終紅袖辭尊前。簷傾斷甍飛人閒。分香老淚恨不滅。秋風吹入苔花斑。漢家一片當時土。肯爲奸雄載歌舞。銷盡曹瞞萬古魂。落日漳河咽寒雨。

鳳皇臺

金陵王氣飛祥雲。鳳皇臺上聲和鳴。鳳來春風花冥冥。鳳去秋風荒草生。嬌娥舞散高城暮。青山迴隔丹丘路。斜陽門巷語烏衣。細雨汀洲飛白鷺。江空天闊鳳影遙。謫仙吟誰誰能招。六朝宮闕煙蕭蕭。月明半夜人吹簫。

凌歊臺

大明天子游南國。紅粉三千臺百尺。歌鐘激浪楚日白。簾櫳凝樹湘雲碧。凌歊高宴金輿來。侍臣狎笑朱顏開。臺城宮扉鎖花柳。寄奴土障生塵埃。昏昏醉夢春風幾。不顧江東數千里。酒罷歌闌帝業銷。青山空映當塗水。

句

三月雲愁百里陰。大湖浪激三州白。大水 浙江亭遠亂帆飛。西興渡溪千花溼。觀湖 千年絕藝洪谷子。身在太行秋色裏。萬里雲飛木落時。遙寫欄干半空起。秋山圖 小槽新壓眞珠滴。擎向碧桃花下吸。惟餘赤日並光輝。未許妖姬比顏色。紅玉杯 長天孤鳥沒。落日大江深。水夾徐邳去。河兼汴泗來。一掃苛秦法。重恢大漢風。飛雲浮畫棟。旭日麗高牙。懸空飛萬瀑。拔地立千峯。落花繁劍佩。高柳映帆檣。

詩藪正傳。五言古清新峭拔。一洗議論纖靡之習。第字句閒有離去者。較之當行。不甚合耳。七言古最長。十臺懷古詩。氣骨錚錚。時咸膾炙。其他句如大水各云云。長篇如南城紀遊修河道中等作。老筆縱橫。殊得工部敘事體。五言律如長天各云云。皆整麗有格。惜全首完善者稀。

又

庭下已生書帶草。馬頭初見米囊花。

吳禮部詩話。舊作集句。用東坡云云。對唐人云云。以爲的切。近閱張祐詩有云。碧抽書帶草。紅節米囊花。已有此句矣。

三寶柱

三寶柱。字廷珪。色目人。登至治元年。右榜進士第。

題門屏

逆刮蛟龍鱗。順捋虎豹尾。若將二伎論。尤比千人易。

輟耕錄三寶柱頗以才學知名。雖湛於酒色。而能練達吏事。剛正有守。爲浙省郎中。日大書四句於門屏之上。云云。其意蓋以杜絕人之求請耳。

李好文

好文字惟中。口口人。至治元年登進士第。官至翰林學士承旨。

挽宋顯夫

四海人傳二宋名。玉京連占兩科榮。鄢陵初喜知公字。樂長終思送我行。故里經過人不在。遺孤問訊淚如傾。荒墳數尺西山下一段平。蕪綠又生。

自注。誠夫兄弟。皇慶中嘗與先大人相遇鄢陵逆旅。始相知。至正乙酉。好文西行。顯夫賦長樂坡詩見送。乃絕筆也。故及之。

夏溥

溥字大之。一字大充。號虎怕道人。淳安人。領至治三年鄉薦。爲安定書院山長。轉龍興路學教授。鴻門歌

大風揚兮赤雲屯。楚人望氣皆龍文。當時吾甚笑亞父。幸至彭城疽背死。誰云沐猴竟遭烹。汝乃盛怒吟。孺子嗟哉拔山之力不可得。扶義而西取天下者以三尺。君看項王重瞳舜重瞳。天命乃在隆準公。

吳山謠和鐵崖先生首唱

中興過江笑諸人。三十二表哀老臣。倡和國事可斬檣。馬上青衣竟何在。采石未靖瓜洲驚。戰功今乃歸。

儒生第一峯前誰立馬。夜箭射血來帳下。

大雅集鐵雅評曰。二作不用二李。別有一種史斷。

劉麟瑞

麟瑞字口口。號如邨。壩次子。

丞相信國文公天祥

金字牌飛出建章。鬱孤萬壘爲勤王。驅馳嶺海君臣寓。囚繫燕雲道路長。六籍一時光日月。孤忠萬里立綱常。元歸凜凜渾生氣。南北人誇姓字香。

丞相陸公秀夫

八面兵威八面攻。馮夷飛血洗千篷。波翻水寨乾坤震。風仆檣旗社稷空。百辟散班奔鶴首。孤臣扈蹕蹕龍宮。茫茫南國重回首。一片丹心照海紅。

樞密張公世傑

曾擁貔貅奏凱歌。匡山雲暝竟蹉跎。地空九有棲荒服。寨列千艘保海阿。龍躍壑沈天若此。烏鳴磳絕事如何。鯨波沃日炎光熄。凜凜英魂尙枕戈。

江東制置使謝公枋得

草履麻衣漫蔽形。千年賈卜慣零丁。願從楚地師鬬勝。欲向遼城友管寧。采石吟成期絕粒。娥碑讀罷棄餘齡。一門盡節均無媿。千載西山疊疊青。

符遂撰水邨先生傳。子麟瑞。哀死節之臣。賦五十律。題曰昭忠逸詠。

洪希文

希文。字汝質。莆田人。郡庠聘爲訓導。父德章。字虎巖。號吾圃。有軒渠集。希文有續軒渠集。續軒渠集。虎巖與坐萬山中。朝脯孟飯。燒芋咬菜。相倡和。無慍色。吾圃試校游洋。翁季枕邊談詩。以僧敲未敢一言定。鳥過曾安幾字來之句授之。夜臥三鼓。聞書聲云。有子定知吾事足。貧家頗覺此聲佳。

蘭陔詩話。吾圃與子汝質。並能詩。汝質有名阿琦詩云。我之先君子。琦也爲大父。丁卯鄉貢郎。名字登天府。又傅氏館中觀咸淳丁卯榜帖詩云。韓歐榜帖家聲舊。孔孟詩書教澤新。而郡志不載其父子名。缺略者多矣。

句

佳句不隨飛鳥盡。名山可想屬僧多。題靈巖廣化寺沈香已帶寅前氣。臘酒初聞子後香。守歲月明夜色玉連鎖。露冷秋莖金屈卮。水仙術作賦重遊前赤壁。題詩一笑再玄都。夏政齋樞府再舉。留莆郡鎮守。功名不建頭顱老。日月如馳脾肉生。雪髭舊書餘草風搜遍。好樹開花月送來。幽居淒其死者無歸路。羞與饑人共戴天。官饒城垣。起衆墳石。

元詩選。汝質集中警句如云云。皆自成一家機軸。

陳植

植字慎獨

自題畫

無多茅屋滄波遠。一半青山竹樹遮。宛似吾鄉荒寂地。直疑割我白鷗沙。

六研齋筆記。元陳慎獨名植。寫江浦樹石。蒼莽疎宕。有子久氣韻。上書一絕云云。

孫鳳洲

贈歐陽圭齋

圭齋還是舊圭齋。不帶些兒官樣回。若使他人居二品。門前車馬鬧如雷。

綠雪亭雜言。長沙有朝士某者。還鄉意氣滿盈。賓至則鼓吹喧闐。里有執友來謁之。朝士曰。翁素好誦詩。近日誦得何詩。執友曰。近誦得孫鳳洲贈歐陽圭齋之詩。甚有味。乃朗然誦之云云。朝士聞詩默然。明日賓至。門庭寂然。

傅子建

句

龜鼉滄海賦。龍馬赤文書。

吳淵穎先生集。去歲留杭。德興傅子建夢得句云云。間以語予。及其鄉人董與幾。

元詩紀事卷十五

陳旅

旅字衆仲莆田人薦除國子助教官至國子監丞有安雅堂集

山堂肆考游京師翰林侍講學士虞集見其所爲文嘆曰此所謂我老將休付子斯文者矣
春明夢餘錄元人董宇定杏花園在上東門外植杏千餘株至順辛未王用亨與華陰楊廷鎮高
安張質夫莆陽陳衆仲譙集是日風氣清美飛英時至巾袖杯盤之上皆有詩虞集爲之記

題虞先生詞後

憶昔奎章學士家夜吹瓊管泛春霞先生歸臥江南雨誰爲掀簾看杏花

蟬精雋陳衆仲旅題虞邵菴伯生詩集後云云蓋用虞邵菴風入松詞中事也與張蛻巖仲舉詞
留意江南杏花春雨和淚在羅帕意同固邵菴之意也

句

能守不成三五戒

輟耕錄陳衆仲先生嘗題樂全堂有云云之句人多不知所謂按史記龜策傳云天尙不全故世
爲屋不成三五而陳之注陳猶居也

傅若金

若金字與礪本字汝礪新喻人以薦佐使安南歸除廣州文學教授有清江集

傳與礪詩集胡行簡居敬序渝舊隸袁山水最爲秀麗近世范太史傳廣文相繼以詩名於時文章鉅公莫不推服

詩藪元人力矯宋弊故五言律多草草無復深造虞楊閒法王岑而神骨乏范揭時參韋孟而天韻疎新喻晉陵二子稍自振拔雄渾悲壯老杜遺風有出四家上者

奉題仇工部壁閒古松圖歌

蒼松在山自奇古灌木翳之人不驚忽然圖向堂上壁滿坐嘆息長風生交柯蠲走森晝晦其下將疑鬼神會霧雨寒霏虎豹毛雷霆怒折蛟鼉背乃知巨筆老且神力幹造化雄千鈞皇天不天棟梁具后土潛回霜雪春爾松已爲人愛惜見爾爲爾生顏色山中豈無材木倚絕壁未逢匠石嗟何益

傳與礪詩文集虞公見之題云絕妙絕妙吾人吾人新來第一手由是名動京師

題栖碧山爲淦龔舜咨賦

山人愛山如李白幽棲還在碧雲深松杉繞屋清宵響雷雨懸崖白晝陰石上每同仙客坐花間猶恐世人尋京華日日多塵土終擬投簪話夙心

傳與礪詩文集揭文安公云予欲賦栖碧久矣與無由起一日臨江傳與礪來開卷同賦之予詩未成與礪已就非不可更作念無可以過與礪也遂易結語而已

卻侍姬連夕蒙遣侍姬皆卽辭卻我輩非陶穀輩人不宜以此見

夜宿安南天使館。主人供帳爛相輝。寶香爐起風過席。銀燭花偏月照幃。王母謾勞青鳥至。文簫先放綵鸞歸。書生自是心如鐵。莫遣行雲亂溼衣。

蘇天爵撰傳與礪墓志。與礪受命行至安南。安南人多設譎詐以紿使者。或郊迎張宴犒衆。或盛飾侍姬侑酒。君皆卻之。

悼亡

驚飈吹羅幙。明月照階旃。春草忽不芳。秋蘭亦同死。斯人蘊淑德。夙昔明詩禮。靈質奄獨化。孤魂將安止。迢迢湘西山。湛湛江中水。水深有時極。山高有時已。憂思何能齊。日月從此始。皇天平四時。白日一何遽。勤儉畢婚嫁。新人忽復故。衾裳歛遺襲。棺槨無完具。送葬出北門。徘徊恒歸路。玉顏不可恃。況乃紈與素。纍纍花下墳。鬱鬱塋西樹。他人亮同此。胡爲獨哀慕。

新婚誓偕老。恩義永且深。旦暮爲夫婦。哀戚奄相尋。涼月燭西樓。悲風鳴北林。空帷奠巾櫛。中房虛織紵。辭章餘婉孌。琴瑟有餘音。瞻故物。惻愴內不任。豈無新人好。焉知諧我心。掩穴撫長墓。涕下霑衣襟。人生貴有別。室家各有宜。貧賤遠結婚。中心兩不移。前日良宴會。今爲死別離。親戚各在前。臨訣不成辭。傍人拭我淚。令我要裁悲。共盡固同理。誰能心勿思。

感獨

幽幽蕙草晚。靡靡蘭芳斷。皎皎夜泉人。冥冥不復旦。流塵棲暗壁。涼吹經虛幔。無論懽意消。日復愁思亂。魂傷夕方永。氣變秋將晏。當窗慘斷素。捐篋悲柔翰。憶初成好合。誓且同憂患。何言遂長終。獨處增永歎。

寤寐忽如在。展轉驚復散。念茲何嗟及。哀至聊自判。

百日

人生悲死別。矧在心相知。新婚未及久。杳杳遽何之。昔爲連理木。今爲斷腸枝。相去時幾何。百日奄在茲。虧月有圓夕。逝水無還期。棄置非人情。何以爲我思。

入室

粧閣閉長夜。幽蘭坐復春。猶疑挑錦字。不見掩羅巾。故物空在目。蕭條生網塵。虛窗明月滿。芳砌綠苔滋。花開時染翰。尙憶解題詩。寂寞幽泉下。真心空自知。

追和蕙蘭

小窗開盡碧桃枝。憶得青鸞化去時。昨夜秋風妬幽怨。夢中吹斷素琴絲。江上愁時復值春。帶圍寬盡不宜身。階前舊種櫻桃樹。日暮飛花故著人。

輟耕錄。先生旣喪妻。哀戚之情。多見於詩云云。哀而不傷。得性情之正。是可傳也已。

憶內

湘臯煙草碧紛紛。淚灑東風憶細君。浪說嫦娥能入月。虛傳神女解爲雲。花陰晝坐閒金剪。竹裏春游冷翠裙。留得舊時殘錦在。傷心不忍讀迴文。

歸田詩話。荆公一日歸行云。賤貧奔走衣與食。百日奔走一日歸。生平歡意苦未盡。正欲老大相因依。空房蕭颯施繡帷。青燈半夜哭聲稀。音容想像知何處。地下相逢果是非。劉須溪云。此悼亡

作也。古無復悲如此者。傳汝礪憶內云云。真致雖不及。而悽惋過之。

勤耕亭

日月墮閒暇。四序一作時更運之。斯人務作業。矧敢怠遑時。負耒適西疇。恆患耕作遲。仲春時雨至。羣物具含姿。牛食青澗阿。鳥鳴芳樹枝。興言播嘉穀。夙夜將耘耔。豈不懷逸居。亦念寒與飢。但使秋稅畢。聊樂及我私。義農雖已遠。沮溺不吾欺。努力順天命。素餐非所知。

傳與礪詩文集。右詩爲鄒福作也。福。豐城田家子。事菽文揭先生。餘力能讀書。爲聲詩。又喜國語。習通其學。然朴慎。不忘乎勤。先生甚喜之。嘗手書福自爲詩七首。敍其所從出京師爲文詞者。福多得其題述。是何福之能使人愛若是也。學者果皆繫所出乎。於是益知藝文爲有德矣。

壽陳景讓都事四十韻

八月十八日

種德由來遠。流芳信有苗。名門多令器。夫子最高標。地迴瞻崧岳。天清見斗杓。聲名從結髮。問學自垂髫。江漢栖遲久。林亭興致饒。紫蘭敷一作依月露。蒼竹倚風飄。畫艇移書放。秋燈把劍挑。微名寧屑屑。高志獨囂囂。五氣乘昌運。羣英集聖朝。武功收赫怒。文治付宣昭。歷數初歌禹。聰明已贊堯。求賢多晏食。夢帝起中宵。石室仍高隱。中臺歛見招。賜書縣日月。乘傳出雲霄。議論紆三顧。榮光一作名動百僚。入宮催護璽。趨府聽鳴鑼。郊社陳周禮。神人協舜韶。出關春衣繡。分陝夜乘輅。獬觸心彌壯。豺吞膽共銷。封章猶懇切。歸思遑飄飄。袞職江湖隔。鋒車道路遙。凝旒思穆穆。行李發蕭蕭。典祀尊原廟。承釐洽大寥。步依文石進。香近黼裳飄。白日明聰馬。清霜急早鵬。帝裾遮道引。諫草避人燒。佐省持三尺。繩民究八條。兵曹多暇。

豫郎位益崇超。所向才華冠。何曾意氣驕。臺評推妙畫。士望慰深翹。引拔連茅茹。芬芳雜桂椒。銀章看且佩。金鼎竟須調。小草方慚出。浮萍久恨漂。文章殊豹隱。篆刻近蟲雕。徐穉矜縣榻。蘇秦惜敝貂。敢期充砥礪。猶幸致芻蕘。黃鶴追高舉。青松託後凋。火行占孟月。星聚識生朝。壽酒開雲液。仙音出鳳簫。祇應成遠業。未可慕松喬。

詩藪風骨蒼然。多得老杜句格。

渾沌石行九江方叔高得武侯八陣磧中小石于其處白質而黃章狀若雞子字曰小渾沌揭藝文爲作渾沌公傳云。

渾沌以來不可數。萬八千歲生盤古。網緼乃在卷石閒。光怪潛通落星渚。來從魚腹人盡訝。坐念武侯心獨苦。八陣圖成泣鬼神。三江石轉凋寒暑。蒼波噴漫圓且堅。雞子結成生理全。久當化鳥非爲怪。大未成羊亦可仙。玉精隱月相照射。金液流霞紛繞繚。輕清已判中黃外。元氣猶函太素前。英雄事往唯存石。天衡地軸今誰識。江上嘗疑霧雨寒。坐中歛恐風雷黑。摩挲直如見溟滓。位置豈肯同沙磧。長路相將拂劍隨。天陰勿使精靈得。

詩藪雄渾流麗。步驟中程。

次韻元日朝賀

宮漏催朝燭影斜。千官鳴玉動晨鴉。交龍擁日明丹扆。飛鳳隨雲繞畫車。宴罷戴花經苑路。詩成傳草到山家。小儒未得隨冠冕。遙聽鈞天隔綵霞。

登一有南字岳

萬壑千峯次第開。祝融最上氣崔嵬。九江水盡荆揚去。百粵山連翼軫來。入樹恐侵玄帝宅。牽蘿思上赤靈臺。明年更擬尋春興。應及瀟湘雁北回。

詩藪全篇整麗首尾勻和

句

國蟠蝸角小地接犬牙深。雨暗蛟龍出。天晴鶴鶴回。江路篁猶籊。山田稻始苗。黃歸幽徑轡。青聚古祠鴉。灑竹鳴宮女。持弓泣野臣。雨蒸歸日路。雲合去時山。衡廬樹入青天盡。章貢波翻白日來。中天日月迴金闕。南極星辰繞玉衡。交龍擁日明丹展。飛鳳隨雲繞畫車。載筆舊登天祿閣。將書還到大明宮。百粵雲山連楚大。六朝煙樹入隋荒。焚香鳳閣春開宴。鳴玉龍池午散朝。

詩藪元人先達者無若元好問趙子昂元金遺老趙宋宗枝也元體備格卑趙詞雅調弱成都諸子乃一振之伯生典而實仲宏整而健德機刻而峭曼碩麗而新至大家逸格浩蕩沈深之軌概乎未聞也同時傳若金張仲舉不甚知名而近體特多宏壯傳如云云張如云云七言律傳如云云張如云云皆高華雄暢得杜陵句格特變態差少耳而詩流不能舉其姓氏良可歎也

黃裳

留別

江岸梅花正白。船頭細雨斜飛。行客三冬北去。將軍一棹南歸。

南翁夢錄。軍頭莫記東潮人也。出身行伍。酷好吟詩。元統間。伴送元使黃裳。裳亦好詩者。旬日江行。相與唱和。多有佳句。裳甚歡之。至界上。留別詩云。

宋褰

褰字顯夫。大都人。擢泰定甲子進士第。官至翰林直學士。有燕石集。

寄張仲容二首

城南城北渺風煙。一度論文月再圓。腸斷而今更愁絕。蓬萊雲隔楚江天。

燕石集自注。仲容時以禮曹掾接漕舟在海上。先予一日出都。素與予契誼甚厚。雖同居京師。然各以塵事稀復接見。常謂小別離。欲賦一詩。此篇首二句。小別離詩起句也。今足成之。

園鄉道中

風雨度崢嶸。新晴喜若何。雲間瞻大華。馬上看黃河。心已爲形役。身兼抱病多。平生遠遊志。垂老漸消磨。燕石集。商洛秦陝。步步皆陳蹟。亦猶山陰道中。使人應接不暇。長安城中碑刻。亦不能徧覽。況近郊乎。雁塔梯級久廢。曲江在其東。而亦久涸。一登含元殿故基。未央宮在漢城。恩遽不及至。但求得一瓦而已。興慶池廣袤五七餘里。荷菱藻芡彌望。岸傍古垂楊甚多。口南白鹿坡甚近。華萼相輝。太真梳洗等樓基皆儼然。僕始至。及邀諸公迎送。皆在長樂坡灞橋。嘗一過灤水。嘗一過華清。一浴繡嶺。一觀華陰顯靈宮。并岳神題名。歸程過藍關秦嶺。宿藍橋。觀裴杭洞。上七盤嶺。下看輞口莊。商山四皓基。又廟外此皆不暇及也。余年來行四方。見山水頗多。然各有可取。至于長安城。

中望終南山。天天古今妙絕也。惜病多才劣。且奪于飲宴。不及富于吟咏。

揭曼頌小僕鄒福頗能作詩。是時諸名勝皆有所贈。

福也。事人初不切。學詩習字欲自別。不似南鄰守舍兒。輕裘肥馬通關節。

珊瑚木難。揭曼頌題鄒福詩後。右鄒福詩七首。鄒福者。吾鄉田夫之子也。粗讀孝經論語。家貧。與人傭耕。泰定五年。余居憂於家。其父遣從余。給薪水之勞。然暇則密自觀書。居五年。余攜至京師。會新天子明年春。開奎章閣。置授經郎。以教勳舊大臣子弟之在左右者。以國子教授廬陵林希顏。及余爲之。寅入酉出。令福守舍。以盡日閉門讀書習字。閒爲小詩。及莫則請可否於余。余或方倦欲休。或方讀書。有會意處。或執筆爲文章。思方屬。必執而告之。不使幾微見余懈怠意。今年秋。遷丞藝文。得簡靜無事。請問之時益富矣。余適墜馬在告。福有所作。皆可觀。因取其法度音節尤近者。得七首。爲書之。仍題其後。以爲世之世臣大家學士大夫之子弟。不知學者。勸余在閣中。福又從林希顏學國書。希顏稱其可教。余數年於文事。使令蓋深得其助焉。因並識於此。

案揭跋。明云右詩七首。今只載此跋。不錄福詩。不知何故。

閏十二月二十七日喜雪二首。前二日平章徹里帖木兒寓南安。

積禍丘山重莫蠲。君恩如海聽南遷。品流懸絕昌黎叟。一樣藍關馬不前。姓名何事到金甌。滄海橫流浩莫收。鶴立白袍三百箇。有誰回首望崖州。

元詩選。徹里帖木兒爲江浙平章。會科舉驛請試官。供張甚盛。心頗不平。及復入中書。首議罷科。

舉及論學校莊田租可給宿衛士衣糧至元元年科舉罷其明年徹里以罪徙六年十二月乃詔復行科舉

句

行人不敢來飲馬稚子時能坐釣魚

山居新話國朝有禁御溝不許洗手飲馬留守司差人巡視犯者有罪故宋顯夫御溝詩有云云可謂紀實矣

張仲容

七夕寄宋顯夫

雲壓高城雨散絲萬家秋氣入羅帷巧棚七夕喧鄰里小宋明朝定有詩

燕石集張仲容七夕來徵詩就次韻以答云鈿合紅蛛綴網絲玉兒瓜果設香帷從來天上張公子解識梧桐一葉詩自注來詩云云

呂思誠

思誠字仲實平定州人擢泰定元年進士第官至中書左丞諡忠肅有仲實集

寄內

自從馬上苦思卿一個窮家兩手擎少米無柴休懊惱大男小女好看成恩深夫婦情何極道合君臣義更明早晚太平遂歸計連杯共飲話離情

水東日記。呂忠肅公思誠。耿恆庵尙書曾祖妣之兄也。天順四年。予過南都。飲尙書太平里第。尙書因誦公寄內詩云云。大抵公之詩情真語切。要亦出元白云。

戲作

典卻春衫辦早廚。老妻何必更躊躇。瓶中有醋堪燒菜。囊裏無錢莫買魚。不敢妄爲些小事。只因曾讀數行書。嚴霜烈日皆經過。次第春風到草廬。

輟耕錄。呂仲實先生未顯時。一日晨炊不繼。欲攜布袍貿米於人。室氏有吝色。因戲作一詩云云。後果及第。

廖毅

毅字宏道。建康人。

伍王廟

浩浩凌雲志。巍巍報國心。忠魂與潮汐。萬古不消沈。

錄鬼簿。泰定三年丙寅春。因余友周仲彬與之會。卽敍平生懽。時出一二舊作。皆不凡俗。天歷二年春。抱疾喪於友人江漢卿家。公能書。善行文。不草率。題伍王廟壁。有折桂令一曲。及有絕句云。云其感慨激烈。徒增悵快。噫。天之生物也。裁成輔相。以左右民。奈何如是之偏戾也。

陸居仁

居仁字宅之。華亭人。中泰定三年鄉試。隱居教授。自號巢松翁。又號雲松野褐。瑯湖居士。有雲松

野褐集

楚人弓

楚人弓懸兩石五十萬矢陷強敵絳人弓箭三一一作二隻長歌入關成偉績多箭不如少箭力制敵若在弓矢間鳴條牧馬高於一作如山

大雅集鐵雅評曰史斷入詩箴警多矣

國馬足

國馬足吉行五十轡如沃天馬足一日千里更神速國馬天閑飽芻粟太行鹽車天馬哭

大雅集鐵雅評曰自托可悲句短而意無窮

李黼

感事

黼字子威潁人泰定四年以明經魁多士授翰林修撰官至江州路總管盜起城陷死之諡忠文彌勒何神孕禍胎颺颺動地起風埃煙銷郡國民生苦血染江淮鬼物哀人世百年遭此厄天戈萬里幾時來石田也有藍田玉可惜同成一炬灰

草木子李黼守江州日妖寇彭和尚攻之城陷死之先城未陷時嘗有詩云云

薩都刺

薩都刺字天錫別號直齋本答失蠻氏後爲雁門人登泰定丁卯進士第官至河北廉訪司經歷

有雁門集

列朝詩集方谷珍盛時招延士大夫折節好文與吳中爭勝文人遺老如林彬薩天錫輩咸往依焉

至正直記京口薩都刺本朱氏子冒爲西域回回人長詠物賦詩如鏡中燈鶴骨笛之類金陵謝宗可效之然拘於形似欠作家風韻且調低識者不取也

送欣上人笑隱住龍翔寺

江南隱者人不識一日聲名動九重地溼厭看天竺雨月明來聽景陽鐘衲衣香暖留春癖石鉢雲寒臥夜龍何日相從陪杖屨秋風江上採芙蓉

開中今古錄薩天錫嘗有一詩送濬天淵入朝地溼厭聞天竺雨云云聞者無不膾炙惟山東有一叟鄙之公以素愜意訪問其故叟曰此聯措詞固善但聞字與聽字合耳公曰當以何字易之叟徐曰看天竺雨公詰其看字叟曰唐人有林下老僧來看雨公俯首拜爲一字師案今古錄作送天淵雁門集作送笑隱今題從雁門集

紀事

當年鐵馬遊沙漠萬里歸來會二龍周氏君臣空守信漢家兄弟不相容只知奉鬻傳三讓豈料游魂隔九重天上武皇亦灑淚世間骨肉可相逢

歸田詩話薩天錫以宮詞得名其詩清新綺麗大率相類惟紀事一首直言時事不諱云云蓋泰

定帝崩於上都。文宗自江陵入據大都。而兄周王遠在沙漠。乃權攝位。而遣使迎之。下詔四方云。謹俟大兄之至。以遂固讓之心。及周王至。迎見於上都歡宴。一夕暴卒。復下詔曰。夫何相見之頃。宮車弗駕。加諡明宗。文宗遂卽眞。皆武宗子也。故末句云然。

玉華宮監禮詠事

大禱天香出內宮。孝思與世總無窮。百年禮樂行三獻。一派笙韶起半空。使者領班雲氣裏。女仙搖珮月明中。小臣監禮陪清列。兩袖葵花映燭紅。

河朔訪古記。玉華宮在真定路城中。衙城之北。潭園之東。是爲睿宗仁聖景襄皇帝之神御殿。奉安御容者也。華麗擬於宮掖。制命羽流。崇奉香燈。歲時月日。中書以故事奏聞。命集賢院臣代祀。函香致醴。遣太常雅樂具朝服。備牲牢。行三獻之禮。元統乙亥。監禮官薩都刺天錫有詩詠其事云云。

宮詞

深夜宮車出建章。紫衣小隊兩三行。石闌干畔銀燈過。照見芙蓉葉上霜。

京城春日

燕姬白馬青絲韁。短鞭窄袖銀鐙光。御溝飲馬不回首。貪看柳花飛過牆。

山居新話。薩都刺宮詞云云。人莫不脰炙之。予以爲擬宋宮詞則可。蓋北地無芙蓉。宮中無石闌干。擎執宮人紫衣。大朝賀。則於侍儀司法物庫關用。平日則無有也。宮車夜出。恐無此理。又云云。

國朝有禁。御溝不許洗手飲馬。

四時宮詞

御溝漲暖綠潺潺。風細時聞響佩環。芳草宮門金鎖閉。柳花簾幕玉鉤閒。夢回繡枕聽黃鳥。困倚雕闌看白鷗。洛盡海棠天不管。修眉慚恨鎖春山。

宮詞

楊柳樓心月滿床。錦屏繡縹夜生香。不知門外春多少。自起移燈看海棠。

蟬精雋。薩天錫以賦宮詞得名。其四時宮詞。姑舉一二。御溝云云。又四時宮詞絕句。清夜宮車云云。楊柳云云。可謂豪險富麗爽闐者矣。

彭城雜詠

雪白楊花撲馬頭。行人春盡過徐州。夜深一片城頭月。曾照張家燕子樓。

歸田詩話亦脫灑可誦。

芙蓉曲

秋江渺渺芙蓉芳。秋江女兒將斷腸。絳袍春淺護雲暖。翠袖日暮迎風涼。鯉魚吹浪江波白。霜落洞庭飛木葉。盪舟何處采蓮人。愛惜芙蓉好顏色。

西湖竹枝集其詩風流俊爽。修本朝家範。宮詞芙蓉曲。雖王建張藉無以過矣。

南臺看月歌

城南江上逢中秋。城南石梁初截流。長虹一道貫秋色。中分百里江南州。殘霞燒盡魚尾黑。金蛇翻動三江白。冰輪展出碧玻璃。照見釣龍臺上客。臺中之客懷古心。黃河泰華三登臨。今年攜月醉臺畔。越水越山爲月吟。無諸城裏人如海。無諸故塚堆殘靄。無諸臺上草離離。龍去臺空幾千載。昔龍已去江悠悠。今龍雖在人未求。懷珠豈立此臺下。腰上黃金臺上鉤。乾坤四顧渺空闊。詩書元氣行勃勃。合沙古識此其時。天下英雄求一決。南臺月照男兒面。豈照男兒心與肝。燕山買駿金萬斛。萬里西風一劍寒。

登烏石山仁王寺橫山閣

千尺金蓮座。煙霞擁地靈。山川幾轡屐。日月兩浮萍。烏沒天垂海。龍歸水在瓶。深堂說法夜。應有石頭聽。

立秋日登烏石山

海國山四圍。繁華坐消歇。樓觀沈夕陽。鴻雁下秋色。水邊無麗人。石上多古刻。感此暮歸遲。秋露滿山白。榕陰新檢引。竹窗雜錄家。藏天錫遺詩數卷。詞藻橫逸。真足馳騁虞楊。毋論石田松雪也。入閩賦詩頗多。今錄其數篇於后云。

蝦助詩

層濤濡沫綴蝦行。水母含秋孕地靈。海氣凍成紅玉脆。天風寒結紫雲腥。霞衣褪色脂流滑。瓊縷烹香酒力醒。疑是楚江萍實老。誤隨潮汐落滄溟。

七修類稿。右蝦助詩。乃元薩天錫作也。薩詩予家所藏。可謂全矣。亦失此律。況膾炙人口。特書之。

燕姬曲

燕京女兒十六七。顏如花紅。眼如漆。蘭香滿路。馬塵飛。翠袖籠鞭。嬌欲滴。春風淡薄。搖春心。錦箏銀燭。高堂深。繡衾不暖。錦鴛夢。紫簾垂。霧天沈沈。芳年誰惜。去如水。春困著人倦。梳洗夜來。小雨潤天街。滿院楊花飛不起。

過嘉興

三山雲海幾千里。十幅蒲帆挂煙水。吳中過客莫思家。江南畫船如屋裏。蘆芽短短穿碧沙。船頭鯉魚吹浪花。吳姬盪漿入城去。細雨小寒生綠紗。我歌水調無人續。江上月涼吹紫竹。春風一曲鷓鴣吟。花落鸞甌滿城綠。

織女圖一作題壽監司所藏美人織錦圖

蘭閨織錦秦川女。大姬啞啞弄機杼。小姬纖倦何所思。簾幕無人燕雙語。成都花發江水春。門前馬嘶車轉麟。髻鬟兩珥看欲墮。蛾眉八字畫不伸。良人一去無消息。冰蠶吐絲成五色。柔腸九曲細於絲。萬縷春愁正如織。綺窗睡起聞早鶯。西樓月落金盤傾。暖霞拂地海棠曉。香雪潑戶梨花晴。日長深院機聲動。梭影穿花飛小鳳。水心驚起鴛鴦飛。花底不成蝴蝶夢。纖纖玉指柔且和。香鉤小韉裁春羅。滿懷心事付流水。盡日雲錦生層波。佳人自古多命薄。風裏楊花隨處落。豈知醜婦嫁田家。生則同衾死同椁。君不聞長安市上花滿枝。東家蝴蝶西家飛。籠中鸚鵡喚新主。門外侍兒更故衣。又不聞田家婦。日埽春蠶宵織布。催租縣吏夜打門。荆釵布裙夫短袴。我題此畫三嗟吁。百年醜好皆虛無。排雲便欲叫閭闔。爲我獻上幽風圖。

贈劉雲江宗師

羽人推轉阿香車。童子穿松拾翠華。天上賜衣霑雨露。山中詩錦織雲霞。瑤臺紫氣秋橫劍。石室丹光夜走砂。擬借茅君三白鶴。乘風騎到玉皇家。

臺山懷古一作越臺懷古

越王故國四圍山。雲氣猶屯虎豹關。銅獸暗隨秋露泣。海鴉多背夕陽還。一時人物風塵外。千古英雄草莽間。日莫鷓鴣嘯更急。荒臺叢竹雨斑斑。

竹窗雜錄。薩天錫爲福建憲司知事。有越臺懷古詩云云。刻碑在南臺山。故老云。碑仆。農家舁入作牆基。而字跡宛然。

三衢馬太守昂夫索題爛柯山石橋

洞口龍眠紫氣多。登臨聊和采芝歌。爛柯仙子何年去。鞭石神人此地過。烏鵲橫空秋有影。銀河垂地水無波。遙知題柱凌雲客。天近應聞織女梭。

雁門集。張習跋。嘗觀天錫燕姬曲。過嘉興。織錦圖等篇。婉而麗。切而暢。雖雲石廉夫莫能道。如贈雲江。越臺懷古。題爛柯山石橋諸律。又和雅典重。置諸松雪道園之間。孰可疑異。

楊妃病齒圖

沈香亭北春晝長。海棠睡起扶殘粧。清歌妙舞一時靜。燕語鶯啼愁斷腸。朱唇半啓榴房破。顰脂紅注珍珠顥。一點春寒入瓠犀。雪色鮫綃溼香唾。九華帳裏薰蘭烟。玉肱曲枕珊瑚偏。金釵半脫翠蛾斂。龍髯天

子空垂涎。妾身日侍君王側。別有閑愁許誰測。斷腸塞上錦棚兒。萬恨千愁言不得。成都遙進新荔枝。金盤紫鳳甘如飴。紅塵一騎不成笑。病中風味心自知。君不聞延秋門。一齒作楚藏病根。又不聞馬嵬坡。一身漉血未足多。漁陽指日鼙鼓動。始覺開元天下痛。雲臺不見漢功臣。三十六牙何足用。朋侪皓齒今已矣。風流何處三郎李。

詩藪雄渾流麗。步驟中程。

元統乙亥余除閩憲知事未行立春十日參政許可惠茶賦此以謝

春到人間纔十日。東風先過玉川家。紫薇書寄斜封印。黃閣香分上賜茶。秋露有聲浮薤葉。夜窗無夢到梅花。清風兩腋歸何處。直上三山看海霞。

詩藪全篇整麗首尾勻和。

句

客遇鐘鳴飯。僧披御賜衣。

七修類稿。僧舊著黑衣。元文宗寵愛欣笑。隱賜以黃衣。其徒後皆衣黃。薩天賜贈笑隱詩云云。正謂此也。

山村猿索飯。竹塢鶴聽棋。浙江潮似雪。閩土臘如春。

詩藪薩天錫俊逸清新。歌行近體。時有佳處。如云云。晚唐語也。云云。晚宋語也。

海瘴連雲起。江湖入市流。故廬南雪下。短褐北風前。夜臥千峯月。朝餐五色霞。朔風吹野草。寒日

下邊城。

詩數元五言律可摘者。陸天錫云云。

河漢入樓天不夜。江風吹月海初潮。詳趙孟頫下

胡善

善字師善。紹興諸暨人。泰定進士。

句

領檄來司教。臨危要致身。

輟耕錄。至正乙未。以憲僉趙公舉爲松江儒學經師。越明年。苗寇至。欲燬孔子廟。善坐經席罵寇。寇怒殺之。先是善題詩於壁云云。及難死。果不誣。

元詩紀事卷十六

楊維禎

維禎字廉夫號鐵崖會稽人登泰定丁卯進士第官至江西等處儒學提舉有鐵崖古樂府等集七修類稿廉夫母夢金鉤入懷而生

又其號鐵崖初居吾杭鐵冶嶺後號鐵笛至松江得莫冶所製鐵笛

列朝詩集張伯雨序其樂府云上法漢魏而出入於少陵二李之間隱然有曠世金石聲又時出龍鬼蛇神以眩蕩一世之耳目斯亦奇矣

又承學之徒流傳訟襲槎牙鉤棘號爲鐵體

又維禎疾亟撰歸全堂記頃刻而就曰九華伯潘君迎我擲筆而逝

四友齋叢說吾松呂璜溪卽開應奎文會者是也走金帛聘四方能詩之士請楊鐵崖爲主考試畢鐵崖第甲乙一時文士畢至傾動三吳

雲林遺事楊廉夫就好聲色一日與元鎮會飲友人家廉夫脫妓鞋置杯酒其中使坐客傳飲名曰鞋杯元鎮素有潔疾見之大怒翻案而起連呼醒醒而去

山堂肆考元楊鐵崖在松江嘗游盤龍塘夜抵普門寺宿盜伺其出盡竊所蓄物黎明家人往白之先生賦詩不輟語客曰老鐵在是區區長物又奚足恤

揮塵詩話。楊鐵崖在金粟道人。家每食。主人必出佳醢。以芙蓉金盤。令美妓捧勸。鐵崖出對曰。芙蓉盤捧金莖露。有能對者。贈以此盤。一妓應聲曰。楊柳人吹鐵笛風。遂以盤酬之。一坐傾倒。鐵崖逸編。先生自言。予用三體咏史。用七言絕句體者三百首。古樂府體者二百首。古樂府小絕句體者四十首。絕句人易到。吾門章木能之。古樂府不易到。吾門張憲能之。至小樂府。二三子不能。惟吾能之。故五峯李著作推爲咏史上手云。門人章琬識。

詩藪。元末楊廉夫歌行。聲價騰湧。今讀之。大率穠麗妖冶。佳處不過長吉文昌。平處便是傳奇史。斷漢魏風軌。未覩藩籬。而一時傳賞楮貴。信識真未易也。

詩藪。元五言絕。自廉夫樂府諸篇外。一代寥寥。卽虞楊氏集中。罕覩佳者。遠不如七言絕也。

西湖竹枝歌九首并序

予閒居西湖者七八年。與茅山外史張貞居。苕溪鄰九成輩。爲唱和交。水光山色。浸沈胸次。洗一時尊俎粉黛之習。於是乎有竹枝之聲。好事者流布南北。名人韻士屬和者。無慮百家。道揚諷諭。古人之教廣矣。是風一變。賢妃貞婦。興國顯家。而烈女傳作矣。采風謠者。其可忽諸。至正八年秋七月。會稽楊維禎。書於玉山草堂。

蘇小門前花滿株。蘇公堤上女當壚。南官北使須到此。江南西湖天下無。

鹿頭湖船唱艖郎。一作片言許郎。金石剛船頭。一作阿奴不宿。一作是野鴛鴦。爲郎歌舞爲郎死。不惜黃金成斗量。

家住西湖新婦磯。勸君不唱縷金衣。琵琶元是韓朋木。彈得鴛鴦一處飛。
湖口樓船一作行雲。湖日陰。湖中斷橋湖水深。樓船一作行雲。無柁一作心是郎意。斷橋有柱是儂心。
病春日日可如何。起向西窗理琵琶。見說枯槽能卜命。柳州街口問來婆。
小小渡船如缺瓜。船中少婦竹枝歌。歌聲唱入空侯調。不遣狂夫橫渡河。
勸郎莫上南高峯。勸儂莫上北高峯。南高峯雲北高雨。雲雨相催愁殺儂。
石新婦下水連空。飛來峯前山萬重。不辭妾作望夫石。望來或似飛來峯。
望夫一朝又一朝。信郎信似浙江潮。浙江潮信有時失。臂上守宮無日消。

歸田詩話。西湖竹枝詞。楊廉夫爲倡。和者甚衆。皆詠湖山之勝。人物之美。而寓情於中。大率一律。
麓堂詩話。詩貴意。意貴遠不貴近。貴淡不貴濃。如杜子美釣簾宿鷺起云云。李太白桃花流水杳
然去云云。王摩詰返景入深林云云。皆可與知者道。難與俗人言。王介甫得之曰。坐看蒼苔色。欲
上人衣來。虞伯生得之曰。不及清江轉柁鼓。洗盞船頭沙鳥鳴。曰。繡畫美人時共看。堦前青草落
花多。楊廉夫得之曰。南高風雲北高雨。雲雨相催愁殺儂。可謂閉門造車。出門合轍者矣。

鴻門會

天迷關地迷戶。東龍白日西龍雨。撞鐘飲酒愁海翻。碧火吹巢雙獬獫。照天萬古無二鳥。殘星破月開天
餘。座中有客天子氣。左股七十二子連明珠。軍聲十萬振屋瓦。拔劍當人面如赭。將軍下馬力拔山。氣卷
黃河酒中瀉。劍光上天寒彗殘。明朝畫地分河山。將軍呼龍將客走。石破天撞玉斗。

鐵崖古樂府先生酒酣時常自歌是詩。此詩本用賀體而氣則過之。蓬窗日錄謝臯羽詩余尤愛其鴻門讌一篇云云。李賀集中亦有鴻門讌一篇不及此遠甚。可謂青出於藍矣。元楊廉夫樂府力追李賀亦有此篇愈不及臯羽矣。

漫興七首并序

學杜者必先得其性情語言而後可得其性情語言必自其漫興始。錢唐諸子喜誦予唐風取其去杜不遠也。故今漫興之作將與學杜者言也。

蠶畫溪頭翠水家。水邊短竹夾桃花。春風喚人狂無那。走覓南鄰羯鼓撾。丈人接羅白氍毹。花邊下馬不驚猜。環沈溪頭買酒去。高堂寺裏看碑來。長城女兒雙結丫。陳皇宅前第一家。生來不識古井怨。唱得後主後庭花。楊花白白絲初迸。梅子青青核未生。大婦當壚冠似瓠。小姑喫酒口如櫻。今朝天氣清明好。江上亂花無數開。野老殷勤送花至。一雙蝴蝶趁人來。南鄰酒伴辱相呼。共訪城東舊酒壚。柳下秋千閒絡索。花間喚起勸胡盧。我愛東湖舊廣文。更過水口覓將軍。醉歸嘗騎廣文馬。不怕打鼓噤黃昏。

鐵崖古樂府漫興者。老杜在浣花溪之所作也。漫興之爲言。蓋卽眼前之景。以爲漫成之詞耳。其情性盎然。與物而爲春。其言語似村。而未始不俊也。此杜體之最難學也。先生此作。情性語言近似矣。

鸞堂詩話杜子美漫興諸絕句有古竹枝意韓退之亦有之楊廉夫十二首非近代作也蓋廉夫深於樂府當所得意若有神助但恃才縱筆多率易而作

春俠雜詞八首 據吳編

金丸脫手彈鸚鵡。玉鞭嬉笑擊珊瑚。侍兒無賴有如此。知是霍家馮子都。
花袍白面呼郎神。當街奪花不避人。天馬乘龍金絡腦。買家貴婿正嬌春。
柘林縱獵金毛鷹。花街行春銀面馬。夜宿倡家酒未醒。飄風吹落鴛鴦瓦。
昨日布衣行九州。今日繡衣拜冕旒。馬前清道一千步。當街不敢闕高樓。
千古才人不可到。朱提注酒酒如池。太白淋漓喚不辭。上樓更衣玉山倒。腰閒帶脫金犀毗。
關右新來豪俠客。姓氏不通人不識。夜半酒醒呼阿吉。碧眼胡兒吹篴笛。
蜀琴聲奏雙鴛鴦。蟹竹鳴和雙鳳凰。夜闌酒醒不上馬。紫荊月墜西家牆。
西江美人久不見。手把新題合歡扇。鯉魚憑送相思書。霸王門前水如箭。
復古詩集
鐵崖復古詩集太史曰此詞俠才冶思見於二十八字非貴公子具五色腸者不能也讀者豈可

以唐人絕句求之哉

又四首 據吳復編

石上葉生青鳳尾。階前花開黃鸝觜。美人弄水百花池。水洒花枝雙蝶起。
宜男草生小院西。階前錦石與人齊。錢塘潮生當午信。丹雞飛上上頭啼。

鳳凰城外橫門道。小妓軍裝金線襖。春暉無賴苦撩人。自下雕鞍蹋芳草。美人遺我昆溪竹。未寫雌雄雙鳳曲。愛惜長竿繫釣絲。釣得西江雙比目。

鐵崖古樂府

案復古詩集。春俠雜詞只八首。吳復編鐵崖古樂府。則係十首。無昨夜布衣。關右新來兩首。多出石上葉生。宜男草生。鳳凰城外。美人遺我四首。美人首又見詩藪。今並錄之。

秋千曲

齊雲樓外紅絡索。是誰飛下雲中仙。剛風吹起望不極。一對金蓮倒插天。

詩藪。春俠詞云云。秋千曲云云。無論溫韓。卽子建太白。降格揮毫。未知孰勝。

吳下竹枝歌七首。率郭幾仲同賦

三箸春深草色齊。花閒蕩漾勝耶溪。採菱三五唱歌去。五馬行春駐大堤。家住越來溪上頭。臙脂塘裏木蘭舟。木蘭風起飛花急。只逐越來溪上流。寶帶橋西江水重。寄郎書去未回儂。莫令錯送回文錦。不答鴛鴦字半封。馬上郎君雙結椎。百花洲下買花枝。罌罎冠子高一尺。能唱黃鶯舞雁兒。白翎鵲操手雙彈。舞罷胡笳十八般。銀馬杓中勸郎酒。看郎色似赤瑛盤。騎馬當軒鶴背靴。西風馬上鼓琵琶。內家隊裏新通籍。不是南州百姓家。小娃十歲唱桑中。盡道吳風似鄭風。不信柳娘身不嫁。真珠長絡守宮紅。

詩藪。七言絕如西湖吳下竹枝歌。及春俠宮詞。續香奩遊仙等作。本學夢得致光。而筆端高爽處。

往往逼李供奉。漫興學杜。亦略近之。其才情實出趙揭諸家上。

題履元陳君萬松圖

繁芝道人天思精。南來新畫青松障。東家畫水西家山。積葉陳縑忽如忘。突然槎枒生肺肝。元氣淋漓逼神王。亟呼圓瓦倒墨汁。盡寫髯官立成仗。羣爭十丈百丈身。氣敵千人萬人將。交柯玉瑣混鱗甲。屈鐵金繩殊骨相。石門雷霆白日傾。雨走蜩龍青天上。前身要是僧擇仁。五百蜿蜒見情狀。天台老林亦畫松。三株五株成冗長。我家東越大松岡。五鬣蒼蒼鬱相望。門前兩箇赤婆娑。上有玄禽語相向。雕龍梓客朝取材。伏虎將軍夜偷餉。安得射洪好絹百尺強。令泫陰森移疊嶂。鼓以軒轅之瑟五十弦。共寫江聲入悲壯。鐵厓逸編右寫似子昭異才。子昭工畫仕女花木。予懼其情過粉黛。則氣乏風雲。故書此詩以遺之。子昭讀此詩後。得毋激作公孫大娘之劍乎。

海鄉竹枝歌

潮來潮退白洋沙。白洋女兒把耒耜。苦海熬乾是何日。免得儂來爬雪沙。門前海圻到竹籬。階前腥臊蠶子肥。殭殭三歲未識父。郎在海東何日歸。海頭風吹楊白花。海頭女兒楊白歌。楊花滿頭作鹽舞。不與斤兩添銅駝。顏面似墨雙腳頰。當官脫袴受黃荊。生女寧當嫁盤瓠。誓莫近嫁東家亭。

鐵崖樂府自記海鄉竹枝。非敢以繼風人之鼓吹。於以達亭民之疾苦也。觀民風者。或有取焉。雉朝飛并序。

琴操有雉朝飛。多指牧犢子之作。據揚雄所記。則曰雉朝飛者。衛女傅母之所作也。衛女嫁齊太子中道。太子死。問傅母。傅母曰。且往當喪。喪畢。女不肯歸。終之以死。傅母悔之。取女所操琴于冢上鼓之。忽有雉出墓中。傅母撫雉曰。女果爲雉也。言未畢。雉飛而起。故其操曰雉朝飛。予以牧犢之歎。不如衛女之善死。有關世教也。故賦以補舊樂府之缺云。

雉朝飛。一雄挾一雌。雄死雌誓黃泥歸。衛女嫁齊子。未及夫與妻。青縞綰素結。一死與之齊。人言衛女蕩且離。烏得冢中有雉飛。琴聲鼓之聞者悲。

蟬精鳥是作。端可以洗樂府之陋矣。

石婦操

章琬曰。石婦。卽望夫石也。在處有之。補入琴操。悲其志與精衛同。不必問其主名也。

山夫折山華。山頭朝音潮。石婦行人幾時歸。東海山頭有時聚。行人歸。啼石柱。石婦岑岑化黃土。

鐵崖復古詩集。太史曰。啼字妙。非啼婦也。乃化鶴來歸。語華表意。

案吳復編鐵崖古樂府。在至正六年。章琬編鐵崖復古詩集。在至正二十四年。兩集相複者數十首。而時有異同。如此首。山夫折山華句上。樂府本尙有峨峨孤竹岡。上有石魯魯二句。山頭朝石婦句。樂府本作歲歲山頭歌。石婦殆樂府本編後。維楨又有所改定。故琬本據之歟。

花游曲并序

至正戊子三月十日。偕茅山貞居老仙。玉山才子。煙雨中游石湖諸山。老仙爲妓者瑤英賦點絳

脣詞已而午霽登湖上山歇寶積寺行禪師西軒老仙題名軒之壁瑤英折碧桃花下山予爲瑤英賦花游曲而玉山和之

三月十日春濛濛滿江花雨溼東風美人盈盈煙雨裏唱徹湖煙與湖水水天虹女忽當門午光穿漏海霞裙美人凌空躡飛步步上山頭小真墓華陽老仙海上來五湖吐納掌中杯寶山枯禪開茗碗木鯨吼罷催花板老仙醉筆石闌西一片飛花落粉題蓬萊宮中花報使花信明朝二十四老仙更試蜀麻箋寫盡春愁子夜篇

六研齋筆記至正戊子三月十日會稽楊維禎同貞居張伯雨諸人遊石湖有作者瑤英與坐各爲花游曲一章詞情美麗實一時之盛

嬉春體五首錢塘湖上作一云賦僧唐體遺錢塘詩人學杜者

今朝立春好天氣況是太平朝野時走向南鄰覓酒伴還從西墅買花枝陶令久辭彭澤縣山公祇愛習家池宜春帖子題贈爾日日春遊日日宜

西子湖頭春色濃望湖樓下水連空柳條千樹僧眼碧桃花一株人面紅天氣渾如曲江節野客正是杜陵翁得錢沽酒勿復較如此好懷誰與同

何處被花惱不徹嬉春最好是湖邊不須東家借騎馬自可西津買蹋船燕子繞林紅雨亂鳬雛衝岸浪花圓段家橋頭猩色酒重典春衣沽十千

入山十里清涼國三百樓臺迤邐開岳王墳前弔東渡隱君寺裏話西來接果黃猿呼一箇探花白鹿走

千迴風流文采湖山主。坡白應須屬有才。

楊子休官日日閑。桐江新棹酒船還。叮嚀舊客兼新客。漫浪南山與北山。好懷急就一斗飲。佳人能作五絃彈。君看此地經游輦。彷彿春風夢未殘。

草堂雅集先生所謂嬉春體。卽老杜以江上誰家桃樹枝。春寒細雨出疏籬爲體也。先生自謂代之詩人。爲宋體所格。故多作此體變之云。

六客詩

有客有客來洞庭。駕罔象兮騁奔鯨。千家含景雙龍精。玲瓏七竅羅天星。莫邪出匣鏗有聲。一鳴一止三千齡。

有客有客來西域。龍高昂兮頸雖覓。腹如巴蚺風非翼。口牙夜光集月魄。奇聲劈山椎霹靂。道人因之寫胸臆。

有客有客來象山。渡青海。飛龍灣。陪道主。登玉壇。吐星宿。呈琅玕。出入爪甲冰雪寒。號鬼母。驚神肝。一聲吹裂虎豹關。

有客有客來文山。如金如鐵堅非頑。文山頽不可攀。留爾亦足消羣奸。靜以安。方以直。帶蒼玉。佩文石。文星燦然守玄默。

有客有客來赤城。碧梧風裁光瓏玲。音含太古文七星。直如赤絲清如冰。洗秋壑。鳴秋聲。金舂玉應和以平。

有客有客來瀉池。皤然其腹蠡以癡。曾太古。春風知。至今面肉凝如脂。祖龍朽腐不足奇。和風自活千年枝。

楊維禎七客者。志抱遺老人。嘗得斷劍於洞庭湖。緱氏子。煉爲笛。又得古琴於赤城。相傳賈師相故物。得胡琴於大陵呂氏。得管於杭老宮人所。云宋道君內府物。又得玉帶硯一。古陶甕一。硯爲文文山之手澤。甕爲秦祖龍藏中器也。旣而闢一室以居六者。老人時燕居其中。六者皆以客遇之。而又命之名焉。以鐵笛形如龍狀。而聲如龍吟也。故名之曰洞庭鐵龍君。以胡斛聲相近。琴又主於律。口噤以珠。而聲又如貫珠然。故名胡琴曰西域斛律珠。以象出於象山。而以其齒爲管。管又同於筒。故名以曰象山管氏筒。以古琴有焦尾材。又聲如秋聲。故名之曰赤域焦氏秋。硯本石而玉帶文。且出文山氏。故名之曰文山玉帶石。古陶出於瀉池君之墓也。盛酒於中。經歲不變。而折花其中。又能自葩實不死。故名之曰陶氏太古春。書洞庭。書西域者。紀異也。書文山者。尊忠臣也。書筒管而不書道君。書秋聲而不書秋壑。書太古春而不書瀉池君。以其所遇非其主也。老人古之廉士。今之怪奇人也。以不遇於世。又自客六者之間。而七焉。總而顏客之所曰七客者之寮。客主道人。而道人亦以客自目。蓋相忘於六者之間。不知主爲客。客爲主也。說光陰者。謂百代過客人。託一室於宇宙之內。雖亦客耳。人於形骸之外。有主客之分。是以物我相形。而閒閒之智。詹詹之言。鋒然而起。惟達者不與物競。而與化往來。至我忘物。物忘我。主客何有哉。道人旣自志。而且歌六客之詩云云。

香奩八詠并序 錄四

吳閒詩社香奩八詠無春芳才情者多爲題所困縱有篇辭鄙婦學妝院體終帶鄙狀可醜也晚得玉樹餘音爲甲而長短句樂府絕無可拈出者一日雲菴王先生寄示踏莎行八闋讀之驚喜先生蓋松雪翁門人今年八十又三矣而堅強清爽出語娟麗此殆爲月中神仙謹付翠兒度腔歌之又評付龍洲生附八詩後繡梓以見王孫門中舊時月色雖曰喪亂固無恙也至正丙午春三月初吉錦窰老人楊維禎序

金盆沐髮

華清春晝賜溫泉綰脫青絲散一編翠雨亂跳花底月黑雲半卷鏡中天銅仙盤冷添甘露玉女盆傾拾翠鈿攏得雲鬢高一尺罍冠新上玉臺前

月奩匀面

一片清光照膽寒玉容滿鏡掩飛鸞素娥照見黃金闕絳雪鎔開白玉盤翠點柳尖春未透紅生櫻顚露初乾好風爲我披羅幙一朵夫容正面看

玉頰啼痕

天然玉質洗鉛華怪底偏將半面遮紅滴香冰融顰蹙彩黏膩雨上梨花收乾通德言難盡點溼明妃畫莫加聚得斑斑在何處輭綃寄與薄情家

黛眉顰色

按樂圖開列畫堂。春愁何獨損清揚。蜀山煙雨雙尖瘦。漢柳風霜兩葉蒼。索畫未成京兆譜。欲啼先學壽陽妝。蕭郎忽有歸期報。喜得天庭一點黃。

詩數。廉夫香奩八詠。收乾云云。索畫云云。銅仙云云。翠點云云。皆精工刻骨。古今綺辭之極。然是曲子語。約束入詩耳。句稍參差。便落王實甫關漢卿。

小游仙十二首錄一

麻姑今夜過青邱。玉醴催斟白玉舟。莫向外人矜指爪。酒酣爲我擘篲篸。

詩數。夢得竹枝。長吉錦囊。飛卿金盞。致光香奩。唐人各擅。至老鐵迺奄四家有之。如勸郎莫上云云。其宛麗夢得靡加。麻姑云云。其瑰嫺長吉莫過。

元夕與婦飯

問夜夜何其。睠茲燈火夕。月出屋東頭。照見琴與冊。老婦紀節序。清夜羅酒席。右蠻舞裊裊。左瓊歌昔昔。婦起勸我酒。壽我歲千百。仰唾天上蜍。誓作酒中魄。勸君飲此酒。呼月爲酒客。婦言自可聽。爲之浮大白。鐵網珊瑚老婦曰。人言天孫思妃。不如月娥守孤。不知羿婦相棄以奔。曷若織女相望以久之愈也。

廬山瀑布謠并序

甲申秋八月十六夜。予夢與酸齋仙客游廬山。各賦詩。酸齋賦彭郎詞。予賦瀑布謠。銀河忽如瓠子決。瀉諸五老之峯前。我疑天仙一作孫織素練。素練脫軸垂青天。便欲手把一作借并州。

翦翦取一幅玻璃煙。相逢雲石子。有似捉月仙。酒喉無耐夜渴甚。騎鯨吸海枯桑田。居然化作十萬丈。玉虹倒挂清冷淵。

堯山堂外紀。至正甲申秋八月十六夜。楊廉夫夢與酸齋仙客遊廬山。各賦詩。酸齋賦彭郎詞。廉夫賦瀑布謠。詰旦以語富春吳復。復拍几大叫曰。酸齋之詞滑稽譴浪。固風流才仙。而先生之謠雄偉俊逸。真天仙也。

佛頂菊

蓮社淵明手自栽。頭顱終不惹塵埃。東籬若爲摩挲看。西域親曾受記來。妙色盡從枝上發。慧香直奔腦門開。明年九月重陽節。再托摩耶聖母胎。

七修類稿。元人謝伯理居松之泖湖。富而好禮。搆光祿亭爲宴樂之所。九日會友於其間。有園丁以佛頂菊花方開。獻之筵間。求詩。衆爲賦之。時鐵笛道人楊廉夫在座。走筆云云。座客顧仲瑛奉觴稱曰。先生之作。誠可謂虎穴得子矣。

王烈婦詩

介馬馱馱百里程。青楓一夜血詩成。祇應劉阮桃花水。不似巴陵漢水清。

南濠詩話。宋王烈婦青楓嶺事。昭灼在人耳目。士大夫過而題詩者甚衆。楊廉夫詩云云。後廉夫得夢悔之。乃更作詩。有寧從湘瑟聲中死。不向胡笳拍裏生之句。則與前詩迥不作矣。

改作

天隨地老妾隨兵。天地無情妾有情。指血齧開雲嶠赤。苔痕化作雪江清。願從湘瑟聲中死。不逐胡笳拍裏生。三月子規啼斷血。秋風無淚寫哀銘。

高坡異纂。楊廉夫題臨海王節婦詩云云。後廉夫無子。一夕夢一婦人謂曰。爾知所以無後乎。曰。不知。婦人曰。爾憶題王節婦詩乎。爾雖不能損節婦之名。而心則傷於刻薄。毀謗節義。其罪至重。故天絕爾後。廉夫既寤。大悔。遂更作詩云云。後復夢婦人來謝。未幾果得一子。

題劉阮山

兩塔原非薄倖郎。仙姬已識姓名香。問渠何時歸來早。白首糟糠不下堂。

南濠詩話。元微之題劉阮山詩云云。後元遺山詩云云。予頃見楊廉夫詩蹟。亦有是作云云。較之二元情致不及。而忠厚過之。

題宋宮觀潮圖

八月十八睡龍死。海龜夜食羅刹水。須臾海劈龜赭門。地捲銀濤薄於紙。艮山移來天子宮。宮前一箭隨西風。劫灰欲洗蛇鬼穴。婆留朽鐵猶爭雄。望海樓頭誇景好。斷鼉已走金銀島。天吳一夜海水移。馬蹀沙田食沙草。崖山樓船歸不歸。七歲呱呱啼軼道。

七修續稿。嘗於先輩葉南屏家。見元人題宋宮觀潮圖詩。皆雄富雅健。感慨悲壯。因假回錄之。楊維禎詩云云。練川嚴恭。出宋宮觀潮圖。索余詩爲首唱。且曰。得奇語。始可抗浙江之奇觀。繼遣金露澆渴穎。飲酣爲之吐錦囊句。時至正廿年秋八月初。楊維禎在元白亭。試奎章龍香寶劑書。

大暑讌朱氏玉井香賦詩

朱公仙人。冰雪照肺腑。祖帑閱羽化。祖書在冊府。門掩一畝宮。虹梁跨風渚。喬木八九株。梧桐雜槐櫟。中有玉井香。銀雲灑零雨。俗士不必來。佳朋來不拒。煮茶不無童。謀酒自有婦。核破玉刃霜。大桃筩卷金莖露。上聲韻方響。歌洞仙。自題舞魔女。梧溪斥琴操。主者極能評詩。謂梧溪子儼琴操爲失體。可措鐵雅鳳味云。海嶽訂畫譜。米老爲書家三變也。棹歌發復留。冰花涼欲語。焉知人間世。大火虐如虎。

好古堂書畫記。楊鐵崖書一軸云。至正景午大暑。讌於朱氏玉井香。賦詩十有二韻。書似西枝。玉海鶴屋三才子共和之云云。箕尾叟在草元閣書。東魯先生攷校。

贈僧一初

一初閣黎諸法解。吹得道人雙劍簫。大道不知宗北秀。看山直欲盡南條。

六研齋筆記。元僧仁一初。隱富陽妙智寺。楊廉夫與之善。廉夫鐵籥。惟一初能吹。楊贈之詩云云。

詠史

買妾千黃金。許身不許心。使君自有婦。夜夜白頭吟。

又

生爲仲卿婦。死逐仲卿棲。廬江同樹鳥。不過別枝啼。

詩藪。老鐵咏史。如云云。此類甚衆。亦大是伎倆人。然惟二十字可耳。要八字便入晚唐。

玉鏡臺

郎贈玉鏡臺。妾挂菱花盤。安得咸陽鏡。照郎心肺肝。

采蓮曲

東湖采蓮葉。西湖采蓮花。一花與一葉。持較阿侯家。同生願同死。死葬清冷洼。下作鎖子藕。上作雙頭華。

洞庭曲

道人鐵笛響。半入洞庭山。天風將一半。吹度白銀灣。

又

仙橋大於斗。浮之過洞庭。江妃渾未識。喚作楚王萍。

又

海上雙雷島。渾如滌瀨堆。乖龍拔山脚。飛渡海門來。

桂水五千里

桂水五千里。瀟湘雨氣空。衡山七十二。望見女英峯。

詩數宋樂府小詩殊寡。元惟楊廉夫才情縹緲。獨步當代。名下士信無虛也。如云云云。酷是六朝。又洞庭曲云云。率超異神俊。追蹤謫仙。非宋元語。

案鐵崖樂府。桂水五千里。別自一題。非洞庭曲。

席上作

江南處處烽煙起。海上年年御酒來。如此烽煙如此酒。老夫懷抱幾時開。

遊聞錄。張士誠以厚幣招楊廉夫甚急。勉行至姑蘇。適元以龍衣御酒賜士誠。廉夫因飲御酒。遂作詩云。士誠聞之默然。遂不強留。

七修類稿。張士誠開宏文館。固延致之。廉夫心知其異圖也。至無一字一語。終日酒酣臥睡。一日朝廷頒酒於士誠。廉夫以指寫塵桌一絕云云。張見之。知終不就。遂放歸。至天朝革命。又令近臣促入京師。廉夫託疾固辭。知不可得也。作詩縊死。有詩云。天子來徵老秀才。秀才嬾下讀書臺。商山肯爲秦嬰出。黃石終期孺子來。太守免勞堂下拜。使臣且向日邊回。袖中一管春秋筆。不爲旁人取次裁。二詩事熟誦人口。然考貝廷臣所作之傳。則廉夫於士誠處。未嘗到也。曾獻五論。并復書直詆所用非人。洪武三年正月。又嘗至京師。有疾回。或者廷臣之傳。尙當信也。

案堯山堂外紀。載楊鐵崖不赴召。有詩商山云云。明太祖閱之。乃云。老蠻子欲吾殺之以成名耳。遂放回。卽鐵崖集亦載此作。特句法小異。七修類藁。至有作詩縊死云云。不知太祖卽位。遣詹同文幣徵。維楨賦老客婦謠以見志。故宋景濂有不受君王五色詔。白衣宣至白衣還之句。若商山黃石一詩。乃福建邱葵爲宋秀才不赴元世祖之徵而作。見本集。題爲御史馬伯庸達魯花赤徵幣不出有述。林霍詩話亦載是詩。同安縣志。邱葵載入儒林。亦有却聘述詩事。卒後配享朱子祠。更按閩書。稱宋末科舉廢。葵杜門勵學。居海嶼中。自號釣磯翁。著書甚夥。

老客婦謠

老客婦。老客婦。行年七十又一九。少年嫁夫甚分明。夫死猶存舊箕帚。南山阿妹北山姨。勸我再嫁我力辭。涉江采蓮。上山采靡。采蓮采靡。可以療饑。夜來道過娼門首。娼門蕭然驚老醜。老醜自有能養身。萬兩黃金在織手。上天織得雲錦章。繡成願補舜衣裳。舜衣裳爲妾佩。古意揚清光。辨妾不是邯鄲娼。

藝苑卮言。高皇帝徵廉夫脩元史。欲官之。廉夫作老客婦示不屈。乃放之歸。

案珊瑚木難。謠後注有臣會稽楊維禎上七字。

珊瑚木難。詹同文撰老客婦傳。老客婦者。會稽楊維禎先生。以高科進士。仕有元三十年。今行年幾八十。而新天子以前朝老文學。思一見之。將延入禮筵文館。遣翰林詹同文奉幣詣門起之。先生以老客婦謝使者曰。豈有八十歲老婦。去木不遠。而再理嫁者耶。明年又遣松江別駕追趣不已。賦老客婦詞一首。微黠。聽曰。皇帝以吾之能以能之。非殫吾所不能則否。否則惟有蹈海死耳。上允之。已而賜安車。詣闕廷。留百有二十日。禮文畢。史統定。卽以白衣丐骸骨。上成其志。弗受爵賞。仍給安車還山。史館胄監之士。祖帳西門外。行路之人。望之如神仙異人。吁。客婦之謠伸矣。

鍾山詩

鍾山千仞楚天西。玉柱曾經御筆題。雲護金陵龍虎壯。月明珠樹鳳凰棲。氣吞江海三山小。勢壓乾坤五嶽低。願效華封陳敬祝。萬年聖壽與天齊。

七修類稿。太祖初召楊廉夫見。令賦鍾山詩。援筆立就云云。太祖曰。此詩值一千貫。今日庶事方殷。姑賜五百貫過日。

無題效商隱體四首與袁子英同賦

當軒隊子立紅靴。龜甲屏風擁絳紗。公子銀瓶分汗酒。佳人金勝翦春花。曲調青鳳歌聲轉。觥進黃鵝舞勢斜。五十男兒頭未白。臨流洗馬走紅沙。主家防落近連昌。燕子歸來舊杏梁。金埒近收青海駿。錦籠初教雪衣娘。卷衣甲帳春容曉。吹笛西樓月色涼。今夜阿鴻新進劇。黃金小帶荔枝裝。

二月皇都花滿城。美人多病苦多情。一雙孔雀行瑤圃。十二飛鴻上錦箏。酒掬真珠傳玉掌。羹分甘露倒銀罍。不堪容易少年老。爭遣狂夫作後生。天街如水夜初涼。照室銅盤壁月光。別院三千紅芍藥。洞房七十紫鴛鴦。繡靴踢毬句驪樣。羅帕垂彎女直妝。願汝康強好眠食。百年歡笑未渠央。

句

小洞桃花落香雪。大堤楊柳舞晴煙。

歸田詩話。楊廉夫詩。公子云云。金埒云云。又云云。皆言宴賞游樂之意。亦其平生性格所好也。

句

安危豈料關天步。生死猶能繫俗情。

歸田詩話。詩社以楊妃機爲題。楊廉夫一聯云云。題目雖小。而議論甚大。所以諸人莫能及。

元詩紀事卷十七

朱仲明

仲明字□□號北軒休寧人。

大有年

五穀皆登幾載無。今秋端不負菑畬。已欣億秭倉箱積。肯數尋常儻石儲。卦象曾占天上火。牧人應協夢中魚。麟經二百餘年久。似此豐穰僅一書。

元詩癸集。近于休寧陳氏。得明經書院考評一冊。乃其先世定宇先生櫟遺筆也。泰定閒。有小桃源詩盟。定宇以大有年爲題。得三百三十七卷。與星源胡初翁存菴定其甲乙。加之評騭。取中者三十名。一曰都魁。卽仲明卷。二曰亞魁。爲康衢遺民卷。其對仗可採者。如康衢遺民云云。二十六名。程維巖云云。二十九名。胡祥云云。亦能切題。餘卷語多陳腐。

楊得祿

得祿字□□休寧人。

大有年

乃夢維魚卜歲登。東皋南畝力深耕。一犁春雨欣沾足。百穀秋風喜用成。作息不知蒙帝力。謳歌聊以樂吾生。重書大有光千古。鼓腹含哺樂太平。

明經書院考評第五名胡初翁存菴評曰首聯清妥次聯平易絕似陸放翁調度

汪志堅

志堅字□□祁門人

大有年

五十年無赤白囊民安田井樂畊桑雞豚社雨家家酒穠極外風處處香已驗天文占斗覆賸收地利應金穰王風喜值時雍盛仰祝皇圖日月長

明經書院考評第八名存菴評曰首聯句法秀整次聯亦襯貼不苟當是作者

胡元采

元采字□□黟縣人

大有年

時和歲稔樂無邊大有堪書續魯宣居積困禾皆萬億佇看斗米只三錢花村月照犬無吠化國日長人醉眠童叟相觀皆額手從茲深願屢豐年

明經書院考評第十六名存菴評曰後聯詩人之詩也

程維巖

句大有年

史筆特書當繼魯詩聲播頌載歌周詳朱仲明下

胡祥

句同上

易地時霑沛然雨。平疇輕拂快哉風。同上

柯九思

九思字敬仲。仙居人。蔭補華亭尉。不就。官至學士院鑒書博士。自號丹邱生。有丹邱生稿。

宮詩十五首

萬國貢珍陳玉陛。九賓傳贊卷珠簾。大明前殿筵初秩。勳貴先陳祖訓嚴。

自注。凡大宴。世臣掌金匱之書。必陳祖宗大札。撒以爲訓。

黑河萬里連沙漠。世祖深思創業艱。數尺闌干護春草。丹墀留與子孫看。

自注。世祖建大內。命移沙漠莎草於丹墀。示子孫毋忘草地也。

親王上璽宴西宮。聖祚中興慶會同。對捲珠簾齊仰聖。瑞雲捧日御天中。

自注。天歷元年十二月二十七日。篤伶帖木兒怯薛。第二日寶房內對速古兒赤。明里董阿。平章月魯不花。右丞大都赤哈刺八口口尙書口有來。典瑞院官吉寶兒。同僉答失蠻。經歷柯都事奏。十月二十三日。上都送寶來的時分。興聖殿御宴。其間有五色祥雲。捧日當殿。本院官院判鄭立。經歷張符。都事柯九思等。與衆於殿前一同仰觀。郁郁紛紛。非霧非煙。委係卿雲現。似這般祥瑞。應時呵。如今與省家文書行移。國史院標寫入史呵。怎生奉聖旨。您每行文書者。

四海昇平一事無常。參已散集諸儒。傳宣羣玉看名畫。先進開元納諫圖。

自注。凡御覽法書名畫。羣玉內史掌之。

萬里名王盡入朝。法宮置酒奏簫韶。千官一色眞珠襖。寶帶攢裝穩稱腰。

自注。凡諸侯王及外番來朝。必錫宴以見之。國語謂之質孫宴。質孫。漢言一色。言其衣服皆一色也。

官家明日慶生辰。準備龍衣熨帖新。奉御進呈先取旨。隋珠錯落間奇珍。

自注。御服多以大珠盤龍形。嵌以奇珍。曰鴉忽。曰喇者。出自西域。有直數十萬定者。

傳宣太府頒宮錦。近侍承恩拜榻前。製得袍成天未曉。著來香殿賀新年。

自注。臘前分賜近臣襖材。謂之拜年段子。

鳳城女樂擁祥煙。梵座春游挾管弦。齊望綵樓呼萬歲。柘黃止在五雲邊。

自注。故事。二月十五日迎帝師游皇城。宮中結綵樓親觀之。

花明畫錦柳搖絲。仙島陪鑾濯禊時。曲水番成飛瀑下。逶迤銀漢接清池。

自注。故事。上巳節。錫宴於萬歲山。

儒臣春值奎章閣。玉陛牙牌報未時。仙仗已迴東內去。牡丹花畔得圍棋。

自注。上日御奎章報未時。則還內殿矣。

玉梳調冰湧雪花。金絲纏扇繡紅紗。綵箋御製題端午。勅送皇姑公主家。

自注。皇姑者。魯國大長公主皇后之母也。天歷二年端午。上賜甚厚。并御詩送之。

觀蓮太液。泛蘭橈。翡翠鴛鴦戲碧苔。說與小娃牢記取。御衫繡作滿池嬌。

自注。天歷間御衣。多爲池塘小景。名曰滿池嬌。

珠宮錫宴慶迎祥。麗日初隨綵線長。太史院官新進歷。楊前一一賜諸王。

自注。每歲日南至。太史進來歲歷日。

元戎承命獵郊坰。勅賜新羅白海青。得雋歸來如奏凱。天鵝馳送入宮庭。

自注。海青者。海東俊鶻也。白者尤貴。有數十金者。

玉漏藏機水暗流。眞珠射日動燈球。偶人自解開青瑣。高拱龍床報曉籌。

自注。大明殿有燈漏。飾以眞珠。內爲機械。以小木偶人十二。捧十二相屬。每辰初刻。偶人相代開。

小門出燈外板上。直御床。立捧辰所屬以報時。

西湖竹枝集。宮詞追王建。墨竹法文湖州。名重當時云。

梧溪集。題柯博士敬仲宮詞後。帝作奎章。隄石渠。花明長日幸鑾輿。丹邱詞氣凌司馬。封禪何如。

諫獵書。

送趙虛一還金陵書虞翰林詩後

詞臣通籍侍金閨。天語從容問舊蹊。雲外山高龍虎踞。人間松老鳳凰棲。翰林擬詔當紅藥。道士疏封出紫泥。更賜金錢祠泰畤。寥陽前殿麗璇題。

草堂雅集虞翰林詩并序曰天歷二年三月廿五日集侍立延閣上顧問集嘗至金陵否集謹對曰嘗到又曰治亭是汝所題往年八九至其處新松常長茂矣集謹對曰是未種松時到也近臣奏言道士趙虛一所種也上曰然已陞觀爲宮汝知之乎集謹對曰臣奉敕題榜賜之矣是日歸虛一來別歸江南卽告以聖上不忘治亭之意又三日吳大宗師持卷來索詩贈行因錄所得如上云詩曰春明畫侍奎章閣聖上從容問治亭爲報仙都趙真士新松好護萬年青

蘇文忠天際烏雲卷九首

山中覆一作見鹿拾蕉葉眼底生花二月明不道人生俱夢裏新詩猶話夢中情

綠窗度曲初含笑銀甲彈箏不露尖人生莫待頭如雪華屋春宵酒屢添雲中初下勢如驚白鳳蹁躚雪色翎多少舊遊歌舞地不堪回首又重經

桃花扇底露脣紅一作無復梳妝與衆同一曲山香春去也一作意動茶蘼無語謝東風

一顆摩尼不染塵瑤池玄圃度千春寥陽殿裏雲深處誰是當時解佩人

三月旌旗幸玉泉牙檣錦纜御龍一作清船千官車騎如雲湧一作擁楊柳梢頭月色娟

長憶眉菴鶴髮翁舊時阿閣贊皇風如今流落那堪說黼黻文章似夢中

鼓瑟湘靈欲斷魂洞庭風一作波浪不堪論一作閒遙知舊賜宮袍一作文窗錦雙袖龍鍾總淚痕

興聖宮中坐落花詩成應制每相誇廬山面目秋來好自杖青藜步白沙

自跋此卷天歷間得之都下余愛坡翁所書之事俊拔而清麗令人持玩不忍釋手故侍書學士

虞公見而題之。余攜歸江南。會荆溪王子明同余所好。攜之而去。他日再閱於環慶堂。俯仰今昔。爲之慨然。因走筆盡和卷中之詩。以舒其悵鬱之氣。傍觀者子明之兄德齋。淮南潘純。金壇張經。長安莫浩。至正三年夏五月。丹丘柯九思書。

至順初。上嘗御奎章閣。太禧使明理董阿。中書左丞趙世安。大司農卿哈喇八兒侍。上從容詢求江南士。臣九思以韓性。張翥應詔。上曰。俟修皇朝經世大典畢。卿至江南刊梓時。可親爲朕召此二人者來。試之館閣。臣九思再拜曰。幸甚。後有近臣自南使還者。上問此二人。其人亦曰。佳士。上頗悅。後竟因循遂隔。今舉事玉山。思之泫然流涕。玉山請詩以記。因爲四十字。以寄二子云。

二美人間少。胡爲滄海涯。文章聯璧貴。聲譽九重知。宣室今無召。丘園謾有詩。蒼梧雲鬢鬢。回首淚空垂。

草堂雅集

酬陸友仁城南雜詩十首錄有注三首

尺五城南憫忠閣。平壤歸來有所思。魏徵不作碑已仆。朝廷久乏諫諍姿。閤忠閣乃唐時建。薦征高麗戰沒之士。

尺五城南故國基。武元皇帝有穹碑。苔痕手剝推終始。載記他年備拾遺。金太祖也。

尺五城南話往年。粧臺明月媚華筵。歡娛未了聞笳鼓。鼓國雙娥鎖翠煙。粧臺者金章宗所築。以貯李宸妃。章宗嘗曰。二人土上坐。宸妃應聲曰。一月日邊明。章宗大悅。我太祖皇帝伐金之初。金宣宗嘗獻岐國公主以請和。故云。

草堂雅集

題趙松雪春山圖

落花飛絮春日間。散策深林獨往還。口成應對口人語。好似西湖西畔山。
丹丘生藁附注。此紀管仲姬畫眉時語也。

題文與可畫竹

湖州放筆奪造化。此事世人那得知。茫然何處見生氣。彷彿空庭月落時。
元詩選按。敬仲善畫竹石。得筆法於文同。嘗自謂寫榦用篆法。枝用草書法。葉用八分。或用魯公撮筆法。木石用金釵股。屋漏痕之遺意。然其生意飛動。有龍翔鳳翥之狀。此詩所謂生氣。非敬仲不能道也。

題畫二首

春濃不放小禽棲。白髮衝冠向曉啼。簾幕半開人未起。樓臺風暖日猶低。
春風嬌軟綠陰肥。上苑鶯花紫翠圍。卻向後宮深院裏。一枝閒自理金衣。

南濠詩話。柯博士九思在奎章日。得出入內廷。後失寵。退居吳下。虞文靖公作風入松詞贈之。中亦微露此意。予聞柯嘗畫白頭黃鸝。題詞二絕云云。

句

夜雨推篷寫松石。焚香何處獨題詩。

雲林遺事。元鎮既散其田。而稅未及推。入國朝。催科者益集。元鎮逃去。潛於蘆葦中。蒸龍涎香。竟蹤跡得之。故柯九思詩云云。蓋道其實也。

又

雲飄五鳳層樓。日繞羣龍法駕來。鴛序久陪蒼水使。鳳池曾賦紫薇郎。詳趙孟頫下
哲理野臺

哲理野臺。字□□□□人。占籍吳縣。天歷元年領鄉薦。

題水村圖

四野漫漫水接天。孤村林木似凝煙。莫言此地無車馬。自是高人遠市廛。詳錢仲鼎下
焦文燭

文燭。字仲明。淮陽人。

夜直

億昨停驂便殿西。柳溝風軟絮霑泥。一彎月子梨花上。冷浸香雲伴鳥棲。

梧溪集。右社稷署奉禮郎焦君。追念先朝眷遇之隆而作也。少由文皇東宮時說書爲前職而卒。
白君之次子。日誦其詩。手寫詩意圖。

幹玉倫都

幹玉倫都。字克莊。

道園學古錄。奎章閣典籤玉倫都。嘗以禮記舉進士。從予成均於閣下。又爲僚焉。又幹君克莊曰。人樵於山。我樵於海。海無木。俟有浮槎斷梗。至君前者取之。故自命海樵子。

訪周古象不遇留題

事親未必可曾參。職分當爲每愧心。今口風來飄忽動。抱琴更入白雲深。

中洲野錄。周古象。蘄水人。生元末。事親孝。遭喪亂。入贅於淮。不見笑容。妻詰之。告以故。遂歸尋母葬之。廬墓二年。妻亡。終身不娶。淮西僉事幹克莊求見不遇。留題云云。復爲立孝里門。

廿立

立字允從。大梁人。辟爲奎章閣史。至丞相掾卒。

夜烏啼曲

月落城上樓。烏啼樓上頭。一啼海色動。再啼朝景浮。馬鳴黃金勒。霜滿翠羽裘。烏啼在何處。人生多去留。西湖竹枝集。平日學文自負爲臺閣體詩。善鍊飭脫去凡近。其夜烏啼曲。可配古樂府云。

和完一作宋學士晚出麗正門

暮光霞彩炫金題。絳闕高居雉堞低。上相樓臺連御苑。中郎車騎過沙隄。阜雕孤振凌雲翮。紫燕雙翻踏雪蹄。回首上林涼月夜。榮珠多是鳳鸞栖。

詩藪全篇整麗。首尾勻和。

句

卓雕孤振凌雲翮。紫燕雙翻踏雪蹄。詳趙孟頫下

詩藪甘允從云云

項炯

炯字可立。台之臨海人。

吳宮怨

繡楣灑黃紛。椒壁漲紅青。倚簷樹如鬼。深草蛇夜鳴。燭燼已無淚。古恨埋石局。

大雅集。鐵雅評曰。十字僭過牛鬼。燭燼無淚。尤勝無語。

公莫舞

龍蟠錦帳金奕奕。虎旗無際人馬立。肉林垂立陵阜赤。萬壘行酒晴虹濕。大蛇中斷狂魄滅。重瞳無光射寶玦。雷憤風愁三尺鐵。河山未必如瓜裂。老荒捽瑀語公莫。頭上青天懸日月。

大雅集。鐵雅評曰。錦囊子有奇語。無此奇氣。

空井辭

石蘭古蘚青蓮錢。老梧石罅孤根懸。下有一斗琉璃泉。轆轤不鳴修綆斷。蛛網濛濛梧葉乾。

江南弄

篴深雨過月色青。濕螢幾點風穿櫺。秋聲滿江龍一吟。江空漠漠懸疎星。鳳皇城頭石花吐。雷擊老樹蛇骨腥。鬼雄騎鼉潮際上。暗藤如山走漆鐙。

元詩選其古樂府如空井辭江南弄等篇酷似李長吉惜不多傳

胡助

助字古愚一字履信婺州東陽人舉茂才官至太常博士有純白類藁

純白齋類藁純白先生自傳監察御史周公景遠薦江浙士之博學通經能古文宜居館閣者七人首胡石塘徐方谷而先生與焉劉公輔之時爲臺郎贈詩有曰作者七人爾君才十倍加又取莊子漢陰抱甕語自號純白道人

上京紀行詩七首

同呂仲實宿城外早行

我行得良友夜宿建德門晨征帶殘雨華星綴雲陰局轡乘羸馬沿途共笑言兩京隔千重氣候殊寒暄聲利汨清思山川發雄文平生所未到扈蹕敢辭煩愧予雁鵝姿亦復陪鸞鵠歷歷紀瑰偉一見勝百聞茲遊償夙願庶用歸田園

昌平

經過昌平縣實惟劉子鄉當時直言策至今有耿光功名真瑣瑣氣節橫八荒斯人寧復見閱世徒慨慷奉祠表諫議化俗崇賢良賊臣偶同里遺臭亦難忘嚴程懼稽緩古跡嗟莫詳揮鞭事前邁居庸翠蒼蒼

居庸關

居庸古關塞老我今見之天險限南北亂石如城陴朝光暎蒼翠征袖涼颼颼澗谷四十里崖巒爭獻奇

禽鳥鳴相和。草木蔚華滋。佛爐架巖上。疏泉匯清池。民居亦棋布。機磴臨山陲。清幽入行李。緩策遂忘疲。黃屋年年度。深仁育黔黎。從官多名儒。山石徧題詩。伊余備史屬。斐然愧文辭。矧茲中興運。歌誦職所宜。皇靈符厚德。豈曰恃險巇。

懷來道中

百千僦一馬。日行百餘里。未明卽戒途。將至輒中止。人困馬思睡。馬疲徒用箠。驅馳失情性。老病侵髮齒。可憐翰鞅掌。豈知固如是。徑行古關塞。形勢那盡紀。荒落久寧靜。富庶或成市。清晨過懷來。沙草風煙美。想當用武時。滿野控弓矢。白塔遠招人。揮鞭渡流水。

李老谷

人言桑乾北。六月少炎熱。我行李老谷。流汗還病渴。疲馬鞭不進。況復礙車轍。翠巖石幽幽。久晴澗泉竭。牛羊放山椒。穹廬補林缺。投宿山店小。子規啼夜血。南歸空有懷。聞之愧剛決。顧方上灤陽。玉堂看秋月。更闌不成寐。聲聲山竹裂。期是明年春。相聞在吳越。

赤城

山石似丹堊。赤城因得名。土異產靈瑞。永宜奉天明。市廛集商賈。有驛通上京。觸熱此經過。忽看風雨生。平原走潢潦。河流浩新聲。斯須卽開霽。燦爛雲霞橫。

鰲峰

乾坤氣磅礴。山石鍾奇形。鰲峰纔數尺。濯秀何亭亭。勢欲負厚地。岌若霄漢凌。一峰更旁聳。玲瓏穴虛明。

書膚縈白障。微扣宣金聲。中涵太湖潤。瑰偉專上京。想當初盤時。山鬼泣以驚。置之玉堂前。幾閱瀛洲登。年來對閣老。岷峨眼中青。雨漬生古色。月寒見霜稜。摩挲助文思。一揮九制成。諒勿憂豪奪。長茲託佳名。

龍門行

龍門山險馬難越。龍門水深馬難涉。矧當六月雷雨盛。洪流浩蕩漂車轍。我行不敢過其下。引睇雄奇心悸懾。歸途卻喜秋泥乾。颯颯山風吹帽寒。溪流曲折清可鑑。萬丈蒼崖立馬看。

草堂雅集。虞翰林題紀行集云。集仕於朝三十年。以職至上京者凡十數。馳驅之次。亦時有吟諷。不能如吾古愚。往復次舍。所遇輒賦。若是其周悉者也。集老且病。將乞身歸田。竹簟風輕。茅簷日暖。得此卷誦之。能無天上之思耶。卷中龍門後詩尤佳。歐陽玄功亦云。至順庚午十月十八日。虞集題。

滌陽十詠

帝業龍興復古初。穹隆帳幄倚空虛。年年清暑大安閣。巡幸山川太史書。綠蘭青草玉花驄。馴鹿眠遊殿閣東。西梵祝釐環地坐。曠曠日色綵旗風。西清學士草黃麻。閣老承恩扈翠華。昨夜司天臺上望。文奎光燄照龍沙。小西門外草漫漫。白露垂珠午未乾。沙漠崢嶸車馬道。半空秋影鐵旂竿。板屋松煙染素衣。天街暑雨沒青泥。夜來沙磧秋風起。鳴鏑雲閒白雁低。御天門前開詔書。驛馬如飛到大都。九州四海服訓誥。萬年天子固皇圖。

斗北高寒無點暑。舉頭止見七星文。玉堂近與琳宮接。清夜步虛聲盡聞。朝來雨過黑山雲。百眼泉生水草新。長夏蚊蠅俱掃迹。葡萄馬湩醉南人。萬騎櫜韃列旆旌。周廬嚴肅駕將興。帳前月色如霜白。曉汲灤河窟裏冰。玉堂視草屋三間。盡月鼇峯相對閒。身遇太平鈴索靜。題名篆畢又南還。

草堂雅集。右灤京十詠。古愚親寫以寄。雖已刊於上京紀行集中。人不多見。今再附於此。以見皇元典章文物之盛事云。

上京紀行見玉泉山下荷花

西山咫尺玉泉清。無數藕花香氣生。立馬岸邊看不足。卻疑五月過臨平。

榆林

倦客出關仍畏暑。居庸回首暮雲深。清山環合勢雄抱。不見舊時榆樹林。

槍竿嶺二首

九折盤紆過客愁。適當載筆扈宸游。長年見說槍竿嶺。今日身親到上頭。下馬徐徐陟澗岡。山風微動十分涼。桑乾嶺上一回首。何處雲飛是故鄉。

再賦李老谷

李老谷中聞杜鵑。江南游子不歸田。利名引得滔滔去。竟渡灤河朝日邊。

過桓州

陰雲慘淡滿天秋。馬上龍鍾擁毳裘。漸近灤京涼又別。斜風細雨過桓州。

題望都舖

坡陀散漫草茸茸。地接烏桓古塞風。仰止神京三十里。樓臺縹緲碧雲中。

偶題

頭上陰雲如潑墨。堦前白雨似跳珠。秋來日日風雷作。併入灤陽八景圖。

宿牛羣頭

蕎麥花開草木枯。沙頭雨過苗磨菇。牧童拾得滿筐子。賣與行人供晚廚。

御花園

朱扉金鎖綠如雲。雨露恩光草木新。若識九重臨幸意。花時人世一般春。

純白齋類藁附錄呂思誠跋上京紀行詩。國家肇迹龍居河。而都和林。世皇追今將百年。扈從文臣不知幾何人。余欲合中統至元。及古愚後諸作。爲觀風者之一助云。王士熙題後。大章雍容。小章深雅。陳旅跋。五十首清妥秀潤。興寄閒適。無急調。無蹇詞。真盛世良作也。柳貫跋。昔予再遊灤陽。嘗隨景成詠。不能如古愚多且奇也。吳師道跋。吾東陽柳博士道傳。黃應奉晉卿。今胡編修古愚。皆有紀行之作。前後輝映。一鄉而得三人焉。吁。亦盛矣。

隱趣園八詠

君子池

池上藕花開。香從太極來。亭亭清淨觀。君子日徘徊。

待月壇

天遠雲歸早。山高月上遲。夜坐發孤詠。秋風生桂枝。

蜀錦屏

濯錦爲屏障。紅妝擁萬妃。試看春睡足。何羨買臣歸。

天香臺

三月韶華盛。名花傾國人。何期真率會。同賞洛陽春。

香雪壁

醱醺春意好。百尺走條枚。壁立堆香雪。風流入酒盃。

晚香徑

彭澤歸來後。東籬菊正黃。秋光無限興。晚節有餘香。

竹澗亭

竹遶茅亭外。泉流石澗中。一天秋月夜。千載隱君風。

歲寒亭

松竹如佳士。梅花更典刑。歲寒千古意。笑指鹿峯青。

蘇天爵題後。太常胡先生歸老東陽。有山林深邃之居。有圖書諷詠之樂。有子孫以具甘旨。有田

園以供伏臘。又值國家承平之世。優游以養高年。蓋亦福德之君子哉。

雅琥

琥字正卿。可溫人。登天歷第。初名雅古。文宗御筆改爲雅琥。官至廣西靜江府同知。

御溝流葉圖

彩毫將恨付霜紅。恨自綿綿水自東。金屋有關防虎豹。玉書無路託鱗鴻。秋期暗度驚催織。春信潛通誤守宮。莫道人間音問杳。明年錦樹又西風。

歸田詩話。雅正卿有四美人圖詩。惟御溝流葉最佳。

句

梅花路近偏逢雪。桃葉波平好渡江。一聲鐵笛千家月。十幅蒲帆萬里風。

詩藪。雅正卿云云。

楊瑀

瑀字元誠。錢塘人。天歷間召見奎章閣。官至建德路總管。

山居新話。元統間。余爲奎章閣屬官。題所寓春帖曰。光依東壁圖書府。心在西湖山水間。時余畧山爲江浙儒學提舉。寫春帖付男垌。寘於山居。則曰。官居東壁圖書府。家住西湖山水間。偶爾相符。亦可喜也。

壽松記碑本

舉世紛紛名利間。達生輕祿古今難。天生瑞兆爲君壽。寄我山中作畫看。

山居新話。至正七年。社稷署太祝張從善。都城巨室也。方四十卽致仕。嘗預營壽室。解石板爲室。門石中忽有紋成松石。雖繪畫者不如也。觀者填門。因以爲碑。而寘墳牆之中。翰林學士歐陽元。侍講學士揭傒斯。亦爲壽松記。刻石以表瑞。後附致碑本。示余求詩。漫以一絕賦之云云。

靜安八詠

陳桢

殿前雙檜鬱龍蛇。翠雨溟濛鎖綠霞。不逐後庭花片落。托根卻在梵王家。

靜安八詠。鐵崖評曰。可見此老志節。豈與紛紛者同日而語哉。

蘆子渡

路入西風十里秋。月明飛雪下汀洲。關山著處皆戎馬。容得山人不繫舟。

鐵崖評曰。此詩頗有興趣。亦佳。

赫德爾

赫德爾。字本初。□□人。官江浙參政。

句

水泝顛崖流自轉。山移絕塞勢尤雄。

山語新話。江浙參政赫德爾公。字本初。嘗云。向任留守司都事。時本司諸先輩。同談內苑萬歲山。

太液池。本非我朝剏建。乃亡金之沼囿也。初。聖朝起朔庭絕塞。有一土山。形勢雄壯。峰巒秀異。金人望氣者言。此山有王氣。當出異人。非金之利。謀欲傾圯之。計無從出。時金已衰微。因通好。託以入貢爲辭。願求此山之土爲報。衆皆鄙笑而許之。金人遂掘其山。自備車馬挽載。運至幽州城北。積累成山。開挑海子。栽植花木。營構臺殿。以爲游幸之所。未幾。金亡。世祖皇帝登大寶。改築京城。山適在禁苑之中。至今塞土遺迹尙存。其土赤潤。草木不生。乃知帝王之宅。都會之京。興衰之兆。天已默定。豈人力之所能爲也。公因和萬歲山詩韻云云。史冊必載之詳。姑錄其略。

林泉生

泉生。字清源。泉之永福人。天歷間。登進士第。官至翰林直學士。有覺是集。

弔岳王墓

誰收將骨葬西湖。已卜他年必沼吳。孤冢有人來下馬。六陵無樹可棲烏。廟堂短計慚嫠婦。宇宙惟公是丈夫。往事重觀如敗局。一龕燈火屬浮屠。

輟耕錄。最膾炙人口者。如高則誠。潘子素。林泉生云云。

何正

正。字守中。分水人。至順間。應薦。授山長。轉寧都下河巡檢。棄官。號雲壑道人。

春草

春來無處不芳菲。色透湘簾好染衣。南浦暝煙鳬鳥沒。曲江寒雨鷓鴣飛。高人有意憐新綠。游子無心戀

舊歸。淮海年年空入望。六朝王業竟成非。

月

宴罷瑤臺出禁遲。玉輪飛上已多時。一天星斗光芒後。萬里銀河影漸移。素女夜寒初倦舞。嫦娥秋老正含悲。黃沙磧裏涼如水。人在青樓有所思。

浙江通志。初被薦時。試以春草月詩二首。人爭傳之。

黃鎮成

鎮成字元鎮。邵武人。至順間。屢薦不就。後政府奏授江西儒學副提舉。

句

王孫不歸怨芳草。山鬼欲啼牽女蘿。鐵檄召雷秋雨足。瑤壇謁帝夜雲高。游山採藥辭家早。掃石看雲出洞遲。青山盡處海門闊。紅日上來天宇低。花竹一家巢絕頂。煙塵九點認齊州。潮來估客船歸市。月上人家水浸空。

筆精。元季詞人輩出。而邵武有黃鎮成。詩多奇警。秋聲集十卷。佳句疊出。如云云。惜梨棗朽腐。尠有觀其全篇者。

陳楚春

楚春字若雷。臨武人。

句

紅日馬頭天已近。青雲雁背雨初晴。

萬歷湖廣總志。授長沙天臨路教授。庚申帝幼年。遠貶南服。至道州。春爲詩上之。有云云之句。庚申喜而諭之曰。此等老先生。宜大用之。乃居此職。及北還登極。以春充扈從官。至京。命題神州八景稱旨。遂擢拜湖南道廉訪使。不拜。以疾乞歸。

元詩紀事卷十八

迺賢

迺賢字易之。本葛邏祿氏。譯言馬也。南陽人。薦授翰林編修官。有金臺集。

王忠文公集。河朔訪古記二卷。合魯君易之所纂。予爲之序曰。合魯實葛邏祿。本西域名國。而易之之先。由南陽遷浙東。易之少力學。工爲文辭。既壯。肆志遠游。乃絕淮入潁。經陳蔡以抵南陽。由南陽浮臨汝而西。至於洛陽。由洛陽過龍門。還許昌。而至於大梁。歷鄭衛趙魏中山之郊。而北達於幽燕。於是大河南北。古今帝王之都邑。足跡幾徧。凡河山城郭。宮室塔廟陵墓。殘碣斷碑。故基遺跡。所至必低徊訪問。或案諸圖牒。或訊諸父老。考其盛衰興廢之故。而見之於紀載。至於撫時觸物。悲喜感慨之意。則一皆形之於詠歌。既乃哀其所記載。及詠歌之什。以成此書。

潁州老翁歌

潁州老翁病且羸。蕭蕭短髮秋霜垂。手扶枯筇行復卻。探瓢勺食河之湄。我哀其貧爲顧問。欲語哽咽吞聲悲。自言城東昔大戶。腴田十頃桑陰圍。闔門老稚三百指。衣食儘足常懸錐。一作熙熙河南年來數亢旱。赤地千里黃塵飛。麥禾槁死粟不熟。長鑱挂壁犁生衣。黃堂太守足宴寢。鞭扑百姓窮膏脂。聒天絲竹夜酣飲。陽陽不問民嗟飢。市中斗粟償十千。饑人煮蕨供晨炊。木皮剝盡草根死。妻子相對愁雙眉。鵲形累累口生箴。櫛割餓莩無完肌。姦民乘隙作大盜。腰弓跨馬紛驅馳。嘯呼深林聚兇惡。狎弄劍槊搖旌旗。

去年三月入州治。踞坐堂上如熊羆。長官邀迎吏再拜。餽送牛酒羅階墀。城中豪家盡剽掠。況在邨落人煙稀。裂囊剖篋取金帛。煮雞殺狗施鞭笞。今年灾虐及陳穎。疫毒四起民流離。連邨比屋相枕藉。縱有藥石難扶治。一家十口不三日。藁束席卷埋荒陂。死生誰復顧骨肉。性命喘息懸毫釐。大孫十歲賣五千。小孫三歲投清漪。至今平政橋下水。觸骸白骨如山崖。繡衣使者肅風紀。下車訪察民瘡痍。綠章陳辭達九陛。徹樂減膳心憂危。朝堂雜議會元老。恤荒討賊勞深機。山東建節開大府。便宜斬磔揚天威。親軍四出賊奔潰。渠魁梟首乾坤夷。拜官納粟循舊典。戰士踴躍皆歡怡。淮南私廩久紅腐。轉輸豈惜千金資。遣官巡行勤撫慰。賑粟給幣蘇民疲。獲存衰朽見今日。病骨尙爾難撐持。嚮非聖人念赤子。填委溝壑應無疑。老翁仰天淚如雨。我亦感激愁歔歔。安得四海康且阜。五風十雨斯應期。長官廉平縣令好。生民擊壤歌清時。願言觀風采詩者。慎勿廢我潁州老翁哀苦辭。

金臺集狀物寫景之工。固詩家之極致。而繫於風化。補於政治。尤作者之至言。易之此詩。兼得之矣。禮部侍郎汝陰李黼子威書。易之此詩。格調則宗韓吏部。性情則同元道州。必有能知之者。監察御史太僕危素書。至正四年。河南北大饑。明年又疫。民之死者過半。期廷嘗議鬻爵以賑之。江淮富人應命者衆。凡得鈔十餘萬定。粟稱是。會夏小稔。賑事遂已。然民罹大困。田萊盡荒。蒿蓬沒人。狐兔之跡滿道。時余爲御史。行河之南。請以富人所入錢粟。貸民具牛種以耕。豐年則收其本。不報。覽易之之詩。追憶往事。爲之惻然。八年三月。翰林待制武威余闕志。

三月京城寒悄悄。燕子初來怯清曉。河隄柳弱冰未消。牆角杏花紅萼小。主家簾幕重重垂。銜芹卻向一作傍檐間飛。托巢未穩井桐一作梧墜。翩翩又向天南歸。君不見舊時王謝多樓閣。青瑣無塵卷珠箔。海棠花外春雨晴。芙蓉葉上秋霜薄。

金臺集自注。京城燕子三月盡方至。甫立秋卽去。有感而作。

巢湖述懷寄四明張子益

憶昔移家東海上。萬斛龍驤跨鯨浪。三神宮闕渺何許。弱水茫茫空悵望。前年去作燕山遊。羸驂短褐風颼颼。昭王臺前月似水。荆卿驛畔天如秋。病骨苦寒情苦倦。南下瀆河疾於箭。清晨雙櫓發呂梁。黃昏已泊桃源縣。生來每歎蜀道難。去年我亦登蒼山。馮公嶺頭日不到。肩輿履雪梯孱顏。僕夫緣崖如凍蟻。下類鰲山深澗底。人家半出松樹頂。白雲卻向山腰起。今年四月江西歸。小姑正對彭郎磯。三更掛帆海門過。一川草樹浮晴暉。我生胡爲自役役。孟浪江湖竟何益。清霜鏡底縈鬢絲。坐對篝燈空嘆息。愁來鬱鬱不可當。結交賴有張家郎。臨風同歌紫芝曲。掃石大醉黃金觴。我家南陽天萬里。十年不歸似江水。秋來忽作故鄉思。裹劍囊衣渡揚子。玩鞭亭下江縈紆。淮山楚樹青扶疎。一帆西風出巢縣。眼明墮此清冰壺。湖水漫漫接天杪。天底更覺青山小。倦飛沙鳥戛漁艇。倒影芙蓉涵碧藻。涼波不動舟如飛。櫓歌窅窅聲相隨。江東雲樹轉頭失。淮西山水尤清奇。故人江南不可見。千里相思情眷戀。門外梅花知未發。屋頭柿葉題應徧。期君不來爭奈何。青天落日搖滄波。明年歸來賀山下。與君共讀巢湖歌。

金臺集。易之詩中所歷之景。予皆嘗過之。所未至者巢湖耳。易之有此清雄俊拔之句。予無一語

者人各有能有不能也。太常博士危素書。

新鄉媼

蓬頭赤腳新鄉媼。青裙百結邨中老。日間炊黍餉夫耕。夜紡棉花到天曉。棉花織布供軍錢。借人輾穀輸公田。縣裏公人要供給。布衫剝去遭笞鞭。兩兒不歸又三月。祇愁凍餓衣裳裂。大兒運木起官府。小兒擔土填河決。茅櫚雨雪燈半昏。豪家索債頻敲門。囊中無錢甕無粟。眼前只有扶牀孫。明朝領孫入城賣。可憐索價傍人怪。骨肉分離豈足論。且圖償卻門前債。數來三日當大年。阿婆墳上無紙錢。涼漿澆溼墳前草。低頭痛哭聲連天。恨聲不作三韓女。車載金珠爭奪取。銀鐙燒酒玉杯飲。絲竹高堂夜歌舞。黃金絡臂珠滿頭。翠雲繡出鴛鴦稠。醉呼閹奴解羅慢。牀前熬火添香篝。

金臺集右新鄉媼一首。余同年塢海仲良宣慰君之仲氏。迺賢易之所作也。其詞質而婉。豐而不浮。其旨蓋將歸於諷諫云爾。昔唐白居易爲樂府百餘篇。以規諷時政。流聞禁中。卽日擢爲翰林學士。易之他詩。若西曹郎。潁州老翁等篇。其關於政治。視居易可以無媿。而藻繪之工。殆過之矣。況今天子聖明。求言之誥。播在天下。當此之時。易之之詩。或經乙夜之覽。則其眷遇又豈下於居易哉。故余三復之餘。謹識其後。以俟南臺中執法。濮陽蓋苗耘夫。書於京師寓舍。

金臺集楊彝跋。余謂易之之詩。如潁州老翁。西曹郎。巢湖新鄉媼。新隄等篇。撫事感懷。若不經意。而盡所欲言。有得於風人之旨者。當不謝於古人。況其所工者。復不下是。茲固可信其必傳也。

三峯山歌并序

鈞州陽翟縣南有山曰三峯。昔我睿宗在邸，嘗統兵伐金，與其三將完顏合達、移刺蒲兀、完顏斜烈等，鏖戰山下，敗其軍三十萬，而金亡矣。今百餘年，樵牧往往于沙磧中，得斷稍遺鏃印章之類。至正五年嘉平第二日，予自鄰城將上京師，道出陽翟，夜宿中書郎郭君彥通私館，感父老之言，而作歌曰：

落日慘淡黃雲低，懸崖古樹攢幽溪。三峯山頭獨長嘯，立馬四顧風淒淒。溝邊老翁行偃偻，勸我停驂爲君語。山前今日耕種場，誰識當年戰爭苦。金源昔在貞祐間，邊塵四起民彫殘。燕京旣失汴京破，區區恃此爲河山。大元太子神且武，萬里長驅若風雨。鏖兵大雪三將死，流血成河骨成堵。朱鸞應瑞黃河清，金將亡，新鄉河清，鼓山鳳出，應國朝開基之兆。聖人啓運乾坤寧，當時流離別鄉井，歸來白髮歌承平。曠野天寒霜藪藪，夜靜愁聞山鬼哭。至今壘上牧羊兒，猶向草根尋斷鏃。論功衛霍名先收，黃金鑄印身封侯。英雄半死鋒鏑下，何爲酌酒澆荒丘。

金臺集余比修國史，睹三峯之役，金師三十五萬來拒戰，我師不敵，軍於山之金溝，其軍數重圍三峯，而中夜大雪，金人戈戟弓矢凍纏，莫能施。我師一鼓殲之，自是金人膽落，不復戰矣。易之作歌辭，豪健激昂，而奕奕有思致，殆與三峯長雄置之樂府，饒歌開揚厲無前之盛績，良無媿也。晉寧張翥題。

汝水

騎馬涉秋水，泠泠戰骨聲。寒沙沈斷戟，殺氣暗殘營。自欲全忠義，誰能顧死生。千年董狐筆，端不愧田橫。

金臺集自注。天兵與宋合攻蔡州。城既破。金右丞完顏仲德率將士六百人突圍遁至汝水。回顧城中煙焰張天。仲德下馬謂將士曰。國已亡。余居宗室。且備位宰相。義固當死。諸公宜早降。諸將大譟曰。相公能死。吾輩獨不能死耶。六百人皆奮然赴汝水以死。

塞上曲

雙鬟小女玉娟娟。自卷氈簾出帳前。忽見一枝長十八。折來簪在帽簷邊。

金臺集原注。長十八。草花名。

南城咏古十六首并序

至正十一年八月既望。太史宇文公。太常危公。偕燕人梁處士九思。臨川黃君殷士。四明道士王虛齋。新進士朱夢炎。與余凡七人。聯轡出遊燕城。覽故宮之遺跡。凡其城中塏廟樓觀。臺榭園亭。莫不徘徊瞻眺。拭其殘碑斷柱。爲之一讀。指廢興而論之。余七人者。以爲人生出處聚散。不可常也。解后一日之樂。有足惜者。豈獨感慨陳迹而已哉。各賦詩十有六首。以紀其事。庶來者有所徵焉。河朔外史迺賢序。

黃金臺

落日燕城下。高臺草樹秋。千金何足惜。一士固難求。滄海誰青眼。空山盡白頭。還憐易河水。今古只東流。

金臺集自注。大悲閣東南。隗臺坊內。

憫忠閣

高閣秋天近。金仙寶珞齊。青山排闥見。紫氣隔城迷。朱戟浮雲濕。瑇瑁檐落照低。因懷百戰士。惆悵立層梯。
自注。唐太宗憫征遼士卒陣亡而建。

壽安殿

夢斷朝元閣。來尋賣酒樓。野花迷輦路。落葉滿宮溝。風雨青城莫。河山紫塞愁。老人頭雪白。扶杖話幽州。
自注。殿基今爲酒家壽安樓。

聖安寺

蘭若城幽處。聯鑣八月來。寶華幢蓋合。袞冕畫圖開。斷碣蒼苔暗。空庭落葉堆。飢鶩不避客。攫食下生臺。
自注。寺有金世宗章宗二朝象。

大悲閣

開道連天起。丹青飾井幹。如何千手眼。只著一衣冠。金榜文龍挾。瑠瑁吻獸攢。憑高天萬里。白紵不勝寒。
自注。閣榜虞世南書。

鐵牛廟

燕人重東作。鎔鐵象牛形。角斷苔花碧。蹄穿土鏽腥。遺蹤傳野老。古廟託山靈。一酌壺中酒。穰穰黍麥青。

雲仙臺

臺殿青冥外。團團海月涼。隔簾聞鳳管。秉燭奏一作按霓裳。銅雀晨霞眩。金盤夕露漙。仙人不復返。愁殺海生桑。

自注。今之望月臺。

長春宮

羸驂踟秋日。一作水迢遞謁琳宮。松子花飄落。溪流板閣通。樓臺非下土。環珮憶高風。草昧艱難日。神仙第一功。

自注。全真丘神仙處機之居。太祖常召至西域之雪山誦道。屢勸上以不殺。

竹林寺

城南天尺五。祇樹給孤園。甲第王侯去。精藍帝釋尊。老僧誇塔影。稚子斲松根。何日天台路。相從一問源。

自注。金熙宗駙馬宮也。寺僧云。一塔無影。

龍頭觀

仙館紅塵外。龍頭得借看。開函雲氣溼。近席雨聲寒。碧血凝螺黛。香涎逼麝檀。牙籤認題字。猶是建隆刊。

自注。龍頭懸三牙籤。刻曰建隆元年。

妝臺

廢苑鴛花盡。荒臺燕麥生。韶華如逝水。粉黛憶傾城。野菊金釵小。秋潭石鏡清。誰憐舊時月。曾向日邊明。

自注。李妃所築。今在昭明觀後。妃常與章宗露坐上。曰。二人臺上坐。妃應聲曰。一月日邊明。上大悅。

雙塔

安史開元日。千金構塔基。世尊寧妄福。天道自無私。寶鐸游絲霄。銅輪碧蘚滋。停驂指遺跡。含憤立多時。
自注。安祿山。史思明所建。在憫忠寺前。

西華潭

秋水清無底。涼風起綠波。錦帆非昨夢。玉樹憶清歌。帝子吹笙絕。漁郎把釣多。磯頭浣紗女。猶恐是宮娥。
自注。金之太液池。

白馬廟

祠宇當城角。霜蹠刻畫真。房星何日墜。駿骨自能神。曾蹴陰山雪。思清瀚海塵。長疑化龍去。騰蹋上雲津。
萬壽寺

皇唐開寶構。歷劫抵金時。絕妙青松障。清涼白玉池。長廊秋屨響。高閣夜鐘遲。獨有乘閑客。扶藜讀舊碑。
自注。寺有許道寧畫屏。

玉虛宮

樓觀迴深巷。松枝夾路低。拾薪供早爨。抱甕灌春畦。經向琅函讀。詩從古鼎題。白鬚張道士。送客過桃溪。
自注。太道教以供薪水之勞。爲其張本。宮主張真人。其貌甚清古。

題汪水雲詩後

三月錢塘海不波。子嬰繫組納山河。兵臨魯國猶弦誦。客過商墟獨嘯歌。鐵馬渡江功赫奕。銅人辭漢淚滂沱。知章喜得黃冠賜。野水閒雲一釣簑。

歸田詩話。元量有詩一帙。皆敘亡宋事。可備野史。元馬易之題其帙後云云。

余闕

闕字廷心。唐兀氏。世居武威。父官合肥。徙家焉。登元統癸酉進士第。官至淮南行省左丞。陳友諒來攻城陷死之。諡忠宣。有青陽集。

戴九靈集。論者謂馬公之詩似商隱。薩公之詩似長吉。而余公之詩。則與陰鏗何遜。齊驅而並駕。案馬。馬祖常。薩。薩都刺。

八月十五夜處州分司對月

玄武夕始正。華月升秋旻。徘徊出西陸。照曜此甌閩。金波何穆穆。綠枝滿中輪。餘輝動軒房。紫闌含微津。皇天降豐歲。王政亦已陳。樂哉一杯酒。允矣同庶人。

草木子。浙東僉憲余闕。案吾郡時。中秋夜望月。嘗作一詩。題於分司官舍云云。此詞清婉。藹然有與民同樂之意。後爲淮西宣慰。守安慶孤城六年。上下援絕。淮寇益熾。城遂陷。府前有大池。自刎死於池。妻子亦同死。贈淮南行省右丞。進平章事。諡文貞公。

案青陽集。首韻升作生。次韻乃金波云云。枝作桂。三韻乃徘徊云云。四韻光流河宿隱。氣隨商律振。草木子無餘均同。惟豐作嘉。杯作卮。

句

野人籬落通潛口。賈客帆檣出漢陽。詳趙孟頫下

李祁

祁字一初，號希遠，茶陵州人。登元統元年進士第，官至浙江儒學副提舉。有《雲陽集》。

昭君出塞圖

朔風吹沙天冥冥，愁雲壓塞邊風腥。胡兒執麾背人立，傳道單于令行急。蒙茸胡帽貂鼠裘，誰信宮袍淚痕濕。漢家恩深幸不早，此身終向胡中老。此身儻負漢宮恩，殺盡青原上草。

懷麓堂集族高祖希遠先生當元季之亂慨然欲效一障以死而不可得又以爲委質事人不可終負蓋見諸明妃詩及青陽集序自以不得如廷心爲恨也

和王子讓

老淚縱橫憶舊京，夢中歧路欠分明。天涯自信甘流落，海內誰堪托死生。短策未容還故里，片帆直欲駕滄瀛。他年便作芙蓉主，慚愧當時石曼卿。

句

諸葛有才終復漢，管寧無計漫依遼。

麓堂詩話族祖雲陽先生以詩名其和王子讓云云此洪武初寓永新時作也他詩如云云皆清激悲壯可詠可歌元詩體要乃獨取五言二絕蓋未見其全集也

題畫二絕

浩浩滄波天四圍，秋風一鶴夜來歸。祇應夢裏聞長笛，知是年時舊羽衣。

町畦高下水漫漫。痛惜辛勤學種田。便擬明朝精長網。與翁同住浙江邊。

雲陽集跋。右絕詩二章。茶陵李先生墨迹。先生退隱永新山中。絕意仕進。二絕必其與同志者。否則寓言耳。前以鶴歸爲況。後以耕漁爲事。其高尚貞一之概。確然有不可拔者。於是乎概見矣。後學安成彭華識。

奉題朱澤民先生畫山水圖

洞庭之南湘水東。青山奕奕蟠蒼龍。雲陽峰高七十一。欲與衡岳爭爲雄。我家近在雲陽下。來往看山如看畫。十年塵土走西風。每憶雲陽動悲咤。吳中勝士朱隱君。筆精墨妙天下聞。畫圖畫出湘江水。青山上有雲陽雲。雲陽山高湘水綠。十年不見勞心目。只今看畫似看山。萬里歸情寄鴻鶴。

長洲吳寬跋。崑山許氏藏元人墨跡數紙。中有茶陵李公一初題朱澤民山水詩一首。公爲賓之學士之族高祖。爲乞而歸之賓之。賓之遂加裱飾。俾予書其所來。宏治戊申冬十月。長洲吳寬書。晉陵陸簡跋。賓之學士得其先世一初提舉手墨一紙於原博所。意謂安得朱畫以成二美。予時偶收此幅。遂以歸之。裝潢爲一。俾識所自。夫詩圖淪落海內百餘年。復還其嗣人之手。亦奇矣。澤民亦嘗爲儒學提舉。今詩稱隱君。當是未仕時筆。公隱永新山中三十年。而詩有風塵之歎。豈其供奉翰林。及出爲提舉時耶。公著有希遠集。惜此詩散逸不收。

五世諸孫東陽跋。希遠府君題朱澤民山水畫長句真蹟。有姓名及字印各一。而無畫。許翀鴻高所藏鉅卷。皆元諸賢詩翰。此其一也。原博先生見而說之曰。此在汝卷。不過三十之一。無不爲闕。

在其子孫。則千金之寶也。子何惜三十之一。以爲千金之饋乎。他日以諾告。且曰。爲我作海月菴記。即可致矣。記成而詩果至。又數日。陸先生廉伯。以澤民畫一軸爲贈。上有空楮。取其詩校之。不爽分寸。卽標於其上。觀者不能辨爲二物。雖府君有靈。不能不爲慨然。況爲之子孫者哉。

歸來軒

忙處愛山看不當。歸來結屋長相向。就中編作歸來軒。田園正欠陶元亮。竹籬茅舍村數家。藜杖芒鞋時一訪。紅塵不比晉宋閒。清風自是羲皇上。夢回枕簟書有聲。客來午篆微煙障。綠陰入戶如有約。白雲出谷遙相望。邈知今日始有歸。始信從前心是放。更容老子二十年。從教白髮三千丈。

雲陽集諸孫東陽記族祖一初先生至正壬辰兵變流落江南弗克寧家洪武元年歸來賦此。

王禮

禮字子讓。

句

當戶雨苔雙石峻。隔江煙樹數峯間。杖藜麥壟秋霜後。樽酒茅堂夕照閒。閒有古書人不見。柴門客去又常關。

麟原集。劉定之序。昔元盛際。專假科舉抑南士。南士多伏處。用詩文自寫。至是與子讓希邈山立。輩往還邱壑。山立有詩題子讓所居者。予已首聯其下云云。觀是子讓甘寂淡。樂幽僻。託耕鑿以棲迹於運去物改之餘。依麴蘖以逃名於頭童齒豁之際。無求於今。有期於古。可見也。

宇文公諒

公諒字子貞京兆人元統元年登第官至嶺南廉訪司僉事

西湖竹枝詞

蘇小門前騎馬過相逢白髮老宮娥自言記得前朝事只說當年賈八哥

西湖竹枝集詩文尙理趣歌是詩者知其人矣

案純節先生集此詩作湖裏菱青日日多蘇小門前無客過今來古往只如此休說當年賈八哥

蔡廷秀

廷秀字君美松江人官袁州推官斬寇起被執死之

句

旌旗小小將軍隊行李蕭蕭郎罷船一水白隨鷗鷺去萬山青逐虎龍眠

梧溪集尤好詩送閩人之巡檢云云袁州宜春臺云云至今傳誦

李介石

介石字守道丹邱人授松江府提控按牘從守鎮江鎮江失守不屈死

西湖竹枝詞

春暉堂上挽郎衣別郎問郎何處歸黃金臺高倘回首南高峯頂白雲飛

西湖竹枝集好學工詩有志於儒者也竹枝一詞不以私語而託以愛親之意亦足裨風教云

樊執敬

執敬字時中。鄆城人。至正間。官至浙江行省參知政事。賊犯餘杭。戰死。追封魯國公。七修類稿。徐壽輝自徽犯浙西。公禦賊於天水橋。巷戰死。其妻與子溺於西湖。杭人立祠祭焉。楊鐵崖爲文紀之。

觀潮題樟亭

煙波閃閃海門開。平地潛生萬壑雷。大信不虧天不老。浙江亭上看潮來。

霏雪錄。樊公時中爲浙江參政。觀潮。嘗題詩樟亭云云。公之志可見矣。至正壬辰。紅巾賊亂。公張弓抽矢。馳射於其間。賊應弦而斃者甚衆。自卯至申。公矢盡。竟死之。

石抹宜孫

宜孫字申之。其先遼之迪烈紮人。官至江浙行省參知政事。亂起。被害於處州。諡忠敏。

妙成觀掀篷和何宗姚韻

結構新亭似勝前。登臨歷歷瞰晴川。放懷喜解防秋戍。乘興還操下瀨船。從此入林堪避地。何妨坐井亦觀天。東風回首春城暮。桃李依然種日邊。

元詩癸集在處州時。用劉基胡深葉琛章溢諸人居幕府。自引諸名士。投壺賦詩。嘗構掀篷于妙成觀。何宗姚首唱。一時和者數十人。

黃復圭

復圭字君瑞安仁人至正兵起陷賊作詩大罵被害

句

隱士高閒臥雲處故家軒豁讀書齋
冉冉霜顛倚門處飄飄風袂及家時
菡萏泉香金錯落芡芻風煖翠婆娑

元詩選如題詹雙崖云云題唐氏遊子遠歸圖云云題古厓上人云云鐵心石腸人偏解吐婉媚辭也

魯至道

至道字□□□□人至正間任潭州路總管

挽樊時中參政

主將無謀拂衆情賢參有志惜言輕
狐羣衝突成妖孽黔首驚惶望太平
舊志從軍全節義殺身殉國顯忠誠
歲寒橋下清冷水夜夜空聞哽咽聲

挽寶哥參政

香魂俊骨墜深淵無智無謀亦可憐
妖寇猖狂如有祟生民凋瘵似無天
芳名苟得千年在死節應當二日先
欲向西湖酌尊酒淒風冷雨浪無邊

山居新話至正十二年壬辰七月初十日徽賊入寇杭城樊時中執敬爲浙省參政亟出禦賊北行至歲寒橋遇害先浙省以杭州路總管寶哥惟賢攝參政調守禦崑山之太倉領軍而往駐於

崑山舊州山寺。離太倉州治三十餘里。終於不往。聞寇至。遂遁匿於杭之寓舍。適值賊破杭。乃挈家潛於西湖舟中。越三日。鄰居無賴之徒。利其所將。恐之。遂與次妻口氏。連結其衣袂。溺水而死。時潭州路總管魯至道。作二詩挽之。以寓褒貶之意。

陳柏

柏字新甫。號雲嶠。泗州人。嘗爲侍儀舍人。後官至太祝。

輟耕錄。陳雲嶠。性豪宕。結客。嘗被命監鑄祭器於杭。無錫倪元鎮慕其名。來見之。張宴湖山間。羅設甚至。酒終爲別。以一帖餽米百石。柏命從者移置近所。舉觥引妓樂。騁從者而前。悉分散之。顧倪曰。吾在京時。卽熟爾名。云南士之清者。他無與比。其所以章章者。蓋以米沽之也。請從今日絕交。時張伯雨在坐。不勝踴躍。其豪氣類如此。

山居新話。陳雲嶠。陳平章之孫也。偶儻不羈。人以陳頗稱之。後至元五年。爲餘姚州同知。因病求醫於杭。稍愈。值重陽日。遂邀張伯雨及余同登高。時雲嶠寓赤山李叔固丞相先塋。余二人往焉。乃扶杖游水樂洞。憩石屋寺前。露坐閒談。雲嶠因自言曰。我前身僧也。泗州塔寺有住持者。皆名之爲老佛。齋戒精嚴。一日呼侍者。令作血臍羹。欲食之。侍者曰。老佛一世持齋。何故有此想。乃不從。遂怒之。拂袖而去。見陳平章曰。我特來索血臍羹喫。平章亦以齋戒爲答。佛曰。元來你也是不了事漢。平章遂作此羹噉之。卽歸寺。乃別大衆而作偈曰。撞開平屋三層土。踏破長淮一片冰。遂跌坐而逝。茶毗之日。昇其龕至淮河岸。冰合已久。舉火之次。忽大響一聲。則河冰自裂。時平章在

府中見老佛入於堂。問之。則後堂報生一子。卽某也。言畢。回飲於寓所而散。明日伯雨送登高詩。而頸聯有百年身付黃花酒。萬壑松如赤腳冰之句。余和韻云。方外弟兄存晚節。人間富貴似春冰。雲嶠曰。我無冰字。且只以長淮一片冰答之。不數日。雲嶠告殂。豈非說破話頭而致然也。

雪中騎牛拜米南宮墓

少年不解事。買駿輕千金。何如小黃犢。踏雪空山深。小小雙牧童。吹笛穿松林。醉拜南宮墓。地下有知音。輟耕錄。嘗雪中騎牛拜米南宮墓詩云云。言世上無知音也。平日喜居錢塘。好古有餘。而治才不足。又不樂小官。怒罵宰相。年逾六十。不得志而死。其畢命時作偈云。前身本是泗州僧。

方瀾

瀾字叔淵。莆陽人。後至元時布衣。

句

以詩爲佛事。隨地學山居。煖容時借酒。寒力曉欺綿。萬事集雙髻。百年堪幾愁。江流拍岸闊。海氣入城涼。疎鐘出煙寺。新月入人家。

蘭陔詩話。叔淵流寓吳門。授徒自給。少年不娶。人比之林和靖。其集中如詠樂天云云。臨平道中云云。夜雨云云。錢塘紀事云云。秋夕云云。皆佳句。

濮彥仁

彥仁字仲溫。桐鄉人。至元中官吳中。棄職歸。

句

丈人夜開關。涼月在松頂。

桐溪詩述。關松月寮。以爲吟嘯之所。有云云之句。遂以松月道人自號。楊維禎爲之記。

朱守諒

秋夜偶成錄一

兩園江水薄城闔。地僻民稀俗化醇。暫止熊羆消大暑。秋深雲合殄妖氛。

湖南通志詩云。近因洞賊作耗。奉命分省剿捕。自辰沅東下至黔陽。時維大暑。軍卒疫痢。故暫憩是邑。秋夜偶成七言六絕。以俟同志諸君一笑云。至正八年歲次戊子。秋七月中旬。朝散大夫湖廣等處行中書省左右司員外郎朱守諒題。右刻正書念三行。在黔陽縣學。

黃德廣

德廣字口口。鄞人。

扇上詩

東風一曲浣溪紗。客子行吟對日斜。猶記金陵貰春酒。小姬能唱後庭花。

歸田詩話。至正初入大都求仕。交游竟無一援引之者。客居以教書爲生。二十年餘。始附海舟而歸。予從先師往訪之。見其所持扇上一詩。乃在北日所著詩云云。亦醞藉可誦。而命運不遇如此。

申屠駟

駒字子迪

道山亭聯句首聯

追陪偶上道山亭，疊障層巒繞郭青。

僧家奴

僧家奴字元卿

次聯

萬井人家鋪地錦，九衢樓閣畫幃屏。

三聯

波搖海日添詩興，座引天風吹酒醒。赫德爾已見

奧魯赤

奧魯赤字文卿

結聯

久立危欄須北望，無邊秋色杳冥冥。

烏石山志石刻追陪云云。子迪萬井云云。元卿波搖云云。本初久立云云。文卿右憲使幃山。僧家奴元卿公僉憲奧魯赤文卿公申屠駒子迪公赫德爾本初公暇日燕集聯句也。譚忞備憲幕。重惟諸公皆文章名士。南北隔數千里。同仕於閩。文字爲娛。誠一時之嘉會。因勒巖石以紀我元文物之盛云。至正九年八月望日。經歷趙譚識。

元詩紀事卷十九

錢惟善

惟善字思復錢塘人。領至正辛巳鄉薦。官至副提舉。有江月松風集。

南濠詩話。錢思復嘗赴浙江省鄉試。時出浙江潮賦。三千人中。皆不知錢塘江爲曲江。思復獨用之。蓋出枚乘七發。考官得其卷大喜。寘於前列。思復歸。乃構曲江草堂。暮年自稱曰曲江老人。詩談。錢惟善鍾湖山之秀。而發於詩。故多秀句。

江月松風集序。錢思復所作特妙。未嘗不議論。而不宋於議論。未嘗不景物。而不晚唐四靈於景物。亦浣花溪上。見白頭亂髮兩耳人耶。

西湖竹枝詞

阿姨住近段家橋。山妬蛾眉柳妬腰。黃龍洞前黑雲起。早回家去怕風潮。

歸田詩話。錢思復以浙江潮賦得名。起句云。維羅刹之巨江兮。實發源於太末。試官喜之。遂中選。蓋滿場無知羅刹爲浙江別號者。復作西湖竹枝曲云云。先伯元範戲之云。此段家橋創見。卻與羅刹江不同也。蓋西湖斷橋。以唐人詩斷橋芳草合得名。亦謂孤山路至此而盡。非有所謂段家者。

句

空澤水寒魚尾赤，洞庭霜落樹頭紅。
漢史丁公那及齒陶詩甲子不書元。

歸田詩話：思復號心白道人，張氏據吳，遂不仕，退居吳江筒川，與楊廉夫唱和，有句云云，蓋感時事也。

又

生前母應金錢夢，死後人稱鐵笛仙。

雪霏錄：楊廉夫先生之母夫人嘗夢神人授金錢一枚，遂娠先生。先生卒，錢君思復作挽詩云云。

盧琦

琦字希韓，惠安人。登至正二年進士第，官至永春縣尹，調寧德。

句

嵐氣滿林晴亦雨，溪聲近驛夜如秋。
潮生遠浦孤帆小，雨過蒼崖古木寒。
小橋跨澗村春急，老樹吹花野店香。
暮雲松徑僧歸寺，夜雨蓬窗客在船。
門掩落花春去後，夢回殘月酒醒時。
梧葉幾番深夜雨，梅花一樹短籬霜。

筆精：盧圭齋所著，有圭齋詩集，歲久弗傳。近惠安莊戶部徵甫蒐而梓之，誤入雁門薩天錫詩六十餘首。薩詩世有傳本，校者一時未之考耳。亟當釐正，不然恐以圭齋爲齊邱之盜化書也。盧詩自佳，如云云，清典可詠，元詩多纖弱，若圭齋者，實有唐調者也。

孔皖

皖字子充。至正壬午鄉貢。授宗文書院山長。官至照磨。

亂後

故居燒後拾殘編。留得陶詩一兩篇。彭澤豈堪猶作令。義熙何忍再書年。

浙江通志。山長秩滿歸。隱居養親。有經略使至。延見。上政略五篇。言天下利害。使嘉納之。授浙閩照磨使。輔周嗣德守禦。元亡。不復仕。有詩云云。

李孝光

孝光字季和。溫州樂清人。至正初。官祕書監丞卒。

詩數。李孝光古詩歌行。豪邁奇逸。如驚蛇跳駿。不避危險。當時語云。前有虞范。後有李楊。謂廉夫也。

箕山操和鐵雅先生首唱。一作爲許生作。

箕山之陽兮。其木樛樛。箕之冢兮。白雲幽幽。乾坤清氣。作箕之冢兮。白雲悠悠。箕之陽兮。其木樛樛。彼一作夫。世之人兮。孰能遺我以憂。雖欲從我一無我字。兮。其路無由。朝有人兮。來飲其牛。

大雅集。鐵雅許曰。善作琴操。然後能作古樂府。和余操者。李季和爲最。其次夏大志也。

太乙真人歌題蓮舟圖

銀河跨西海。秋至天爲白。一片玉夫容。洗出明月魄。太乙真人挾兩龍。脫巾大笑眠其中。鳳麟洲西與天通。扶桑乃在碧海東。手把白一作綠。雲有兩童。雙鵬二鳥開金籠。

大雅集鐵雅評曰此作乃是李騎鯨也孰謂此老椎鈍無爽氣邪二鳥作日月看

送僧朴菴用柯敬仲韻

月行天中央天高如屋極中有雪色兔下土人不識我曾摩其頂仙吏睨我側世人乞毫光密如霧雨塞
蹴踏河漢搖洶湧若秋沙是誰知此奇南有彌天釋去去不復念令人淚橫臆

梧溪集僧惇朴菴黃巖人壯游金陵與五峯李孝光並受知梁王一日公引柯九思見柯以寫竹
遂親幸王卽位獨召用柯李後送公詩云云若不能無慨者

大星

大星在天小星落城頭烏烏吹畫角津吏擊鼓河上船行人草草居人憐男兒墮地弧矢願南北東西君
莫怨

詩藪雄渾流麗步驟中程

張翥

翥字仲舉晉寧人至正初召爲國子助教官至翰林學士承旨有蜨菴集

歸田詩話至正初爲集慶路學訓導御史下學點視廩膳鄰齋出對云豸冠點饌是日適用驢肉
仲舉戲續云驢肉作羹御史聞之大怒欲逮捕之仲舉乘夜逃奔揚州

西湖游覽志張仲舉翥其先晉寧人父爲杭州鈔庫副使因家焉翥少時豪放不羈好蹴踘喜音
樂父憂之一旦翻然易轍閉戶讀書從仇仁近學以詩文名海內

寄浙省參政周玉坡

天子臨軒授鉞頻，東南無地不紅巾。鐵衣遠道三軍老，白骨中原萬鬼新。義士精靈虹貫日，仙家談笑海揚塵。都將兩眼淒涼淚，哭盡平生幾故人。

輟耕錄：此至正辛丑間張蛻菴承旨，在都下寄浙省周玉坡參政詩也。夫翰苑詞臣而寓言如此，則感時之意從可知矣。

西湖冰合

西湖雪厚冰徹底，行人徑度如長川。風吹鹽池結陰鹵，日射玉田生暖煙。魚龍穴裏寒更縮，鷗鷺沙頭饑可憐。安得長冰通滄海，我欲三島求神仙。

委巷叢談：元至正間西湖冰合，故老云：六十年前曾有此異。張仲舉賦詩云云。

螢苑曲

楊花吹春一千里，獸艦如雲錦帆起。咸洛山河真帝都，君王自愛揚州苑。軍裝小隊皆美人，畫龍纔汗金麒麟。香風搖蕩夜遊處，二十四橋珠翠塵。騎行不用燒紅燭，萬點飛螢炫川谷。金釵歌度苑中來，寶帳香迷樓上宿。醉魂貪作花月荒，肯信戰劍生宮牆。爛斑六合洗秋露，尙疑怨血凝晶光。至今落日行人路，鬼火狐鳴隔煙樹。腐草無情亦有情，年年爲照雷塘墓。

詩藪：雄渾流麗，步驟中程。

登金山吞海亭了公請賦

危亭突兀戴鼇頭。俯視滄溟一勺浮。龍伯衣冠藏下府。梵王臺殿起中流。扶桑夜色三山日。灩澦江聲萬里秋。老我惜無吞海句。但磨崖石記曾遊。

賦中書左曹小瀛洲

東曹地迴集名郎。宛是仙家紫翠房。閭闔上通天只尺。蓬萊移出海中央。金波日煖浮鵲。玉樹春濃下鳳凰。幾度夢回清夜直。此身如在五雲鄉。

詩藪全篇整麗首尾勻和

七月廿九日

此醜今方殞。京城蹀血新。也知天悔禍。誰謂國無人。勝氣騰龍虎。沈機動鬼神。大庭親命詔。終夜在延春。元詩選此詩爲李羅帖木兒作。李羅之入京師。使仲舉草詔不從。嘗作自誓詩曰。此醜行當殞。吾身敢顧危。要看奪笏處。正是結纓時。萬古千秋在。皇天后土知。寸心三尺簡。肯愧史卑詞。與此詩是一時作也。

挽忠襄王

聖主中興大業難。元戎報國寸心丹。軍中諸將驚韓信。天下蒼生望謝安。羽檄北來兵氣肅。樓船南下海波寒。老臣擬直詞林筆。細傳成功後代看。

元詩選忠襄王謂察罕帖木兒也。察罕起兵沈丘。悉平河南山東諸處紅巾。至正壬寅爲田豐王士誠所刺。先是有白氣如索起危宿。貫太微垣。太史奏山東當大水。順帝曰不然。山東必失一良

將卽馳詔戒察罕勿輕舉未至而已及難矣。

句

舊河通瓠子。新浪漲桃花。

詩藪云云。張仲舉詩也。李于鱗一聯云。春流無恙桃花水。秋色依然瓠子宮。實用張語。而意稍不同。

又

半生懸磬室。萬事缺壺歌。積陰霾日月。愁色滿江湖。露花迎夕斂。風樹借秋涼。寧爲伏劍死。不作倒戈攻。四郊多壁壘。萬里半煙塵。詞人歌蟋蟀。軍士歎蠨蛸。龍伯衣冠藏下府。梵王臺殿起中流。露下遠山皆落木。風來滄海欲生潮。千嶂晚雲原上合。兩河秋色雁邊來。雲移雁影沈江樹。雨帶龍腥出海濤。方驚掘地雙鵝起。卽見浮江五馬來。金波夜永浮鵲鵲。玉樹香濃下鳳凰。詳傳若金下。

成廷珪

廷珪字原常。蕪城人。有居竹軒集。

居竹軒詩集。邵肅序。嚮在揚州。識成君原常。雖居於市廛。而植竹庭院間。綽有山林意趣。扁其燕息之所曰居竹。其交遊則仲舉張公爲忘年友。故其詩之音律體製。蓋有得於仲舉者多焉。居竹軒詩集。張翥序。余在廣陵時。嘗與君游乎山僧野士之寓。或臨大江。眺羣峯。或升蜀岡。坐茂樹。未嘗不詩。是作也。其或風日之朝。燈火之夕。樽俎前而几杖後。未嘗不詩。是談也。

送余廷心翰林應奉

楓葉蕭蕭江已秋。吳船三日住揚州。旋花深染青綾被。雲葉新裁紫綺裘。征驛馬嘶風滿樹。別筵人散月當樓。明年春雁將書去。人在蓬瀛第幾洲。

詩藪全篇整麗。首尾勻和。

題宋徽宗白頭翁圖

梔子紅時人正愁。故宮衰草不勝秋。西風吹落青城月。啼得山禽也白頭。筆精宋徽宗繪畫。題咏者多含譏刺。元成廷珪題白頭翁圖云。

陸仁

仁字良貴。河南人。寓居崑山。有乾乾居士集。

菽園雜記。西湖竹枝詞。南北名士屬和者。凡一百二十二人。吳郡士二十六人。而崑山在列者。一十一人。其間最有名。時稱郭陸秦袁。謂義仲。良貴。文仲。子英也。陸本崑山太倉人。其稱河南。蓋姓氏郡望耳。

天馬歌

於穆世祖肇王蹟。受天之慶大命集。神寓鴻圖大無及。功烈皇皇共開闢。四方下上沛流澤。列聖相承續。丕績哲王嗣位建皇極。大臣弼輔尙禹稷。禮樂制度靡有隙。六府孔修萬姓懌。天子聖德於昭共。念承皇祖心弗宅。日月同明天地廓。絕域窮陲歸版籍。萬國貢獻歲靡息。琛瑤瑰異陋金錫。豈須征討費兵革。文

懷遠人盡臣服。至正壬午秋之日。天馬西來佛郎國。佛郎之國遼西域。流沙瀾漫七海隔。浪波橫天馬橫涉。馬其猶龍弗顛蹄。東逾月窟過回紇。陸地不毛千里赤。太行雪積滑如石。電激雷奔走颺歔。四年去國抵京邑。俯首闕廷拜匍匐。帝見遠臣重恍惕。慰勞以酒賜以帛。遠臣牽馬赤墀立。金羈絡頭朱汗滴。房星下垂光五色。肉駿巍巍橫虎脊。崇尺者六修丈一。墨色如雲隄兩白。天閑騏驎俱駿骨。天馬來時皆辟易。驢騾屈乘未足惜。大宛渥洼斯與敵。穆王八駿思游歷。漢武窮兵不多得。天馬自來徵有德。史臣圖頌永無斂。再拜歌詩思彷彿。願帝愛賢如愛物。更詔山林訪遺逸。□□治化齊堯日。帝業永固保貞吉。天子萬壽大降福。

西湖竹枝集。詩學有祖法。清俊奇偉。如佛郎國進天馬頌。水仙廟迎送神辭。渡黃河望神京諸篇。縉紳先生莫不稱道之。

高明

明字則誠。永嘉平陽人。至正五年中第。授處州錄事。辟丞相掾。入明不仕。有柔克齋集。

和趙承旨題岳王墓韻

莫向中原歎黍離。英雄生死係安危。內廷不下班師詔。朔漠全歸大將旗。父子一門甘仗節。山河萬里竟分支。孤臣尚有埋身地。二帝游魂更可悲。

輟耕錄。讀此詩而不墮淚者幾希。

西湖游覽志。岳墳詩。趙子昂支韻難和。徐孟岳和云云。高則誠云云。

題青山白雲圖

昨夜山中宿雨晴。白雲綠樹最分明。茅堂早起無他事。去看谿南新水生。

自跋此余往日在越中錄寄倪君仲權之詩。今十餘年矣。意其不投之苦海。則亦當供醬蒙矣。仲權乃裝潢爲卷帙。列之於諸名勝間。矧當時事輾轉。世方以斯文束高閣。而仲權於朋友之片言隻字。亦無遺棄。亦可見其好尚之清。交道之厚。而不爲世變所移者也。惜也。予之學問名位。視往日不少加進。徒負故人期待之意耳。展卷一覽。慨歎不已。因書於左方。以自警云。永嘉高明。

句

吳門亂後逢梅福。遼海來時識管寧。

擇石齋詩集觀敦交集冊子。自注元季明初。上虞魏壽延仲遠輯其三十年所友人酬贈之詩也。凡七十六首。鄭彝乙巳句。亂離時世全高潔。淳朴山川似古初。王璠至正廿五年句也。應清曠風塵外。誰道邊城尙繹騷。乙巳卽廿五年。他如凡涉憂亂者。當在辛卯。趙俶和入邑感懷云。閉戶十年方入城。當在庚子後。至高明云云。當在廿七年丁未後。是年明祖破平江。方國珍降浙。東西甫寧靜也。

謝應芳

應芳字子蘭。武進人。至正初舉爲三衢書院山長。入明不仕。有龜巢稿。

龜巢稿余詮序。先生之門人王著集先生之詩。鈐諸梓。先生摘其詩之什一與之。凡若干卷。名龜

巢摘稿

明史隱白鶴溪上，構小室，顏曰龜巢，因以爲號。

過吳江三高祠

三高祠前秋水波，客來弔古悲且歌。季鷹魯望桑梓敬，蠶也簋豆理則那。生爲越人身相越，百計謀吳吳乃滅。眞憂烏喙將無情，免死狗烹肝腦裂。飄然攜手湖海游，捧心人與同扁舟。越人誇功鑄金像，於吳孰曰非仇讎。行裝重寶久彌厚，清高之風絕何有。奉嘗堪笑木腸兒，忍睹荒臺麋鹿走。江風蕭蕭楓葉寒，扣舷折我青琅玕。靈胥怒挾海潮起，般若雷鳴過雪灘。

南濠詩話：三高祠在吳江長橋南，中祀越上將軍范蠡、晉大司馬東曹掾張翰、唐贈右補闕陸龜蒙。毗陵謝應芳嘗上書行省，欲去范蠡像，會世變弗果。

嚴將軍戰馬歌并序

至正乙未春，常多盜，省府調兵捕之。浙東宣慰司元帥嚴公來總軍事，未幾，無錫平，移軍武進。一日，擣本富莊賊巢，軍中失二馬，明日賊乘之抗官兵，烈塘上二馬聞金鼓來奔，賊控勒不能止，遂墮地，馬立踴殺之。官兵大捷，故烈塘之民咸神其事，俾余作歌以美之。

往聞齊軍夜路迷，老馬前導人追隨。又聞的盧躍檀前，漢業復立西南陲。古來良驥稱有德，未有驍騰能殺賊。將軍兩馬馱賊來，雲霧四起生風雷。紅綃帕首爾何物，霜蹄一踏成飛埃。軍前認主鳴且舞，驚倒熊羆與獼猴。羣兇膽落敢口追，官軍凱還槌大鼓。馬兮馬兮誠有功，須知感物由元戎。將軍接迹武惠功，煌

煌史冊書勳庸。爾馬名示垂無窮。

摘稿序云。至正乙未春。浙東宣慰司元帥嚴公某。統兵捕寇。過浙西。秋八月。兵駐烈塘。一日。遣兵擣禾富莊賊巢。失一騎士。既而賊乘馬出拒。其馬望官軍來奔。賊墜地。馬踴殺之。賊衆驚潰。官軍大捷。以馬詣帳前白事。時余適在公座中。聞而喜之。故有是作。

摘稿詩云。將軍武惠之嫡孫。帳前甲騎多如雲。一驪偶爾墮賊窟。背馱賊渠來策勳。沫流兩吻噴白雪。光燦雙瞳夾經月。雷奔電激煙霧隨。望我旌旗馳踣賊。渠方命墮鐵蒺藜。驪口吮之成粉齏。賊曹瓦解爭納款。我軍凱歌歸馬嘶。古來良驥稱有德。未有驍騰能殺賊。呂家赤兔項家騅。骨朽猶當有慙色。將軍報國秉精忠。安知馬亦肝膽同。他年太史作佳傳。宜亦牽連書乃功。

宜山謠并序

廣東南丹諸州。民獠雜居。素號難治。洪武初。朝命設官置司安撫之。山東尹明善實在僚選。凡所司事。知無不爲。爲無不達。蒞官再期。多善政。後四年。有客自廣西來者。傳其事甚詳。余乃摘其大者。作宜山謠七篇。

苗獠地連交趾。咸籍爲民。且爲除其凶號。人悅之。作椎髻舞。

椎髻舞。擊銅鼓。淺蠻生蠻皆安堵。賣刀買鉏犁。啣恩人鳥語。獷俗馴。惡俗去。豈弟君子吾父母。

沿邊舊置七十五屯。獠爲長。每羣聚爲諸州害。今罷之。民乃安。作除虎窟。

除虎窟。虎皆散亡。龍睡穴。湖南海北廣東西千里。如今無白骨。無白骨。人何憂。每每舊屯田。年年稻花秋。

我所思兮。龍江水流。

兵後游飢。發官廩。活宜山數萬口。民德之。作枯桑。

枯桑枯桑。徒爲我薪。煮石弗糜。曷以食人。廩發于官。我命乃續。誰其主之。伊人如玉。伊人如玉。孚及豚魚。詔我婦子。償粟勿渝。厥粟固償。厥德靡忘。我懷伊人。于羹于糲。

覃國大韋仲海等。世爲土豪。與溪蠻洞獠相表裏。反側不一。公以計擒殺之。民大快。作霹靂斧。霹靂斧。行天誅。百靈奔走。羣醜除。磔梟獍。醢饕餮。招徠角端。舞騶虞。日月兩山明。畏境成康衢。

宜山莫天護。虎踞一方。公言之方伯。徙和州。民樂之。作坎井蛙。

坎井蛙。兮渤澥。偷生蝦蜆門。怒腹氣何在。長魚跋浪欲吞舟。竟作任公雪花鱗。蛙乎幸偷生。有愧輸芒蟹。前度放蛙人。今日恩如海。

獠蠻負固。稅久不供。而良農病于重斂。今均之。視前賦減什五六。恩不能忘。作生子以尹名。

生子以尹名。有田須力耕。昔憂公租重。今喜公租輕。窮閭杼軸具。當路鈞衡平。焦冥覆盆下。視此白日明。革命之初。公以安邊事。屢白相府。民懷之。作鞍馬勞。

鞍馬勞。肉消脾。廣西一去二千里。借箸籌邊丞相喜。兩年單騎八往還。青草黃茅瘴煙裏。鞍馬勞。有如彼。不負公。不掠美。一寸忠丹報天子。龜巢稿。

吳師尹

師尹字萃樂。永新人。至正八年登第。官吉州永豐縣丞。

宋丞相信國公上已詩

厓山雲寒海舟覆。六載孤臣老燕獄。東風杜宇三月三。五雲望斷春無綠。墨花煌煌五十六。寫出江南愁萬斛。當時下筆眼如虎。日落天低鬼神哭。揚帆昔走儀真船。手持鰲柱擎南天。間關嶺海血灑檄。回首家國隨飛煙。六宮粉黛黃埃裏。漢火無煙吹不起。全軀肯效褚淵生。嚼舌甘爲杲卿死。薊門碧草春悽悽。爲官不換西山薇。哀吟一曲肝腸裂。勁氣萬丈蛟龍飛。當年恨殺葛嶺賊。恨不剗心飲其血。堂堂忠義行宇宙。白日青天照遺墨。再拜酬公金屈卮。有酒不讀蘭亭詩。

右吾鄉先生吳公所作。所以景仰丞相極至。而又兼得其儀容髣髴者也。少嘗喜誦之。丞相嘗以弟璧之子爲嗣。其後元末仕爲海北道廉訪副使。卒葬鬱林州。子孫因家焉。余先高祖與丞相兄弟同時。書札往來存者甚多。今來鬱林見良錫廉訪之子也。乃寫詩以歸之。吉水解縉書。

方子京

子京字口口分水人。

鑑湖風月

賀仙歸去隱滄浪。萬頃晴波一鏡光。龍瑞尙存古時跡。鴻禧猶帶晉餘芳。兩堤楊柳三更影。千樹芙蓉五月涼。後數百年無問處。雲山煙水共蒼茫。

浙江通志。至正十一年應薦起。試以鑑湖風月詩。時試者百餘人。惟子京擢居前列。除嘉興路教授。致仕歸。

陳高

高字子上平陽人登至正十四年進士第授錄事別號不繫舟漁者

種槿花

炎方有槿樹衣被代蠶桑舍西得閒園種之漫成行苗生初夏時料理晨夕忙揮鋤向烈日灑汗成流漿培根澆灌頻高者三尺強鮮鮮綠葉茂燦燦金英黃結實吐秋繭皎潔如雪霜及時以收斂采之動盈筐緝治入機杼裁剪爲衣裳禦寒類挾纊老稚免淒涼豪家植花卉紛紛被垣牆於世竟何補爭先翫芬芳棄取何相異感物增惋傷

木綿譜宋末木綿之利尙在閩中而江南無此種也元人陳高有詩云云高元末人而隙地初學種之則其來未久可知

周志遠

志遠字口口吉水人以危素薦授太子說書

自題其像

十年塵土變形容惟有丹心日月同北海子卿羝不乳未應已在畫圖中

江西通志周志遠生於元仕於元然其心若有不自得者嘗自贊其像云云

鄭玉

玉字子美徽州歙縣人至正十四年除翰林待制辭疾不起明兵至將要致之自經死學者稱師

山先生有師山集

師山書樓成唐長孺先生賦詩見寄次韻

居山日夕見山容。環堵蕭然一畝宮。我喜煙雲來几上。人看樓閣出空中。夜深月色偏明朗。曉起嵐光更鬱蔥。若比羊裘軒上景。臨江惟欠一絲風。

師山先生文集。余以才疏學陋。一無所用於世。退而躬耕壠畝。將以自養。間有朋游。相從講學。乃築室師山之上。以爲肄習之所。

陳謙

謙字子平。吳郡人。

勉學詩錄一

黃河西北來。云是崑崙邱。經行非一山。回薄半九州。上有不測源。下有無盡流。萬化同此機。不知幾春秋。分明天地心。不爲淺狹謀。癡人用小計。顛倒若無求。安得申韓氏。化爲古伊周。

菽園雜記。遜志齋集三十卷。其二十八卷內。勉學詩二十四章。本蘇士陳謙子平所作。誤入方集耳。子平。元末人。張士誠兵至。吳有突入其室者。脇其兄訓使拜。不屈。刃其胸。子平以身翼蔽。并遇害。平生著述甚富。兵後散亡。獨所著易解詁二卷。及古今詩數十篇。傳於世。正統間。吾崑山所刻養蒙大訓。收其詩。予幼嘗見之。京師士人徐本以道。亦嘗刻其詩印行。後有國初韓奕公望跋語。

韓徐皆蘇人。
案明詩綜。方孝孺下。登此一首。





書叢本基學國：2

元 詩 紀 事

(下)

陳 衍 輯

商務印書館發行

821.857

384


12

書叢本基學國

事紀詩元

(下)

輯衍陳



3 0617 3349 3

行發館書印務商

元詩紀事卷二十

楊允孚

允孚字和吉吉水人

灤京雜詠

北顧宮庭暑氣清。神堯聖禹繼昇平。今朝建德門前馬。千里灤京第一程。此以下多述途中之景。行幸上京。蓋云避暑也。

納寶盤營象。蜚來畫簾。氍毹暖九重開。大臣奏罷行程記。萬歲聲傳龍虎臺。龍虎臺。納寶地也。凡車駕行幸宿頓之所。謂之納寶。又名納鉢。

居庸千古翠屏環。飛騎將軍駐兩關。萬里車書來上國。太平弓矢護青山。兩關。謂南口北口。

穹崖幻出梵王宮。雙塔中間一逕通。四月雨餘山更碧。六龍行處日初紅。至正年間。始營雙塔。宮闕巍峨。直通絕嶺。

餽赤王侯部落多。香風簇簇錦盤陀。燕姬翠袖顏如玉。自按轅條駕駱駝。轅條。車前橫木。按之則輕重前後適均。

仙峽琴鳴水木多。別離見月奈愁何。題名石壁遼金字。宿雨殘風半滅磨。彈琴峽也。狼山山下。曉風酸。掩面佳人半怯寒。倚戶殷勤喚嘗粥。正宜倦客宿征鞍。俗資豆粥。



榆林御苑柳絲絲。昨夜宮車又黑圍。宿衛一時金帳卷。鎗竿珍重白雲飛。此處有御苑黑圍地名。大駕經由之所。俗云龍上槍竿。是以御駕不由此處。

汲井佳人意若何。轆轤渾似挽天河。我來濯足分餘滴。不及新豐酒較多。此地墜水故也。

馬上重看尖帽山。山頭無數白雲閒。漢家天子真龍種。坏土長陵爲設關。選葬后妃之所。設衛卒焉。

驅車偏嶺客南還。始見胡姬笑整鬟。誰信片雲三十里。寒暄只隔此重山。過人到偏頭之北。面不可洗。頭不可梳。冷極故也。過此始有暖意。素非高嶺。寒氣止隔于此。良可怪也。歟。

李陵臺畔野雲低。月白風清狼夜啼。健卒五千歸未得。至今芳草綠萋萋。此地去上京百里許。

鴛鴦陂上是行宮。又喜臨歧象馭通。芳草撩人香撲面。白翎隨馬叫晴空。由黑圍至此。始合微焉。即察罕膳兒白翎草地所產。

歡喜坡邊望禁城。鸞翔鳳翥卿雲清。舉杯一吸灤陽酒。消盡南來百感情。此以下敘灤京之景。及聖駕往還典故之大概。

鐵番竿下草如茵。澹澹東風六月春。高柳豈堪供過客。好花留待蹋青人。即幹耳朵。踏青人。指宮人也。

先帝妃嬪火失房。前期承旨達灤陽。車如流水毛牛捷。轡縷黃金白馬良。毛牛其毛垂地。火失。斃房。乃累朝后妃之宮車也。

聖祖初臨建國城。風飛雷動蟄龍驚。月生滄海千山白。日出扶桑萬國明。上京大山舊傳有龍居之。奉自宥通。

北闕東風昨夜回。今朝瑞氣集蓬萊。日光未透香煙起。御道聲聲駝鼓來。謂駝鼓也。

又是宮車入御天。麗姝歌舞太平年。侍臣稱賀天顏喜。壽酒諸王次第傳。千官至御天門。俱下馬徒行。獨至尊騎。馬直入。前有教坊舞女引導。且歌且舞。舞出天下太平字樣。至玉階乃止。內門曰御天之門。

九奏鈞天樂漸收。五雲樓閣翠如流。宮中又放灤河走相國家奴第一籌。灤河至上京二百里。走者名貴。赤黎明放自灤河。至御前已初中刻者。上賞。

大安閣下晚風收。海月團團照上頭。誰道人間三伏節。水晶宮裏十分秋。大安閣。上京大內也。別有水晶殿。

四傑君前拜不名。輪番內直浹辰更。蓬萊山上羣仙集。得似王孫世祿榮。四傑。即四怯薛也。或稱也可怯薛者。即大怯薛之稱。是之謂不名。當三間。凡所以浹辰一更者也。

北極修門不暫開。兩行宮柳護蒼苔。有時金鎖因何掣。聖駕棕毛殿裏回。棕毛殿。在大幹耳朵。

千官萬騎到山椒。個個金鞍雉尾高。下馬一齊催入宴。玉闌干外換宮袍。每年六月三日。詐馬筵席。所以喻其盛事也。千官以雉尾飾馬入宴。

錦衣行處狻猊習。詐馬筵前虎豹良。特勅雲和罷絃管。君王有意聽堯綱。詐馬筵開。盛陳奇獸。宴享既具。必一。二大臣。稱吉。思皇帝。禮徹。於是而後。禮有文。飲有節矣。雲和。署隸儀鳳司樂。掌天下樂工。

儀鳳伶官樂既成。仙風吹送下蓬瀛。花冠簇簇停歌舞。獨喜簫韶奏太平。儀鳳司。天下樂工隸焉。每宴教坊。美女必花冠錦繡。以備供奉。

聿來新貢又殊方。重譯寧誇自越裳。馴象明珠龜九尾。皇王不寶壽無疆。萬歲山有九尾龜。嘉魚貢自黑龍江。西域蒲萄酒更良。南土至奇誇鳳髓。北陲異品是黃羊。黑龍江。卽哈八都魚也。鳳髓。茶名。黃羊。北方所產。御膳用。

太平天子重文曹。開建奎章選俊髦。一自六龍天上去。至今黃帕御牀高。昔文宗建奎章閣於大內。年深灑掃。睹御榻之巍然。感而賦此。

內人調膳侍君王。玉仗平明出建章。宰輔乍臨閭闔表。小臣傳旨賜湯羊。御前廚常膳有曰小廚房。大廚房。小廚房。則內人入珍之奉是也。大廚房。則宣徽所掌湯羊是也。由內及外。外膳既畢。羣臣始入奏事。每湯羊一膳。具十六餐。餘必賜左右大臣。日以爲常。予常職賜。故悉其詳。

香車七寶固姑袍。旋摘修翎付女曹。別院笙歌承宴早。御園花簇小金桃。凡車中載固姑。其上羽毛又尺許。按付女持。手持對坐車中。雖后妃駝象亦然。

內宴重開馬湏澆。嚴程有旨出丹霄。羽林衛士桓桓集。太僕龍車款款調。馬湏。馬嬬子也。每年八月。開馬嬬子宴。始奏起程。太僕寺掌馬者。

鸞輿八月政高翔。玉勒雕鞍萬騎忙。天上龍歸纔帶雨。城頭夜午又經霜。每年駕起。其夕即霜。異哉。南坡暖翠接南屏。雲散風輕弄午晴。寄與行人停去馬。六龍飛上計歸程。南坡。乃納寶地也。故遊人罕至焉。

月出王孫獵兔忙。玉驄拾矢戲沙場。皮囊乳酒鑊鍋肉。奴視山陰對角羊。良馬驟馳拾墮箭。橘綠羊。或四

角六角者謂之迭角羊。迭義未詳。以其角之相對。故曰對角。毛角雖奇。香味稍別。故不升之鼎俎。於以見天朝之玉食。有等差也。

雍容環佩肅千官。空設番僧止雨壇。自是半晴天氣好。螺聲吹起宿雲寒。西番種類不一。每卽殊禮。燕享大會。則設止雨壇於殿隅。時因所見。以發一哂。

正元紫禁肅朝儀。御榻中間寶帕提。王母壽詞歌未徹。雪花片片彩雲低。此以下多敘一年之景。并雜詠之物。

試數窗前九九圖。餘寒消盡暖回初。梅花點遍無餘白。看到今朝是杏株。冬至後。貼梅花一枝於窗間。佳入曉妝。日以臨照。圖一團。八十一圈。既足。變作杏花。卽暖回矣。

脫圈窈窕意如何。羅綺香風漾綠波。信是唐宮行樂處。水邊三月麗人多。上巳日。灤京士女。競作繡圈。臨水棄之。卽修禊之義也。

葡萄萬斛壓香醪。華屋神仙意氣豪。酬節涼糕猶未品。內家先散小絨絛。重午節也。

百戲遊城又及時。西方佛子閱宏規。綵雲隱隱旌旗過。翠閣深深玉笛吹。每年六月望日。帝師以百戲入內。從西華入。然後登城設宴。謂之遊皇城是也。

紫菊花開香滿衣。地椒生處乳羊肥。氈房納石茶添火。有女褰裳拾糞歸。紫菊花。惟灤京有之。名公多見題品。地椒草。牛羊食之。其肉香肥。納石。鹽韃茶。

爲愛琵琶調有情。月高未放酒杯停。新腔翻得涼州曲。彈出天鵝避海清。海青。祭天鵝。新聲也。

海紅不似花紅好。杏子何如巴欖良。更說高麗生菜美。總輸山後蘇孤香。海紅花紅。巴欖仁。皆果名。高麗人以生菜裹飯食之。尖山產蘇孤。

偶因試馬小盤桓。明德門前御道寬。樓下綠楊樓上酒。年年萬國會衣冠。明德門。午門也。

怪得家童笑語回。門前驚見事奇哉。老翁攜鼠街頭賣。碧眼黃髯騎象來。黃鼠。瀛京奇品。

東風亦肯到天涯。燕子飛來相國家。若較內園紅芍藥。洛陽輸卻牡丹花。內園芍藥迷。望亭亭直上數尺許。花大如斗。揚州芍藥稱第一。終不及上京也。

時雨初肥芍藥苗。脆甘味壓酒腸消。揚州簾卷東風裏。曾惜名花第一嬌。草地芍藥初生軟美。居人多采食之。

霜寒塞月青山瘦。草實平坡黃鼠肥。欲問前朝開宴處。白頭宮使往還稀。文宗曾開宴於南坡。故云。

雖然玉宇桂無花。秋比江南分外佳。絃管盡樓人散去。舍郎攜妓勸嘗瓜。俗以月下送瓜果往還。上京不產桂花。

御饌官廚不較餘。金門掌膳意勤如。更分光祿瓶中酒。爛醉歸時月上初。凡御膳及民間者。謂之貢餘。光祿寺掌御酒。

別卻郎君可奈何。教坊有令趣興和。當時不信郵亭怨。始覺郵亭怨轉多。興和署。迺教坊司屬。掌天下優人。

出塞書生瘦馬騎。野雲片片故相隨。凍生耳鼻雪堪理。冷入肝腸酒強支。凡凍耳鼻。卽以雪揉之方回。近

火則脫。

買得香梨鐵不如。玻璃碗裏凍潛蘇。書生半醉思南土。一曲鐙前唱鷓鴣。梨子受凍其堅如鐵。以井水浸之。則味回可食。

灤京雜詠。羅大已跋。楊君以布衣從當世賢士大夫遊。襤被出門。歲走萬里。耳目所及。窮西北之勝。具江山人物之形狀。殊產異俗之瑰怪。朝廷禮樂之偉麗。尤喜以詠歌記之。予索居間見甚狹。獨竊愛中臺馬公祖常。奎章虞公集。翰林柳公貫時。能以雄辭妙筆。寫其一二。今得楊君是集。又爲增益所未見。俯仰今昔。又一時矣。

達不花

宮詞

墨河萬里金沙漠。世祖深思創業難。卻望闌干護青草。丹墀留與子孫看。

草木子。元世祖皇帝。思太祖創業艱難。俾取所居之地。青草一株。置於大內丹墀之前。謂之誓儉草。蓋欲使後世子孫。知勤儉之節。至正間。大司農達不花公。作宮詞十數首。其一云。

鄭元祐

元祐。字明德。處州遂昌人。至正丁酉。除平江路儒學教授。有僑吳集。

梧溪集。以右臂疾。左書。號尙左生。

溫日觀畫葡萄

伊昔錢塘溫日觀。醉兀竹輿殊傲岸。卻將書法畫葡萄。張顛草聖何零亂。枝枝葉葉點畫閒。醉瞠白眼看青天。狂呼大盜楊都統。天不汝誅吾厚顏。楊加箠死曾不畏。故老言之淚尙潛。畫成葡萄誰賞識。惟有鮮于恆嘖嘖。醉叩齋室支離疏。撫摩悲歌淚填臆。鮮于設浴師浣之。爲師滌垢曾弗辭。人言結機張廷尉。千載風流寧異茲。蔓如龍鬚實馬乳。問師揮毫奚獨取。只因漢使遠持來。野老詩成淚如雨。

遂昌雜錄。宋僧溫日觀。居葛嶺瑤瑤寺人。但知其畫葡萄。不知其善書也。今世傳葡萄多假。其真者枝葉鬚梗。皆草書法也。嗜酒。楊總統以名酒啗之。終不一沾唇。見輒忿。嘗曰。掘墳賊。掘墳賊。惟鮮于伯機父愛之。溫時至其家。袖瓜啗其大龜。抱軒前支離叟。或歌或笑。每索湯浴。鮮于公必躬爲進澡豆。支離叟。卽伯機家所種松也。

次韻錢伯行游仙體二首

海定神風滿綠羅。仙人辭藻寄來多。貫珠音在雲誰遏。琢玉文成手自磨。憶昔絳河輕就別。至今黃竹不成歌。可憐人世書裙手。池上猶籠道士鵝。軋軋青年擬度沙。煌煌白兔豈無家。肉生徐甲符難祕。斧鈍吳剛桂始華。誦授寶書盟刻玉。醉離瑤席舞傳芭。竹宮望拜真癡絕。日日暈光在景霞。

詩藪全篇整麗。首尾勻和。

周伯琦

伯琦字伯溫。號玉雪坡。饒州人。由上舍生以蔭入官。至正間。官至江浙行省左丞。招諭張士誠。留

平江十餘年。張氏亡。歸鄱陽。尋卒。有近光扈從兩集。

續吳先賢讚。假江東參政。招諭張士誠。遂沒士誠所羈旅。無聊時。與諸文士飲酒賦詩。流連日夜。或前而爲變徵之聲。皆垂淚涕泣。已又爲羽聲慷慨。士盡變色投袂。在吳十餘年。伯琦儀貌都雅。而非戢難才。虛談無實。雍容自免而已。

六研齋筆記。元周伯琦書相鶴經。自稱谷陽生。跋云。右經一卷。迺浮丘公授王子晉之書也。崔文子學道於子晉。得其文。藏嵩山石室中。淮南王采藥得之。遂傳於世。又系一詩云。江南羽化張天雨。海上神交宋仲溫。楷法鍾繇稱獨步。草臨皇象已專門。折釵未墜風前股。漏屋先凝雨後痕。寄語臨池諸俊彥。蚓蛇雞鶩莫須論。

案此首二筆上卷。又以爲張憲作。

立秋日書事三首

大駕留西內。茲辰祀典揚。龍衣遵質樸。馬酒薦馨香。望祭園林逸。追崇廟祔光。艱難思創業。萬葉祚無疆。

近光集。國朝歲以七月七日或九日。天子與后素服。望祭北方陵園。奠馬酒。執事者皆世臣子弟。是日擇日南行。

鐵剎標山影。金鋪耀日華。龍迴秋歇雨。燕落晝翻沙。苑御調饒騎。宮官葺轎車。長楊誰共賦。滿耳沸寒笳。

近光集。上京西山。上樹鐵幡竿。高數十丈。以其下海中有龍。用梵家說。作此鎮之。

涼亭千里內。相望列東西。秋獮聲容備。時巡典禮稽。鵠鳬隨矢落。猋鹿應弦迷。乾豆歸時薦。康莊頌耄倪。

近光集。上京之東五十里。有東涼亭。西百五十里。有西涼亭。其地皆饒水草。有禽魚山獸。置離宮。巡守至此。歲必獵較焉。

紀行詩二十四首錄十六

乘輿繩祖武。歲歲幸灤京。夏至今年早。山行久雨晴。日瞻黃道肅。夜拱北辰明。隨步窺形勝。周諏記里程。居庸東北路。草細一川平。夾岸山屏展。穿沙水帶縈。六龍扶日御。萬騎擁雲旌。遊豫諸侯度。歡歌兆姓迎。縉雲山獨秀。沃壤歲常豐。玉食資原粟。龍州記渚虹。荒祠寒木下。遺殿夕陽中。誰信幽燕北。翻如楚越東。右縉山縣。今名龍慶州。

車坊尙平地。近嶺晝生寒。拔地數千丈。凌空十八盤。飛泉鳴亂石。危磴護重關。俯視人寰隘。真疑長羽翰。右十八盤嶺。

險險夢頻悸。循夷氣始愉。千巖奇互獻。萬壑勢爭趨。峭壁劍門壯。重梁皇渚紆。凡鱗期變化。雷雨在斯須。右龍門。

嵐翠摩台斗。林霏隱日車。谷深幽境迴。路轉列峰斜。錦石欹瑤草。蒼叢綴白花。柴門成聚落。山崦盡人家。萬幕懸崖下。高低疎復稠。闢牆聯虎衛。幄殿聳龍樓。榆柳清長晝。槐松颯早秋。威容隆古昔。神武鎮中州。高嶺橫天出。炎天氣候涼。白沙深沒馬。碧草淺連岡。晨服增絲繡。寒鄉貴稻粱。土風多國語。閭井異尋常。晴川平似掌。地勢與天寬。煙草青無際。雲岡影四圍。貔貅環武陣。麟鳳擁和鑾。高獻南山壽。同承湛露歡。右沙嶺二首。是日上都守土官。遠迎至此。內廷小宴。

嶺西通驛傳。山盡見郵亭。萬竈閭閻聚。千幃驃騎營。市樓風策策。野堠霧冥冥。雄略卑秦隴。孤兵笑廣青。
右牛羣頭。

涼亭臨白海。行內壯黃圖。貝闕明清旭。丹垣護碧榆。龍湫時霧雨。應署世衡虞。駐驛光先軌。長楊只一隅。
右察罕腦兒。猶漢言白海。

地曠居人少。山低雲影微。石牆蟲避燥。土屋燕交飛。沙淨泉宜酒。天涼秋合圍。朔方戎馬最。芻牧萬羣肥。
右明安驛。

漢將荒臺下。灤河水北流。歲時何袞袞。風物尙悠悠。川草花芬郁。沙禽語滑柔。莫梁遺句在。過客重綢繆。
右李陵臺。

桓州當孔道。城築自唐時。翊輔千年盛。川原萬里夷。草滋新雨歇。雲起遠山移。迎送官僚習。長懷被眷私。
右桓州。古烏丸地也。

南坡延勝槩。一舍抵開平。地蘊清涼界。天開錦繡城。雷轟駝鼓振。霞綯象輿行。填道都人士。瞻前戴聖明。
右南坡。

巡守綏畿甸。游從覽近風。山川隨地異。聲教此時同。王業艱難遠。神都制作雄。按行循故事。不用避青聰。
扈從詩前序。至正十二年四月。伯琦由翰林直學士兵部侍郎。拜監察御史。視事之三日。大駕北
巡上京。例當扈從。啓行至大口。留信宿。歷皇后店。阜角。至龍虎臺。皆納鉢。猶漢言頓宿所也。龍虎
臺在昌平境。又名新店。距京師僅百里。五月一日。過居庸關而北。遂自東路至瓮山。明日至車坊。

在緡山縣之東。沃衍宜粟。歲供內膳。又明日入黑谷。過色澤嶺。高峻曲折。凡十八盤。遂歷龍門。及黑石頭。過黃土嶺。至程子頭。又過磨兒嶺。至頡家營。歷白塔兒。至沙嶺。自車坊黑谷至此。凡三百一十里。皆深林複谷。邨隴僻處。山路將盡。兩山高聳如洞門。尤多巨材。近沙嶺。惟土山連亘。地皆白沙。深沒馬足。過此則朔漠平川如掌。天氣陡涼。風物大不同矣。遂歷黑鬍兒。至失八兒禿。地多泥淖。又名牛羣頭。其地有驛。有郵亭。有巡檢司。閭閻甚盛。驛路至此相合。北皆芻牧之地。無樹木。徧生地椒。野苳香葱韭。芳氣襲人。草多異花五色。有名金蓮花者。似荷而黃。至察罕腦兒。猶漢言白海也。水灤深不可測。氣皆白霧。其地有行在。宮曰亨嘉殿。闕庭如上京而殺焉。置雲需總管府。以掌之。沙井甘潔。釀酒以供上用。又作土屋養鷹房。駐蹕於是。秋必校獵焉。此去納鉢曰鄭谷店。曰明安驛。泥河兒曰李陵臺驛。雙廟兒。遂至桓州。曰六十里店。即烏丸地也。前至南坡店。去上京一舍耳。以是月十九日抵上京。歷納鉢凡十有八。爲里七百五十有奇。爲日二十四。大抵兩都相望。不滿千里。往來者有四道。曰驛路。曰東路。二曰西路。東路二者。一由黑谷。一由古北口。古北口路。東道御史按行處也。伯琦往年分署上京。但由驛路而已。黑谷輦路。未之前行。因忝法曹。肅清穀下。遂得見所未見。實爲曠遇云。鄱陽周伯琦自敘。

懷禿腦兒作漢言後海也。

侵晨離白海。輦路轉西邁。野光散平蕪。山容列修黛。秋風動地來。曾波忽澎湃。戎馬多驚嘶。寒聲襲盤帶。踰岡覽晴川。夷曠襟抱快。白花閒紫蕤。將將委珩珮。幽興足目前。絕境疑方外。旌麾匝雲屯。輿輶擬行在。

法從各有司。諫垣敢荒怠。邊報叢遠函。蒼黃盡吁怪。解鞍惕前邨。伏枕念當代。王綱未旒綴。羣生半塵芥。紆軫誰與言。沉思屢長嘅。東南何時蘇。吾欲問大塊。是日驛報杭省有警。

鴛鴦灤作

官路何逶迤。里數不可度。宿止有常程。晚次鴛鴦灤。山低露草深。天朗雲氣薄。積水風颼颼。平沙煙漠漠。鳬鷺雜翔集。巨鱗倏潛躍。居人歲取給。遠眺近一勺。原隰多種藝。農蹊犬牙錯。場圃盈粟麥。力穡喜秋穫。舒徐八駿遊。相羊瑤池樂。山川豈不佳。人事日蕭索。芻牧紓邦供。征徭非昔昨。都人望翠華。朝朝候靈鵲。興和郡屬河東憲司按部西抵太原千餘里。

我行已旬浹。所歷皆朔漠。興和號上郡。陂陀具城郭。灤陽界東履。汾晉直西略。提封廣以遐。編氓半土著。連薨結賈區。會樓瞰寥郭。要會稱雄麗。勢壓諸部落。興王遠垂裕。百載承制作。北巡必西還。遠擬東邑洛。供億須浩繁。撫循在恭恪。四鄰慎備虞。三輔嚴寄託。賢愚不同調。蟲沙與猿鶴。長願四海清。漢儀歲輝燦。野狐嶺嶺界南北甚寒南下平地則喧矣。

高嶺出雲表。白晝生虛寒。冰霜四時凜。星斗只尺攀。其陰控朔部。其陽接燕關。澗谷深叵測。梯磴紆百盤。坳垤草披拂。崎嶇石巘岈。輪蹄紛雜還。我馬習以安。恍然九天上。熙熙俯人寰。連岡束重隘。拱揖猶城垣。停鞭履平地。回首勢望尊。縣衣遂頓減。長途汗流漣。亭柳蔭古道。園果登御筵。境雖居庸北。物色幽薊前。始悟一嶺隔。氣候殊寒暄。小邑名宣平。相距兩舍間。牛羊歲蕃息。土沃農事專。野人敬上官。柴門莫款延。休養嘉承平。禹迹邁古先。漢唐所羈縻。今則同中原。大哉輿地圖。垂創何其艱。張皇我六師。金湯永深堅。

自順寧府歷坳兒嶺臨渾河上源過雞鳴山晚宿雷家驛

郡治頗清曠。民俗亦樸淳。川原西成饒。景物娛征晨。登頓未及晡。修嶺忽前陳。亂石森礚礚。濁流奔沄沄。斗厓鳴瀕洞。險逕緣鄂陂。園林暗回隄。峰巘排秋旻。海鵬奮凌風。江蛟歛乘雲。雞鳴俗語傳。世遠昧所因。招提據危巔。略口口天津。睥睨窮豪芒。翕忽叢鬼神。六龍行中天。壯觀齊崑崙。造設開闢先。顯耀當茲辰。垂髫耳已熟。華顛目方親。甚欲恣冥搜。赤日昏黃塵。紀勝猶挂漏。觀風能宣旬。

懷來縣

山風日多寒。近燕苦秋陽。懷來雖小縣。肇置自李唐。泉甘沙井冽。橋古川流長。重岡相抱環。遠山勢低昂。鑾輿歲西還。傾朝迎道傍。蟠桃百寶盤。敬上萬年觴。三登調玉燭。羣黎樂康莊。吾皇仁聖君。動必循彝章。宵旰貽近憂。苗頑尙跳梁。所貴根本固。忍此枝葉傷。思見萬邦寧。野無遺賢良。

榆林驛漢史稱榆谿長塞卽此也

昔人多種榆。今人惟種柳。堅脆雖不同。氣盡同一朽。此地名榆林。自漢相傳舊。但見柳青青。夾路忘炎晝。行旅蘇汗渴。車騎藉蔭覆。培植將百年。柯葉日滋茂。驛亭當要衝。人煙紛輻湊。崇山峙東西。步障明錦繡。磴路中平平。形勝信天授。宛如道衡廬。中流望雲岫。初夏別都城。攀條集親友。茲還秋將中。涼颼滿衣袖。物態有變容。歲月如反手。不問柳與榆。生意要悠久。

入居庸關

出關復入關。五月見上弦。草木雖未霜。寒色已淒然。厓路何紆縈。疊嶂橫中天。上有太古石。下有無底泉。

幽致良足嘉。萬雷奈喧闐。馴象寶轡鳴。紫駝錦幃鮮。鐵騎簇雲隊。黃屋循星躔。時巡謐風俗。執法恭後先。達官國同休。拔宅如登仙。細民終歲勞。輸轉百苦煎。苦樂殊雲泥。使我中心愴。偶經巖谷勝。復憶江湖壖。升高望白雲。楚天浩無邊。王師未休息。敢賦歸來篇。

龍虎臺在昌平境北。距居庸關廿五里。

巍巍百尺臺。蕩蕩昌平原。隆隆鎮天府。奕奕環星垣。居庸亘北紀。陝區歛全燕。蒼龍左蟠拏。白虎右踞蹲。斯名豈易得。天以遺吾元。明明傳正統。聖子及神孫。巡歸遂駐蹕。衣冠照乾坤。山川皆改容。草木亦被恩。章華民力竭。柏梁侈心存。豈若因自然。張設一旦昏。雄偉國勢重。簡儉邦本敦。年年舉盛典。宮中奏雲門。大口其地有三大埕。土人謂之三挖痘。距都北門二十里。

三埕何崇崇。遙直都門北。天肅烟嵐青。野迴露草白。紫氣千里臨。蜺旌拂秋色。文武迨耄倪。拊舞拜路側。萬羊肉如陵。萬甕酒如澤。國家富四海。予以著功德。詰朝御大明。湛露春拍拍。簫韶殷九天。歡聲溢遠陌。非才忝扈從。所職陳典則。皇其奠泰山。億兆究安宅。

扈從詩後敍。車駕既幸上都。以六月十四日。大宴宗親世臣。環衛官於西內櫓殿。凡三日。七月九日。望祭園陵竣事。屬車轅皆南向。彝典也。遂以二十二日。發上都而南。宿六十里店。納鉢。越三日。至察罕腦兒。由此轉西。至懷禿腦兒。猶漢言後海也。有大海在納鉢後。故云。曰平陀兒。曰石頂河兒。土人名爲鴛鴦濼。其地南北皆水。水禽集育其中。國語名其地曰遮里哈刺納鉢。猶漢言遠望則黑也。兩水之間。壤土隆阜。諸部與漢人雜處。因商而致富者甚多。自察罕腦兒至此百餘里。皆

雲霄府境也。界是而西，則屬興和路矣。納鉢曰苦水河兒，曰回回柴。國語名忽魯禿，漢言有水濼也。隸屬州保昌曰忽察禿，猶漢言有山羊處也。地饒水草野獸，兔最多。又西二十里爲興和路，世祖所創置也。歲北巡，東出西還，故置有司爲供億之所。城郭周完，閭閻最夥。河東憲司所按部也。西抵太原千餘里，郡多太原人，路置二監一守，餘同他上郡。東界則宣德府境，上都屬郡也。府之西南名新城，武宗築行宮其地，故又名中都。今多圯毀，大駕久不臨矣。由興和行三十里，過野狐嶺，上爲納鉢，地高風甚寒。東南盤折而下平地，天氣卽暄，無不減衣者。前至得勝口，宣平縣境也。有御花園，雜植諸果，中置行宮。南至縣十五里，去邑三十里，有山出瑪瑙石。又前至沙嶺，五十里至順寧府。本宣德府也，因地震改名。南過坳兒嶺，下臨深澗，其流爲渾河。嶺頭參互，四十里至雞鳴山，疊嶂排空，綿亘二十餘里。又南二十里乃平地，曰雷家驛。驛之西北十里，納鉢曰豐樂。二十里至阻車納鉢，又二十里至統幕，則與中路驛程相合。而南歷狼居胥山，至懷來縣。四山環抱，中有水名媯川，縣南二里，納鉢也。凡官署留京師者，皆盛具牲酒，於此候迎大駕，仍張大宴。慶北還也。南則榆林驛，卽衛青傳榆谿舊塞。自懷來行五十五里至媯頭，又十里入居庸關，以至於大口。遂以八月十三日至京師。凡歷納鉢二十有四，爲里一千九十有五。此輦路西還之所經也。國制，凡官署之幕職掾曹當扈從者，東西出還，甲乙番次，惟監察御史扈從。與國人世臣環衛者同東西之行，得兼歷而悉覽焉。鄱陽周伯琦述。

師泰字泰父宣城人翰林學士奎子官至戶部尙書有玩齋集

西湖竹枝詞

葛嶺東家是相門當年甲第入青雲樓船撐入裏湖去可曾望見岳王墳
芙蓉葉底雙鴛鴦飛來飛去在橫塘人生多少不如意水遠山長難見郎

案此詩依鐵崖竹枝倡和本錄入其本集所載稍不同云葛嶺西邊師相宅潭潭府第欲連雲別
買樓船過湖去可曾看見岳王墳

擬古二首

東南有佳人遠在水一方綺疏粲飛樓曲闌圍洞房意態閒且靚氣若蘭蕙芳纖阿揚姢服雜佩懸明璫
流風迴皓雪明月舒其光白面誰家子錦鞍青絲韁翩然一見之下馬立中堂可望不可卽五采盛文章
山溪當作蠟谷有美竹挺挺霜雪中何人斷兩節製爲十二箏宮商自相應鳳鳥鳴雌雄一鳴垂衣裳再
鳴致時雍從此去不返治道竟少隆鄙哉叔孫氏綿蕤變王風寥寥數千載伊誰啓冥矇后皇如有作聲
教垂無窮

遣懷

日入柳風息月上花露多東軒頗幽敞夜靜時一過鳥散庭中樹蟲鳴堦下莎北斗何低昂疎星沒橫河
獨賞誰晤語感慨成悲歌懷哉巖桂臺邈在姑山阿

感興三首

芙蓉生綠水。水綠花更好。採花當及時。莫待顏色老。美人久不見。華髮忽已皓。因之遺芳馨。聊以慰懷抱。失意且勿嗟。令名當共保。悲風從西來。海樹何蕭瑟。薄寒中人肌。毛髮爲慘慄。疏林動鵲鵲。壞壁鳴蟋蟀。出門忽四顧。愴恍若有失。仰面對青天。青天行白日。客有雙寶劍。紫氣射牛斗。年少乍得之。日夜不去手。豈知靈異物。佩服終難久。一朝騰波去。化作蒼龍吼。何時復歸來。爲國殄羣醜。

河決

去年黃河決。高陸爲平川。今年黃河決。長堤沒深淵。濁浪近翻雪。洪濤遠春天。滔滔渾疆界。浩浩襄市廛。初疑滄海變。久若銀漢連。怒聲恣砰磕。悍氣仍洄漩。毒霧飽魚腹。腥風噴龍涎。鼉鼉出滾滾。雁鳧下翩翩。人哭菰蒲裏。舟行桑柘顛。豈惟屋廬毀。所傷墳墓穿。丁男望北走。老稚向南遷。縣官出巡防。小吏爭弄權。社長夜打門。里正朝率錢。鳩工具畚鍤。排戶加笞鞭。分程杵登登。會聚鼓闐闐。雖云免覆溺。誰復解倒懸。瀾漫勢稍降。膏血日已腴。流離望安集。荒原走疲瘡。孤還尙零丁。旅至纔屬聯。園池非故態。鄰里多可憐。貧家租舊地。富室買新田。頽垣吠黃犬。破屋鳴烏犍。秋耕且未得。夏麥何由全。窗泥冷窺風。竈土溼生煙。頃筐摘餘穗。小艇收枯蓮。賣嫌雞鴨瘦。食厭魚蝦鮮。榆膏綠皮滑。蓴菹紫芽圓。乍見情多感。久任心少便。金堤塞已潰。淇園竹爲椹。玉壁沈白馬。冠蓋相後先。舜禹事疏鑿。漢唐勞委填。瓠子空作歌。寶鼎徒紀年。昨聞山東飢。斗米直十千。卽今江南旱。骨肉皆棄捐。倉廩豈不實。賑貸猶迍邐。恐是廊廟遠。不聞道路傳。

恐是天聽高。致使雨露偏。小臣思覆載。百念倍憂煎。躊躇慘莫發。憤結何由宣。作詩備采擇。孰敢希陶甄。平成諒有在。更獻河清篇。

題滕王閣圖

雄城控華甸。傑閣臨芳洲。飛甍起千仞。曲闌圍四周。丹碧何輝煌。文采射斗牛。帝子去不返。頽仰經幾秋。江黑簾雨捲。山青棟雲收。孤舟天際來。揚帆在中流。狂飈薄莫起。坐覺增煩憂。何當掃重翳。白日耀神州。開圖發長歎。天地一浮漚。

題伊尹耕莘圖

碧海晝沸白日淪。禹鼎欲徙湯網仁。長繩短筌行整躋。驅牛獨耕莘野雪。有時仰面一長吁。青天漫漫風烈烈。身居畎畝堯舜心。忍看民生墮昏沉。乾坤闔闢係出處。幡然起作商家霖。先農有詩亦有譜。後世南陽詠梁父。

段節婦吟

河可塞。山可移。志不可奪。義不可虧。妾爲段家婦。年紀方及笄。上堂奉翁姑。入室攜兩兒。兒死夫亦死。此生將何爲。昔如雙鴛鴦。今日爲孤雌。昔如三春花。今日成枯枝。寒風吹短髮。明月照空帷。百年在世能幾時。父兮母兮不我知。青天在上將誰欺。

金溪縣葛烈女廟

金谿廟前草離離。金谿廟中兩女兒。青山猶似舊時色。流水不盡行人悲。翠翹珠珥垂孔雀。廟前深鎖藤

華落靈風蕭颯半空來。髣髴音容啓珠箔。憶昔里中初賦銀。銀賦日急家日貧。父身榜掠痛欲絕。女心憤結何由伸。鬼狐夜號天漆黑。大冶騰騰火光烈。可憐踴躍雙蛾眉。變作兼金白如雪。君不見緹縈上書更肉刑。木蘭遠赴可汗兵。固知才略過男子。不如孝女英烈能捐生。又不見湘妃江邊淚斑竹。韓憑冢上連理木。固知精誠可相召。不如孝女感化獨神速。赤龍並駕參嬋娟。萬古日月懸中天。人生雖死名不死。吁嗟丈夫應愧爾。

送國字張教授

九鳥彈羽鰲斷足。六龍飛光晝相逐。何人造書泄機巧。夜夜天陰聞鬼哭。岐山鳳遠科斗空。戈鳥爰蟲漸湮伏。太史方垂鼎足金。丞相已變斂頭玉。下邳拘囚死復生。三千晚奏雲陽獄。自從毛錐擅楷法。今古紛紛踵遺躅。天生真人起北方。更遣浮圖出身毒。六書垂世盡諧聲。八體彌文貫句曲。黃鐘大呂都協和。鐵畫銀鉤謾摹錄。大音直與造化同。陰翕陽舒驗疏數。先生典教元非輕。直使昌言被殊俗。歸來繫馬在堂堦。莫厭微官就羈束。人生得志亦有時。萬里晴天矜黃鶴。

黃河行

黃河水。水闊無邊深無底。其來不知幾萬里。或云崑崙之山出西紀。元氣融結自茲始。地維崩兮天柱折。於是橫奔逆激。日夜流不已。九功歌成四載止。黃熊化作蒼龍尾。雙缸鑿斷海門開。兩鄂嶄嶄向中峙。盤渦盪激。回湍衝射。懸崖飛沙。斷岸決石。瞬息而爭靡。洪濤巨浪相喧呶。怒聲不住從天來。初如兩軍戰方合。飛礮忽下堅壁摧。又如豐隆起行雨。鞭笞鐵騎驅奔雷。半空澎湃落銀屋。勢連渤海吞淮瀆。天吳九首

今魑魅獨足。潛潭雨過老蛟吟。明月夜照蛟人哭。扁舟側挂帆一幅。滿耳蕭蕭鳥飛速。徐邳千里半日程。轉盼青山小如粟。吁嗟雄哉其水一石。其泥數斗。滔滔汨汨兮。同宇宙之悠久。汎中流以擊楫兮。招羣仙而揮手。好風兮東來。酌河伯兮盃酒。

分題得姑蘇臺送吳元振赴江浙省左丞

姑蘇城外江水綠。姑蘇臺是吳王築。吳王燕罷越王來。館娃夜冷宮門開。落花飛去春無迹。江邊卻起姑蘇驛。馬頭旌節何皇皇。候吏傳呼謁道旁。孤山梅白堤柳黃。相君入坐中書堂。

楊白花

楊白花無定止。昨日宮中飛。今朝渡江水。江水茫茫千萬里。綿輕雪薄春旖旎。把臂踏歌歌未已。石頭城邊風亂起。楊白花無定止。

吳中曲送楊伯幾南遊

鯉魚風起波紋綠。枯葭折騰啼寒玉。榜聲催曉渡江心。聽吳娃舊時曲。楊郎年少輕別離。三尺光芒練帶垂。虎丘山頭候月出。靈巖洞口看雲飛。梅花雪點身上衣。慈母倚門聽馬歸。

輓陳堯草廬吳先生門人也。有俊才。卒年十八。其妻亦痛哭而絕。

乘舟沃酒魚口熱。小袖萊衣雙鳳結。春歸白玉不禁寒。雪兔西沈半山闕。望夫化去孤石裂。死與韓憑誓同穴。鬼狐寒食上新丘。陰風自掃梨花雪。

玩齋集楊維禎序。玩齋爲予通家。每令評其所著。如東南有佳人。嶰谷有美竹。深得比興。日入柳

風息芙蓉生綠水。遠詣選體厚倫理。如風樹春暉。樹風操如葛烈女。段節婦。李貞母。陳堯妻。感古如蒼梧。滕閣紀變如河決。蘇臺論人物如耕莘。蹈海遊方之外。如子虛道人。楊白花。吳中曲。有古樂府遺音。國字黃河。可補本朝闕製。其他所作。固未可一二數也。

送劉彥明從經略使還

經略江南開幙府。曾因三語辟劉郎。千金海上來騏驎。五色雲間識鳳凰。思入金莖秋滴露。行隨玉節晝飛霜。還朝定上平南策。應從夔龍到建章。

詩藪全篇整麗。首尾勻和。

句

紅蓮日湧神仙幕。翠柏霜飛御史臺。千金海上求騏驎。五色雲間下鳳凰。貔貅萬竈新趨幕。虎豹千門舊直廬。小雨挾雲行斷岸。亂山排浪入孤城。詳趙孟頫下。

元詩紀事卷二十一

黃公望

公望字子久自號大癡哥富春人

西湖竹枝集少有大志試吏弗遂歸隱西湖笱簋泉詩工晚唐畫獨追關仝其據梧隱几若忘身世蓋游方之外非世士所能知者也

西湖竹枝詞

水仙祠前湖水深岳王墳上有猿吟湖船女子唱歌去月落滄波無處尋詳燕不花下

題雲林畫

遠望雲山隔秋水近看古木擁陂陀居然相對六君子正直特立無偏頗

珊瑚網倪雲林六君子圖跋廬山甫每見輒求作畫至正五年四月八日泊舟弓河之上而山甫篝燈出此紙苦徵畫時已憊甚只得勉以應之大癡老師見之必大笑也大癡詩云云朽木居士云云吳興錢雲云云

又此圖因大癡詩有居然相對六君子句遂名其圖乃松柏樟楠槐榆六樹行列修挺疎密掩映位置得宜而皆在平地且氣象蕭索有賢人在下位之象豈感當時胡運否塞高流隱遁而爲是歟廬山甫別號白石先生妙香道者識於藥房

錢雲

雲號秦窩道人吳興人

題雲林六君子圖

黃公別去已多年忽見雲林畫裏傳二老風流遼鶴語悠然展卷對江天見黃公望下

吳鎮

鎮字仲珪嘉興人自號梅花道人有梅花菴稿

六研齋筆記吳仲圭將歿命置短碣塚上曰梅花和尚之塔人或怪之曰此有意久當自驗未幾楊髡毀掘江南諸墳卽林和靖孤山之骨不免發露仲圭以碣所署疑爲釋流竟免案此不足信是時鎮未死

自題畫

枝枝自參差葉葉無限量不根而自生換卻諸天相

六研齋筆記吳仲圭爲松巖和尚寫竹枝一卷簡淡蕭遠有天成之趣自題云云至正庚寅梅沙彌奉爲松巖和尚助喜

墨菜畫卷

菰根脫地翠毛溼雪花翻匙玉肪泣蕪蕪金谷暗塵土美人壯士何顏色山人久刮龜毛毳囊空不貯椰揄錢屠門大嚼知流涎淡中滋味吾所便元脩元脩今幾年一笑不直東坡前

鐵網珊瑚自跋。梅花道人因食菜糜戲而作此。友人過廬索墨戲。因書而遺之。聊發同志一笑也。至正己丑。

平林野水圖

平林方漠漠。野水正湯湯。蒼莽日欲暮。年華客異鄉。草店月初冷。村路迂長。渡頭人散後。漁父正鳴榔。清閼閣集。元初真士嘗居嘉禾紫虛觀。好與吳仲珪隱君游。故得其詩畫爲多。今年十月。余始識元初。卽出示此幀。命僕賦詩。因走筆次吳隱君詩韻題於上。隱君自號梅花道人云。至正二十一年歲在辛丑。倪瓚記。

倪瓚

瓚字元鎮。無錫州人。嘗自謂癡瓚。亦曰倪迂。有清閼閣稿。雲林遺事。蹤跡多在松陵笠澤間。陸莊有蝸牛廬。則其嘗棲止處。荆溪善權離墨銅棺。其游甚數。嘗避兵泖上有出泖詩。又閣前置梧石。日令人洗拭。及苔蘚盈庭。綠緝可坐。每遇墜葉。輒令童子以針綴杖頭刺出之。不使點壞。

又元鎮好僧寺。一住必旬日。篝燈木榻。蕭然宴坐。時操紙筆作竹石小景。客求必與。一時好事者購之。價至數十金。壯年有巨幅雅宜山圖。甚爲當世所珍。元鎮又有雅宜山竹枝詞二首云。雅宜山舊名娜如山。蓋虞道園所命名。然未若娜如之名近古也。

又張士信聞元鎮善畫。使人持絹縑侑以幣。求其筆。元鎮裂其絹而卻其幣。一日。士信與諸文士

遊太湖聞漁舟中有異香。此必有異人。近之。乃元鎮也。士信欲手刃之。諸文士力勸免。命重加箠辱。當撻時。噤不發聲。後人問之。元鎮曰。出聲便俗。

七修類稿。入國朝。盡散其產。不過其稅。而催科者集其室。逃入蘆洲。燕龍涎以自適。因香被執。囚於有司。每傳食。命獄卒舉案齊眉。卒問其故。不答。旁曰。恐汝唾沫及飯耳。卒怒。鎖之溺器之側。衆雖爲祈而免。憤哽成疾。今人以漁舟之香爲祥。止庵太祖因得而誅。以元鎮爲太祖投之廁中。皆非也。

寄王叔明

能詩何水部。愛石米南宮。允矣英才最。居然外祖風。釣絲煙霧外。船影畫圖中。他日千金積。陶朱術偶同。

又

幾夢山陰王右軍。筆精墨妙最能文。每憐竹影搖秋月。更愛山居寫白雲。祕笈封題饒古趣。雅懷蕭散逸人羣。今年七夕閒多事。曝畫繙書到夕曛。

西湖志餘。王叔明蒙其先吳興人。趙文敏公之甥也。隱於仁和之黃鶴山。號黃鶴山樵。善詞翰。畫學王維。與吳興倪元鎮詩畫齊名。元鎮嘗寄之詩云云。又云云。

絕句

松陵第四橋前水。風急猶須貯一瓢。敲火煮茶歌白苧。怒濤翻雪小停橈。

又

人家住近江城外。月色波光上下天。風景自佳時俗異。泊舟閒詠白雲篇。

又

白鷗飛處夕陽明。山色隔江眉黛橫。試看三高祠下水。悠悠中有別離情。

清河書畫舫。正月十四。舟過吳江第四橋。大風浪中。貯水一瓢而去。乃賦小詩云云。是夜泊舟吳江城外人家。水月皓然。與希言理詠久之。明日題壁詩云云。十五日與希言謁三高祠。望江上諸山。爲寫隔江山色圖。并賦詩贈別云云。

題高房山尙書著色山水

白雲孤鶴暮知還。晚泊錢唐看越山。珍重今朝重展卷。吟詩作賦北窗閒。

清河書畫舫。房山高尙書。以清介絕俗之標。而和同光塵之內。蓋千載人也。儼居餘杭。暇日策杖。攜酒壺詩冊。坐錢塘江濱。望越中諸山。岡巒之起伏。雲煙之出沒。若有得於中也。其政事文章之餘。用以作畫。亦以寫其胸次之磊磊者歟。因閱允同文學所藏著色山水一卷。後有默菴賦詩。展詠永日。遂紀尙書之一二。并次默菴韻詩題畫上云。倪瓚。

懷歸

久客懷歸思惘然。松間茅屋女蘿牽。三杯桃李春風酒。一榻菰蒲夜雨船。鴻迹偶曾留雪渚。鶴情原止在芝田。他鄉未若還家樂。綠樹年年叫杜鵑。

中秋

經旬臥病揜山扉。岩穴潛神似伏龜。身世浮雲渡流水。生涯煮豆爨枯萁。紅蠶捲碧應無分。白髮悲秋不自支。莫負尊前今夜月。長吟桂影一伸眉。

雲林遺事。老年遊歷江湖。多寓琳宮梵刹。有懷歸詩云云。洪武甲寅還鄉。時已無家。寓姻親鄒惟高家。是歲中秋。鄒氏開宴賞月。元鎮以脾疾戒飲。淒然不樂。乃賦詩云云。不久竟以是疾卒於鄒氏。

題畫

蕭蕭風雨麥秋寒。把筆臨摹強自寬。賴有口君相慰藉。松肪笏脯勸加餐。

漁洋山人精華錄。太液兄家舊藏倪元鎮畫。自題云云。此詩甚佳。而雲林集不載。

秋林山色圖

寓館風雨秋。閒門草苔翳。懷人思奮飛。攜書此留滯。玉琴和幽吟。竹牖聊靜憩。西山日在望。白雲淡生媚。寂寞棲德園。清虛捐世味。石竈有餘烟。未收煮茗器。

好古堂書畫記。倪雲林設色秋林山色圖。遠山帶夕陽色。松二。絳葉樹一。衰柳一。樹幹多用渴筆。平坡淺沙三數層。石出齒齒。儼然霜寒水落境也。上題云云。八月二日。寫秋林山色并詩。以遺伯循文學倪瓚。

八月十八日。蕭閒道館。聽袁南宮彈琴。是日風雨蕭然。有感而作。玉琴轉清亮。風雨更飄飄。疎桐蔭高館。朱槿耀芳條。生物曷可遏。撫事發長謠。弱齡陪清譙。櫓髮想垂髫。

相見日以老。離居夢且遙。秋江渺雲水。去鶴影遙遙。

草堂雅集。余與元鎮初識時。元鎮始弱冠。余年六十。今余年八十有六。而元鎮四十餘矣。蕭閒館東齋庭下。向見盛鍊師手種二桐。忽已十五年。今桐蔭可蔽十車也。因誦桓司馬樹猶如此。人何以堪之語。元鎮復賦此詩。相與諷詠。爲之泫然。袁矩書。

題畫贈九成

故人鄭掾史。邀我宿溪船。把酒風雨至。論詩煙渚前。晨興就清盥。思逸愛春天。復遇武陵守。共尋花滿川。自跋至正十二年三月八日。冒風雨過九成。荆溪舟中。劉德方郎官。方舟煙渚。留宿談詩。明日快晴。移舟綠水岸下。相與嘯咏。仰睇南山。遙瞻飛雲夾岸。桃柳相廂。如散綺霞。掇芳芹而薦潔。瀉山瓢而樂志。九成出片紙。命畫眼前景物。紙惡筆凡。固欲騁其逸思。大乏騷騷康莊也。歐陽公每每云。筆硯精良。人生一樂。書畫同理。余亦云焉。時舟中章鍊師岳隱者對弈。吳老生吹洞簫。

春日雲林齋居

池泉春漲深。徑苔夕陰滿。諷詠紫霞篇。馳情華陽館。晴嵐拂書幌。飛花浮茗盃。階下松粉黃。窗閒雲氣暖。石梁蘿薦垂。翳翳行蹤斷。非與世相違。冥棲久忘返。

元詩選。此詩集中又載改本云。臨池春流駛。掃地夕陰滿。正襟味道言。超遙坐溪館。嵐嶺當書榻。煩襟一舒散。靡靡松花黃。逐逐雲氣暖。石梁青苔合。於焉人跡斷。故非與世疎。冥栖遂忘返。元音所載卽此。

饒介之云。堂扁雲林二字。雲字正摹天台白雲寺額。林字摹廬山東林寺額。皆右軍得意筆也。

早春對雨寄懷張外史

林臥苦泥雨。憂來不可絕。掀帷望天際。春風吹木末。飛蘿散成霧。細草綠如髮。念子獨高世。南山修隱訣。撫弄無絃琴。招邀青天月。神安形不彫。跡高行自潔。思之不可見。飢渴何由歇。願爲鸞鶴翔。南遊拂松雪。元詩選。此詩集中又載改本云。林臥對雲雨。憂來不可絕。褰帷望庭際。春風動林樾。飛蘿散成霧。烟草綠如髮。不見高世人。飢渴何由歇。神鸞戲玄圃。巨鱗偃溟渤。爾亦碧巖中。遁形修隱訣。燒香庭竹淨。洗研池苔滑。取瑟和流泉。操瓢酌明月。跡高行亦苦。冰槩忌芳潔。何當往相尋。拂石棲松雪。今新本所刻。竟自神鸞戲玄圃句起。而題無早春對雨字。不知何所據也。

竹枝詞并序錄五

會稽楊廉夫。邀余同賦西湖竹枝歌。余嘗莫春登瀕湖諸山而眺覽。見其浦溆沿洄。雲氣出沒。慨然有感于中。欲托之音調。以申其悲歎。久未能成章也。因覩斯作。爲之心動。言宣爲詞。凡八首。皆道眼前不求工也。

錢王墓田松柏稀。岳王祠堂在湖西。西冷橋邊草春綠。飛來峯頭烏夜啼。湖邊女兒紅粉妝。不學羅敷春采桑。學成飛燕春風舞。嫁與燕山遊冶郎。阿翁聞說國興亡。記得錢王與岳王。日莫狂風吹柳折。滿湖煙雨綠茫茫。春愁如雪不能消。又見清明賣柳條。傷心玉照堂前月。空照錢塘夜夜潮。

噫噫歸雁度春江。明月清波雁影雙。化作斜行箏上字。長彈幽恨隔紗窗。

元詩選倪高士詩集刻本係荆溪蹇曦編集所載竹枝詞八首。敍次甚明。新刻本止載四首。又不載小序。而于楊鐵崖西湖竹枝詞所載雜見集中。并列朝詩選所錄二詩。亦分兩處。鐵崖所載四首。止第二首與此頗同。附記于此。其詞云。鷓鴣生長最高枝。雁墻銜將向北歸。天長水闊無消息。只有空梁燕子飛。湖邊女兒紅粉妝。不學羅敷朝采桑。自從學得纖腰舞。嫁與城西遊冶郎。愁水愁風人不歸。昨夜水沒釣魚磯。踢盡蓮根終無藕。著多柳絮不成衣。桐樹元栽金井西。月明照見影離離。不比蘇公隄畔柳。烏鴉飛過鵲鳩棲。

因吳國良過玉山草堂輒賦長句奉寄

玉山樹色隱朝陽。更著漁莊近草堂。何處唱歌聲欸乃。隔雲濯足向滄浪。珍羞每送青絲絡。佳句多投古錦囊。幾問樵船尋好事。辟疆園圃定非常。

元詩選玉山主人欲延楊鐵崖于家塾。鐵崖報曰。必得當世清雅高潔之士。如倪雲林者。一札至。卽如約耳。玉山因託雲林素相習者。操舟出邀至玉山家。已搆別業。悉如蕭閑清閤之製。雲林驚喜。請見玉山。告以鐵崖之意。欣然致書焉。自是三人相與結驩。往來無間。

清明日風雨淒然。舟泊東林西澣。步過伯璇徵君高齋。焚香淪茗。出示燕文貴秋山蕭寺圖。展玩良久。因賦一絕。

野棠花落過清明。春事怱怱夢裏驚。倚檻微吟沙際路。半江煙雨暮潮生。

元詩選舊本作清明後題云野棠花落又清明楊柳青青人耦耕春物闌珊成底事半江疎雨暮潮生

王冕

冕字元章諸暨人自號煮石山農有竹齋集

菽園雜記所居與一神廟切近鑿下缺薪則斧神像鑿之一鄰家事神惟謹遇冕毀神像輒刻木補之如是者三四然冕家人歲無恙補像者妻孥沾惠時時有之一日召巫降神詰神云冕屢毀神神不之咎吾輒爲新之神何不祐耶巫者倉卒無以對乃作怒曰汝不置像彼何從而鑿耶自是其人不復補像而廟遂廢至今以爲笑談

玉壺冰買舟下東吳度大江入楚淮歷覽名山川或遇奇才俠客談古豪傑事卽呼酒共飲慷慨悲吟人目爲狂奴

宋學士集北游燕都館秦不花家秦不花薦以館職冕曰公誠愚人哉不滿十年此中狐兔游矣霏雪錄游大都時臨川危素爲翰林學士居鐘樓街山農嘗見其文而不相識一日危騎而過山農所與之坐而不問其姓名徐曰君非鐘樓街住耶危曰然更不出他語而罷人問之山農曰吾觀其文有譎氣目其人舉止亦然料知必危太僕也

山棲志隱九里山種萱三畝粟倍之樹梅花千桃杏居其半芋一區薤韭各百本引水爲池種魚千餘頭結茅廬三間自題爲梅花屋

墨梅

我家洗硯池頭樹。個個花開淡墨痕。不要人誇好顏色。只留清氣滿乾坤。

應教題梅

獵獵西風吹倒人。乾坤無處不生塵。胡兒凍死長城下。始信江南別有春。

七修類稿。王冕身長多髯。少明經不偶。卽焚書讀古兵法。戴高帽。披綠簑。着長齒屐。擊木劍。行歌於市。人以爲狂士之負才氣者。爭與之游。平生嗜畫梅。畫成未嘗無詩也。有詩云云。或以是詩刺時。欲執之一夕遁。後太祖物色得冕。因與樸飯蔬羹。山農且談且食。上喜曰。可與共大事。授諮議參軍。一夕暴卒。應制作云云。今竹齋集中未刻。

水東日記。初見太祖。應制題梅云云。睿意極眷想之。

案列朝詩集。應教詩下云。余家有元章眞蹟。下二句云。清高只有老梅樹。照水開花個個眞。

梅花屋

荒苔叢篠路。縈迴繞澗新。栽百樹梅。花落不隨流水去。鶴歸常帶白雲來。買山自得居山趣。處世渾無濟世材。昨夜月明天似洗。嘯歌行上讀書臺。

鐵網珊瑚。飯牛翁。卽煮石道者。閑散大夫新除也。山農近日號老村。南園種菜時稱呼。元章字。冕名。王姓。今年老異於上年。鬚髮皆白。腳病行不得。不會奔趨。不能諂佞。不會詭詐。不能干祿仕。終日忍飢過。畫梅作詩。讀書寫字遣興而已。自喝曰。旣無知己。何必多言。呵呵。

題畫飛白竹

蕭灑三君子。是伊親弟兄。所期持大節。莫負歲寒盟。

書畫史。王元章飛白竹一軸。題云。己丑歲夏五月二十二日。會稽王冕寫云云。赤城陶君九成。故家子也。淳粹雅澹。有出塵風韻。讀書之暇。每以翰墨自適。余寓西湖之東。九成時來會談論。竟日。退有不忍舍者。其仲季皆清爽。真芝蘭玉樹。不下王謝家也。遂題而歸之。

句

生前不繫黃金帶。身後空餘白玉簪。白石皆成佛。蒼頭半是僧。

閒居錄。至元間。釋氏豪橫。楊總統發掘陵墓。奪取宮觀。孤山和靖墳亦被發。然無他物。但得一白玉簪。屍已空矣。其亦仙者耶。王元章有詩云云。後又鑿靈鷲山壁爲佛像。時小民之無賴者。多爲僧以逞奸。王復有詩云云亦佳。

又

冰花個個團如玉。羌笛吹他不下來。

梧溪集。平生嗜畫梅。有自題云云。或以是刺時。欲執之。一夕遁去。

鄭韶

韶字九成。吳興人。至正中。辟試漕府掾。自號荅溪漁者。有雲臺集。

絕句四首

杏花簾幕看春雨。深巷無人騎馬來。獨有倪寬能憶我。黃昏臨屐到蒼苔。
春色三分都有幾。二分已在雨聲中。牆東兩個桃花樹。恨殺朝來一番風。
十日春寒早閉門。風風雨雨怕黃昏。小齋坐對黃金鴨。寂寞沈香火自溫。
春寒時節病頭風。惆悵年華逝水同。世事總如春夢裏。雨聲渾在杏花中。

清河書畫舫。至正十四年二月二十五日雨。郊君九成賦絕句四首云云。倪瓚留宿高齋。篝燈爲
寫春林遠岫圖。并次韻四詩題畫上。時夜漏下三刻矣。佩韋齋中書。

陳方

方字子貞。自號孤篷倦客。京口人。

元詩選。如門前灌木春啼鳥。屋畔長松夜宿雲。天寒客裏輕相別。花落孤村喜獨來。隨事感發。鍛
鍊最工。

雲林生惠山圖次元韻

佳樹陰森欲礙空。畫成夜落燈花紅。絕憐帶經自鋤者。未忍竟別天隨翁。汾河春雲散高柳。湘水微茫綠
於酒。翁歸天末見青山。臨風莫負揮弦手。

清閨閣集。至正五年三月八日。玄素先生來林下。瓚乃賦詩曰。吳淞江水春映空。波浪沄沄霞映
紅。耕田鑿井居其左。令我長懷甫里翁。夢見維舟江畔柳。剝啄敲門散盃酒。整冠起接平生歡。石
逕蘭芳重攜手。雨後共步林下。正見惠山先生命。瓚寫之。畫訖。因書此詩於上。張外史陳先生見。

之必大笑也。倪瓚記。

楊謙

謙號平山別號竹西居士。又號清溪道士。松江人。

題貞期爲楊竹西草亭圖卷

翠玉蕭蕭在屋東。主人號作竹西翁。品題莫說揚州夢。好寫閒雲入卷中。

六研齋筆記。楊瑀爲江浙行省掾屬。晚棲峯泖閒。植竹千竿。自號竹西居士。趙仲穆爲作圖。楊廉夫爲作記。自題句云云。仲穆詩云。離外涓涓閒水流。竹西花草弄春柔。茅檐相對坐終日。一鳥不鳴山更幽。張伯雨詩云。問訊揚雄宅。深居在竹西。風林宜月影。春日聽鶯啼。東老應同樂。南隣憶舊題。東風又花草。相與及幽棲。馬文璧云。楊子宅前好修竹。因看萬个碧交加。薰風滿簾吹蒼雪。春雨充庖盡玉芽。茶臼或聞來北牖。籊龍未許過東家。時時仿佛揚州去。拄杖尋君又日斜。錢維善詩曰。爲竹移家亦苦辛。我如東道竹如賓。石頭路滑機鋒峻。峴首碑沈感慨新。淡月半窗金弄影。清風一徑玉傳神。明當拄杖敲門去。愛汝草玄亭上人。

案此詩。李日華以爲楊元誠作。癸集據松江志載。楊謙別號竹西。而引謙不礙雲山樓歌詠事爲證。又疑元誠謝歸鶴沙時。變易名號。又疑日華筆記多舛誤。未可爲據。然癸集庚上。趙茂原櫺有楊竹西草亭圖卷詩序云。至正乙未春。余來浦東。張溪楊君平山。植竹數百竿於西林。結亭蒼翠閒。扁曰竹西。因以爲號焉云云。平山爲楊謙號。其非元誠無疑。

不礙雲山樓歌

海之雲兮油油。雨我田兮有秋。海之山兮離離。障我流兮東之。雲之動兮颺颺。吾與雲動兮。動而不遷。山之靜兮層層。吾與山靜兮。靜而不停。

楊維禎不礙雲山樓記。至正九年。余抵松之張溪。溪之東有大族。爲楊竹西氏居之。南扁其樓曰。不礙雲山。竹西宴於樓之上。牕戶四闢。萬頃之雲。兩鰲之島。皆自獻於眉睫之下。竹西風日佳時。岸巾樓上。手揮五絃之餘。與一二解人。談至理。旣以八牕無礙者。闢於目。復以八荒無礙者。洞於心。雲山之觀。盡矣備矣。竹西憮然若有得。起舉酒而自歌云云。又歌云云。併錄其歌以爲記。

沈良

良號華溪雲閒人。

題王叔明做董北苑風雨蕭寺圖

墨雲擁高山。頃刻風雨至。劃然海潮聲。草木爭偃地。曠野少人行。山僧獨歸寺。衲衣盡沾溼。敲戶何急事。倉皇前村民。乘屋一何亟。一婢已抱瓮。一婦更持器。重茅惜被卷。破屋家所寄。戴笠者漁郎。理網屈雙臂。老翁若望家。擔物終不棄。陸走尙甚危。水行可無畏。前溪風雨惡。篙折水流駛。行者當早歸。居者不豫備。北苑爲此圖。黃鶴師其意。想見晚來晴。雲淨山橫翠。始信雲時間。真宰特相戲。四朝詩。

自跋。余家有董北苑風雨蕭寺圖。是思陵所題。筆法高古精絕。叔明相訪。出示之。稱賞不置。念輒以贈之。叔明爲臨此卷。余展賞題此俚言。時至正庚寅秋七夕次日也。華溪沈良。

張監

監字天民金壇人至正閒避地荆溪。

題秀野軒圖并序

余昔遊吳中諸山至周氏秀野軒領覽天池玉遮之勝今數年矣近歸寓軒獲觀周侍御之大篆朱提學之新圖恍然若夢游也景安求余著語聊爾塞責毫餘才盡媿無佳語耳

我憶天池與玉遮幽軒水木澹清華笙竽遠振風林竹錦綺晴連曉徑花山厨敷牀朝看雨澗泉漱石夜分茶番陽大篆睢陽畫不負春陵處士家

秀野軒記吳人周君景安居餘杭山之西南其背則倚錦峯之文石面則挹貞山之麗澤右則肘玉遮之障左則盼天池之坂雙溪界其南北四山之間平疇沃野草木蔥蒨卓然而軒者景安之所遊息也軒之傍幽蹊曲檻佳木秀卉翠駢玉映於闌楯之間得江浙行省左丞周公題其軒之顏曰秀野以誌其美至正二十四年歲甲辰四月十日睢陽山人時年七十有一朱德潤畫并記

沈廷珪

廷珪字德璋橋李人

題破窗風雨圖

劉君性嗜學孜孜事三餘孤燈破窗下簡編自卷舒蕭蕭風雨來吾伊聲自知安貧人所難味道心常愉我聞顏子淵簞瓢陋巷居千載稱亞聖聲價重璠璣又聞陶淵明所處亦敝廬蕭然環堵間左右惟圖書

吁嗟世之人。惟樂耳目娛。華居美飲食。所務安其軀。良心日以斲。疇能返厥初。最哉劉孝廉。聖賢以爲徒。
鍾虞

虞。字安期。吳江人。

前題

一室蕭然誰與同。清如獨鶴寄樊籠。詩成春草池塘上。夢繞玉堂雲霧中。花氣每隨嵐氣入。書聲時與竹聲通。從容更覓新晴好。臥看東林日影紅。

何恆

恆。字口口。練川人。

前題

一室蕭然四壁空。客懷況復雨兼風。溼沾衣服愁仍重。清到肌膚句轉工。知命肯隨時變化。甘貧宜爲道汗隆。夜深尙對羲皇易。應怪寒燈不耐紅。

珊瑚網。破窗風雨記。大名劉易性初氏。避地吳中。今年從吳興來。見余草玄閣。出玉坡周公所篆。破窗風雨四大字。求余文志之。至正甲辰嘉平初吉。東維叟會稽楊維禎。

又破窗風雨卷跋。劉君性初。以破窗風雨自居。諸公賦詩成卷。因作此圖。時至正廿六年。歲在丙午暮春之初。王蒙。

石字

字宇宙亭。

題劉孟功竹深處

高風遠市門。植竹千簣簣。蒼雪下庭砌。元陰翳齊房。晴旭仙聚島。鮮飈鳳鳴陽。碧滋潤簡編。翠沍浮冠裳。披圖有真趣。夙抱非羈寓。遊蹤自南北。夢寐還相遇。朝哦棲遁詞。暮誦琳琅句。悅卽故園居。森森竹深處。

黃仲瑤

仲瑤字□□號隆谿。

竹深處詩

樂彼數畝園。青青萬竿竹。中有讀書人。開軒伴幽獨。軒前輕陰埽不開。軒後繁聲疑雨來。春風淡蕩拂翠羽。白露泠泠生莓苔。入窗無塵從不埽。吐薜在地瓊花老。夜深對月任光微。晝永乘風覺涼好。有時早起坐石牀。口中吹笙鵝管長。有時枕書臥軒中。清興宵入蓬萊宮。蓬萊宮闕幾千里。紅塵不到看書几。彩鸞紫鳳情翩翩。一段清光照流水。昨日我來造竹下。主人開門笑相迓。山肴滿盤酒滿壺。醉歌一曲爲君謝。豈不見園中桃。又不見道旁柳。昔日媚春華。今日成衰朽。何如此君含彩故青青。獨向軒楹託根久。勸君更種松與梅。歲寒清絕成三友。

鄧資深

資深字□□號文江。

竹深處詩

種得篋管數百竿，築亭深處伴秋寒。危梢滴露清堪掬，密葉籠雲翠作團。夜月虛濤翻素壁，晚風清佩響雕欄。漪漪絕勝淇園好，會看窗前宿鳳鸞。

倪維哲

竹深處詩

吳門煙雨掩荆扉，湘楚清兮一徑微。叢叢覆蔽空忘晝，永涼生入夜覺寒歸。王猷疎散人皆仰，劉向操持世不違。儒業已閒沾寵渥，休將宦思戀初衣。

趙次進

竹深處詩

高人適幽趣，羨此琅玕清。新梢和露滴，舊葉迎風鳴。結屋佳深處，時見茶煙橫。焚香手遺編，詎有塵慮縈。一自綰章綬，夢入吳中行。覺來尙幽意，滿抱涼吹生。

金灝

灝字□□秀州人。

竹深處詩

碧琅玕下覓幽蹤，行盡齋居路始通。煙歛月梢金瑣碎，風生雲幹玉琤琮。秋光滿座陰長合，靛色清神暑自空。淨掃蒼苔夜留客，解衣磅礴興無窮。

珊瑚網。錢唐張時竹深處賦序云：姑蘇劉孟功先生，性嗜竹，種之數萬竿，蔚然成林。孟功日居其

中同志者過之輒留。迺取杜少陵句。顏其所居曰竹深處。鴻儒碩士咸爲之品題。

陳樵

樵字居采。婺州東陽人。

西湖竹枝集。居開谷間。衣鹿皮衣。著書自號鹿皮子。

夜闌曲

碧宇星回夜漫漫。靈蕪烟煖重薰薦。冷翠香銷青桂枝。冰荷蓋光光遶帷。花樓臨舞金菱鞋。吳羹蜀酒精瓊糜。酒闌半解龍綃衣。春朝曲渚聞鷓鴣。

七夕調

內人拜月金鋪戶。鳳宿梧枝秋葉下。露華入秋玉階寒。織署錦工催祭杼。月下金鈿照骨明。同心絲綉紅生縷。素瓜碧實上繪樓。夜闌颺馭下銀州。

瑤臺月

銀漢西流烏接翼。回首人間化爲碧。瑤臺月裏可避胡。三郎錯落歸魚鳧。霓裳月裏親偷得。又怪李暮偷擊笛。

海人謠

海南蠻奴髮垂耳。朝朝採寶丹涯裏。夜光盈尺出飛魚。柏葉收珠寒盞盞。幽箔連錢生綠花。切玉蠻刀如切水。九譯來朝萬里天。北風不動琅玕死。

出塞曲爲成道園李總督賦

鳳樓夜啼光燭地。將軍一出機槍死。行塵不動人歸市。帶甲如雲自天至。取君甲兵爲君洗。分明袖有銀河水。手中遺下泥丸。不封函谷封秦山。

雁來紅

東朝一書成百戰。上林一書旌節返。又傳騎子一函書。人不如禽解邊難。自從燕滅秦晉亡。是非直到空中雁。蘇郎寒絕雁來紅。腳下胡姬殘綵線。願燕在北秦在西。雁去雁來無是非。

長安有狹斜行

長安出狹斜。方駕秦中客。云是牛丞相。來自薄家宅。薄家萬戶侯。朱門映椒壁。長秋車馬來。賓客御瑤席。金屋貯尹邢。阿嬌淚霑臙。燕燕慵來妝。繁華照春色。轉蕙光風翻。趙帶徘徊月。到班姬牀。班姬輟芳翰。執扇從風揚。明姬闢百草。玉環御雲裝。向來溫柔地。盡入白雲鄉。何以慰王孫。琵琶隨騶駟。何以奉燕燕。龍舞歌慨慷。何以奉明妃。綠珠奏清商。嫫母挾無鹽。搔頭愛宮粧。

大雅集評曰。裴格不襲語。善學小李者。雁來紅。狹斜行。匠意尤遠。

北山別業三十八咏

太霞洞冬春居此洞

石林深處飯胡麻。幾度登臨送日車。雪到峯頭猶是雨。雲生石上半成霞。相看露下朝華草。不放春歸冷豔花。地冷花遲。魏紫姚黃風捲盡。人間峯蝶到山家。

鹿皮子集原注首二句一作山中穴處逞春和洞下栽桃攬物華第五六七八句一作樹臨陰壑元無影日傍晴崖不度花莫夜相過玩清月山前鄰笛兩三家

飛雨洞盛夏居此洞流沫成雨中有小泓

蜀天萬里入東州冷翠侵扉翠欲流朱鯉有靈時出穴白狐生火幾經秋山中十暑寒猶在潭上千年雨未收昨日西林晞白髮濕雲依舊滿貂裘

鹿皮子集原注首句一作天梯石棧落東州

碧落洞秋初入居此洞

灝氣翻衣露滿懷人言天上我驚猜近從月裏種花去遙見鼎湖飛葉來使我加餐有黃獨爲人題勝是青苔杖頭化作光明燭願逐東皇下九垓

鹿皮子集原注又一首云聽盡東林夏雨聲自攜桐几下巖扃白雲持得人誰寄明月攀來桂未生雨後引苔書洞榜霞邊摘葉寫山銘如何地絕重黎後猶自披雲望玉京

羅衣洞

羅衣草帶護煙簑楚國狂夫尙楚歌石影到溪千丈勁藤痕入水八分多泉分小白山中雨衣取雲門寺頂荷洞口樵人誰語汝棋邊相遇懶相過

鹿皮子集原注首句一作手攜綠玉下山阿第五六句一作卷中真跡臨紅葉身上生衣捲碧羅又作僧披襪葉收芝菌客厭羅衣種芰荷

五雲洞

飛梁壓水石苔蒼。洞口飛泉瀉石梁。屋上春霞常易散。雪中樹影不曾長。陰雲滿地晴飛白。雨蝶依林暗貼黃。手裏芙蓉渾忘卻。蓑衣日日釣滄浪。

鹿皮子集原注。飛梁一作漁磯。第五六句一作松花入酒傳香碧。貝葉分題寫硬黃。又作飯收菰蔣叢邊米。藥聚梧桐葉上霜。

東白草堂

屋後茅籬與水平。屋頭怪石列爲屏。捲簾帳下雲先去。步月庭前樹欲行。白雨侵階渾是綠。黃童食柏久應青。如何庭下朝陽影。盡在少微巖上明。

鹿皮子集三四句一作齋餘瓢裏水猶活。晦近花前月尙生。

圓谷澗

水樂聲中共夕涼。雪花片片灑衣裳。山中古樹如魚大。水上遊絲似線長。柳絮散爲萍梗紫。花根染作牡丹黃。自從西域神僧死。澗上無人識水香。

鹿皮子集三句一作山中碩果如瓜大。五六句一作采藥奴舂菰作米。談經人指樹生蠶。

秦素壇

竹死煙寒樹不榮。石壇千仞與雲平。春來天上元無色。雨到人閒方有聲。夢入松風吹不斷。詩如芳草剪還生。陶山北望飛霞散。夜半有時孤鶴鳴。

鹿皮子集七八句一作他年學製鄒生律盡種山樊與杜蘅

山齋一名草易齋

幾夜山中乍月昏晨朝挾冊傍初陽懸崖種菊紅多葉開戶見山青一方石上韋編新汗竹研中白露半成霜義皇未盡非無易石室遺書不用藏

鹿皮子集三四句一作登臺望越丘陵遠開戶草玄枝蔓長

壺天在澗左一作壺天閣

宮殿隨身信所如寓形一室似樓居神遊八極皆吾土天入三山不滿壺雨夜無人共清月水扉幾度種丹魚山童長怕漁舟至不放桃花下五湖

鹿皮子集一作剝海中閒別一區普香香積是通衢花連葉蔓疑無路天入靈山不滿壺芥裏須彌空處有階前地影月中無自從漁父穿花去不放桃花下石渠

西峴峰

雨後看山對酒歌飛紅駭綠滿巖阿萬重山外碧方寸五色雲中青最多亭下日生霞映草松根苔長葉成窩江源分付西流去莫作門前東逝波

鹿皮子集第二句一作紅銷綠漲草成窩五六句一作峯漸欲危通月過路遮不斷奈春何

書房

休名不口死如麻挾冊空山望碧霞書在終難招李杜灰寒無處覓陰何春歸一尺人閒淚雲暖萬重煙

際花風景尙堪留研席。浮生憂樂向來多。

鹿皮子集三。四五六句。一作門外雨生雲。沒鶴松根。苓長葉成窩。天雞颺下唐時綬。越鳥銜來楚地花。

句

掃葉僧將猿共爨。賣花人與蝶俱還。

筆精陳樵有詩一卷。如云云。殊有巧思。

元詩紀事卷二十二

潘純

純字子素。廬州合肥人。晚居淮浙。爲行臺御史大夫納璘子安安所殺。輟耕錄子素嘗作輓卦。譏世之仕宦人。以突梯滑稽而得顯爵者。

題畫

阿翁作畫如說法。信手拈來種種佳。好水好山塗抹盡。阿婆臉上不曾搽。

輟耕錄嘉興林叔大。掾江浙行省時。貪墨鄙吝。然頗交接名流。以沾美譽。其於達官顯宦。則刲羔殺豕。品饌甚盛。若士夫君子。不過素湯餅而已。一日延黃大癡作畫。多士畢集。而此品復出。譏諠交作。叔大赧甚。不敢仰視。遂揖潘子素求題其畫。子素卽書一絕句云云。大癡笑謂曰。好水好山。言達官顯宦也。阿婆臉不搽。言素面也。言未已。子素復加一句云。諸佛菩薩摩訶薩。俱不解其意。子素曰。此謝語。卽僧家懺悔也。閨堂大笑而散。叔大數日羞見客。

弔岳王墓

海門寒日澹無輝。偃月堂深晝漏遲。萬竈貔貅江上老。兩宮環珮夢中歸。內園羯鼓催花發。小殿珠簾看雪飛。不道帳前胡旋舞。有人行酒着青衣。

輟耕錄最膾炙人口者如云云。

案此首光岳英華作蕭宇

湖水春來自綠波。空林人迹少經過。夜寒石馬嘶風雨。日落山精泣薜蘿。江左長城真自壞。鄴中明月竟誰歌。惟餘滿地萋弘血。草色年深碧更多。

案此首文翰類選大成作張惟庸。

謝宗可

宗可字□□。金陵人。有詠物詩百首傳世。

走馬燈

飄輪擁騎駕炎精。飛遶人間不夜城。風鬣追星低弄影。霜颯逐電去無聲。秦軍夜潰咸陽火。吳炬霄馳赤壁兵。更憶彫鞍年少夢。章臺踏破月華明。

蓮葉舟

穩櫂紅衣泛渺茫。風帆浪櫂水雲鄉。曉撐太華半峯月。晚載西湖十里香。藕放雪絲應作纜。荷欹翠柄若爲檣。不須更捧仙人足。太乙真人夢正涼。

睡燕

補巢銜罷落花泥。困頓東風倦翼低。金屋晝長隨蝶化。雕梁春盡怕鸛啼。魂飛漢殿人應老。夢入烏衣路轉迷。卻怪捲簾人喚醒。小橋深巷夕陽西。

賣花聲

春光叫盡費千金。紫豔紅香藉好音。幾處喚回游冶夢。誰家不動惜芳心。韻傳楊柳門庭晚。響徹鞦韆院落深。忽被捲簾人喚住。蝶蜂隨擔過牆陰。

歸田詩話謝宗可百詠詩世多傳誦除走馬燈蓮葉舟睡燕數篇外難得全首佳者。邇見邱彥能誦其賣花聲一首百詠中不載詩云云。

白雁

翅老西風絕點瑕。秋江難認宿蘆花。雲邊字缺銀鈎斷。月下箏開玉柱斜。影亂飛鷗回遠浦。陣迷宿鷺落平沙。聲聲喚起周郎恨。爲帶胡霜染髩華。

七修續稿謝宗可有白雁詩而顧文煜亦有之。袁景文有白燕詩而瞿宗吉亦有之。膾炙人口。惟謝袁之作也。

同根竹

競秀亭亭一種奇。駢頭曾脫錦襦兒。西山二子情依舊。湘浦雙娥影鎮隨。高節元非連理樹。虛心共是傲霜枝。莫教移作仙人杖。恐化雌雄下葛陂。

筆精武夷城高巖有巨竹一幹雙梢。予與謝在杭欲賦詩詠之。未就也。偶閱元人謝宗可詩云云。似不能復繼矣。

句

篩影細分雲縷滑。棋文斜界雪絲乾。

月山詩話。朱竹垞云。網巾之制。相傳明太祖見之於神樂觀。遂取其式。頒行天下。三百年未之改。然題詠者寡。獨藍靜之有二詩。余觀謝宗可詠物詩。有賦網巾云云。蓋元時已有之矣。

郭豫亨

豫亨號梅巖野人。

梅花集句錄十二

水沈爲骨玉爲肌。好處曾臨阿母池。雪後園林應有恨。籬邊屋角立多時。早開卻被嬌紅妒。未落先愁玉笛吹。要識此花奇絕處。滿窗唯有月明知。李堯夫毛澤民和靖後邨盧元贊曹松簡齋白廷玉

刻玉雕瓊作小葩。溼雲黯澹雪橫斜。半開半落緣誰事。和影和香屬我家。數抹晚霞憐野笛。一泓流水度寒沙。吟邊苦思無佳句。立盡斜陽數過鴉。趙福元口口口程月溪竹塘和靖程梅窗徐榮應鳳山

黯澹江天雪欲飛。屋檐斜入一枝低。禽翻竹葉霜初下。春在花梢日未西。晚歲風霜從冷澹。小園煙景正淒迷。平生慣是思梅苦。多謝詩翁爲品題。陸倉和靖趙天樂黃師雄子倉和靖張介卿趙愚軒

天寒落日澹孤村。占斷風情向小園。翠羽啼花追昔夢。縞衣和雨立黃昏。蘇厓直上雙飛屣。茅店驚寒半掩門。憶得去年風雪裏。江南石上對窪樽。東坡和靖陳起陳竹泉方惟深放翁程梅窗山谷

踏破溪邊一徑苔。與尋陳迹久徘徊。雪漫隴樹魂應斷。風靜寒塘花正開。只恐好枝爲雪壓。留看瘦影上窗來。花前獨立無人會。謾使詩腸日九迴。石屏呂居仁秦韜玉劉涪石屏易涉趣趙嘏元廣

雪後相看意更深。謾將一朵插銅餅。人生此樂須天賦。歲晚知心唯月明。白鶴未歸春已老。危欄倚遍酒

初醒。逋仙只說香和影。不是詩家莫浪評。道潛張逢吉。東坡陳月溪。雪磯耐庵。柯柏軒。劉炎午。

勾引春情出苑牆。無人知處忽然香。愁連粉豔飄歌席。亦要天花作道場。風約暗香臨淺水。月明疎影媚寒塘。浣花溪上堪惆悵。可是無心賦海棠。楊蟠玉蟾。羅隱李商隱。口口口。无逸鄭谷。介甫。

貌枯神澤骨槎牙。蕭索東風兩鬢華。甘與雪霜同冷澹。醉看參月半橫斜。溪山冷落泥三尺。水竹參差屋數家。自笑自吟還自得。案頭搖落小餅花。孤山。東坡。劉斗溪。東坡呂居仁。張逢吉。盧槩。方養澤。

樽拙爐寒硯欲冰。舍南舍北雪猶存。旋催妝額添宮樣。靜愛寒香撲酒樽。兩岸嚴風吹玉樹。一灣流水護柴門。閑中有意堪圖畫。溪上無人月一痕。竹溪疎寮。于湖羅隱。章莊。葉永竹。黃文度。吳可。

半屋蒼雲冷不知。茅檐竹隔兩幽奇。凝情金谷登樓日。依約華清出浴時。隴月定知今夕恨。春風搖動故人思。綠楊解語應相笑。雪裏開花恐是遲。沈口口。晁叔用。趙義若。梅亭。口口口。程梅窗。臧謀。東坡。

滿地飄零更斷腸。恐隨春夢去飛揚。柳搖臺榭東風軟。花撲玉缸春酒香。驛使不來羌管歇。燕釵初試漢宮妝。巡檐說盡心期事。幾度凭闌到夕陽。口口口。林季諤。介甫。周詞峯。張榮。韓偓。晦庵。王叔安。

湖山搖落歲方悲。自恐冰容不入時。但笑紅芳誇豔冶。渾將絳雪點寒枝。橋邊野水通漁路。城外春風吹酒旗。正似美人初醉著。澹妝濃抹總相宜。口口口。東坡。口口口。和靖。劉禹錫。介甫。東坡。

梅花字字香自序。余愛梅花。自號梅巖野人。凡見古今詩人梅花傑作。必隨手鈔錄而歌咏之。積以歲月。遂成巨編。熟之又久。若有所得。暇日輒集其句。得百篇。目爲字字香。其閒句煅意煉。璧合珠聯。亦有天然之功者。吾不知其爲古作也。

金涓

涓字道原義烏人本姓劉先世避錢武肅王嫌名改姓金有青村遺稿

青村遺稿附錄鄭柏撰小傳受經於許謙學文於黃潛隱居青村學者稱爲青村先生州郡薦辟輒懇謝

又昴孫江書後所著有文集四十卷有湖西集有青村集散逸莫存家君搜獲及克全叔祖口授者共得詩五十五首又儒儀叔孔安兄來詩九十七首以續於後

青村遺集宋濂跋右德原先生所和子充王君詩凡一百九十韻時子充在金陵因黃主簿之官烏傷作詩餞之遂於鄉中舊遊深致意焉詩止一百二韻凡增多八十有八者乃先生引而伸之也非維波瀾浩渺不可涯涘而其念鄉學之美思官政之治實有得古人風勸之義

絕句

燕子飛來近畫簷暮春時節雨纖纖
杏花落盡無情緒何處人家有酒帘

江村

寂寂江村路輕煙晚自生遠峯晴見色
獨樹暖無聲渚鷺行看水溪魚賣入城
孤舟人不渡兩岸夕陽明

山莊

青村溪盡處村密隱孤莊石老莓苔路
門荒薜荔牆人行秋葉滑鶴立晚松涼
治畝人歸後簑衣挂夕陽
筆精元末金青村涓與邑人吳萊宋濂友善有詩名嘗賦詩云云又遠峯人行云云皆佳句也

葉廣居

廣居字居仲仁和人官江浙儒學提舉

題西泠隱居

瘦木栽冠鶴鬣輕十年塵土厭飄零小山舊隱雲封戶大藥新栽月滿庭丹井夜交龍虎氣碧霄春蹠鳳凰翎西風客舍炎歊淨擬讀琴心內景經

西湖游覽志築室西泠橋陶情詩酒著有自得齋集自題隱居詩云云

寄楊鐵崖

聞道西湖載酒還飛瓊弱翠擁歸鞍可無私夢登金馬剩有春聲到玉鑾異國頓消鄉井念小堂新作畫闌看野人未納彭宣履獨向清溪把釣竿

西湖志餘維禎雅好聲伎名徹都下葉居仲寄之詩云云

吳復

復字子中後改字見心富春人有雲槎稿

西湖竹枝詞

官河繞湖湖繞城河水不如湖水清不用千金酬一笑郎恩才重妾身輕

歸田詩話西湖竹枝詞和者甚衆皆詠湖山之勝人物之美而寓情於中大率一律惟二人詩春暉云云官河云云用意稍別惜不記其姓名

七修類稿。吾杭西湖有竹枝詞一帙。乃廉夫爲倡。一時詩人和者。惜無刻本。瞿存齋詩話論其二章用意甚佳。惜不知姓氏。今補於右。前乃李介石作。後乃吳復作。

句

江花多自落。天籟或時鳴。雲歸沙嶼白。日出水城黃。雲氣上天星劍溼。龜文入地石幢深。西湖竹枝集。如云云。蓋盛唐之選也。

衛仁近

仁近字叔剛。一字子剛。華亭人。至正間舉幕官。張太尉闢延賓館聘之。皆謝免。

秋夜曲二首

誰家女兒青結螺。花前雙歌舞婆娑。湘簾在鉤明月多。奈此迢迢涼夜何。銀河流光夜初靜。姮娥娟娟度鸞影。綺疏美人醉方醒。倚闌吹簫更漏永。

句

江水深深碧。梨花淡淡明。九農勞畚耜。三泖足風波。亞夫舊是將軍子。賈誼初傳太傅官。玉人楊列錦步障。銀筆醉調金縷衣。醉吹銀笛五老洞。閒拾瑤草三神山。

東維子集城西衛子剛。蓋山齋別駕公之孫也。首贊詩見余。旣而復出敬聚齋詩稿一編。讀其古詩如秋夜曲白苧詞。其排律如九山讌集。五言律如江水云云。七言律如亞夫云云。其絕句如消寒圖一首。音節興象。皆造盛唐。

郭鉦

鉦字彥章號靜思吉水人

句

聖賢去我遠。靡茲糟粕味。當其得意時。何如卿相貴。

靜思集。羅念菴洪先序。壯年奔走兵革。以爲養。晚際明興。徵茂才。辭疾不就。年踰六十。竟貧死。獨幸詩歌。猶有錄者。蓋生平經歷艱危。閭里流離之狀。若目見所載。郡邑失復。月日與當時死事故實。可裨野史。憶靜思贈吾族秀賓詩有云云。嗚呼。此詩人所以窮餓終身而不悔也。

胡布

布字子申。盱江人。

句

斧斲雲根木。瓢探石竇泉。旭日千門曉。春花萬樹明。穴深留禹蹟。松古受秦封。夕幃兼空淨。秋江得月多。

詩藪。盱江胡布子申集十卷中。有與方方壺往還題。又有寄倪元鎮詩。蓋勝國末人。其詩頗能爲古樂府。及六朝唐人語。第全篇佳者絕寡。又近體拉攏耳。然元人遂無一齒及者。余於書肆敝楮中得之。大半漫滅。惜而摘其數聯。如云云。咸自成語。至七言歌行。佳處往往出元諸名家右。而全篇亦寡勻稱。

墨菊

彭澤歸來日。緇塵點素絲。烏沙漉酒後。挂在菊花枝。

詩藪子中五言絕亦頗有佳者。墨菊云云。七言如刻竹題梅諸絕。殊濃麗可觀。同時劉紹者。有聯句見其集。惜不覩全篇。

岑安卿

安卿字靜能。餘姚人。所居近栲栳峯。自號栲栳山人。

句

蛩鳴深巷靜。月昃半樓明。山高不礙夢。日落易生愁。

筆精。岑安卿號栲栳山人。有集一卷。平淡不類元習。如云云。清新有味。亦胡元瑞所未覩也。

又

平生耕稼心。媿此老病軀。老成媿苟得。童稚羞無官。我窮不出門。頗覺天地窄。

元詩選。靜能淪落不偶。其簡王子英云云。又云云。又會資敬菴云云。何其坎壈抑鬱之甚也。

王士穀

士穀字子英。餘姚人。

句

陶潛千載友。相望老東臯。

戴九靈集。隱居鄉之上林。鄰有栲峯岑君。先生友也。平居好誦陶靖節詩。愛其風致絕人。有云云之句。而自署其號曰東臯處士。

朱子範

雪後讀杜詩

十年鄉國亂。幾卷杜陵詩。閉戶挑燈夜。深山積雪時。紫陽誇入蜀。雙井喜居夔。歧路終何適。吾將有所思。新安文獻志。張外史伯雨云。朱子範詩有虞揭遺響。

韓奕

奕字公望。吳人有蒙齋集。

列朝詩集。公望生於元文宗時。少目眇。筮得蒙卦。遂扁其室曰蒙齋。絕意仕進。與王賓偕隱於醫。句

豐年稻熟村如畫。南國萼生水亦香。新秋次韻。官清便似居高品。任久長如在故鄉。送縣學教諭。樹影不隨流水去。荷香常帶遠風來。東湖放舟。西風颯颯林間葉。乍聽猶疑是雨聲。晚晴。

四庫書存目。韓山人集。元韓奕撰。其詩古體傷於淺率。近體如云云。一知半解。尙稍得宋人格律。其瓣香當在劍南。

劉渙

渙字彥亨。紹興山陰人。至正間。薦授三茅書院山長。道梗不赴。卒於洪武間。

絕句二首

白玉搔頭金步搖。春衫紅勝海棠嬌。只因記得當年事。重到桃花第四橋。
鬢薄雲鬟綠霧涼。春風額點麝臍黃。背人撲得雙胡蝶。滿扇薔薇露水香。
明詩綜詩話彥享受學楊門。不離書樓舊染。

顧觀

觀字利賓。丹陽人。官星子縣尉。遇亂。流寓紹興。

過松江詩

吳淞三萬六千頃。震澤與之俱渺茫。鴻雁一聲天接水。蒹葭八月露爲霜。秋風漫引漁人笛。落日偏驚買客航。三十年前此來往。塵纓猶未濯滄浪。

淞故述。顧利賓過松江詩云云。

句

董經白下橋頭路。頗憶元都觀裏花。

藝苑卮言觀送人詩云云。吳江詩。鴻雁一聲云云。此等語。參之貞元長慶。亦無媿色。

沈貴

貴字仲華。烏程人。

留青日札沈萬三秀。名富。字仲榮。其弟萬四。名貴。字仲華。本湖州南潯人。父沈祐。始徙蘇之長洲。

東蔡村。貴之子漢傑。又徙于化周莊。今南京會同館。乃其故宅。初居東蔡村時。人以汙萊之地歸之。祐躬率子弟服勞。糞治有方。潞洩有法。由是致富不貲。後流雲南。尋命選大戶家爲京官六曹。得漢傑之子曰玠者。擢員外郎。受官辭祿。上器重之。至今傳二家子孫。在流所者尙富。或云善點化術。

農田餘話。古人無畫蒲萄者。吳僧溫日觀。夜于月下視蒲萄影有悟。出新意以飛白書體爲之。酒酣興發。以手潑墨。然後渾筆迅于行草。收拾散落。頃刻而就。如神。甚奇特也。旣死。其弟子沈仲華。湖州人。傳其法。亦佳。世多見之。

諷兄詩

錦衣玉食非爲福。檀板金樽可罷休。何事子孫長久計。瓦盆盛酒木綿裘。

天祿識餘沈富。字仲榮。行三人。因以萬三秀呼之。元末富甲天下。其弟貴。以詩諷萬三云云。萬三不聽。貴遂隱於終南。不知所終。洪武初。每縣分人爲哥時郎官。秀五等。家給戶由一紙。哥最下。秀最上。每等中又各有等。鉅富者謂之萬戶三秀。如沈萬三秀。乃秀之三者。

舒頔

頔字道原。績溪人。元末台州學正。明初禮聘。以疾辭不出。學者稱貞素先生。有華陽貞素齋集。

寄興

湖海半生客。乾坤一布衣。義哉周伯叔。飽食首陽薇。

列朝詩集道原辭召之後名其齋曰貞素嘗有詩云云其寄託如此

周必達

必達天台山隱士

題扉上

海角愚夫不自斟。妄起關中逐鹿心。命運由來非力致。項羽英雄亦就擒。

壘起雜事。方谷珍起兵時。嘗造天台山隱士周必達問計。必達曰。當今四方雖亂。君舉義爲天子。除逆。斯名正言順。富貴可致耳。餘非我所知也。谷珍不別而去。必達意珍復來。乃題句扉上云云。遂攜妻子入山中。明日谷珍果來。恨不先殺之。焚廬而去。後谷珍事不成。爲兵所困。方悔曰。不意黃毛野人。能料事至此。嗚呼晚矣。乃投水而死。

李序

序字仲倫。東陽人。有細繻集。

武皇仙露曲

甘泉照月如鈞天。千門萬戶生碧煙。碧天無雲露盤出。明河夜拂金童仙。栖鴉起啼曲城曉。大官步進青龍道。崑山玉盡武皇老。茂陵春風吹綠草。魏人車馬東方來。一朝秋燐飛空臺。天荒地老骨亦摧。三川白日聞春雷。蕙花蘭葉參差起。微月斜明光泥泥。仙人之淚猶泚泚。

嗽金鳥行

昆明使者南方來，洛陽宮闕如雲開。玉階奉進嗽金鳥，水晶鏤刻辟寒臺。錯金爲屑玉爲餌，神刀取腦白龜死。美人自搗明月珠，赤玉盤中光靡靡。雲高夜啓月當戶，展翼垂吭爲君吐。白鸞之尾掃成堆，瑟瑟輕黃如粉蠶。冶煙五色何氤氲，後宮獨賜承恩人。雕成苑轉合歡釧，一尺青風袖中軟。不知南國江水深，鐵箕已盡愁人心。岸旁沙隴高百尺，賣兒買得雲南金。安得羣飛萬千羽，不食珠璣食禾黍。嘔出肝腸奉明主，天下黃金賤如土。

次韻納齋銅雀臺磚硯歌

銅雀臺傾見荒土，月黑妖狐上臺舞。千年瓠甌墮人間，瑟瑟苔花暗秋雨。天荒地老奈愁何，臺上青泥生碧沙。斜風吹雨啼蟋蟀，此是西陵長夜歌。魏人骨血今已古，漆色凝花人未覩。一從爲硯今幾年，漳水滔滔自東去。爲君寫作銅臺吟，臺前瓦礫猶傷心。元詩選雜諸昌谷集中，亦咄咄逼真也。

何景福

景福字介夫，睦之淳安人，有鐵牛翁遺藁。

句

繡牀漸覺香毬滿，魚艇初疑雪片多。龍吟五夜霜飛瓦，鼃吼三更月滿城。青山自此詩名重，采石如今酒價低。荒祠晝掩無人到，苦木叢中春鳥啼。風景不殊豪傑盡，新亭誰復淚沾衣。

元詩選介夫詩甚奇偉，其詠柳絮云云，極體物之妙。他如云云，亦錚錚佼佼。陸州詩派論之如

此。

彭炳

炳字元亮。崇安人。至正中。徵爲端本堂說書。不就。

句

明河夜無聲。茅亭四檐月。壁樹落秋子。風吹白雲起。

元詩選如云云。真不減柴桑。愚溪品致也。

羅蒙正

蒙正字希呂。其先廬陵人。後徙新會。官教授。

句

儒冠不是將軍具。只作當年措大看。願賜一廛閒養病。簡編燈火伴青衿。

元詩選。至正丁亥赴省試。遇開武銓。或勸其借註巡檢。不就。以詩答云云。後遭亂。避地郡城。趙式薦於行省。授南恩州教授。州判吳元良陰謀割據。欲倚其籌畫。用爲幕官。蒙正悟其意。辭不就。後因病以詩謝云云。未幾卒。

陳德載

德載字口口。青田人。

栽芋

區里饒田早下來。綠芽才發旋鉏開。添泥善護兒孫長。看取秋高掇大魁。

栽桂

雲邊移得數株來。人老花應次第開。儻到兒孫攀折日。也須道是阿公栽。

元詩癸集至正閒避寇多歷險阻形於詩題曰山村雜興中有二詩期待子孫後孫詔果登洪武庚戌會元有栽芋栽桂詩云云

程從龍

從龍字口口嘉魚人

雙洲

涉水逾山竄草萊。亂離懷抱幾時開。元家運變黃河徙。漢土兵興赤幟來。夜寂堠亭烽火盛。月明江艦角聲哀。風沙滿目鄉關異。日暮愁登江上臺。

自注元壬辰正月十一日紅巾攻破漢陽十三日破湖廣鄂漢官民擁舟南遁余家近江室廬煨燼里人相率命歸稍復故居而號令不一所茆菴舍隨成隨蕪所蓄糧食隨瘞隨啓遂遁於野艱苦萬狀幸免鋒鏑豈非天相與因紀其事於此云

韓友直

友直字伯清吳興人隱居不仕

句

泉出珠璣千眼沸。花開錦繡一庭春。

吳興詩選招隱詩云云。

潘時雍

時雍字□□錢塘人。

徐一夔獨樹軒

瀟瀟幽軒面水開。軒前老樹倚雲栽。閒來倚杖過三市。醉後支頤看百回。風雨欲隨龍化去。雲霄常聽鶴飛來。結鄰擬共榮枯事。遮莫人知是散材。

東城難記。元末潘時雍居郡城東宋輦院故址。有隙地十餘畝。古井一區。簡淡力學。詩句脫塵。嘗賦云云。教授海鹽之黃灣。見海宇兵起。遂歸抱甕而隱。自號灌園生。

顧素

素字世通歸安人。

句

家人不笑營生拙。野老空嘲歷聘忙。

湖州府志。元末兵亂。遷徙不遑。未嘗廢學。洪武初。累聘不起。有云云之句。

沈貞

貞字元吉。長興人。元末隱居。自號茶山老人。入明不仕。有茶山集。

樂神曲

樂神曲者。擬楚辭九歌而作也。吳人尙鬼。祀必以巫覡。迎送舞歌登獻。其辭褻嫚。禳災徼福。不知其分。滋黷甚矣。故爲此辭。以明鬼神之理。禱祀之意。祛其荒淫之志矣。

波震蕩兮具區。旣底定兮奠神之居。芙蓋兮菱車。導翠龜兮文魚。神之來兮孰俱。後子皮兮前靈胥。與神游兮湖之滸。衝風息兮極浦。有倡兮妙舞。有列兮清酤。神飽聿歸兮。或返而顧。灌吾田兮。受神之祐。

右太湖神

雄何爲兮厲於鄉。祀有時兮享有嘗。赭白馬兮青蓋。明而無兮晦而在。屏方相兮去儼。神巫進兮舞且歌。雄欣欣兮遠逝。不水旱兮不疵厲。樂吾民兮世世。

右鄉厲

兩旗兮分張。舞輕風兮悠揚。神之司兮我疆。原田每每兮。立我青秧。不稂不莠兮。無虺無蛇。時雨兮時暘。俾百穀兮登場。維神兮降康。報之肴兮蒸膳羊。

右青苗神

靜志居詩話。集五十卷。惜不傳。從陳編中搜得樂神曲一十三首。不無冗長。且多闕文。因汰其六。稍爲刪易補綴。頗覺奇古。

案茲又節錄其三

韓介玉

嘲張仲舉

垂柳陰陰拂翠簷。倚欄紅袖玉纖纖。先生掉臂長街過。十里朱樓盡下簾。

歸田詩話。時揚州方全盛。衆素聞仲舉名。皆延致之。仲舉肢體昂藏。行則偏竦一肩。韓介玉以詩嘲之云云。坐中皆失笑。時有相士在座。或曰。仲舉病鶴形也。相士曰。不然。此淋鶴。雨霽則沖霄矣。後入大都。致位貴顯。果如其言。

程渠南

渠南字口口。松陽人。

食丁蕈戲作

頭子光光脚似丁。祇宜豆腐與波稜。釋伽見了呵呵笑。煮殺許多行腳僧。

草木子。松陽縣詩人程渠南。滑稽之士也。與僧信道元同齋食蕈。道元請渠南賦蕈詩。應聲云云。聞者絕倒。

魯琪琳

口占

三百五篇風雅頌。世人能讀少人觀。吟哦須得自情性。雕琢反愁失肺肝。春草池塘中造化。梅花香影外波瀾。熟參熟究工夫到。始信仙凡共一丹。

湖州府志。魯琪琳。烏程人。古樸不樂仕進。能詩文。沈夢麟叩其詩法。因口占示之云云。

元詩紀事卷二十三

袁介

介字可潛其先蜀人占籍華亭至正間爲府掾藝苑卮言袁可潛如師手鳴琴流利有情高山尙遠

踏災行一作檢田吏一作踏車行

有一老翁如病起破衲穢穢瘦如鬼曉來扶向官道傍哀告行人乞錢米時予奉檄離江城邂逅一見憐其貧倒囊贈與五升米試問何故爲窮民老翁答言聽我語我是東鄉李福五我家無本爲經商只種官田三十畝延祐七年三月初賣衣買得犂與鋤朝耕暮耘受辛苦要還私債輸官租誰知六月至七月雨水絕無潮又竭欲求一點半點水却比農夫眼中血滔滔黃浦如溝渠農家爭水如爭珠數車相接接不到稻田一旦成沙塗官司八月受災狀我恐徵糧吃官棒相隨鄰里去告災十石官糧望全放當年隔岸分吉凶高田盡荒低田豐縣官不見高田旱將謂亦與低田同文字下鄉如火速逼我將田都首伏只因嗔我不肯首却把我田批作熟太平九月開旱倉主首貧乏無可償男名阿孫女阿惜逼我嫁賣陪官糧阿孫賣與運糧戶卽日不知在何處可憐阿惜猶未笄嫁向湖州山裏去我今年已七十奇饑無口食寒無衣東求西乞度殘喘無因早向黃泉歸旋言旋拭腮邊淚我忽驚慚汗沾背老翁老翁無復言我是今年檢田吏

輟耕錄。此袁介踏災行也。可以爲民牧。不恤民瘼者之勸。介字可潛。管掾松江。蓋能以儒術飾吏事者。

蓬窗日錄。讀袁介踏災行手錄一通。彼苛吏者。不惻然。可謂無人心矣。

王禎

禎字伯善。東平人。官旌德宰。調永豐。有農務集。

句

一行已見光如拭。再過都無迹可尋。平板本擬助禾輕著力。却憑偃草重千風。輟軸禹門似是崇三級。巫峽還同東衆流。水開花徑有同流。暗水桃源誤認出殘紅。陰溝。

元詩選。每歲教民種桑若干株。凡麻苧禾黍牟麥之類。所以蒔藝芟穫。皆授之以方。又圖畫所爲錢鎛耰耨耜耨諸器。使民爲之名。其書曰農器圖譜。農桑通訣。如云云。皆能刻畫摹擬。曲肖情狀。

張端

端字希尹。江陰人。官江浙行樞密院都事。有溝南漫存稿。

賓鴻吟

鴻雁來。天雨霜。鴻雁去。春日陽。雁來雁去如嘉賓。寒暑暑愁殺人。一聲叫落秋空雲。不覺淚下霑衣巾。如賓又復如兄弟。吁嗟人兮不如彼。

張仲簡云。此數句勝作大篇。關係世教。

俞俊

俊字子俊。□□人。官平江判官。

楚州夜泊

漏鼓聲頻欲四更。野航燈火對愁明。城頭楚語驚鄉夢。船尾吳歌動客情。漠漠水雲聽雁度。瀟瀟風雨自雞鳴。離羣遠道何嗟及。未必江湖老此生。

詩藪全篇整麗。首尾勻和。

高志道

志道字原朴。嘉祥人。官安州學正。

句

流水落花西子宅。故家喬木范家祠。

松江府志。俞子俊赴平江。高原朴贈行詩。有云。云句。坐客笑曰。真堪壯子俊行色矣。

陳乾富

乾富字□□。□□人。官副都元帥。

蔡九娘詩

一笑花前醉似泥。綺筵歡劇不聞雞。馬蹄到此空歸去。不是花迷是酒迷。

瓊臺雜咏。至元末。敦武千戶蔡克憲之女九娘。有姿色。副都元帥陳乾富。一日引兵就之。九娘度

來意必強。力不能支。乃設宴張樂。親行酒。迭出侍女侑觴。乾富歡甚。意不相違。乃肆意據飲沈醉。兵騎皆兼饌。人人樂飲。恬不爲備。九娘乘間避匿。乾富醒已侵晨。窺其室。閤無聲矣。覓尋莫知所向。悵悵引兵而去。賦詩云云。

玉環詩

使臺歸騎準鳴笳。花氣茶煙競院奢。禽慧不須雲板約。好窺人意喚琵琶。

瓊臺雜詠。至正間。陳元帥乾富。控制乾寧。侍兒。媵愛者數十人。惟玉環極殊色。髮初覆額。爲陳所寵。家養秦吉了。慧而能言。每呵騶自公府歸。必呼玉環報之。

陳孔彥

孔彥。字子美。口口人。官華亭縣丞。

題趙子昂竹石

徒羨芙蓉與牡丹。繁華瞬息易凋殘。何如竹石常清淡。冬雪春風一樣看。

六研齋筆記。子昂擬東坡竹石。明勾四筆。作馬卵石。細篠面面叢叢。不露根節。真所謂簣簣耶。石背一梅樹。槎枒有勢。仍雜以棘枝。古澹之極。陳孔彥題一絕云云。款云。華亭贊邑陳孔彥題。孔彥字士美。元之縣丞。稱贊府。亦科目中人。非今佐領比也。

周棐

棐。字致堯。四明人。嘗爲宣公書院山長。

句

珥筆每同花下散。玉珂時聽月中還。御水滿溝看洗馬。宮牆隔樹聽流鶯。

元詩選。曹石倉採致堯詩入明詩初集。題曰山長集。但致堯送張志學詩云云。寄龍子高詩云云。似乎官不止山長者。

案致堯有臨平道中寄京師諸友。末云。自慚薄劣頻趨走。幾度因風想玉珂。

察級一作級。

級。字士安。□□人。自號海東樵者。

趙子昂天馬圖

曲江洗刷雲滿身。雄姿逸態何超羣。眼中但覺肉勝骨。幹也合讓曹將軍。嗟哉今人畫唐馬。藝精亦出曹韓下。玉堂學士重名譽。一紙千金不當價。山窗擁雪觀畫圖。據案便欲擒於菟。大廐真龍有時有。杜老歌行絕代無。

六研齋筆記。詩云云。史官察級士安。竹懶曰。察級之意。似嫌子昂此馬稍肥。故謂曹韓之下。橫以時名取重耳。求其如杜老所歌掃空萬馬者。則絕代未有也。何物胡奴。強作解事如此。案記又作海粟作。

陵希惠

希惠。字季和。宛陵人。

賦郭用和所藏古鏡

漢皇蛇劍穿屋飛，伯禹神鼎淪泗涯。鯨翻鼉轉總陵谷，此鑒零落何足疑。團團知是誰家物，偶向耕夫春隴得。苔昏土蝕篆文微，消盡清光質如石。憶昔清光未泯時，玉臺盤帶生光輝。白髮幾揮豪傑淚，青娥曾照嬋娟啼。汾陽諸孫誠好古，床上書連只環堵。聞之不惜抱衾裯，豈爲深閨照媚嫵。願君試覓負局生，炯然秋月高堂明。一點莫遣飛埃侵，萬古不滅如此心。

句

丹崖雪竇相掩映，一枝北走如翔龍。白雲輸雨出深谷，蒼松倚壁來清風。宛陵羣英集，人傳其賦古鏡詩。又有雲松樓詩云云，時頗許之。

施坦

坦，字季平，宛陵人。

句

香紉幽蘭佩，詩裁明月珠。亂聲秋樹葉，寒色晚花枝。

宛陵羣英集，五言佳句如和梅叔章云云，劉氏園云云，一時傳誦。

熊不易

不易，字口口，宛陵人。

句

太瘦尙能憐杜甫。不言幾已失醜明。

宛陵羣英集。如與友人別云云。極爲警句。

朱得先

得先。字□□。宛陵人。

句

戴星間俗千村曙。耕雨關山百里春。

宛陵羣英集。如奉楊明府云云。亦工。

師晦文

晦文。字□□。宛陵人。

句

吠雪從驚犬。耕雲欲買牛。

宛陵羣英集。言懷詩云云。

胡晉

晉。字□□。宛陵人。

句

茶竈霑晴露。書林趁午陰。

宛陵羣英集如嘉秀亭云云亦佳

何致中

致中字鶴齡號華陽山人宛陵人

句

苦吟生白髮歸夢繞青山雨久琴絲潤風清扇影閒

宛陵羣英集如秋日云云此類甚多

汪士深

士深字起潛宛陵人

句

雨香林下屐花影席閒尊白髮已從公道得青山長似故人看

宛陵羣英集如題嘉秀亭云云齋居云云世多傳之

劉得之

得之字口口宛陵人

句

登樓須待月稅地亦栽花風帘桑落酒春網藻植魚

宛陵羣英集如杭州云云琴高峯云云

梅德明

德明字口口宛陵人

句

彩鷁隨風飛宛水黑貂犯雪上金臺

宛陵羣英集如送叔章姪云云頗亦楚楚

吳鏐

鏐字子彥宛陵人官耒陽知州

句

塞翁休問馬海客自盟鷗泉聲晴亦雨山氣夏先秋

元詩癸集如和鄭仁卿云云象山書院云云皆佳句也

繆思恭

思恭字德謙號菊坡吳陵人至正間官至淮安總管

至正二十年八月十五日招同諸彥小集南湖以杜甫不可久留豺虎地南方猶有未招魂爲均得不字

我生胡弗辰守土媿簪紱亂離難斯瘼兵氛駕飄拂貴人旣防求苗獠薦騷拂比戶罹毒淫流殃痛未訖大軍有凶年荆榛莽菲鬱天地塞無歡三秋翳沈沔當國哀黎氓方來濫朱紱所冀民社寧優詔非爲屈

頓覺元氣清。太空如蕩菽。借問今夕娛。還思去年不。

也。至正庚申倡和詩。周伯琦序。至正庚申倡和詩。爲嘉禾同守繆君。廣文曹君。偕諸名輩。分均之什。

唐朝

朝字大用。桂林興安人。官教諭。

五無吟六首

與物無心。心頗寬。無才贏得本無官。更無文字勞神思。絨口無言漫自安。
此君原是主人翁。夙夜惺惺儼在中。只爲杜門能謝客。一間虛室自玲瓏。無心。
山中古木老槎牙。幾度逢春不放花。清廟棟梁奚足取。霜枝雪榦漫矜誇。無才。
鱸鱖吞香繫釣筒。珍禽解語入金籠。爲憐蠹鷁能安分。自得叢林淺瀨中。無官。
雲在空中變態奇。風來江上浪漪漪。何如風定雲開後。秋水長天一色時。無文。
曉林喜鵲暮林鴉。飲啄隨時漫自嘉。禍福于人何所與。不勞屋角日喳喳。無言。

元詩癸集。自號五無齋。述五無詩以見志。

林彥華。號城南。黃巖人。

戲馬臺

白蛇夜斷飛赤龍。長驅疾足平關中。鴻門玉碎亞父死。彭城霸氣隨飄風。沐猴御尊真成戲。調服羣鷺棄。

天驥一馳豈解踏九州。事去空歌時不利。宋公不復登此邱。弔古有客悲黃樓。

詩藪雄渾流麗。步驟中程。

程彥明

句

地吞南極盡。波撼北溟迴。

詩藪元五言律可摘者。程彥明云云。句格閎整。大曆元和閒。

李子飛

句

花迎玉殿紅千樹。柳拂金沙翠萬條。層嵐蔽日雲當戶。陰瀑含風雪滿床。詳趙孟頫下。

丁守中

句

彈琴夜和鳴皋鶴。持鉢朝降度海龍。詳趙孟頫下。

吳漳

漳字楚望。

句

平野北連鐘阜遠。大江東抱石城流。詳趙孟頫下。

王東

東字尙志廬陵人一云臨川人

句

西風曠野孤城出落日空江白浪迴詳趙孟頫下

潘伯修

伯修字省中黃巖人至正三年中省試後爲方谷珍所害

燕山秋望三首

西山木落向高風萬壑千崖出梵宮翠幕遙看銀榜合金精虛逐火輪空
柵欄靜立脩脩上冠佩飛行蕩蕩中何日龍船移櫂曉露房雲水四簾通

遼海東空鶴不歸平蕪遙際極涼霏寒天霜靜雕鷹沒沙苑秋高牧馬肥
落日美人歌玉帳西風獵騎擁金羈豪豬猛起當前立曾冒鳴弓脫曉圍

北落師門霄漢間陰雲粉沸夜漫山水聲亂趁龍門道月色斜窺碣石灣
劍臥古臺星鬱鬱笳凝幽草露斑斑千秋萬歲滄浪面長照君王入近關

丙申元旦

元朝舉酒欲傷神六載崎嶇脫死身草木不忘春雨露山川猶擁宿風塵
河南輕重須藩翰江左安危數縉紳家國未知焉稅駕等閒笑語答時人

元詩選忠君愛國之心藹然溢於言外。

王圭

圭字敬仲宛陵人。

句

福兼鴻範五瑞集鳳雛三興寄冥鴻外詩成立馬閒。

元詩選弟璋字敬叔並以詩名敬仲如挽貢南漪云云戴帥初過訪云云敬叔詩如題劉御史熙寧諫疏云云謝惠帶鏡云云皆佳句也時人誦之。

王璋

璋字敬叔。

句

舉世非新法中朝放直臣寬覺腰圍減明嫌髻影秋見上王圭下。

李廷臣

廷臣字仲虞台之寧海人學詩於丁復。

句

湛露仙盤白朝陽虎殿紅詔起西河上旌隨斗柄東西北干戈定東南杼柚空。

元詩癸集楊鐵崖序其詩謂如五言律云云置諸少陵集中卒未能辨也。

曹文晦

文晦字輝伯天台人。有新山臺。

句

剝腸難脫豫且網。留骨堪爲子夏冠。鼠鬚過晉今無用。兔額封秦亦不如。當時照炫水中影。今日掃空堂上塵。小槽酒滴清光透。老瓦盆空飲興多。顧家曾識將軍號。華嶽堪供處士眠。

元詩選輝伯詠十器詩如龜殼冠云云。豬毫筆云云。雉尾帚云云。鶴子杯云云。虎頭枕云云。刻畫肖題而全首殊欠雅馴。

錢岳

岳字孟安吳興人。元季徙雲間。官毫縣丞。

靜安八詠

陳檜

上方雙檜鬱嵒嶢。不逐禎明玉樹凋。雲擁鶴巢溟海暗。火枯龍骨艮宮搖。深根入地應千尺。老幹擎天已十朝。夜半木精聽說法。昔年亡國恨都消。

靜安八詠鐵崖評曰此章全美。

講經臺

潮打鸞碕半欲摧。老禪稱土鐵崖評曰二字人未用到處。築高臺。旃檀林下談經坐。舍衛城中乞食回。江

月夜搖金篆冷。天風時散寶花來。惟餘石塔殘陽裏。長使登臨過客哀。

滬濱壘

袁公築壘吳淞口。廢址猶存滬濱名。先駐孤軍防險地。已勝癡將假陰兵。濤春海岸喧鼙鼓。雲合江天擁旆旌。豪傑不將成敗論。千年青史見忠貞。

鐵崖評曰。知豪傑之不懼者。其岳乎。

余寅

寅。字景晨。華亭人。

靜安八詠

陳檜

海波浮玉殿。寶網拂珊瑚。座上來聽法。龍精卽老夫。

鐵崖評曰。五字善融化。

鰕子禪

老禪不解事。眉白鬢莖稀。曹溪一滴水。鰕子作龍飛。

鐵崖評曰。字與奎辭尙意。

滬濱壘

我過袁崧宅。重尋滬濱津。英雄千載下。遺壘大江濱。

鐵崖評曰。二十字全美。

陸侗

侗字養正。上海人。

靜安八詠

赤烏碑

金人入夢興梵宗。重元始創滬濱東。紫髯紀年石且豐。大書赤烏卻黃龍。維松潮汐地不同。文章忽瘞洪。濤風龜蚨螭首潛無蹤。川后河伯還會通。奎星下燭娑竭宮。方信人間談色空。江水自白江花紅。

鐵崖評曰。結益精神。

陳檜

鐵幹屈左紐。苔枝鎖空青。雨露承十朝。根心自禎明。願仗千佛蔭。羞向三閭榮。水月照纓絡。儼矣大士形。秋風動石頭。不雜玉樹聲。泰媼永訶護。恐化蒼龍精。

鐵崖評曰。水月照纓絡。恐化蒼龍精。諸作未能如此想像。

湧泉

元氣幹坤軸。不舍晝夜旋。四五窮其上。趺突萬劫泉。寧隨月盈縮。滾滾常自然。沸如沃焦起。汨若尾閭連。神虎恥來跑。驪龍懼爲淵。自天一數生。在理合後先。荒哉博望侯。空去求河源。美彼西方人。卓錫良有緣。鐵崖評曰。沃焦尾閭句好。一數後先。尤見道體。

蘆子渡

蘆村胥村南北路。舟往舟還古今渡。一笠天垂紫鳳飛。百枝水落青龍步。鯉魚風起夜未收。雪色葦花零亂秋。借得君山第三管。月中吹過滄浪洲。

鐵崖評曰。鯉魚風起。忽然出一奇句。

趙觀

觀字宗弁。澄江人。

靜安八詠

赤烏碑

僧來天竺國。寺創赤烏年。碑碣前朝重。文章後世憐。秋風生大野。斜月墮重淵。有待龜龍負。圖書得共傳。鐵崖評曰。此一結方是作者。

陳檜

不識陳朝檜。相傳故老言。理文俱左紐。后土自蟠根。氣迴青山暝。陰寒玉殿昏。何須野王筆。圖畫至今存。鐵崖評曰。用事正切本題。

蘆子渡

蘆花十里塘。野色正荒涼。明月秋無際。西風雪有香。漁郎茆屋小。估客櫓歌長。自愧無家別。經行百感傷。鐵崖評曰。雖無意亦自可誦。

韓壁

壁字壁翁。饒州人。

靜安八詠

滬瀆壘

山暝蒺藜黑。天寒燐火青。將軍身沒後。衰海毒蛟腥。

鐵崖評曰。五字老辣。

湧泉

光搖星彩亂。聲散雹珠圓。不爲將軍拜。元機極後先。

鐵崖評曰。五字有餘妙句。

唐奎

奎字文昌。晉陽人。

靜安八詠

赤烏碑

河水初潤瓠子決。東吳滬瀆復漫泄。重元不見赤烏碑。悵惘波臣心欲折。元龜抃舞蒼龍飛。江頭落日楓林稀。誰云杜公兩石在。安知陵谷千年非。

鐵崖評曰。句語超。

陳檜

禪明老檜高百尺，十畝蒼寒浸苔石。虬枝偃如東向松，霜皮慘若西來伯。金陵王氣當時誇，落日江村啼亂鴉。壁月滿天清夜靜，玉簫吹落後庭花。

鐵崖評曰：一結尤見老手。

鰕子禪

誰云儼師示化所，餘香未絕天花雨。癡禪狡獪悉共知，嚼碎紅鬚化龍舞。鰕崖評曰：鰕句有點丹神奇，癡禪化去鰕亦存。至今法門無盡燈，風雨幾度驚山靈。庭前柏樹猶青青。

講經臺

師遺臺石蒼苔厚，兔葵燕麥生禪肘。當國公享七十年，石丈人中誰肯首。鰕崖評曰：着調亦自好。我來作誌寫長文，可歎昔人諛墓金。自喜文章如謝朓，涅槃重問遠公林。

鐵崖評曰：自高妙不妨。

滬濱壘

吳淞江上袁公壘，千年何處尋遺址。石犀半落江水中，秋老蘆花三十里。五百馬塵今尙飛，啾啾赤子將安歸。月明古堞急鼓鼙，孤臣有淚空沾衣。

鐵崖評曰：書生憂國憂民語，有足感動人者。萬古而不磨。

蘆子渡

耶城東來蘆子渡。萬頃蘆花失江路。明月清秋作雪飛。村中不見將軍墓。只今海內風塵昏。移家來就漁樵倫。處處桑麻有閑地。紛紛桃李傍公門。

鐵崖評曰。亦有感慨。

涂守約

句

西北窮陰連莽蒼。東南巨浸接微茫。詳趙孟頫下。

元詩紀事卷二十四

郭翼

翼字義仲，崑山人。老官訓導，自號東郭生。命其齋曰雪履。有林外野言。

雪履齋筆記：作詩如作字，橫眉直鼻，所差幾何，而清俗相去遠甚。然亦有姣好而俗者，有醜怪而清者，要不在皮相之媸妍也。

續吳先賢傳：嘗獻策張氏，言頗切忤，士誠幾欲殺之。

送人游武當山

武當諸峯何壯哉，大朶小朶青蓮開。元聖居中天地戶，赤日下照金銀臺。神龜六眼電光走，山鬼一脚雲頭來。道人再拜望北極，應帶滿身星斗迴。

懷鐵崖先生

楊子十年官不調，湖山不負謫仙才。洞庭鐵笛龍吹出，后土瓊花鶴寄來。車子看花將一轎，雪兒勸酒拗運臺。時時對客理弦索，月色羅衫小樣裁。

大雅集評曰：人呼老郭爲五十六，以其長於七言八句也。觀此二詩可知。

和鐵崖西湖竹枝詞二首

采蓮湖上一雙舟，白縠風生易覺秋。淺淺溪流齊鶴膝，青青荷葉過人頭。

四月南風海岸深。青旗高高柳陰陰。三江湖發來如馬。五兩風搖密似林。
西湖竹枝集。余以湖上竹枝。索義仲和。而義仲以吳之柳枝答云。

沈右

右字仲說。號御齋。吳中世家。有清輝樓集。

與慎獨先生

東林薄酒試新嘗。中有松花膩粉香。遣送潁川陳有道。書齋渴飲勝茶湯。

鐵網珊瑚。廿八字偕一壺薄酒奉上。惜不多耳。楊誠齋文稿。不曾收得。所謂芍藥屋。疑只是用幄
帟覆護者。古人稱牡丹爲木芍藥。白居易有詩云。上張幕屋茈。豈亦本諸此。未審是否。更乞考正
之。右再拜。

西湖竹枝詞

勸郎莫向花下迷。勸君莫待醉如泥。臨行更有分明語。枝上流鶯休亂啼。

西湖竹枝集。能掠去豪習。刻志詩書。與縉紳先生游。故其詞理婉順如此。

同同

同同。字同初。蒙古人。狀元及第。官至翰林待制。

西湖竹枝集。詩多臺閣體。天不假年。故其詩文鮮行於時云。

和西湖竹枝詞

西子湖頭花滿煙。謾郎日日醉湖邊。青樓十丈鉤簾坐。簫鼓聲中看畫船。以下均詳燕不花下，唐棣

棣字子華。歸安人。由茂才異等。官至休寧縣尹。

和西湖竹枝詞

門前楊柳亂吹花。第一橋頭第一家。馬上郎君休挾彈。柳枝深處有慈鴉。

蟬精雋。可謂長者之言也。

韓好禮字彥敬。口口人。

和西湖竹枝詞

翠柳黃鶯金縷衣。海棠紅鵲兩相思。賓郎本是薄情鳥。獨要阿儂呼畫眉。

西湖竹枝集。此詞暗藏禽鳥之名。

案韓好禮與陳樞元詩。癸集因相次而互誤。今據西湖竹枝集正之。

黃季倫

季倫字季倫。番陽人。

西湖竹枝集。與危太樸爲唱和友。嘗游京師。從翰林學士揭公游。充三史書寫。工畢。奉命覲上中書。授以長洲縣教諭。

前題

錢塘江頭莎草齊。錢塘女兒歌別離。願郎相見如月子。月子團團無暗時。
湖上女兒猶褐衣。出門日日望郎歸。春水繞湖春草綠。草上雙雙蝴蝶飛。
李廷臣

廷臣字仲虞。台之寧海人。

西湖竹枝集。湖海間多稱道所作。仲容丁先生尤愛重之。

前題

楊花飛盡荷花開。南人北人湖上來。蕩舟自唱黃陵一作葵曲。載得山頭月子回。
呂誠

誠字敬夫。吳之東滄人。

前題

江頭竹枝青復黃。纖纖織作養蠶筐。乍可採桑南陌上。不願黃金逢貴郎。

賈策

策字治安。大梁人。辟爲宗正府幕。官至仁和令。

西湖竹枝集。美丰姿。僑居西興。有賈公墩。嘗自綸巾衣鶴氅。吟嘯其上。自謂風度去古人不遠。詩
工唐七言律。字行草聯綿。

前題

郎身輕似江上篷。昨日南風今北風。妾身重似七寶塔。南高峯對北高峯。
塔簡

簡字無傲。京口人。官至江浙行省檢校官。張士誠陷松江。遇害。
前題

港上蘆蒲翠葉齊。鳬鷗鴻雁總來栖。勸郎得意且行樂。白苧樽前日易西。
楊椿

椿字子壽。蜀人。後爲吳人。爲總兵參謀。張士誠兵至。遇害。
前題

儂家生長在西湖。暮管朝絃隨處呼。早聽當初阿姨語。免教今日悔狂夫。
郎去天涯妾在樓。西湖楊柳又三秋。郎情莫似湖頭水。城北城南隨處流。
邊魯

魯字魯生。北庭人。以南臺宣使奉臺命西諭。不屈死。
西湖竹枝集。善古樂府詩。尤工畫花竹。

前題
戴勝降時桑葉青。梨花開處近清明。狂夫歸來未有信。蝴蝶作團飛上城。
楊慶源

慶源字宗善泗水人官信州永豐縣儒學教諭

西湖竹枝集祖爲止齋先生父爲改改道人俱有詩集行於世

前題

小姑女兒住裏湖年來十八十三餘自從湖口送郎去馬上金錢不受呼
湖中采菱菱刺長芡頭新剝掌中藏掌中芡子眼中淚化作鮫珠來遺郎
完澤

完澤字蘭谷西夏人官平江路萬戶平汀寇有功

前題

花滿蘇堤酒滿壺畫船日日醉西湖阿儂最苦兩離別不唱黃鸝唱鷓鴣
堤邊三月柳陰陰湖上春風似海深游人來往多如蟻半是南音半北音
謝寅

寅字叔畏上饒人疊山先生諸孫

前題

郎書前月發京華燕子來時當到家記得去年栽白苧郎君繫馬石榴花
徐夢吉

夢吉字德符杭之於潛人以茂才舉書院山長官常熟教授

前題

雷峯港口晚涼天。相喚相呼去採蓮。莫爲採蓮忘却藕。月明風定好回船。

劉肅

肅字子威。河南開封人。試郡從事後棄去。

前題

日出放船水中流。日落風波浪打頭。勸郎移向儂家去。楊柳青青堪繫舟。

李庸

庸字仲常。婺之東陽人。官江陰州知事。號用中道人。

前題

六橋橋下水流東。橋外荷花弄晚風。郎心似水不肯定。妾顏如花空自紅。

康瑞

瑞字瑞玉。廬陵人。廣東肅政府辟爲掾屬。官至富州判官。

西湖竹枝集。尤工古樂府。邵庵虞公畏友也。

前題

大船撻鼓銀酒缸。小船吹笛紅繡窗。鴛鴦觸櫂忽驚散。荷花深處又成雙。燕子來春雁來秋。曾見錢王衣錦遊。英雄漫說八百里。只管東西十四州。

獅子峯頭插將旗。鳳凰山下草離離。三宮去後宮門閉。恰似錢王獻土時。
陸繼善

繼善字繼之。吳江人。自號甫里道人。

前題

手種宜男寄去時。花開灼灼葉離離。芳心不似蘼蕪草。一任春風爛熳吹。
朱彬

彬字仲文。吁江人。登進士第。

前題

南北峯高作鏡臺。十里湖光如鏡開。行人有心都照見。勸郎肝膽莫相猜。
湖水東來日欲西。蘭荇參差那得齊。蘇公堤邊人蕩槳。吳山樹頭鴉欲棲。
歐陽公瑾

公瑾字彥珍。廬陵人。

前題

第一橋邊第一家。瓜皮船子送琵琶。妾身自是良家女。不是當年蘇小家。
鄭賀

賀字慶父。諸暨人。幼出家。晚歸宗。

西湖竹枝集詩有詠史自鼎湖訖清風嶺凡三百餘首傳於人

前題

北高峯頭儂望夫望見西子下姑蘇脂塘水腥吳作沼莫將西子比西湖

高克禮

克禮字敬臣河間人官慶元理官

前題

第四橋頭第一灣看魚直上玉泉山大魚已逐龍飛去留得當年舊賜環

屠性

性字彥德會稽人領至正鄉薦

前題

二八女兒雙髻丫黃金條脫銀條紗清歌一曲放船去買得新妝茉莉花

李元珪

元珪字廷璧河東人

西湖竹枝集作詩若不經思往往超詣穎脫字法追蹤漁陽

前題

郎去遠過江上山望郎江上幾時還只怕郎歸不相識湖邊日日照容顏

三月湖邊花亂開。江邊望船郎未回。燕子來時春又去。心酸不待喫青梅。

陳聚

聚字敬德。臨海人。基兄。官常熟州教授。

西湖竹枝集詩尤工律體。多膾炙人口。

前題

茜紅裙子柳黃衣。花間採蓮人不知。唱歌蕩槳過湖去。荷葉荷花風亂吹。

張渥

渥字叔厚。淮南人。

西湖竹枝集善屬文。能用李龍眠法爲白描。

前題

長簪高髻畫雙鴉。多在湖船少在家。黃衣少年不相識。白日敲門來索茶。

陸元泰

元泰字長卿。吳之崑山人。

前題

桃花街口春水波。梅花墓下竹枝歌。桃花開處春光老。梅花開處月明多。

馬稷

稷字民立。吳郡人。

西湖竹枝集。不經師授。而能吟詠。雖居賈販。而獨能脫去其習者也。

前題

與郎別久夢相思。不作西園蝴蝶飛。化作春深鷓鴣鳥。一聲聲是勸郎歸。

繆侃

侃字叔正。吳之常熟人。

西湖竹枝集。詩工玉臺小體。書善楷隸。家有述古堂。貯法書古物。

前題

初三月子似彎弓。照見花開月月紅。月裏蟾蜍花上蝶。憐渠不到斷橋東。

任昱

昱字則明。四明人。

西湖竹枝集。少年狎游平康。以小樂章流布裙釵。晚銳志讀書。爲七字詩甚工。

前題

儂住湖邊。一作西湖。二十年。花開花落任春妍。門前有個垂楊樹。不著游人繫畫船。

蔣克勤

克勤字德敏。湖州長興人。

西湖竹枝集字畫秀潤步追吳興云。

前題

題詩秋葉手新裁。好似阿儂紅頰腮。寄與錢塘江上水。早潮回去晚潮來。

周溥

溥字公輔。吳興人。領鄉薦。

西湖竹枝集其詩如鄉閭新省。比事至百韻。亦以詩爲史者也。

前題

西湖西畔上清家。美人有如綠萼華。七星道冠拜星斗。萬一瓊臺乘紫霞。

錢大有

大有字明遠。嘉興人。

西湖竹枝集始恨詩不工。輒自忿曰。杜甫云。讀書破萬卷。下筆如有神。吾患讀不多。不患作不工也。既而下筆流暢。不疑於物。

前題

淡黃裙子縷金衫。長髻垂肩短鳳簪。不願燕一作西京嫁官去。花枝草蔓自江南。

留春

春字養愚。括蒼人。

西湖竹枝集。所居好溪。有紫芝元鶴。嘗著書。自號留子云。

前題

湖上南風六月涼。採蓮驚起雙鴛鴦。妾心恰似蓮心苦。郎心不似藕絲長。

張田

田字芸己。吳郡人。

西湖竹枝集。工歌詩。不務苟作。有擬九體詩。

前題

潮去潮來春復秋。錢塘江水通湖。一作潮頭。願郎也似江潮水。暮去朝來不斷流。

張師賢

師賢字希顏。崑山人。

西湖竹枝集。好古物圖畫。雜列左右。人間欲得之。即便持去。毋所顧惜。

前題

孤山脚下路三叉。孤山墓上好梅花。不似馬塍桃李樹。隨春供送別人家。

顧敬

敬字思恭。吳郡人。

前題

樓船兒女日晚歌蓮心結子綰雙螺湖水瀟瀟湖月白奈爾湖中涼夜何

朱庸

庸字伯常四明人

前題

小姑疑郎去不歸爲郎打瓦復鑽龜青山尙有飛來日不信人無相見時
阿奴采蓮湖上舟阿郎販豆遼東州一心願逐東流水流送遼東古渡頭

李一中

一中字彥初山陰人

前題

阿儂隨郎上釣舟郎作釣絲儂作鈎釣絲無鈎隨風蕩鈎鈎無絲隨水流

陳樞

樞字仲機

前題

且莫唱君楊白花聽我西湖竹枝歌竹枝青青多竹節楊花輕白奈君何
鴛鴦宛在水中央恰似阿奴初嫁郎擲却郎君金彈子勸郎切莫打鴛鴦
莊蒙

蒙字子正烏程人。

前題

日出裏湖煙水開。初陽臺下抱琴來。夜深彈罷烏啼曲。明月自照高高臺。
宋元禧

元禧字無逸。姚江人。明洪武初徵修元史。

前題

十三女郎不出門。父娘墓在葛山根。同攜女伴踏青去。不上道旁蘇小墳。
湖上采薪春復春。養蠶長見繭絲新。老蠶不識人間事。猶趁東風了此身。
嚴恭

恭字景安。吳之練川人。

西湖竹枝集。築室海上。號惜寸陰齋。

前題

湖中女兒不解愁。三三蕩槳百花洲。貪看花間雙蛺蝶。不知飛上玉搔頭。
張世昌

世昌字叔京。諸暨人。

西湖竹枝集。爲詩善比事。以故多喜效排律詩。至三百餘韻不少衰。

前題

秦皇石頭三丈高。云是秦王繫船標。儂心只似繫船石。莫比郎心船易搖。
馬貫

貫字本道。紹興人。辟府從事。不就。

前題

吳車軋軋小車紅。爭來陌上看春風。不敢高聲唱歌去。恐驚丞相在船中。
百花樓頭聞馬嘶。郎從花裏鬪金雞。朝朝捲起珠簾望。不是郎歸不下梯。
曹睿

睿字新民。永嘉人。

前題

昨夜西湖月色多。照見郎君金叵羅。明朝江頭放船去。江亭風雨奈君何。

馮士頤

士頤字正卿。富春人。

西湖竹枝詞

與郎情重爲郎容。南北相看只兩峯。請看雙投橋下水。新開兩朶玉芙蓉。

山堂肆考。杭州西湖南入路有雙投橋。舊有情人雙投於橋下。故名。一名長橋。元富春馮士頤詩。

云云。

留青日札。西湖今但知有冷泉。而不知有溫泉醴泉。並在冷泉之上。見武林舊事。今不可考矣。楊廉夫西湖竹枝詞。家住西湖新婦磯。又石新婦下水連空。郊九成竹枝詞。風篁嶺頭西日暉。青龍港口新月微。馮士頤詞。請看云云。此皆遺跡也。

不花帖木兒

不花帖木兒。字德新。

絕句

玉樓珠箔晚天涼。秋色依稀滿建章。金井梧桐霜葉盡。自隨流水出宮牆。

西湖竹枝集。國族居延王孫也。所爲詩。落筆有奇語。如云云。亦宮詞之體也。

掌機沙

掌機沙。字密卿。

西湖竹枝詞

南北峯頭春色多。湖山堂下來棹歌。美人蕩槳過湖去。小雨細寒生綠波。

西湖竹枝集。阿魯溫氏。禮部尙書哈散公之孫也。學詩於薩天錫。故其詩風流俊爽。觀於竹枝。可以稱才子矣。

聶鏞

鏞字茂先蒙古氏

宮詞

九重天上日初和。翡翠簾垂午漏過。聞到南閩新入貢。雕籠進上白鸚哥。

西湖竹枝集。幼警悟。從南州儒先生問學。通經術。善歌詩。尤工小樂章。其音節慕薩天錫。如云云。亦宮詞之選也。

郭庸

庸字彥中東平人

西湖竹枝詞

日落平湖艇子遲。岸花汀草伴人歸。鴛鴦驚散東西去。唯有蜻蜓蛺蝶飛。流光昨日又今朝。猶憶當年醉六橋。金鵲翠蕤紛在眼。生紅七尺繫郎腰。

西湖竹枝集。銳志經學。善屬文。作詩有新意。時輩罕及。觀其竹枝。亦可謂中州之才子也。

王立中

立中字彥強蜀人

列朝詩集。元末爲松江太守。入明致仕。

絕句

梅粉凝嬌不肯添。萬雲籠暝壓重簷。江南可是春寒甚。十日東風不捲簾。

又

春波橋頭柳似煙。越王城郭在西邊。我家繞屋皆春水。盡日鴛鴦隨釣船。

西湖竹枝集。少年傲達凌物。晚刻節厲行。能以門蔭公子。爭秀於作者之林。詩如云云。又云云。得風流美譽。往往類此。

熊進德

進德。字元修。上饒人。

西湖竹枝詞

金絲絡索雙鳳頭。小葉尖眉未著愁。大姑昨夜苕溪過。新歌學得唱湖州。銷金鍋邊瑪瑙坡。爭似儂家春最多。蝴蝶滿園飛不去。好花紅到剪春羅。

蟬精雋。元上饒熊進德作詩幽深。嘗作西湖竹枝詞云云。杭西湖方南渡盛時。綺羅錦繡。畫舫笙歌。游人士女。日費千金。時人目爲銷金鍋。故云。

句

木怪鬼欲出。山空巖自鳴。

西湖竹枝集。其爲人退然若不及。而才名日進。不可禦。如木怪云云。其用心亦幽而深矣。而不知其善吐媚語。則如此詩者是也。

徐哲

哲字延徽萊州萊陽人

前題

盡說盧家好莫愁不知天上有牽牛
膽拋萬斛燕支水溜向銀河一色秋

升庵詩話元楊廉夫竹枝詞一時和者五十餘人余獨愛徐延徽云云

韋珪

珪字德珪山陰人

前題

湖中艇子風徐徐秋水蕩漾金芙渠
釣魚不是貪雙鯉爲恐腹中藏素書
蘇小門前月漾波牽牛織女挂秋河
恨妾如星圓處少恐郎如月缺時多

西湖竹枝集早年以詩鳴其鄉有梅花百詠梓行於書坊其網羅古今詩人之學而日進於近古者未已也竹枝二章語意俱新可稱作者矣

盧浩

浩字養元錢塘人

西湖竹枝詞

記郎別時風颼颼銀鼠帽子黃鼠袍
別來轍迹不可見湖邊青草如人高

西湖竹枝集竹枝首章杭人爭誦之

吳禮

禮字和叔歙縣人

西湖竹枝詞

湖上鴛鴦相對飛。春寒著人郎未歸。莫捲珠簾看行路。楊花撩亂撲人衣。

西湖竹枝集爲吏有操行。雖簿書叢中。不廢吟事。故其詞婉然。

申屠衡

衡字仲權大梁人

列朝詩集洪武間徵至京師。授翰林修撰。無何病免。疑不肯仕。謫徙濠。卒於濠上。

絕句

青鎖春閒漏點遲。博山香煖翠煙微。隔簾誰撼金鈴響。知是花間燕子歸。

西湖竹枝集少貧。恥爲商賈胥吏之習。銳志經史。善屬文。然爲時經生而兼工詩翰。度越流輩。時論難之。其云云。可以列才子之林矣。

姚文奐

文奐字子章。崑山人。辟爲浙東帥閫掾。自號婁東生。與郭義仲。鄭九成。顧仲瑛。相唱和。有野航亭稟。

竹枝詞四首

儂家只在斷橋邊。勸郎切莫下湖船。湖船無柁難輕託。白日風波在眼前。
晚涼船過柳洲東。荷花香裏偶相逢。剝將蓮肉猜拳子。玉手雙開各賭空。
冰肌玉骨自清涼。藕花十里錦雲香。一朵紅衣初脫卸。那將蓮子打鴛鴦。
家住西湖第四橋。自從卅角學吹簫。年來愁得兩鬢雪。吹盡春風那得消。

張守中

守中字大本。吳都人。

西湖竹枝詞

西湖女兒似西施。瓜皮小船歌竹枝。郎心如月有時黑。妾身如山無動時。
蘇公堤上柳枝枝。月子彎彎似妾眉。記得雙雙拜新月。只今獨有影相隨。

沈性

性字自誠。吳興人。

前題

儂住西湖日日愁。郎船只在東江頭。憑誰移得湖山去。湖水江波一處流。

燕不花

燕不花字孟初。張掖人。

前題

湖頭春滿藕花香。夜深何處有鳴榔。郎來打魚三更裏。凌亂波光與月光。

西湖竹枝集序。前元楊維禎氏。寓居湖上。日與鄒韶輩留連詩酒。乃賦西湖竹枝詞。一時從而和者數百家。雖婦人女子之作。亦爲收錄。其山水之勝。人物之庶。風俗之富。時代之殊。一寓於詞。各見其意。集成。維禎既加評點。仍於諸家姓氏之下。注其平昔出處之詳。版行海內。而竹枝之音。過於瞿塘東吳遠矣。

案同同以下諸人。別無他傳。作者皆彙錄於此。不更次時代。分散各卷中焉。

元詩紀事卷二十五

張昱

昱字光弼。廬陵人。左丞楊完者鎮江浙。用參謀軍府事。遷左右司員外郎。有廬陵集。羽庭集。扁其室爲一笑。爾後錢塘遭變。失其故處。尋得敝居。湫隘不治。亦復以一笑顏之。西湖游覽志。昱罷官時。居室已敝。友人凌彥紳募緣以葺之。疏云。昌黎寄玉川子。首稱洛陽破屋之數間。東坡題綠筠軒。終比揚州纓腰之十萬。一笑居士詩名優於張籍。生計劣於陶潛。囊無一錢之留。家徒四壁之立。若非慷慨而多助。安得輪奐之一新。卽欲取杜工部草堂費。何時可辦。倘葺得楊關西槐市塾。今歲無憂云云。疏傳。交遊皆助之。列朝詩集。太祖徵至京。閱其老曰。可閒矣。遣還。因自號可閒老人。

過歌風臺

世間快意那有此。亭長還鄉作天子。沛宮不樂復何爲。諸母父兄知舊事。酒酣起舞和兒歌。眼中盡是漢山河。韓彭受誅鯨布戮。且喜壯士今無多。縱酒極歡留十日。感慨傷懷涕沾臆。萬乘旌旗不自尊。魂魄猶爲故鄉惜。從來樂極自生哀。泗水東流不再回。萬歲千秋誰不念。古之帝王安在哉。莓苔石刻今如許。幾度秋風灞陵雨。漢家社稷四百年。荒臺猶是開基處。

歸田詩話。一日作歌風臺詩。乘醉來過。爲余朗誦之云云。蓋得意所作也。豪邁跌宕。與題相稱。

西湖志餘。一日乘酣。朗唱於瞿宗吉。以界尺擊卓。鏗然若金石也。

唐天寶宮詞

興慶池頭芍藥開。貴妃步輦看花來。可憐三首清平調。不博西涼酒一杯。

歸田詩話。又嘗作唐宮詞數首。中間可憐云云。予曰。太白於沈香亭應制。親得御手調羹。貴妃捧硯。力士脫靴。不可謂不遇。何必西涼酒一杯乎。光弼亦大笑。

春日

一陣東風一陣寒。芭蕉長過石欄杆。只消幾度瞢騰醉。看得春光到牡丹。

七修類稿。元末政壞。遂棄官不仕。以詩酒自適。有春日詩云云。蓋寓時事也。今集中亦無。嘗曰。吾死埋骨西湖。題曰詩人張員外墓足矣。後果如其言。海昌胡虛白作詩以弔云。二仙坊裏張員外。頭白相逢只論詩。今日過門君不見。小樓春雨燕歸遲。二仙坊在杭之壽安坊西。卽今之花市也。

楚下曲一百二首并序 錄四十

昱備員宣政隨判官。以僧省事簡。搜索舊文稿於囊中。曩在京師時。有所聞見。輒賦詩。有宮中詞。塞上謠。共若干首。合而目之曰楚下曲。其據事直書。辭句鄙近。雖不足以上繼風雅。然一代之典禮存焉。

五坡千陸立朝廷。檻首銅鵬一丈翎。不待來儀威鳳至。日聞韶濩在青冥。州橋拜伏兩珉龍。向下天潢口派通。四海仰瞻天子氣。日行黃道貫當中。

東樓緋服唱雞人。擊到朱聲第幾聲。楠寢奉常先告備。駕行三叩紫鞘鳴。
國戚來朝總盛容。左班翹鶚右王封。功臣帶礪河山誓。萬歲千秋樂未終。
三司侍宴皇情洽。對御吹螺大禮終。寶扇合鞘催放仗。馬蹄哄散萬花中。
只孫官樣青紅錦。裹肚圓文寶相珠。羽仗執金班控鶴。千人魚貫振嵩呼。
西天法曲曼聲長。瓔珞垂衣稱豔妝。大宴殿中歌舞上。華嚴海會慶君王。
竹扛金鑄百尋餘。頂版高鑄梵國書。禁得下方雷與電。聲光不敢近皇居。
墀左朱闌草滿叢。世皇封植意尤濃。艱難大業從茲起。莫忘龍沙汗血功。
國初海運自朱張。百萬樓船渡大洋。有訓不教忘險阻。御廚先飯進黃梁。
遼東羞貢入神廚。祭鮪專車一大魚。寢廟歲行春薦禮。有加釧豆雜鮮脰。禽鳥之肉。
當年大駕幸灤京。象背前馱幄殿行。國老手鑪先引導。白頭聯騎出都城。
請號關牌趨鼓閣。弓刀千騎領兵符。例差右姓巡倉庫。哄唱穹廬賜大酺。
祖宗詐馬宴灤都。桐酒噶噶載愁車。向晚大安高閣上。紅竿雉帶埽珍珠。
駝裝序入日精門。銅鼓牙旗作隊喧。一聽巡階鈴鉞振。滿宮俱喜出迎恩。
華纓孔帽諸番隊。前導伶官戲竹高。白傘葳蕤避馳道。帝師輦下進葡萄。
守內番僧日念咒。御廚酒肉按時供。組鈴扇鼓諸夫樂。知在龍宮第幾重。
御前親拜中書令。恩賜東宮設內筵。手署勅黃唯一道。任誰祇受付雙遷。

雞人唱罷內門開。千騎前頭丞相來。衛士金瓜雙引導。百司擁醉早朝回。
端本堂深繡榻高。滿前學士盡風騷。星河騎士知唯馬。慣識金牋玉兔毫。
儒臣奉詔修三史。丞相銜兼領總裁。卒士院官傳賜宴。黃羊拘酒滿車來。
文明天子念孤寒。科舉人材兩榜寬。別殿下簾親策試。唱名纔了便除官。
鑪香夾道湧祥風。梵輦遊城女樂從。望拜綵樓呼萬歲。柘黃袍在半天中。
對朋角飲自相招。黃鼠生燒入地椒。馬湏飲輪金鐸刺。頂寧割髮不相饒。
柳林密遣弄臣回。封印黃金盒一枚。天語直將西內去。便教知是草芽來。
直教海子望蓬萊。青雀傳言日幾回。爲造龍舟載天姆。院家催造畫圖來。
西方舞女卽天人。玉才疊花滿把青。舞唱天爐供奉曲。君王長在月宮聽。
鴨綠江波勝鴨頭。魚龍變化滿中州。分來一派天潢水。到得烏桓便不流。
昭君遣下漢琵琶。拗軫誰彈狼獲沙。春色不關青塚上。只今芳草滿天涯。
西番僧果依時供。小籠黃旗帶露裝。滿馬塵沙兼日夜。平坡紅豔露猶香。
圓殿儀天十六楹。向前黃道不教行。帳房左右懸弓角。盡是君王宿衛兵。
棕毛四面擁龍床。殿角涼生紫霧香。上位勵精求治切。不曾朝退不擡湯。
閒家日逐小公侯。藍棒相隨覓打毬。向晚醉嫌歸路遠。金鞭相過御街頭。
鬬鷁初能草初黃。錦袋牙牌日自將。鬧市閑坊尋搭對。紅塵走殺少年狂。

教坊女樂順時秀。豈獨歌傳天下名。意態由來看不足。揭簾半面已傾城。
似將慧日破愚昏。向日如嘗下釣軒。男女傾城求受戒。法中秘密不能言。
肩垂綠髮事康禪。淡掃蛾眉自可憐。出入內門裝飾盛。滿宮爭逐女神仙。
壁衣面面紫貂爲。更繞腰闌挂虎皮。大雪外頭深一尺。殿中風力豈曾知。
天朝習俗樂從禽。爲按名應出柳陰。立馬萬夫齊指望。半空鵝影雪沈沈。
欄馬牆臨海子邊。紅葵高柳碧參天。過人不敢論量數。雨露相將近百年。

宮中詞二十一首并序 錄十二

宮中詞。唯唐陝司馬王建一百首爲得體。蓋從內臣出入宮闈所賦。俱實見其事。厥後蜀主花蕊夫人效其體。賦詩一百首。亦其身親見之。宋王安國校官書。見其本。序而置之內閣。元初奉天楊奐錄宋宮人語五言詩十八首。頗得其情。足次二家後。大抵宮中詞論。富有天下貴爲天子。不可以文工拙稱。必非想像。必親見。皆非閭巷之士可擬而賦者。後學廬陵張昱光弼誌。

裏頭保母性溫存。不敢移身出後門。尋得描金龍鳳紙。學摹國字教皇孫。
頒賜三宮端午節。金絲繡扇繡紅紗。謝恩都作男兒跪。拜起深深鷓鴣尾斜。
內人哄動各盈腮。談自西宮撒雪回。報與內司當有宴。羊車今晚蚤將來。
宮衣新尙高麗樣。方領過腰半臂裁。連夜內家爭借看。爲曾著過御前來。
和好風光四月天。百花飛盡感流年。宮中無以消長日。自擘龍頭十二絃。

鴛鴦鵲滿池嬌。綵繡金茸日幾條。早晚君王天壽節。要將著御大明朝。
宮羅支請銀霜褐。徹夜房中自剪裁。明日看花西內去。牡丹臺畔木瓜開。
延華閣下日如年。除是當番到御前。尋出塗金香墜子。安排衣線撚春綿。
頻把春羅拭汗腮。綠雲背綰未曾開。相扶相曳還宮去。笑說秋千架下來。
上苑新波小海分。綠香溢岸好湔裙。故將禁指監官見。放出天河洗綵雲。
填金臂失戲分明。贏得珍珠三兩升。便去房中還賭賽。黃封銀榼酒如澠。
從行火者笑相招。步輦相將過釣橋。鹿頂殿開天樂動。西宮今日賽花朝。

士禮居藏書題跋記。元張光弼詩二卷。趙清常道人跋云。集有輦下曲百二首。宮中詞二十一首。皆道胡元宮闈中事也。

五府驛代楊左丞留題

免胄日趨丞相府。解鞍夜宿五侯家。玉杯行酒聽春雨。銀燭照人如一作天生。晚霞受命敢忘一作世亂。
且從軍旅事。撫時又過掖垣花。一作功成須插御簪花。漢家一作王。未可輕韓信。尙要生擒李左車。
西樓柳風吹晚香。石榴裙映黃金觴。纖歌不斷白日速。微雨欲度行雲涼。笑看席上賦鸚鵡。醉聽門前嘶
驢驢。早晚平吳王事畢。羽書飛插入朝堂。

句

蛺蝶畫羅宮樣扇。珊瑚小柱教坊箏。玉瓶注酒雙鬢綠。銀甲調箏十指寒。新粧滿面猶看鏡。殘夢關

心懶下樓

歸田詩話。張光弼詩云云。又云云。蓋時在楊完者左丞幕下。故所賦如此。又蛺蝶各云云。多爲杭人傳誦。其一時富貴華侈。盡見於詩云。

留青日札。臨川岳東軒能詩文。而灑翰深得李北海遺意。余偶購得二幅。其一免胄日趨丞相府。解鞍夜宿五侯家。一柱東南擎日月。五城樓閣爛雲霞。受命無忘軍旅事。盛事須折按垣花。漢家未可輕韓信。尙要生擒李左車。其二。皇明正朔承千載。天下車書共一家。玉杯行酒聽春雨。紅燭照人如晚霞。寶刀雷煥蒼精劍。天馬郭家獅子花。收拾全吳還聖主。將軍須用李輕車。筆法妙絕。但瞿宗吉詩話中載是張光弼詩。與此不同。此二詩或大年所改定爲之也。

又

西河伶人火倪赤。能以絲聲代禽臆。白翎雀歌。

靜志居詩話。陳雲嶠云。白翎雀生於烏桓朔漠之地。雖雄和鳴。自得其樂。世皇因命伶人碩德閭。製曲以名之。曲成。上曰。何其末有哀嫠之音乎。時譜已傳矣。故至今莫之改。陶九成云。白翎雀者。教坊大曲也。始甚雍容和緩。終則急躁繁促。殊無有餘不盡之意。楊廉夫云。白翎雀能制猛獸。尤善擒駕鵝。廉夫有二詩詠之。張思廉王子充。張光弼皆有作。第雲嶠言製曲者碩德閭。而光弼獨云云。微有不同。

張簡

簡字仲簡吳郡人自號白羊山樵。

醉樵歌

東吳市中逢醉樵。鐵冠欹側髮飄蕭。兩肩矻矻何所負。青松一枝懸酒瓢。自言華蓋峯頭住。足跡踏遍人間路。學書學劍總不成。惟有飲酒得真趣。管樂本是王霸才。喬松自有煙霞具。手持崑崗白玉斧。曾向月裏斫桂樹。月裏仙人不我嗔。特令下飲洞庭春。興來一吸海水盡。卻把珊瑚樵作薪。醒時邂逅逢王質。石上看棋黃鵠立。斧柯爛盡不成仙。不如一醉三千日。於今老去名空在。處處題詩償酒債。淋漓醉墨在人間。夜夜風雷起光怪。

藝苑卮言。當勝國時。法網寬。人不必仕宦。浙中每歲有詩社。聘一二名宿。如廉夫輩主之。刻其尤者爲式。饒介之仕僞吳。求諸彥作醉樵歌。以張仲簡第一。季迪次之。贈仲簡黃金十兩。季迪白金三斤。

續吳先賢讚。師事張伯雨。爲黃冠。張氏之亂。反服養母。饒介嘗延諸客。授簡使賦。季迪孟載方締思。簡已就篇。衆推第一。介贈黃金一餅。

罽石篇

山中學仙人。斷穀自有方。泌水生石精。鬻之以爲糧。候火中夜起。松材製馨香。切以昆吾刀。間以瓊莖漿。長年尙服食。玉體生光芒。一朝凡骨換。白日凌風翔。

西湖竹枝集。雲邱道人詩。工韋柳。翰墨無俗氣。而暗合書法。自詩名益著。而字畫因之而並行。詩

如鸞石篇云。

周霆震

霆震字亨遠吉之安成人。生前至元之季科舉行再試不利杜門授徒。晚遭至正之亂。明洪武十二年卒。私諡清節先生。有石初集。

古金城謠并序

國家承平百年武備寢弛盜發徐穎熾於漢淮武昌南紀雄藩一旦灰滅洪省堅壁寇蔓延諸郡水陸犬牙北來名將相繼道殞丞相出督步騎直抵高郵事垂成以讒廢方面多貴游子弟貪鄙庸才虛張戰功肆意罔上誅求冤濫慘酷百端重以吏習舞文旁羅鷹犬意所欲陷卽誣與賊通其弊有不忍言者間存一二廉介則又矜獨斷昧遠圖坐失機會民日以敝盜日以滋廬壽舒三州屏蔽上流廬壽旣沒舒獨當鋒鏑之衝至正十年壬申進士余闕以淮西元帥之節來鎮廣設方略招徠補葺備戰守豐軍儲賊飲恨不得逞朝廷嘉其功授淮南參知政事自是日與賊還受違凡四十又二大小二百餘戰江西賴以苟安坐視弗援十八年正月丙午城遂陷公一門爭先赴死闔郡無一生降賊黨舉手加額稱余元帥天下一人購得其尸城下池中禮葬之傷哉寄痛哭於長歌使後人哀也

昆侖烈風撼坤軸日車斂轡咸池浴六龍飲渴呼不聞赤蜺玄蠶厭人肉荆襄弗支廬壽孤江東掃地如摧枯忠臣當代誰第一七載舒州天下無東南此地關形勝天柱之峰屹千仞當年赤壁走曹瞞天爲孫

吳產公瑾。我公千載遙相望。崎嶇恆以弱擊強。孤城大小二百戰。食盡北拜天無光。當關援劍蒼龍吼。盡室肯汙姦黨手。摧鋒闔郡無生降。羣盜言之皆稽首。堂堂省憲羅公卿。建官分閫日募兵。哀哉坐視無寸策。遂使流血西江平。向來不曉皇穹意。名將南征死相繼。一時貪暴聚庸才。玩寇儉安饗富貴。河流浩浩龍門西。燕山萬騎攢霜蹄。英雄暴骨心未死。去作海色催朝雞。玉衣飛舞空中見。太息孤忠塵百戰。五陵元氣待天還。睢陽誰繼中丞傳。

李潯陽死節歌并序

李侯治潯陽之二載。紅巾賊發蘄黃。倚蔡醜爲聲援。勢浸逼郡。數告急於省。省議調兵。武昌興國相繼沒。南北道梗。潯陽厄。侯力疾獎率民義。誓不與賊俱生。郡將悉所部先遁。侯轉戰力盡。猶持短兵奮擊。慷慨指天。父子同遇害。嗚呼。李侯可謂仁義之勇矣。彼滔滔者獨何心哉。侯家潁川名。黼字子威。曾祖而下。仕皆通顯。發身監學。泰定丙寅。鄉試魁上都。丁卯進士第一。死節壬辰春。年五十有六。

蜀川會漢投匡廬。潯陽之厄江西樞。李侯仗節忠貫日。存沒誓與城池俱。夫何郡將弛練卒。世祿忍負私其軀。寇來談笑啓關道。坐使邑井成丘墟。侯時力疾短兵奮。臣首當血心當刳。魂歸謁帝慟伏闕。塗地肝腦民何辜。臣衷願瀝付渠答。臣首欲飛宜僕姑。誓堅紅壁殲衆醜。卻掃淮蔡匡全吳。黃塵四低黑風淡。赤豹騰駕蒼蚪呼。山川幾劫鑄英氣。上遡古昔誰其徒。平原汗馬河北重。江淮安堵睢陽孤。顏張凜凜心未死。迴立千載誠相孚。况聞有子殊激烈。義在從父輕頭顱。石頭之袁姑熟卞。兩間忠孝何時無。紛紛賣降

與棄甲。仰視汗喘呀長吁。惟公蓋自元氣立。顧盼所取皆詩書。當年射策首多士。已分一念金無渝。勛哉謀國愼所托。古今大勇惟真儒。

普顏副使政績歌并序

壬辰寇陷武昌。順流而下。省郎中普顏伯華。諗於衆曰。若其直擣真陽。事未可知。儻轉而南。無能爲矣。吾受國厚恩。發身監學。忝進士先。誓死必報。遣人間道馳書。奉百金歸別父母。建議盡撤城外民居。寇始渡江。官軍小衄。母弟佛奴死之。公單騎殿小橋。寇不敢逼。衆遂翕從。奉平章公道同。左丞章伯顏。竭志守城。逆黨雲集。攻圍五十有四日。大敗而還。散亡略盡。江南遂爲天下雄。非公長才贊畫。平章左丞聽用其言。詎至是邪。朝廷論功。除本道廉訪副使。於是公之口愈無窮矣。遠近士大夫。作爲公歌詩。頌其美。俟太史氏擇焉。公世家山東。希古其字也。邑士劉子真。近歸自洪。具道本末如此。

近時有客湖上歸。能話郎中身許國。朝廷取士數十年。誰謂書生無寸策。江州李侯死可書。郎中百戰全洪都。昔年廷對俱第一。鸞鳳固與羣飛殊。當其練兵首陳義。謂賊南征非所忌。環城撤屋民始疑。事急方知爲上計。家書問道馳山東。百金歸報壽乃翁。小臣於此誓生死。仰視白日照其忠。朔風雲低吹戰血。母弟魂歸寶刀折。倉皇勁氣吐寸心。立馬危橋萬夫決。相臣攬轡從天回。將軍鞞鼓轟春雷。爲公破敵捐萬死。顧盼妖賊如山摧。君王口口加褒異。深副當年設科意。碧霄雨露湛恩深。官轉霜臺弘國器。漢延寥寥渤海髡。廣陵張網尤罕逢。使君宴坐試深省。談笑憲府看平戎。

石初集附錄。門人晏璧撰行述。陳公一德。稱先生江南野史。誰復健筆。而集中隱約散見。皆可爲國史補。

過玉成砦

玉成三面堅如鐵。穿井無泉援兵絕。去年此際萬人登。已是如今髑髏骨。刀飛丁壯屠嬰孩。婦女分配囊。費財浪傳古昔險。堪恃曠劫竟墮昆明灰。我來似陟羊腸坂。道遇遺黎拭愁眼。故人何處覓遊魂。雲樹鴉啼寒日晚。

石初集自注。陳德新主戰。剛於永新罵不絕口而死。

城關西

雞鳴海東黃塵起。落日關山氣如水。餘民髓竭欲無生。月費給軍須萬計。尙書前時來使臣。近者太守宴將軍。割鮮飲醇互來往。白晝走馬邀紅裙。布衣小儒寸心赤。咄咄書空長太息。閭閻無奈覆盆何。帝禁九重方盱食。

石初集自注。兵部尙書黃昭奉詔遠出。按兵撫建閒。其行營經歷伍千章。安成醫生也。榮遇京師。出黃幕下。自撫抵吉。以督兵爲名。招權納賂。郡守梁水寨都事吳相與玩寇。儉安酒食徵逐無虛日。殆承平時所未有。

宿州歌

萬騎連雲發蜀都。宿州一擲似撈蒲。幕僚摺得流星檄。牙帳朝酣睡未蘇。

石初集自注。客有自中興來能言四川聞亂遣兵出援。主將日置酒高會。收其子女玉帛。而西宿州南北之咽喉也。知州廉能在任十二載。遠近歸心。因不納拜見之禮。責以軍前供給。知州既行。宿州遂陷。

寇至

羣醜發禾川。中宵羽檄傳。才收緣岸戍。已漲近城煙。掠貨舟相次。毆人騎獨先。兒孫猶九口。兩地寸心懸。元詩選。石初集又載。喜康子至一首。序云。幼兒淹滯劉氏館。中夜刼者壞大門而入。急呼宿客。父子起走。出遇寇。二客趨東廂影堂。寇追躡之。父死。子傷。吾兒避西廂。匿神龜側。幸免。死生之異。在毫髮閒。於其來也。且喜且悲。其領聯云。及今相見日。是汝有生初。詞意切至。他如風雨重陽云。鷹臺人化前千載。雁塞書沈外九州。中秋云。天意未知何日定。月華空似昔年來。紀事云。天地豈忘心。惛惛山河未放影分明。數語備見亂雜之慘。

元詩紀事卷二十六

陳有定

有定一名友定字安國汀之歸化人官至福建行省平章政事遂據閩中明兵至被執送京師死
列朝詩集有定爲元守閩招致文武士長樂鄭定輩在幕下以行省郎中廬州王翰德望表授潮
州路總管元末張士誠據吳方谷真據慶元皆能禮賢下士而閩海之士歸于有定一時文士遭
逢世難得以苟全者亦羣雄之力也有定起傭伍目不知書卒能通曉文翰其子宗海善騎射佐
有定據閩十年亦能賓禮文士有定被執宗海自將藥死父子稱完節焉
閩部疏建寧行都司是元陳平章有定開府極宏麗初以鼓樓爲門今移入二百步許猶朗朗可
觀後園有竹樹池沼亭臺之勝細泉溝流溢爲方沼其源直從處州龍泉來抵此始入溪

送趙將軍

縱橫薄海內不愴別離顏幾載飄零意秋風一劍寒

被收作

失勢非人事重圍戟似林乾坤今已老不死舊臣心

筆精陳有定元末倡義勤王太祖恨其不歸附置之重辟有定雖起行伍而亦能詩送趙將軍云
云及被收之後作詩云云

王翰

翰字用文。靈武人。先世本齊人。沒於西夏。元初賜姓唐兀氏。家廬州。用薦官至潮州路總管。有友石山人遺稿。

賦詩見志

昔在潮陽我欲死。宗嗣如絲我無子。彼時我死作忠臣。覆祀絕宗良可恥。今年辟書親到門。丁男屋下三人存。寸刃在手顧不惜。一死了却君親恩。

元詩選。陳有定據守全閩。留居幕府。陳氏敗。屏居永福之觀獵山。自號友石山人。如是者十年。辟書再至。歎曰。女豈可更適人哉。時長子偁纔九歲。屬其友人吳海。且賦詩見志云云。遂自引決。

伯顏

伯顏字子中。西域人。官至兵部侍郎。

元史。其先西域人。後仕江西因家焉。子中明春秋。五舉有司不第。行省辟授東湖書院山長。江南盜起。授分省都事。使守贛州。而陳友諒兵已破贛。子中倉卒募吏民。與鬪城下。不勝。脫身間道走閩。陳友定素知之。辟授行省員外郎。出奇計。復建昌。浮海如元都獻捷。持節發廣東何真兵救閩。至則廖將軍永忠已降何真。子中跳墜馬折一足。致軍前。永忠欲脅降之。終不屈。義而舍之。變姓名冠黃冠。浮行江湖。聞太祖求之不得。簿錄其妻子。子中竟不出。久之。事寢解。乃還故里。洪武十二年。詔令郡縣舉元遺民。將官之不應者。論重辟。布政使沈本立密言。子中於朝。詔以幣聘。使者

至。子中太息曰。死晚矣。爲歌七章。飲酖而死。

七哀詩七首

有客有客何纍纍。國破家亡無所歸。荒村獨樹一茅屋。終夜泣血知者誰。燕雲茫茫幾萬里。羽翮鍛盡孤飛遲。嗚呼。我生兮亂中遭。不自我先兮。不自我後。

我祖我父金月精。高曾累世皆簪纓。歲維丁卯吾以生。於赫當代何休明。讀書願繼祖父聲。白頭今日俱無成。我思永訣非沽名。生死逆順由中情。神之聽之。和且平。嗚呼祖考兮。俯馭假籙。豆失薦兮。我之責。

我母我母何不辰。腹我鞠我徒辛勤。母兮淑善宜壽考。兒不良兮負母身。殺維新兮酒既醇。我母式享無悲辛。嗚呼。母兮母兮無遠適。相會黃泉在今夕。

我師我師心休休。教我育我靡不周。四舉濫叨感師德。十年苟活貽師羞。酒既陳兮師戾止。一觴我奠涕泗流。嗚呼。我師兮。毋我惡。舍生取義未遲暮。

我友我友全公海公。愛我愛我兮。人誰與同。惟公高節兮。寰宇其空。百戰一死兮。偉哉英雄。嗚呼我公兮。斯酒斯酌。我魂我魂兮。惟公是托。

我子我子兮。嬌且癡。去住存沒兮。予莫女知。女旣死兮。骨當朽。女苟活兮。終來歸。嗚呼女長兮。毋我議。父不慈兮。時不利。

鳩兮。鳩兮。置女已十年。女不違兮。女心斯堅。用女今日兮。人誰我冤。一觴進女兮。神魂安然。嗚呼。鳩兮。果不我誤。骨速朽兮。肉速腐。

七修類稿先一夕具牲醴作七哀詩祭其先與昔時共事死節之士復手書短歌一篇寄別熊釗以後事屬之飲藥而卒詩云

林諫

諫字格非青田人官至兵部侍郎

句

淚寫血書寄吾弟早令昂姪繼吾宗

元詩癸集明太祖既平吳諫遣姪南歸并寫其像遣從弟詢作詩有云云聞者哀之明兵至通州從元主遁於沙漠

吳訥

訥字克敏休寧人官建德路判官兼義兵萬戶有萬戶集

破紅巾

君不見斬黃兒紛紛白馬張紅旗去年陷湖北今年陷淮西遂令深山之民皆帶甲四海瀕洞含瘡痍堆金積玉亦何有略地攻城徒爾爲又不見黃連寨左帶溪山右淮海天兵如日照雪霜百萬紅巾一朝敗親王按劍定中原丞相分兵救吳會邊人不識韓將軍極口爭誇鐵元帥八座東開昱嶺關羣僉欲度愁躋攀奇兵閒道絕歸路可憐白骨高如山桂林老臣再徵起坐鎮西垣幾千里昨聞餘黨犯其鋒血作龍沙半江水南方猛獠勇莫當自謂効義收斬黃賊徒一見驚喪膽堅壁不出知天亡諸君力盡在此舉巢

穴不平鼠爲虎。相期麟閣畫丹青。却憶虞廷舞干羽。

昱關行

昱關鐵騎爭馳突。白羽紅翎送金鏑。可憐五嶺之中間。朽骨茫茫照寒日。賊徒散走東南回。却倚黃連足。堅壁四面長圍築已成。礮架崔巍向城立。自知九死不一生。猶捲朱旗戰原隰。君不見韓將軍。陷陣常呼萬人敵。我當從之斬妖賊。

戰昱嶺關

鼓角聲雄隊伍齊。揚兵曉戰昱關西。黃金匣動雙龍出。赤羽旗開萬馬嘶。露布不煩諸將草。詩篇還効古人題。沙溪春酒甜如蜜。醉臥花陰聽鳥啼。

新安文獻志。楊鐵崖曰。克敏謁予。七者寮。出其所爲詩。予奇其人。適垣府相臣招致名士。講及三關之事。克敏慨然有擊楫中流之志。無幾。遂統士會諸軍於昱關。予聞而益奇之。其才勇忠義。實得於天性。則知嚮所爲詩。皆筆櫝之餘耳。

句

怪石有痕龍已去。落花無主鳥空啼。

新安文獻志。克敏以元義兵萬戶守昱關。與天兵再戰不利。退守札溪。題怪落花一聯於石壁。遂自剄。永嘉孔從善爲足成之。

孔從善

從善字口口永嘉人

續龍爪石壁題句

萬里西風起馬蹄。金戈回日塞雲低。未爲豫讓先亡趙。欲効田單獨報齊。怪石有痕龍已去。落花無主鳥空啼。至今天與英雄恨。嗚咽泉聲下札溪。

列朝詩集方行以元義兵萬戶守昱關。與明兵戰不利。退守札溪。題怪石落花一聯於石壁。遂自刎。孔從善爲足成之云。案牧齋全以吳訥事屬方行。然訥守札溪。見元史本傳。會軍昱關。又見文獻志。述鐵崖之言。殆訥字克敏。而行字明敏。故混而致誤歟。

丁鶴年

鶴年以字行。一字永庚。西域人。明永樂間卒。有海巢集。

仰山脞錄。常卜日葬其父。雨至。十日不止。鶴年仰天悲泣。翼日雨止。葬畢。雨如初。時兵亂後。失母墓所在。悲慕深切。夜夢母告以葬所。鄰翁韓重者亦夢焉。卽其地求而得之。見母屍正中一齒如漆。復嚙指血試之。良驗。人呼丁孝子。

海巢集。夢得先妣墓詩序。己未夏五月還武昌。遷葬。兵後陵谷變遷。先妣封樹。竟迷所在。久尋不得。露禱大雪中。冬十一月二十日夜。忽感異夢。翼日遂得其處。

過九江追悼李子威太守

瓣香遙拜九江城。太守精神日月明。叔姪並歸忠義傳。江山不盡古今情。潮回湓浦聲猶怒。雲起爐峯氣

未平生死總魁天下事。丈夫端不負科名。

昏瞶一首錄呈靈淵老師求印方

老來昏瞶底須嗟。聲色雙忘也自嘉。秋枕不驚風外葉。春杯長對霧中花。海師唱道禪多悟。張籍題詩字半斜。幸有靈臺長不昧。目觀耳聽總無差。

題貓

食有溪魚臥有裯。有恩深重更無倫。若將乳鼠誇爲瑞。恐負隆冬蜡祭人。

竹枝詞

竹雞啼處一聲聲。山雨來時郎欲行。蜀天恰似離人眼。十日都無一日晴。

詠蟬

蟬性極清高。愁吟類楚騷。炎天風露薄。度日亦嗷嗷。

採蓮曲

採蓮復採蓮。仍唱採蓮曲。若欲知苦心。須食蓮中肉。
採蓮復採蓮。踟躕一何久。不愁花妬容。惟恐刺傷手。
採蓮復採蓮。藕亦不可棄。中有不斷絲。似妾纏綿意。
採蓮復採蓮。爭如採荷好。花謝葉獨存。團圓以終老。
採蓮復採蓮。湖水清且深。徒能照妾面。不能照妾心。

採蓮復採蓮。下有孤鴛鴦。秋花不結實。夜夜守空房。

蟬精雋。丁鶴年詩律極工。有集一帙。國朝楚藩爲敍。稱其庶幾於老杜。追悼九江李子威。黼太守云云。昏瞶云云。詠貓云云。竹枝云云。詠蟬云云。採蓮曲云云。皆含諷本情。關教言志。可謂不徒作矣。

長江萬里圖 將歸武昌自賦二首

長江千萬里。何處是儂鄉。忽見晴川樹。依稀認漢陽。
長嘯還江國。迴回別海鄉。春潮如有意。相送過潯陽。

詩數元題畫五言小詩。虞伯生柯氏山水圖。揭曼碩瀟湘八景圖。丁鶴年長江萬里圖。等篇。皆頗天趣。

題鳳浦方氏梧竹軒

鳳鳥曾聞此地過。至今梧竹滿邱阿。政懷翦葉書周史。卻恨翻枝入楚歌。金井月明秋影薄。石壇風細晚涼多。中郎去後知音少。共負奇才奈老何。

歸田詩話。作者已滿卷。此詩一出。皆爲檢衽。

逃禪室與蘇伊舉話舊有感

不學揚雄事草玄。且隨蘇晉暫逃禪。無錫可卓香嚴地。有柱難擎杞國天。謾詫丹霞燒木佛。誰憐玉露泣銅仙。茫茫東海皆魚鼈。何處堪容魯仲連。

句

行蹤不異梟東徙。心事惟隨雁北飛。

歸田詩話。方氏據浙東。深忌色目人。鶴年畏禍。遷避無常居。有句行蹤云云。識者憐之。又逃禪室。與蘇生話舊云云。感時書事。而鍊句精緻如此。

王逢

逢字原吉。江陰人。自號席帽山人。又號梧溪子。又號最閑園丁。洪武間卒。有梧溪集。陳敏政梧溪集後序。先生嘗自標題其微詞與義。及人名地里之難曉者。於各詩之首。

七月間河南平章凶問

六月妖星芒角白。幾夜徘徊天市側。尋聞盜殺李上公。窮旅孤臣淚沾臆。當時寬猛制菑澤。安得受降翻受敵。上公忠名垂竹帛。書生奚爲費禱惜。東南風動旗黃色。蒲梢天馬長依北。

列朝詩集。壬寅六月。田豐王士誠刺殺李忠襄於濟南城下。先是順帝見星變。歎曰。當損大將。馳使戒諭忠襄。正此詩所謂妖星芒角也。

帖侯歌有引

昌國州字達魯花赤。高昌帖木兒平章買住之猶子也。海寇犯境。侯連與戰破之。衆寡不敵。或勸侯遁去。侯曰。是吾死所也。遂死之。江浙省參政樊執敬爲文遣使致祭。請諡于朝。逢爲作歌云。

仙居縣丞寇海邦。白晝突入千矛鋒。帖侯親騎大宛馬。快劍躍出蒼龍雙。鬚張背裂赫如虎。殺氣雄風助。

虢武。鬪。體。擲。地。血。飛。雨。短。兵。未。接。寇。偃。鼓。天。南。弧。矢。夜。掩。光。狼。角。赭。赤。雲。玄。黃。洪。濤。鯨。鯢。去。咫。尺。再。戰。身。與。城。存。亡。艤。艫。千。百。水。犀。手。主。者。誰。歟。仆。旗。走。岳。立。不。轉。縱。殺。之。殉。忠。國。家。良。亦。厚。君。不。見。台。州。牧。長。金。兜。鍪。氣。節。自。是。名。臣。流。情。鍾。兒。女。挫。堅。銳。卒。墮。賊。計。空。貽。羞。男。兒。真。僞。那。料。得。長。松。古。柏。寒。增。色。鴻。飛。冥。冥。我。何。及。落。日。荒。山。淚。橫。臆。

張武略有序

侯諱珍字元諒堂邑人以廕受武略將軍穎川翼萬戶鎮杭至正十二年冬徽寇陷常侯引兵伏橫林偵得其狀連敗之乘勝深入常悉平明年春移戍婁江海漕罷警夏六月江陰儉民江牟二人作耗太尉納麟檄侯討之父老上謁必親慰曰某義不與賊俱存須蜂螫掃跡郊鄙輸賦流移歸業以謝父老苟不幸先士卒死亦無憾也父老感泣未幾俘若干人射死其手旗者秋八月浙東元帥野合先侯進屯胡村賊縱火迫胡村各分地出戰賊蔑以當侯潰去輒勒兵助野時野與裨校鄭溥賢死矣侯機發弩殲復大敗之以返失二郡將侯奮激曰將陷而獨全恥急追之冒圍以入江中三矢牟被創甚其黨度擒江牟將魚肉其類因并力來抗侯矢盡馬蹶精銳傷者過半乃拔所佩刀蹂殺數十百人以死先是浙省參政買朮丁分制常侯嘗直言忤之故其臨敵也按不之援以至不利云

張武略馬中驃驚中鶚神清氣完志落落決背萬里空沙漠紅巾據有南蘭陵無人先執螯弧登角弓朝分雲漢月血刃暮洗官壕冰黃金璫甲鎮江徽食簞漿壺駢父媼刁斗嚴城令密傳菜果漫村跡如掃陸

州方臘絕饒道。素服威名罷侵擾。陋邦寇劫誰使然。令我諸君師盡老。孟勞寶刀龜甲文。緡然佩之星入氛。虎賁千百濟。虓猛禽獮草薶收奇勳。浙東元帥亦不羣。羅圍狗附聯陣雲。兩軍鼓行屋瓦墜。殺聲直上蒼天聞。牙張距趯開復合。左啓右肱煙壑接。勢如驚飈振槁葉。冒圍蹂賊賊膽聳。賀蘭陰拱僅自守。檀公上計無乃走。王琳遺愛壽陽間。袁崧殉名滬濱口。妖星黨現秋日微。英雄命薄將安歸。連營陷敵泯功業。別部抱憤無晶輝。殘兵古吏望鄉哭。儉生可誅死可錄。我招其魂歌楚曲。高寒吹下雙鴻鶴。

張孝子有序

張孝子諱天麟。字仲祥。平江之嘉定人。祖瑄。江西參政。初從忠武王平江南。旣航宋圖籍重器。自海入朝。復建策海漕江南粟。世皇特寵任之。由是與河南左丞。崇明朱清貴。富爲江南望。至元末。儉人姚衍。誣二氏瀕海異志。上不聽。詔丞相完澤曰。朱張有大勳勞。朕寄股肱。卿其卒保護之。成宗嗣位。未幾疾。后專政。樞密斷事官曹拾得。以隙踵前誣。后信。輒收之。丞相完澤奉先帝遺詔。諍莫解。參政竟獄死。籍其家。沒入諸子女。或竄之漠北。麟時年甫冠。諸王有欲奴朱張後者。麟長喟曰。吾先世戮力王室。一旦無罪廢。乃忍奴我族耶。泣訴將作使忻都。爲奏占匠戶。諸女亦入繡局。麟猶以寃食不甘味。寢不安席。大德九年春。訟之省臺。弗理。夏四月。上清暑上京。麟拜輦道左。有命侍臣代問。旨未得。又伏東華門。欬歔流涕不輟。言甚哀婉。歷陳先朝願遇。爲譏佞搆陷狀。尋勅中書省遣使召還。竄者改父文龍。董日本賈舶。武宗初。超遷都水監。仍俾治海漕。大司徒大順公奏免匠役。繡工家令星哈思的啓皇太子。以麟直宿衛。至大三年。選授麟絳路坑冶提舉。弗就。曰。

嘗坑吾家。尙何坑爲。仁宗御極。眷幸益隆。載念曾大父。未有葬地。其上海之烏涇別業。參政尤樂之。卽陳請於上。曰。此孝順之道也。詔中正院還其籍土。爲議者沮。延祐二年春。請復感切。始如其志。秋八月。撫藏以祖妣太夫人趙祔。時王清獻公郡中來會葬。以上嘗語題其門曰。孝順之門。元統二年。江浙平章牙不花薦舉。終不起。麟晚通易。子守中。前鄉貢進士。嘉禾俞鎮爲著誌。逢括其概。系以詩。詩曰。

三朝雪涕大明宮。咫尺威顏卒感通。百輛珠犀歸寶藏。千區松柏倚青空。天妃罷燭滄溟火。野史追揚孝里風。誰謂奸臣終愧漢。石榴苜蓿也封功。

丙申八月紀事時自鄉里入吳還華館遂卜隱鴻山

寸舌解重圍。長歌振短衣。不成巢父去。空似魯連歸。蔡港沙田薄。黃山宰木稀。伯鸞吾所慕。梅李況魚肥。

天門行

天門高高俯四極。寸田尺地登版籍。澤梁無禁漁者多。瀚海橫戈恣充斥。去年官饑私歛攘。今年私鹺官價償。屠燒縣邑誠細事。大將不死鯨鯢鄉。謂李羅帖木兒左丞烹羊椎牛醉以酒。腰纏白帶紅帕首。定盟歃血許自新。禦寇征蠻復何有。國家承平歲月久。念汝紛紛迫餬口。羽林堅銳莫汝撓。慎勿較夸好身手。春風柳黃開陣雲。號令始見眞將軍。

憂傷四首上樊時中參政蘇伯脩運使

竹笠黃時海寇賊。竹笠以拒官軍。黃金兜鍪勢相當。兜鍪本居大將壇。左劍右印增威光。邊隅將校望塵

拜州縣曹佐聞風僵。況從元首授元柄。稍忤言意違軍令。不因菑疫自焚船。那致生靈輕隕命。竹笠黃兜。整相當難走藏。兜整旦晚先戎行。

官柳場青茫茫。野鷹交飛撲馬驤。年年十月轅門張。元戎始來坐虎牀。翼舒箕哆魚麗行。鼓進金退兵家常。起伏見譏孫武子。勾卒貽笑曹成王。千夫散盡旌旗定。偏裨隊伍相呼應。幾處私恩誤主恩。一回酒令行軍令。酒醉邊隅事不聞。邊隅擾擾多煙氛。

無家燕

嗟嗟無家燕。飛上商人舟。商人南北心。舟影東西流。芹漂春雨外。花落暮雲頭。豈不懷故棲。烽暗黃鶴樓。樓有十二簾。一一誰見收。衆雛被焚蕩。雙翅亦斂擎。含情盼鬼蝶。失意依訓猴。茅茨固低小。理勢難久留。昔本烏衣君。今學南冠囚。燕燕何足道。重貽王孫憂。

梧溪集楊維禎序。梧溪集者。江陰王逢氏遭喪亂之所作也。予讀其詩。悼家難。憫國難。採撫貞操。訪求死節。網羅俗謠與民謳。如帖木侯。張武略。張孝子。費夫人。趙氏女。丙申紀事。月之初生。天門行。竹笠黃。官柳場。無家燕。諸篇皆爲他日國史起本。亦杜史之流歟。

遊崑山懷舊傷今

丈夫貴善後。事或失謀始。桓桓張楚國。挺生海陵里。一門蓄大志。羣雄適蜂起。玄珠探壁社。白馬飲浙水。三年車轍南。北向復同軌。量容甘公說。情厚穆生醴。誓擊祖生楫。竟折孫策箠。天王詔褒贈。守將躬歲祀。翼然東昆丘。蘭橈映疏綺。青蘩春薦豆。翠柏寒動檠。乾坤宥孤臣。風雨猖五鬼。銅駝使有覺。洊懼荆棘杞。

列朝詩集張士誠降元元追封士德爲楚國公廟祀崑山楊廉夫詩所謂先封楚國碑也

寄桃浦諸故知卽事

山床折足琴暗口種菊不種西山薇願從漢士碑有道夢逢秦鬼歌無衣閒園不入煙火境巨浸盡漂桃上梗老伴惟餘臥隴雲抱晦含光體常靜

有章擲還太尉閣有版不受丞相垣南朝天子許謝病竊長木石儀鸞園平生氣節詩千首才非元亞元遠山甘劉後劉靜修素聞魯廟鑄金人晚學程門坐泥偶雙平原裏新得原名庶全歸他日壙銘辭大手列朝詩集此原吉戊辰歲卽事寫懷寄故知之作蓋絕筆也詩稱我太祖高皇帝尙曰南朝天子又曰夢逢秦鬼歌無衣真所謂倔強猶昔耶

無題五首

五緯南行秋氣高大河諸將走兒曹投鞍尙得齊熊耳卷甲何堪棄虎牢汧隴馬肥青苜宿甘梁酒壓紫蒲萄神州比似仙山固誰料長風掣巨鼇

天槍幾夜直鈎陳車駕高秋重北巡總謂羽林無猛士不緣金屋有佳人廣寒霓仗閒華月太液龍舟動白蘋雪滿上京勞大饗西風華岳弔秦民

白衣騰艘渡吳兵赤羽旌旗奪趙營灤水天迴龍虎氣榆林風逐馬駝聲靚妝宮女愁啼竹白髮祠官憶薦櫻猶有海鷹神不王駕鵝高去塞雲平

五城月落靜朝雞萬竈煙消入水犀椒闥珮琚遺白草木天圖籍冷青藜北臣舊說齊王肅南仕新聞漢

日。碑。天。意。人。心。竟。何。在。虎。林。還。控。雁。門。西。
廿。載。羣。雄。百。戰。疲。金。城。萬。雉。自。湯。池。地。分。玉。冊。盟。俱。在。露。仄。銅。盤。影。不。支。中。夜。馬。羣。風。北。向。當。年。車。轍。日。
南。馳。獨。憐。石。鼓。眠。秋。草。猶。是。宣。王。頌。美。辭。

後無題五首

一。國。三。公。狐。貉。衣。四。郊。多。壘。烏。蛇。圍。天。街。不。辨。元。黃。馬。宮。漏。稀。傳。日。月。闌。嵇。紹。可。能。留。濺。血。謝。元。那。及。總。
戎。機。祇。應。大。駕。懲。西。楚。弗。對。虞。歌。北。渡。歸。
吐。蕃。回。紇。使。何。如。馮。翊。扶。風。守。太。疎。范。蠡。不。辭。句。踐。難。樂。生。何。忍。惠。王。書。銀。河。珠。斗。低。沙。幕。乳。酒。黃。羊。減。
拂。廬。北。陸。漸。寒。冰。雪。早。六。龍。好。扈。五。雲。車。
回。首。崑。崙。五。色。天。疎。風。落。日。重。何。憊。駕。驂。八。駿。非。忘。鎬。臺。置。千。金。舊。慕。燕。地。限。上。林。雲。過。雁。雪。封。西。嶺。樹。
啼。鵲。遠。慚。行。在。周。廬。士。橫。草。無。功。日。晏。眠。
險。塞。居。庸。未。易。劇。望。鄉。臺。上。望。鄉。多。君。心。不。隔。丹。墀。草。祖。誓。無。忘。黑。水。河。前。後。炎。劉。中。運。歇。東。西。元。魏。百。
年。過。愁。來。莫。較。興。衰。理。只。在。當。時。德。若。何。
黃。河。清。淺。海。塵。揚。陝。月。關。雲。氣。慘。蒼。寧。復。明。珠。專。斃。社。尙。論。玉。兔。踞。金。牀。衣。冠。並。入。梁。園。宴。簡。冊。潛。回。孔。
壁。光。私。幸。老。歸。忘。世。事。梧。桐。朝。影。對。溪。堂。

列朝詩集無題前後十首皆感悼王師入燕庚申北狩之事

列朝詩集原吉爲張氏畫策使降元以拒臺故其游崑山懷舊傷今之詩於張楚公有餘恫焉前

後無題十首。傷庚申之北遁。哀王孫之見俘。故國舊君之思。可謂至於此極矣。

得兒掖書時戊申歲

客夢躬耕隴。兒書報過家。月明山怨鶴。天黑道橫蛇。寶氣空遺水。春程不見花。衰容愧耆舊。猶語玉人車。
列朝詩集戊申元日。則月明云云。丙寅築城。則云孺子成名。狂阮籍。伯才無主。老陳琳。殆狂而比於諄矣。

案戊申。正明太祖改元之年。

書無題後凡三首。偶感燕太子丹事。

火流南斗紫垣虛。芳草王孫思愴如。淮潦浸天魚有帛。塞庭連雪雁無書。不同趙朔藏文祿。終異秦嬰祖素車。漆女中心漫於邑。杞民西望幾踟躕。
塞空桑木抱猥雌。草暗江南罷射麋。秦地舊歸燕質子。瀛封曾畀宋孤兒。愁邊返照窺牆榻。夢裏驚塵喪轆轤。莫識白翎終曲語。蛟龍雲雨發無時。
幾年薪膽泣孤嬰。一夕南風馬角生。似見流星離斗分。謬傳靈武直咸京。九苞雛鳳沖霄翼。三匝慈烏落月情。縱少當時趙雲將。臥龍終始漢臣名。

列朝詩集洪武七年。遣元幼主之子買里的八刺北歸。此詩記其事。故有舊歸質子。及南風馬角之句。太祖封買里的八刺爲崇禮侯。故曰瀛封曾畀宋孤兒也。

毗陵秋懷

老兵爲說劉都統。起坐舟中思滿襟。玄武城危寒日短。紫駝塵暗朔風臨。江山不盡新亭淚。天地長懸卽墨心。宋祚未移中道死。至今劍井蟄龍吟。

梧溪集原注。泊常州城下。有老兵能道劉都統事。劉名師勇。山東文安人。至元十一年。元師渡江。過常州。知州趙汝鑒遁。通判錢彬以城降。師勇與都統王安節殿師。張彥克復之。以姚訔知州事。安節出戰不利。彥尋以衆降。師勇登埤拒戰。攻圍五十餘日。城陷。訔戰死。安節被執不屈。死之。師勇從八騎走。所向披靡。間道赴行在。扈二王入閩。至紹興。疽發背卒。或曰。國初吳城外僧舍。有一老僧。長七尺許。居十餘年。未嘗面北坐。人詰其姓名。輒不答。死之日。僧開篋。得師勇官誥。豈其人耶。抑其騎士耶。不可考矣。

銀瓶娘子辭

娘子宋岳鄂王女。聞王被收。負銀瓶投井死。祠今在浙西憲司之左。逢感其節孝。敬爲之辭。

碧梧月落烏號霜。寒泉幽凝金井床。綺疏星流大星白。夢驚萬里長城亡。女郎報父收圉圉。匍匐將身贖無所。官家明聖如漢主。妾心愧死緹縈女。井臨交衢下通海。海枯衢遷井不改。銀瓶同沈意有在。萬歲千春露神采。魂兮歸來風泠然。思陵無樹容啼鵑。先王墓木西湖邊。

風月堂雜識。銀瓶烈女。古今歌詠其事者甚衆。惟王梧溪原吉銀瓶娘子辭。五清劉先生孝娥井銘二篇可誦。

句

地荒存菊本。人老發梅花。紅芳飛血盡。黃蝶上衣來。犬眠牛斗地。鯢躍鳳凰池。乾坤人鮮覩。歲月鬼門關。雪落蘋花盡。青浮山影來。簾卷東風燕子還。天清月浸淡梨花。草霜鷹始擊。梧溪集。予自幼至壯。詩夢頗多云云。最後得草霜云云之句。

戴良

良字叔能。浦江人。至正辛丑。以薦授儒學提舉。入明不仕。自號九靈山人。有九靈山房集。列朝詩集。太祖遣使物色。求之十五年。召至京師。欲官之。固辭。忤旨待罪。次年四月卒於寓舍。蓋自裁也。

九靈山房遺稿。揭法序。學文於柳待制先生。黃文獻公。學詩於余忠宣公闕。

九靈山房集。九靈自贊。識字不如揚子雲。摘辭不似沈休文。胡爲而有沈之瘦。胡爲而有揚之貧。歌黍離麥秀之音。詠剩水殘山之句。則於二子庶幾乎無愧。

插秧婦

青袂蒙頭作野粧。輕移蓮步水雲鄉。裙翻蛺蝶隨風舞。手學蜻蜓點水忙。緊束暖煙青滿地。細分春雨綠成行。村歌欲和聲難調。羞殺揚鞭馬上郎。

七修類稿。詠物之詩。宋元以下作者多矣。然其親切有蘊者。亦足比方前人。戴九靈插秧婦云云。

哭楊大章先生二首

家紹文元學。身安原憲貧。世方推獨行。天忽奪斯人。客路誰傾蓋。湖堤幾詠春。回看攜手處。不語自傷神。

近到揚雄宅。徘徊至夕暉。那知三宿別。竟作九原歸。許劍嗟何及。懸床事已非。祇應重過日。獨泣向空扉。
九靈山房集自注。三日前嘗訪先生慈湖之上。蒙留飲。至日莫不聽去。酒口索予數藥方。且言必親至而密受之。故有許劍懸牀之語。

題何監丞畫山水歌

至正以來畫山水。祕監何侯擅其美。帝御宣文數召見。抽毫幾動天顏喜。有時詔許閱內儲。名筆班班世所無。王吳李范已心識。餘者山堆皆手摹。海內畫工亦無數。才似何侯豈多遇。權門貴戚虛左迎。往往高臺起煙霧。人閒一筆不可得。門外車徒漫如織。葉君使還親集送。乘輿始肯留真迹。于時在座總儒冠。王鄭歌辭晚更妍。豈無片語道離恨。見侯之畫筆盡捐。此畫攜歸在鄉縣。萬壑千巖眼中見。却憶都門送別時。回頭瞥視西山面。莫言短幅僅盈咫。遠勢固當論萬里。既似山河月裏明。復同衡霍牖中起。葉君眼力老愈光。愛之不減雲錦章。年來行橐盡拋棄。惟將此紙什襲藏。何侯遷官定何處。有客披圖正傾慕。北騎南轅倘相值。煩君爲我致毫素。請侯一寫滄洲趣。

自跋。此畫乃葉君孔昭爲南臺宣使時。以公事走京師。祕書監丞何侯思敬爲寫以贈。而畫上所題鄭仲舒。蓋孔昭同門友。時爲國子博士。其王周叔。則孔昭居冑監時同舍生也。時爲翰林檢閱。章甫亦宦游京師。與孔昭深友愛。一時交舊。皆文學之士。而思敬翰墨尤號知名。孔昭旣重思敬之作。而又以諸君之會合。不可驟得。攜歸故里。請余詩之。而并識其始末於後。觀圖畫之如新念。游從之日遠。孔昭安得不慨然於斯。

鄧定

定福建人。

句

松窗朝聽雨。石碓夜春雲。澗光接樹影。石磴沁口口。野水流花出。松雲載雨還。看山曾到寺。隔水忽口口。

榕陰新檢。畊隱先生鄧定。字子靜。元至正間。遣使徵之不起。洪武中。又徵不起。曰。吾旣削迹畎畝。生於元。已不事元。肯仕明乎。遂終身耕隱。卒無子。有詩數卷。其從孫汝高。序而梓之。如云云。酷肖王孟風骨。先生與國初王恭諸子相倡和。百餘年無有知者。

董旭

旭字泰初。新昌人。

題長江偉觀圖

龜書出洛水。神禹膺九疇。豈伊彝倫敍。洪濤亦安流。惟岷西南隅。金火相綢繆。江源發其側。微茫不容舟。淺瀄淵途涂。道遠勢乃遒。辛勤逾青城。憤怒脫黃牛。漢水嶺兩川。彭蠡會七州。劬劬朝宗心。自可無滯留。屹彼金與焦。相望僅一漚。離立當要衝。不沒亦不浮。大類武安西。震蕩不得謀。神奇北山捷。乃以一卒收。又似尋邑兵。兇虎雜貔貅。氣貯百文叔。草草就俘囚。叵測天地心。平地陳險幽。我疑東海若。力據江上游。於此戰不勝。奔迸若兕矛。不然江神薨。厥婦義從遊。天吳役祕怪。負石奠雙邱。九思苦未得。物理諒難求。

因悲英雄人。爭此若射侯。偉哉韓將軍。鐵鎖掣萬艘。向非天與靈。萬騎眞杵投。至今江之波。猶負脫鼠羞。我昔曾過之。嘖嘖淚盈眸。中流一長嘯。宇宙爭百憂。東顧無津涯。赤日出海頭。西望赤壁磯。尙想孫曹劉。正北維揚城。樓櫓鬱相糾。寒煙際衰草。日落風颼颼。近聞事益殊。沙戶逮稱酋。舳艫夾鵠舫。浩蕩劇長蚪。蕭瑟但一氣。焉能辨邗溝。向來金碧堆。一炬十二樓。諸天盡星散。死樹生清秋。時事翻覆間。桑海變蜉蝣。安知億劫外。偉觀寧此不。取我金叵羅。披我紅錦裘。酌此一杯酒。淨洗千古愁。

元詩癸集歸隱山中。方國珍欲羅致幕下。旭拒不受。作詩曰。鬱鬱芒碭雲。未辨蛟龍形。熒熒祥星光。未燭夾馬營。君子慎其微。草露不可行。國珍復強之。遂遇害。秦初善畫山水。嘗作長江偉觀圖。題詠者數十人。

元詩紀事卷二十七

顧瑛

瑛一名阿瑛。別名德輝。字仲瑛。崑山人。舉茂才。署會稽教諭。辟行省屬官。皆不就。有玉山瑛稿。蘇談顧阿瑛在元末爲崑山大家。其亭館蓋有三十六處。每處有春帖一對。阿瑛手題也。記必名公。詩必才士。雖篆隸一二字。亦必選當代之筆。當時如楊廉夫。鄭明德。張伯雨。倪元鎮。皆其往還客也。尤密者爲秦約。于立。釋良琦。後阿瑛遭亂。財盡散去。遂削髮爲在家僧。

元明事類鈔。玉山草堂園池聲伎之盛。甲於天下。有小璫花。南枝秀者。每宴會輒命侑觴乞詩。

自題小像

儒衣僧帽道人鞋。天下青山骨可埋。若說向時豪傑處。五陵鞍馬洛陽街。

藝苑卮言。吾崑山顧瑛。無錫倪元鎮。俱以猗卓之貲。更挾才藻。風流豪賞。爲東南之冠。而楊廉夫實主斯盟。顧倪各散家貲。顧畫其像。題云云。至今人傳之。夫以顧倪之富。與廉夫之豪縱。而若此其於陶靖節。可謂異軌同操。

南濠詩話。顧玉山仲瑛。嘗自題小像云云。人咸賞其達。予謂仲瑛此詩。不無所襲。傅大士詩云。道冠儒履釋袈裟。三教原來總一家。東坡獄中寄子由云。是處青山可埋骨。他時夜雨獨傷神。

金粟冢中秋日燕集

嘉樹蔽日涼颺散煙展席藉草待月臨川簪蓋既合飲芳割鮮歌斯哭斯以終餘年

綽山古佳城左股接昆丘水作青龍來九派盤遭過道人金粟冢在彼山之幽團團青桂樹枝葉相蟠樛
石削華表立碑刻金窠餒人身無百年胡乃三彭仇四大偶一失九丹不能瘳肉血潰臭腐不朽惟髑髏
棄之道路傍行者得溺洩狐狸與蠅蚋食嘬紛相讎欲貽後之人以掩面目羞烏兔互出沒急行不入郵
縱有萬丈繩誰能繫之留暖穴競螻螳涼風滅蜉蝣榮名乃何物汲汲將奚求金谷珊瑚樹天網一夕收
美人化黃壤燕子巢空樓大印佩六國散金馳八騶一朝不得志車裂徇九州秦皇與漢武靈藥採仙洲
玉棺葬地底金甌出海陬梨花自寒食夜雨鬼啾啾飛錢化蝴蝶走鱗驚鵲鷗混沌鑿不死倏忽何能休
丈夫不解事老大傷白頭何如種秫米壓酒日自篋今夕三五夕我已爲君謀長餅貯十斛百結青絲兜
截江取紫蟹攀樹摘紅榴周垣設茵席矮几陳脯修步登白雲屏待月豁醉眸劃然白蝦蟆抱出黃金毬
又若摩尼珠躍出驪龍湫吐吞大地影晃漾東南浮老兔玉杵臼搗作人間秋寶城三千里縮景歸遐陬
宮殿魚鱗竊草木秋雲稠素娥騎彩鸞舞雪翻霓裘手折瓊樹花競拂金精流化爲五素芒落我白瑤甌
持滿向君語借箸請爲籌十載苦國難豪傑紛戈矛鴻門撞玉斗桃園宰烏牛戰血濺野草餓莩填荒溝
我時挈妻孥夜泛蒼雪舟有兒綰兵符承乏萬戶侯三年盡忠歸身作抱官囚平生萬卷書怒焚遭鬱攸
廬墓讀內典守節事清修親友散如雪雲樹空悠悠獨爾數君子艱棘見何由今聞王師出卒伍皆兜鍪
弄刀走官馬千里風颼颼桓桓李將軍大旗畫蚩尤去秋奪汴城今復追大酋屯兵泗水上添竈扼賊喉
東南貢米粟連網起歌謳我曹幸無恙坐看恢皇猷酒旗指南斗今茲會綢繆請起各稱壽我亦相勸酬

羣才盡敏捷。用作釣詩鉤。青山忽大笑。此意君知不。呼童酌大白。醉此土一坏。他時蓋棺了。神隨和氣游。巾插空中花。撒手鞭蒼蚪。東海招若士。西池訪阿緱。共看麻姑爪。當座擘筍篸。不必兒女淚。暗灑袍笏愁。達哉司空圖。吾今乃其儔。大書勒巖壁。永絕生前遊。

鐵網珊瑚。右前詩四韻。後詩七十韻。匡廬于立。金粟冢中秋日燕集後序。綽山。乃勾吳顧仲瑛氏之先塋在焉。仲瑛附先塋營繭室。自銘其墓。題曰金粟冢。則知仲瑛之曠達。蓋有昔賢司空圖傳奕之遺風焉。千古在前。萬古在後。生而與故人飲酒泉臺之上。則勾吳自顧君始也。倪生道原。做李龍眠蘭亭修禊圖。于右。□□□□淮海秦君敍之首。是集主客凡十有二人。爲詩者八人。詩不成者四人。依觴政行罰云。

次韻劉季章治中邀夏仲信郎中游永安湖詩二首

金粟寺中公廡靜。白晝事閒如治蒲。沙棠爲舟穩可泛。郎官之湖今豈無。啄花鷺坐水楊柳。雪藕人歌山鷓鴣。日西上馬踏歸路。小隊大呼驚道吾。

鐵網珊瑚。金粟道人和劉別駕。□□□上詩有啄花云云之句。此詩一出。便覺鐵崖不得擅體。又徵老鐵同韻走筆賡去。不能奇也云云。老鐵禪詩帖上和畢。煩粘卷送達金粟所也。

題文湖州折竹

湖州昔在陵州住。日日逢人寫竹枝。一段枯梢作三折。分明雪後上窗時。

書畫史文湖州竹。生平僅見真蹟一幀。在橫冊上。乃折竹也。其題者二人。柯九思云云。金粟道人

阿瑛云云。

玉山佳處以愛汝玉山草堂靜分韻得靜字

蘭風蕩叢薄。高宇日色靜。林迴泛春聲。簾疎散清影。褰裳石蘿古。濯纓水花冷。於焉奉華觴。聊以娛晝永。

。玉山草堂晚酌以高秋爽氣相鮮新分韻得鮮字

玉山草堂秋七月。露梢風葉正脩然。出林新月清輝發。當竹幽花夜色鮮。羽客時來蒼水珮。山僧頻寄白雲泉。文章錄事休輕別。正好深樽滿眼傳。

玉山逸稿西夏昂吉起文序云。七月既望日。玉山主人與客晚酌于草堂中。肴菓既陳。壺酒將瀉。時暑漸退。月色出林樹閒。主人乃以高秋爽氣相鮮新分韻。詩不成者三人。各罰酒二觥。

案玉山逸稿七十三首。今錄二首以概其餘。

楊維禎玉山雅集圖記。右玉山雅集圖一卷。淮海張渥用李龍眠法所作也。玉山主者爲崑丘顧阿瑛氏。其人青年好學。通文史。及聲律鐘鼎古器法書名畫品格之辨。性尤輕財喜客。海內文士未嘗不造玉山所。其風流文采出乎輩流者尤爲傾倒。故至正戊子二月十又九日之會。爲諸集之冠。鹿皮衣紫綺坐。據案而申卷者。鐵笛道人會稽楊維禎也。執笛而侍者。姬翡翠屏也。岸香几而雄辨者。野航道人姚文奐也。沈吟而癡坐。搜句於景象之外者。若溪漁者鄭韶也。琴書左右。捉玉麈而從容談笑者。卽玉山主人也。姬之侍爲天香秀也。展卷而作畫者。爲吳門李立。傍視而指畫者。卽張渥也。席皐比曲肱而枕石者。玉山之仲晉也。冠黃冠坐蟠根之上者。匡廬山人于立也。

美衣巾束冠帶而立。頤指僕從。治酒肴者。玉山之子元臣也。奉肴核者。丁香秀也。持觴而聽令者。小瓊英也。一時人品。疎通俊朗。侍姬執伎。皆妍整。奔走童隸。亦皆馴雅。安於矩矱之內。觴政流行。樂部諧暢。碧梧翠竹。與清揚爭秀。落花芳草。與才情俱飛。登口成句。落豪成文。花月不妖。湖山清發。是宜斯圖一出。一時名流所慕尚也。時期而不至者。句曲外史張雨。永嘉徵君李孝光。東海倪瓚。天台陳基也。夫主客交并。文酒賞會。代有之矣。而稱美于世者。僅山陰之蘭亭。洛陽之西園耳。金谷龍山而次弗論也。然而蘭亭過於清則隘。西園過於華則靡。清而不隘也。華而不靡也。若今玉山之集者。非歟。故余爲撰述綴圖尾。使覽者有考焉。是歲三月初吉。客維楨記。

以玉山亭館分題得金粟影

飛軒下瞰芙蓉渚。檻外幽花月中吐。天風寂寂吹古香。清露泠泠溼秋圃。雲梯萬丈手可攀。居然夢落清虛府。庭中擣藥玉兔愁。樹下乘鸞素娥舞。瓊樓玉殿千娉婷。中有瓊仙淡眉宇。問我西湖舊風月。何似東華軟塵土。寒光倒落影娥池。的皪明珠承翠羽。但見山河影動搖。獨有清輝照今古。覺來作詩思茫然。金粟霏霏下如雨。

附晉寧張翥仲舉序云。至正十年。蒼龍庚寅之歲。秋仲十九日。余以代祀歸至姑蘇。願君仲瑛。延于玉山。時鄭君明德。李君廷璧。于君彥成。鄭君九成。華君伯翔。草堂主人。方外友。本元。元璞二公。酒半歡甚。卽席以玉山亭館分題者九人。予以過賓。屬爲小引。未知昔賢梓澤蘭亭。如今之會也耶。

玉山名勝集。楊維禎玉山草堂記。崑隱君顧仲瑛氏。其家世在崑之西。界溪之上。既與其仲爲東西第。又稍爲園池別墅。治屋廬其中。名其前之軒曰釣月。中之室曰芝雲。東曰可詩齋。西曰讀書舍。後壘石爲山。山前之亭曰種玉。登山而憩住者。小蓬萊。山邊之樓曰小游仙。最後之堂曰碧梧翠竹。又有湖光山色之樓。過浣花之溪。而草堂在焉。所謂柳塘春漁莊者。又其東偏之景也。臨池之軒曰金粟影。此虎頭之癡絕者。合而稱之。則曰玉山佳處也。余抵崑。仲瑛氏必居余佳之所。且求誌勝顏屋。按郡志。崑山隸華亭。陸氏祖所寔。生機雲。時人因以玉出崑而名。崑邑山本號馬鞍。出奇石似玉。煙雨晦明。時有佳氣。如藍田焉。故人亦呼曰玉。又曰崑。而仲瑛氏之居。去玉山一舍遠云。

按名勝集。尚有書畫舫。春暉樓。秋華亭。淡香亭。君子亭。雪巢。春草池。綠波亭。絳雪亭。聽雪齋。白雲海。來龜軒。拜石壇。寒翠所等處。記中不載。

唐宮詞次鐵雅先生無題韻十首

天寶雞坊寵賈昌。不教一作宮中。蝴蝶上一作滿。釵梁錦棚晝浴天。驕子絳節朝看王大娘。王母也。芍藥金闌開內苑。蒲萄玉觥酌西涼。月支十萬資膳粉。獨有三娥一作姨。素面妝。

蓮花池畔暑風涼。玉竹迴文寶簾光。貪倚畫屏調一作看。翡翠誤開金鎖放。鴛鴦輕綃披霧誇新浴。墮髻欹雲銜晚妝。笑語女牛私語處。長生殿下月中央。

五色卿雲護帝城。春風無處不關情。小花靜院偷吹笛。淡月閑房背合箏。鳳爪劈柑封鈿合。龍頭瀉酒下

瑤器後宮學做金錢會。香水蘭盆浴化生。

龍旂翠一作孔蓋擁鸞幢步。楚追隨幸曲江。鳥道正通天上路。羊車直到竹間窗。桃花柳葉元無匹。一作

限。燕子鶯兒各有雙。中貴向人言近事。風流陳裏帝先降。

祕閣香殘日影移。燈分青玉刻蟠螭。琵琶鳳結紅文木。絃索蠶繅綠水絲。金屋有花頻賭酒。玉杯無子不彈碁。傳宣趣發明馳使。南海今年進荔枝。

近臣諧諛似枚皋。侍宴承恩得錦袍。扇賜方空描蛺蝶。局看雙陸賭櫻桃。翰林醉進清平調。光祿新呈玉一作五色醪。密奏君王好將息。昨朝馬上打圍勞。

競國來朝不動塵。障泥一色繡麒麟。朱衣小隊高呵道。粉筆新圖徧寫真。寶雀玉蟬簪翠髻。銀鵝金鳳踏文茵。一從羯鼓催春後。不信司花別有神。

五王馬上打毬歸。贏得宮花獻貴妃。樂起閣門邊奏少。禍因臺寺諫書稀。侍兒隨幸皆顏紫。骰子蒙恩亦賜緋。一作姊妹相從習歌舞。何人能製柘黃衣。

新製霓裳按舞腰。笑他飛燕怕風飄。玉蠶一作簪倒臥蟠條脫。金鳳斜飛上步搖。雲母屏開一作殿前齊奏樂。沈香火底並一作坐吹簫。只因野鹿銜花去。從此君王罷早朝。

宮衣窄窄小黃門。躑躅初開賜繚盆。夜月不窺鸚鵡塚。春風每憶鳳皇園。愛收花露消心渴。怕解金珂見爪痕。只有椒房老宮監。白頭一一話開元。

草堂雅集。鐵雅評曰。十詩綿聯縟麗。消得錦半臂也。

巫峽雲濤石屏志

謝家綠玉屏。不琢龜甲形。方若陟釐紙。粉縹帶苔青。秀潔庚庚絕文理。十二巫峯橫隱起。芙蓉照影立亭亭。遠落巴江一江水。素湍洶湧翻綠濤。長風吹雲白月高。三峽濤聲滿人耳。箇中獨欠孤猿號。胡僧謾有金壺汁。灑向素縑圖不得。女媧鍊石作五彩。點染料應無此色。此石產景由天工。略假石人磨削功。石色欲盡玉色起。汎汎天碧涵清空。君不聞大食貢石瑩如玉。中有奇松四時綠。六月涼風卷翠濤。瑟瑟秋聲戰空屋。又不聞楊家古屏刻水精。中有爲雲之美人。海綃衣裳爲煙霧。姓名自語非眞眞。二物化去固已久。價重隋珠難再有。君家玉屏獨在世。勿落忍人豪奪手。我聞故人楊鐵仙。束帶拜之如米顛。起來發狂捉鐵筆。醉墨寫入青瑤鐫。何日乘舟上魚腹。喚取巴童唱巴曲。更借丹丘粉墨屏。對案巫山眞面目。玉山璞藁。余嘗往震澤。聞松陵謝氏伯仲賢而好事。而余水仙之舟。未得一造其所。今高君叔彬。攜此卷至別業求題。且知楊鐵崖亦到湖上。由是益知其賢而好事。故製長詩一篇寄題寶屏。他日或飲君薔薇花下。幸出此爲張本云。至正乙巳七月廿一日。金粟道人顧阿瑛書于合溪別業。

顧佐

佐字翼之瑛兄子。

西湖竹枝集。好吟詠。時有驚人句。蓋亦漸染玉山之習。

西湖竹枝詞

阿儂心似湖水清。願郎心似湖月明。南山雲起北山雨。雲雨朝朝何處晴。

顧元臣

元臣字國衡仲瑛之子。

列朝詩集至正間官水軍都府副都萬戶國初徙濠。

西湖竹枝詞

牡丹開時花滿闌芍藥開時春已殘等過三春今半夏重樓日日倚闌干。

西湖竹枝集年少能讀書作詩俊爽世其家者此詩雖用藥名隱而不顯善於喻者也。

顧晉

晉字進道瑛仲子。

前題

楊白花開風滿天花開成絮不成綿不如落向西湖水化作浮萍個個圓詳燕不花下。

案以上二人不類次卷八之末者居顧瑛前嫌於倒置也。

黃文德汴中人號尙文子。

寄玉山草堂

玄圃仙人吾未識閒說吳山種春色昨夜洞雲天際來明月空齋坐相憶。

草堂雅集自題曰予家汴中僑之昭武甫官五溪適洞雲錢居士過我得覲仲瑛揮玉詞翰兼美雖未能識荆有不能忘情者賦二十八字附卷末他日洞雲歸澗當以此爲顧君一笑且以期後

會云。

卞思義

思義字宜之。

鐵笛詩寄楊廉夫

一段清冰百鍊鋼。曾翻宮徵侍虛皇。裂開黃鵠磯頭石。驚落青鸞鏡裏霜。仙子珮環新樂府。翰林風月舊文章。道人清節磨礱久。卻笑桓伊獨據床。

歸田詩話。楊廉夫初居吳山鐵冶嶺。號鐵崖。後遷松江。又號鐵笛道人。卞宜之作鐵笛詩寄之云。廉夫喜之。同時有製鐵笛賦者。造語粗率。不若詩也。

汗酒

水火誰傳既濟方。滿鑪香汗滴瓊漿。開尊錯認薔薇露。溜齒微沾菡萏香。水泄尾閭知節候。津生華蓋識溫涼。千鍾魯酒空勞勸。一酌端能作醉鄉。

西湖竹枝集。卞思義光州人。氣宇疎曠。早年有詩名。瀾西憲府以其才賢。辟爲屬掾。雖居官日。猶不廢於吟詩。長於詠物。如汗酒鐵笛。爲人所稱云。

瞿士衡

士衡字口口。錢唐人。

宋故宮詩次楊廉夫韻

歌舞樓臺擬汴州。可憐蠻觸戰蝸牛。臨書玉枕雕簷靜。行酒青衣罽帳愁。卷土自應從亶父。滔天誰復放驩兜。臺空樹老寒鴉集。落日白波江上秋。

歸田詩話。先叔祖士衡和楊廉夫宋故宮詩云云。廉夫喜其和兜字韻勝。蓋廉夫詩用紅兜字。元廢宋宮爲佛寺。西僧皆戴紅兜帽也。

文質

質字學古。甬東人。

梅花燈

五出玲瓏四面分。一枝挑月照黃昏。歸來踏遍橫斜影。吹落東風不見痕。

江南通志。嘗與楊廉夫玩梅花燈。賦詩有歸來云云之句。人傳誦之。

時太初

太初字大本。常熟人。

白燕

春社年年帶雪歸。海棠庭院月爭輝。珠簾十二中間捲。玉剪一雙高下飛。天下公侯誇紫領。國中儔侶尙烏衣。江湖多少閒鷗鷺。宜與同盟伴釣磯。

南濠詩話。袁景文嘗與友人謁楊廉夫。凡上有詠白燕詩。珠簾云云。景文曰。此詩殆未盡體物之妙也。廉夫不以爲然。景文歸作詩。翌日呈廉夫云云。廉夫歎賞。一時呼爲袁白燕云。

顧亮

亮字寅仲上虞人

月氏王頭歌和楊鐵崖

月氏肉碎如雪。月氏顱勁如鐵。鐵崖曰。只數語便破鬼膽。快劍一斫。天柱折。留取胡盧飲生血。冒頓老魅呼月精。夜酌葡萄隴。月明鬼妻蹋地號。我天可汗天靈哮。曉聲嘶酸於乎。顱兮顱兮。汝勿悲。我今酌汝金留犁。黔州都督有血頂。精魂夜夜溺中啼。

列朝詩集鐵崖擊節歎賞曰。說出月氏王一副枯骨。作活潑潑底侏僂語。青冢妃不能宣諸宮羽者。茲調宣之。費憲兩生當讓一籌。

李費

費字口口口口人。楊鐵崖門人。

月氏王頭飲器歌和楊鐵崖

太白入月月欲頹。胡風吹墮白龍堆。鐵崖曰。一起便絕倒。血函模糊截仇首。半腕剝作玻璃杯。目眚生紅酒微纈。戎王胸堂沃焦熱。奇語青氍帳下唱胡歌。三十六國皆膽裂。愈出愈奇。金匏攪紅紅欲凝。腦中猶作銅龍聲。真孤精語。千古恨未平。怨魄飛作精衛精。君不見漆身復仇仇未復。地下義人吞炭哭。

列朝詩集余讀費辭爲之擊几而歌。費真狐精也。時和者稱張憲。明日費辭至。憲拜之曰。吾當放君一頭地。取已作而焚之。

林世濟

世濟字口口三山人。

漫興一首奉懷草元先生

噬牙不可摩。領鱗不可嬰。所以明哲士。婉孌逃其生。埴蛙既聒聒。陵茗亦榮榮。懷哉一壺酒。南山最高層。

鐵崖評曰。三月不見石室生。忽得此詩。如渴沃甘露。有數日餘味。末句所懷。老夫不足當也。

敬和草元內翰先生臺字韻并呈世壽堂賢喬梓過目
鐵史新移淞上屋。子雲住蜀小亭臺。窗涵九朶山尖出。門對百花潭水開。月下文簫騎虎去。雲間青鳥送書來。高年自得養生術。政似嬰兒初未孩。

鐵崖評曰。末句道家語也。

貢性之

性之字友初。尚書師泰族子也。元季以胄子除簿尉。後補閩理官。入明不仕。更名悅。有南湖集。

絕句

十八姑兒淺淡妝。春衣初試柳芽黃。三三五五東風裏。去上吳山答願香。

送戴伯貞檢校還廣西

桂江煙水接瀟湘。逐客南歸道路長。卷裏漫多新製作。篋中猶是舊衣裳。逢人盡說官如水。老我相看鬢已霜。此去莫教音問斷。雁飛今喜過衡陽。

歸田詩話。賁有初工詩。春日見吳山遊女之盛。作絕句云云。特過予誦之。其詩新嫩奇巧多類是。惟送戴伯貞遠廣西一律云云。敘事委曲而感慨係之。出諸作之上。

題畫梅

王郎胸次亦清奇。寫盡孤山雪後枝。老我江南無俗事。爲渠日日賦新詩。
王郎日日寫梅花。寫遍杭州百萬家。向我題詩如索債。詩成贏得世人誇。

南湖詩集。四代孫欽序。入國朝。隱居越之山陰。更諱悅。遂終於越。門人私謚曰貞晦。世號南湖先生。故其集曰南湖。時會稽王元章善畫梅。得其畫者。謂無貢南湖詩。則不貴重。故集中多詠梅詩。

吳志淳

志淳字主一。以字行。無爲州人。以父蔭官縣簿。入明不仕。

句

晚涼浴罷閒無事。水閣東頭看月生。

歸田詩話。水殿雲廊三十六。不知何處月明多。王子宣詩云云。吳主一詩。二人在當時。皆以詩鳴。此其得意句。

又

燕來已覺社日近。寒退始知春意深。

藝苑卮言。入宏正間。不復可辨。參之貞元長慶。亦無愧色。

陳思

思字履信松人。

句

傳家忍學韓爲賈。失國驚聞莒滅鄆。

梧溪集。弊廬數楹。鄰人侵傍地。自歌曰。食且無魚。奈何盤蔬無餘。鄰聞之。歸所侵地。居海上。日惟無後是戚。乃欲弟之幼子。弟不之卹。吳被圍。思愈皇皇。因賦詩謁祝上海挺云云。挺嘉歎爲讓弟。遂立其子。

吳敬夫

題蘆花被圖

秋風吟就蘆花被。一落人間知幾年。澤國江山今入畫。詩人毛骨久成仙。高情已落滄洲外。舊夢猶迷白鳥邊。展卷不知時世換。水光山色故依然。

歸田詩話。亡友邱彥能。藏蘆花被圖。蓋模寫酸齋梁山灤故事。貢泰甫題律詩一首。吳子立繼之。其餘數首而已。彥能寶惜此卷。不妄與人題。後遇吳敬夫。以其有詩名。出而求題。敬夫爲賦數首。皆不愜意。最後一首云云。彥能喜。始登於卷。

思子

劍閣陵雲鳥道邊。路難聞說上青天。山川萬里身如寄。鴻雁三秋信不傳。落葉打窗風似雨。孤燈背壁夜

如年老懷一掬鍾情淚。幾度沾衣獨泫然。

瓠里子筆談。錢塘吳慥。洪武間官四川。其父敬夫思之。作詩云云。敬夫卒。而慥始以丁憂還家。且作詩。矜其妻之賢。而未嘗念及其父。至爲瞿存齋先生面誚之。

句

闌干苜蓿先生飯。顛倒天吳稚子衣。

歸田詩話。曹組元寵題村學堂圖。此老方捫蝨。衆雛爭附火。想當訓誨間。都都平丈我。語雖調笑。而曲盡村俗之狀。近吳敬夫一聯云云。其景况可想也。

呂玄英

鶴傍牡丹圖

牡丹花畔鶴精神。飛並雲林似倚人。萬里青霄不歸去。洛陽能有幾時春。

閒中今古錄。元末江西程國儒。任餘姚州判官。因亂來依方谷珍。與呂玄英爲友。國儒有鶴傍牡丹圖。索呂題云云。程得詩。卽日促裝回番陽。

沙可學

可學字口口。永嘉人。登至正進士第。爲行省掾。

詠懷

疏鑿功成王氣衰。九重端拱尙無爲。貪夫柄國忠良沒。巨敵臨郊社稷危。萬里朔雲沙漠漠。六宮禁御草

離離金輿玉輅無消息。腸斷西風白雁飛。

靜志居詩話。可學僅存詠懷詩。蓋憶庚申君北狩而作。首句指賈魯挑河言也。

郝經

經字仲誼。仁和人。元末進士。有玩齋集。

春陪呂志學曾彥魯劉仲原同登虎邱賦呈居中長老

虎邱山前新築城。虎邱寺裏斷人行。梵僧自識灰千劫。蜀魄時飄淚一聲。漸少松杉圍宰堵。無多桃李過清明。向來遊事誇全盛。曾對春風詠太平。

靜志居詩話。虎邱詩集一卷。王高士賓所錄。吾鄉項氏萬卷樓藏書也。中載仲誼是詩。同時和者。呂敏志學云。山上樓臺山下城。朱旗夾道少人行。曾朴彥魯云云。僧寧居中云云。又周南老正道。有至正丁酉冬。督役城虎邱詩八首云云。虎邱築城。吳人亦鮮有知者。予嘗泊舟山後。見遺趾尙存。

曾朴

朴字彥魯。燕山人。

次仲誼韻呈居中長老

闔閭家上見新城。無復遊人載酒行。山雉聽經依塔影。樹鴉爭食亂鐘聲。劍池龍去泉空冽。茶竈僧閒火獨明。我欲投簪營小隱。佛香終日祝昇平。詳郝經下。

周南一作南老

南字正道。至正末，以薦補信州永豐學教諭官。至淮南省照磨。洪武初，徵赴太常，議郊祀禮。禮成，發臨濠居住，放還卒。

至正丁酉冬，督役城虎邱，連月餘，賦詩八首，錄呈居中禪師錄三。

捧檄趨功城虎邱，因高據險互相繆。洪盧一躍寒潭底，夜半光芒射斗牛。
四疊新城繞澗隈，劍池池上碧崔嵬。於菟夜吼山靈振，仙鬼哀吟風雨來。
平林慘淡日沈西，百萬城春落杵齊。努力相歌歌未徹，回頭仰羨鳥歸栖。詳鄉經下。

趙汭

汭字子常，休寧人。至正間，以保守鄉井，授爲江南行樞密院都事。洪武初，召修元史，不仕。有東山存稿。

餘冬序錄：新安趙東山謁黃楚望先生於九江。楚望問年，答曰：己未。楚望曰：先吾刊六經補注之歲也。或曰：書刊矣，恐無讀者。予曰：是讀者未生耳。豈知吾子適生是歲乎？

詠蟋蟀

赤翅晶瑩何處歸，秋來清響傍庭闌。莫言微物無情意，風虎雲龍共一機。

東山存稿原注：先生年十二時，從胡井表學於家塾，賦此詩。胡大驚異，賦乳燕詩以答之云云。

詠鋸匠解木

一條黑路兩人忙。傍晚相看髣髴有霜。汝去我來何日了。虧他扯拽度時光。

綠雪亭雜言。趙東山垂髫有詩名。里中有二執友。其一因投荒過家。其一以磨勘需調。皆栖栖桑榆。猶戀雞肋者。一日同訪東山。見庭下有鋸匠解木。因以命題。東山口占絕句云云。二執友知詩意。諷己也。相與感歎而去。

贈推命焦月巖

李送水迎仍值箕。奎躔火日竟何爲。祇應少日懷經濟。垂近中年迫亂離。至樂每從天外得。長生難向命中期。藏書避地俱無計。禍福煩君仔細推。

東山存稿原注。先生己未生。安命在戊。太陽火星同躔奎度。李在丑。水在寅。當時談星者言。行限至箕。前有水。後有李。必不佳。故起句及此。

張翼亦作筌。

翼字翔南。建德人。徙居嘉興。至正乙巳舉於鄉。吳元年徵入禮局。告歸。

西湖竹枝詞

南高北高峯頂齊。錢塘江水隔湖西。不得潮頭到湖口。郎船今夜泊西溪。

西湖竹枝集早有詩名。觀其詩。知其人矣。

忠徐倡詩

西神峨峨。睢孽蔓乘。兵塗毗膏。國武乏興。喑爾尸素。營賄朋。城弗典守。妖狐凌。彼章縫之徒。冠倫魁能。蒲

伏襲服。倒授太阿。儼以承天。廓不白暑雨冰。綱常淪墮。綫絕罔惡。胡爲優徐倡。冶容倚市矜。鬢妖軀之俾。侑樂頡玉肆。冒無陵兢。噤謳褫舞餘。怒鬢植鬚髻。鉛爲鋼刃。割膺戟營。霸灼上升。顧守臣鉅儒。汗慙銜愧。死莫懲。二儀磅礴。忠義氣。猶出下里。孰可仍。桓桓執夷徒。乃反經溝塍。爾倡丹衷。燭日月。易粉黛。譽聲繩。繩汙瀆。流回清激。

輟耕錄。至正壬辰秋。邊寇陷常州。守吏望風奔潰。徐婦倡者。寇命以佐燕。乃憤冒弗從。竟刺死之。未幾江浙平章定定來尅復。儒流吳寅趙君謨等。以從逆伏誅。嘉興張翔南翼作忠徐倡詩。以白於世。

梁寅

寅字孟敬。新喻人。元末辟爲集慶路儒學訓導。明洪武初徵修禮書。書成以老疾辭歸。明史四方士多從學。稱爲梁五經。

玉階怨

團扇且棄置。夕氣涼轉添。流螢點魚鑰。隕葉近蝦簾。羅衣舊恩賜。不令珠淚霑。投壺隨筆新喻梁孟敬先生作玉階怨樂府云云。拳拳不忘舊恩。可謂怨而不怒者。

魯淵

淵字道原。淳安人。至正進士。官江浙儒學提舉。洪武初徵修禮樂書。詔授江西按察司僉事。以病辭。

句

九州文軌車書混。萬里梯航玉帛齊。題入貢圖。越裳翡翠供輸少。遼海雲航漕運通。感懷杜鵑山外家千里。姑惡聲中淚兩行。晚宿新岑

靜志居詩話。嘗與楊廉夫。張光弼。校文貢院。其云云。蓋猶及見元盛時者。其後幾死於寇。極其顛沛。晚宿新岑云云。誦之亦可悲矣。

張思孝

思孝字奉先。雲中人。至正間官武州守。洪武己酉。被召至。辭歸。

句

意當極快處。心有不平時。少忍應無患。欲言宜再思。訓子綺窗花落東風軟。曾讀曹家女誡無。題二喬。一眼濁黃天塹闊。半眉老翠太行昏。倒屣道中。敢效子陵辭漢爵。願同巢父樂堯年。辭歸述懷

梧溪集所遺稿有云云。志行概見之矣。

鄧雅

雅字伯言。

句

鼇足立四極。鍾山蟠一龍。

七修類稿。太祖召涂人鄧伯言見。命賦鍾山詩。稿既呈。中一聯云云。上大喜。以手拍案高誦之。鄧

以爲怒驚死于墀下扶出東華門始甦。

元詩紀事卷二十八

張憲

憲字思廉山陰人別號玉筍生張氏據吳辟爲樞密院都事有玉筍集
列朝詩集吳亡走杭州寄食報國寺旦暮手一編人不得窺死後視之其平生所作詩也

岳鄂王歌

君不見南薰門鐵爐步神矛丈八舞長蛇雙練銀光如雨注又不見鐵浮屠拐子馬斫鏗鋼刀飛白霜貫
陣背嵬紛解瓦義旗所指人不驚王師到處壺漿迎兩河忠義望風附襄鄧荆湖唾手寧朱仙鎮上馬如
虎百戰經營心獨苦賜環竟壞迴天功捲旆歸來臥樞府錢塘宮殿春風輕嬌兒安晏醉未醒徒令功臣
三十六舞女歌兒樂太平虎頭將軍面如鐵義膽忠肝向誰說只將和議兩封書往拭先皇目中血將軍
將軍通軍術君命不受未爲失大夫出疆事從權鐵馬長驅功可必功成解甲面丹墀拜表謝罪死不遲
惜哉忠義重山岳智不及此良可悲嗚呼肆讒言加毒手申王心循王口斬王湖上乘驢走五國城頭帝
鬼啼胡兒相酌平安酒

玉筍集劉鈺序余嘗於精忠錄閱先輩張思廉所作詩歌其詞氣抑揚感激所以爲王自處而表
其忠烈者曲盡無遺

二月八日遊皇城西華門外觀嘉驍弟走馬歌

春風壓城紫燕飛。繡鞍寶勒生光輝。軟沙青草平似鏡。花雨滿巾風滿衣。潛蛟雙綰玉抱肚。朱鬣分光散紅霧。金龍五爪蟠彩袍。滿背真珠撒秋露。生猿俊健雙臂長。左脚踏鐙右蹴韁。銅鏡四扇遶十指。玉聲珠碎金琅璫。黃蛇下飲電掣地。錦鷹打兔起復墜。袖回突兀鞍面空。銀鬣駝囊兩邊絕。西宮綵樓高插天。鳳凰繚繞排神仙。玉皇拍闌誤一笑。不覺四蹄如迸煙。神駒長鳴背凝血。郎君轉面醉眼纈。天恩翦下五色雲。打鼓歸來汗如雪。

玉筍集原評。嘔出錦心。可與桃花爭奇。決非驢上詩人語也。

戲贈乍浦稅使歌

去年四月雨如竹。錢幣不行百姓哭。故人走馬初上官。日日誅求征稅足。今年四月雨如箭。海賊東來船著岸。土兵東走百姓空。商征不成官吏散。故人本是西河夫。殺賊得官心氣麤。如何臨難乃無勇。不敢東向鳴桑弧。君不見彭城劉寄奴。長刀獨戰今非無。

玉筍集原評。詞氣豪宕。可以激立頽靡。

酬海藏主紙扇歌

海一漚。氣骨有似生驂騑。凡韁俗絡羈不得。西望八駿瑤池游。終焉不遂志。屏棄妻子祝髮爲比丘。遨遊名山川。脚趼不肯休。誓絕俗士交。有語常不酬。西來貽我白紙扇。瀟灑不盡三湘秋。雙石相對峙。不壓長江流。上有秀髮翁。踞坐披羊裘。手垂獨繭絲。下掛直鐵鉤。其意不在鱗與鰵。涼風從西來。短髮吹颼颼。故人位九五。駕六龍。垂冕旒。諫議亦好官。視若囹圄囚。作書罵丞相。傲氣凌公侯。天星徹夜鬧。帝座疑有憂。

胡爲太史公。仰觀勞心眸。偶然共臥伸一足。誤壓天子腹。奚足尤。飄然納爵去。天子不可留。清灘七里水。如玉上縛草。廬下艤舟。有時耕白雲。鞭青牛。何庸圖像南宮樓。我今把釣釣臺去。海漚此意知我否。海漚此意知我否。

玉筍集原評。此篇亦似生馬悍氣不可羈也。知此僧不凡。

槎洲歌

明珠洲水西行九萬七千里。上直箕尾通銀河。洲中之地三萬六千頃。下有登天貫月槎。洲旁瑤草白似雪。瓊林大樹高可五百尺。樛枝的礫琉璃葩。人間百世始一日。何有寒暑歲序白兔隨朱鴉。家雞曉啼朝陽九。苞鳳家犬晝戲于閭獅子。五色石盤擎雪龍。切鱗色奪日月。露注酒光燦霞。白石髓。青胡麻。王母蟠桃七顆碧玉斗。安期大棗五尺青銅瓜。明星之精。化作老仙降槎上。手揮白鸞尾。身坐白鹿車。長髮晞綠水。童臉浮丹砂。西方康胡跪進酒。南極丈人來獻花。蓬萊散仙遣以照書杖。大瀛海伯貢以黃茅芽。明星翁。壽何遐。樂無加。時呼鐵崖老仙友。西渡弱水逾流沙。杖拄青騰蛇。橋踏金蝦蟆。五城十二樓。到處皆爲家。淋漓宮錦袍。倒著青綸紗。桑田東海不足較。麻姑三見何庸誇。明星翁。樂無極。壽無涯。吹笙駕鶴一去五千載。歸來重醉槎頭槎。

玉筍集原評。此又於賀體離而去之。掉辭擎韻。所謂橫絕颺起者。

橘洲行

太湖之水分三支。注爲長泖東去無已時。泖灣之口有大橘。一樹盤盤蔭門楣。里鄰呼爲橘洲衆所知。洲

之上。橘之下。矮屋六七間。皆茅茨。孝子萬生三世以來。皆居之。生衣無綾錦華。食無肉作糜。讀書談道。操履步步以古哲自礪。不肯苟爲。堂有老親。白髮垂。必須甘旨備二膳。家貧不常得。十年客寄。爲人訓其兒。所得金。悉以爲奉母資。母病下痢。不能自潔。生卽棄業歸。取中裙褲溲穢。手奉虎子。晝夜伺母。不使床席沾淋漓。母有女。贅狼壻。不識孝義。惟務利。日思剝取生家資。甚至湯藥之費。亦來撝剝。生卽與之無吝詞。惟恐致鬪。傷母慈。使母不得瘥。以陷終天無窮悲。卒能護持母病。無恙以終。天年之壽期。噫吁。橘洲之水清且漪。橘洲之橘碩且飴。飲洲之水。食洲之橘。誰無父母思。嗟哉萬生孝義。今古稀。我詩直欲追韓奇。玉筍集原評。此篇步驟全是老韓。想見萬孝子不在董南下也。

縛虎行

白門樓下兵合圍。白門樓上虎伏威。戟夫不掉丈二尾。袍花已脫斑爛衣。捽虎腦。截虎爪。眼中視虎如貓小。猛跳不越當塗高。血吻空腥千里草。養虎肉不飽。虎饑能噬人。縛虎繩不急。繩寬虎無親。座中叵測劉將軍。不縱猛虎食漢賊。反殺猛虎生賊臣。食原食卓何足噴。

歸田詩話。張思廉作縛虎行云云。記當時事。調笑可誦。思廉有詠史樂府一編。皆用此體。

太真明皇竝笛圖

黑奴絃索花奴鼓。譚奴撫掌閣奴舞。阿環自品玉玲瓏。御手夷猶親按譜。風生龍爪玉星香。露溼櫻脣金縷長。莫倚花深人不見。李薺側足傍宮牆。

案此詩見鐵崖集。其前尚有十六句。截去較勝。

陳秀民

秀民字庶子溫州人。一云嘉興人。張氏時爲參軍。有寄情集。

寄紹興呂左丞

後來江左英賢傳。又是淮南保相家。見說錦袍酣戰罷。不驚越女采荷花。

輟耕錄。張氏據有平江。部將呂珍守越。叅軍陳庶子饒介之在左右。一日。陳賦此詩。饒染翰題扇以寄呂。詞翰雙絕。呂倩人誦罷。大怒曰。我爲主人。血戰守封疆。豈愛一女子。不忍驚乎。見則必殺之。

陳基

基字敬初。臨海人。受業於黃潛。從至京師。授經筵檢討。有夷白齋集。續吳先賢讚。張士誠受元太尉。以基參府事。及其謀自王也。乃獨諫止之。謂當且需時者。遂命以內史領學士院。凡軍旅文符書檄悉委之。士誠無大略。不知攻取勢。遽晏安。徒好文爲故。時有命篇。諸人與相和歌。亦曾無巢幕及燼之慮。及與同覆。基既俘。乃蒙宥。俾修元史。成放還吳卒。

舟中看虞山有感

一望虞山一悵然。楚公會此將樓船。開關百戰捐軀地。慷慨孤忠罵寇年。填海欲銜精衛石。驅狼願假祖龍鞭。至今父老猶垂淚。花落春城泣杜鵑。

列朝詩集。此詩爲張士德被擒而作。余別有記甚詳。孤忠罵寇。亦指斥之詞也。

桂林謠

廣寒宮前秋色老。杪擺子結虬枝杪。剛風吹顫玉蟾蜍。丹枝經霜香似掃。雪魄持杵敲丁東。驚落璫璣銀闕空。羿妻嬌居不遑惜。蚌胎撒下塵寰中。

拜經樓詩話。世傳天竺中秋夕。往往有月中桂子飄落。惟至正壬辰。落在九月十五夜半。陳敬初爲賦桂林謠云。

羣珠碎傷吳帥潘元紹衆妾作

繡紋刺綺春纖長。蘭膏鬢髮瓊肌香。芳年豔質媚花月。三三兩兩紅鴛鴦。翠靴踏雲雲帖妥。海棠露溼臙脂朶。冶情紛作蝶戀春。新曲從翻玉連瑣。畫堂銀燭天沈沈。揚眉一笑輕千金。明珠買得綠珠心。欲揮魚腸掃妖彗。主君勿疑心似醉。一宵痛擊羣珠碎。門前鐵騎嘶寒風。奇勳解使歸元戎。

元明事類鈔。元陳基集。吳帥潘元紹七妾。皆青年絕色。善纂組歌詞。因潘出軍恐致疑。皆雉經。爲作羣珠碎詩。楊慎集。七姬之死。蓋潘逼焉。平安則獲雜子女而漁聚之。一旦有變。恐樂他人之少年而雉經之。潘之惡甚矣。

卞元亨

絕句

牡丹曾是手親栽。十度春風九不開。多少繁華零落盡。一枝猶待主人來。

茶餘客話。卞元亨元從張士誠。屢諫不聽。歸隱海濱。明太祖平吳後。屢徵不出。作詩有恐使田橫。

客笑人句。明祖怒。遣戍遼陽。將行。以酒醑牡丹曰。待我南還。花再開。自是花果不開。妾棲息園中。朝夕對花祝云。主人有還信。當再開。如是十年。花忽大放。元亨果遇赦還。復作詩云。

方行

行。字明敏。黃巖人。谷珍子。有東軒集。

詩談黃巖方行。寧海許繼。皆鐵中錚錚者。

句

採窮江海無靈藥。歸到驪山有劫灰。登秦住山。

藝苑卮言。參之貞元長慶。亦無愧色。

劉仁本

仁本。字德元。天台人。元末進士。官江浙行省左右司郎中。佐方谷真謀議。有羽庭詩稿。

續蘭亭會補參軍劉密詩并序。

庚子春。仁本治師會稽之餘姚。乃相龍泉之左麓。州署之後山。得神禹祕圖之處。水出巖罅。瀦爲方沼。蔬爲流泉。卉木叢茂。行列紫薇。間以竹篁。彷彿乎蘭亭景狀。因作零詠亭。以表之。合甌越來會之士。得四十二人。同修禊事。取晉人蘭亭會圖詩缺不足者。各占其次。補四五言各一首。因曰續蘭亭會云。

陽春沐膏澤。草木生微喧。靈圖發幽祕。感此禹迹存。衣冠繼芳集。臨流引清樽。性情聊自適。理亂復奚言。

列朝詩集至正庚子仁本治師會稽之餘姚州作零詠亭於龍泉左麓彷彿蘭亭景物集名士趙俶謝理朱右天台僧白雲以下四十二人修禊賦詩仁本自爲之序焉

謝理

理字□□南陽人官都事

續蘭亭會補侍郎謝瑰詩二首

東溫散晴旭。灌水浮嘉陰。良辰事修禊。我友欣盍簪。方池注清流。可以濯煩襟。一觴復一詠。暢情忘古今。

王霖

霖字叔雨括蒼人官浙江行省樞密院都事

續蘭亭會王獻之詩二首

華髮宴餘春。微風宿雲散。蘭皋野氣芳。桐岡日初旦。羣賢集崇邱。臨流水光渙。酌酒清湍曲。俯泉慨長歎。

諸綱

綱字□□□□人官蕭山教諭

續蘭亭會補府曹勞夷詩二首

叢木翳林薄。構亭俯澗濱。旭日散晴彩。光風媚芳春。臨流轉輕觴。於以樂嘉賓。詠歌意自適。酣暢趣益真。茲游敦所尚。庶足酬令辰。

徐昭文

昭文字秀章。上虞人。官平江儒學學正。

續蘭亭會補府主簿后綿詩二首

茲辰天氣佳。駕言寫我憂。衣冠盛良會。祓禊俯長流。川容澹疎雨。樹色翳崇邱。清風接千載。復此逍遙遊。

鄭彝

彝字元乘。餘姚人。

續蘭亭會補山陰令虞國詩二首

夙駕稅幽麓。泛醴循流瀾。芳蕤被巖瀨。葩萼耀林端。靡靡時運近。期焉撫崦嶺。主欣遠賓集。陶然有餘歡。

張溥

溥字口口。餘姚人。官嘉興路經歷。

續蘭亭會補鎮國大將軍掾卞迪詩二首

茲辰暮春初。散策臨泉石。雲渠引微波。浮觴薄前席。伊人既已去。古今同一適。瞻茲修禊地。遙岑澹空碧。靜志居詩話。左司結續蘭亭會。與者四十二人。今名氏未能悉考。詩僅存者。左司而外。都事謝理。補晉侍郎謝瑰。鄉貢進士趙俶。補參軍孔盛。蕭山主簿朱右。補餘杭令謝滕。帥府都事王霖。補王獻之。蕭山教諭諸綱。補府曹勞夷。平江儒學正徐昭文。補府主簿后綿。祕圖隱者鄭彝。補山陰令虞國。嘉興路經歷張溥。補鎮國大將軍掾卞迪。天台僧自悅。補任城呂系。四明僧如阜。補任城令呂本。東山僧福報。補彭城曹誼。詩皆醇雅。絕類晉人。事在至正庚子。後九年。始建元洪武。諸君惟

俶及右仕明案以上七人詩皆二首錄一

吳徹

徹字文通崇仁人

西山夜雨

莫厭西山夜雨多也應添起洞庭波東風肯與周郎便直上金陵奏凱歌

明詩綜爲陳友諒用事嘗偵太祖軍被獲命詠百馬圖黥其面目爲詭譎秀才又賦西山夜雨云

元詩紀事卷二十九

芝麻李

平胡錄。蕭縣人李二。號芝麻李。以燒香聚衆。與其黨趙君用彭早住起淮安。攻陷徐州。元兵破徐州。芝麻李遁。趙君用彭早住走濠州。

庚申外史。芝麻李者。邳州人也。值歲饑。其家惟有芝麻一倉。盡以賑人。故得此名。

庚申外史。脫脫平徐州。以得芝麻李奏功。既而陰構朝旨。令班師。使者六七返。帝始令月怯察兒代之。月餘始獲芝麻李。械送京師。脫脫密令就雄州殺之。案據此。疑芝麻李始終未真獲。

題留連亭

憶昔曾爲海上豪。騰脂馬上赤連刀。此地斬分陳總管。彼時斫斷莫軍曹。固知今日由天定。方信當年漫自勞。英雄每每無常在。戰袍著盡又方袍。

壘起雜事。芝麻李之遁也。髡髮爲頭陀僧。及天下既定。遊徐之永固河。河上有留連亭。李徘徊久之。乃題一筆云云。三歎投筆而出。乃有翁方且以舟艤岸。見李發歎。問其故。李泣下。謂曰。我卽蕭縣李二也。此翁亦流淚不止。自陳其由。所謂湘鄉賊鄧文元也。避難詭姓名作渡於此。二人沾村酒酌之。話昔日之強梁。傷今日之狼狽。聞者爲之感歎。

西昌寇

口占詩

頭戴血淋漓。負母沿街走。遇我慈悲人。與汝一杯酒。我亦有家兒。雪色同冰藕。亦欲如汝賢。未知天從否。
江西通志云。鄧學詩。字崇雅。泰和人。元季寇入西昌。學詩負母劉以逃。塗遇寇。斫之幾死。繼有寇至。見老母哭其旁。憫之。與以善藥。傳創。又解衣覆之。久乃甦。最後復遇渠寇。知其儒者。哀之。口占一詩云云。命和學詩應聲和云。鐵馬從西來。滿城盡驚走。我母年七十。兩足如醉酒。白刃加我身。一命懸絲藕。感君不殺恩。未知能報否。寇喜釋之。

元詩紀事卷三十

元好問

好問字裕之。太原秀容人。金興定三年登進士第。官至翰林。知制誥。金亡不仕。世稱遺山先生。有遺山集。

郝文忠集。先生當德陵之末。獨以詩鳴。上薄風騷。中規李杜。粹然一出於正。天才清贍。邃婉高古。沈鬱太和。力出意外。巧縛而不見斧鑿。新麗而絕去浮靡。造微而神采粲發。雜弄金碧。糅飾丹素。奇芬異秀。洞蕩心魄。看花把酒。歌謠跌宕。挾幽并之氣。高視一世。以五言雅爲正。出奇於長句雜言。至五千五百餘篇。爲古樂府。不用古題。特出新意。以寫怨思者。又百篇。用今題爲樂府。揄揚新聲者。又數十百篇。

余謙遺山集序。崔立之變。駢首死難者不可勝紀。遺山歸然獨存。金亡。晦道林莽。日課一詩。寒暑不易。

遺山集。初余學詩。以數十條自警。毋怨懟。毋譴浪。毋傲狠。毋崖異。毋狡訐。毋婢阿。毋附會。毋籠絡。毋衍粥。毋矯飾。毋爲堅白辨。毋爲聖賢顛。毋爲妾婦妬。毋爲仇敵謗傷。毋爲雙俗閔傳。毋爲瞽師皮相。毋爲黥卒醉橫。毋爲黠兒白捻。毋爲田舍翁木強。毋爲法家醜詆。毋爲牙郎轉販。毋爲市倡恩怨。毋爲琵琶娘返魂韻詞。毋爲村夫子兔園冊。毋爲算沙僧困義學。毋爲稠梗治禁詞。毋爲天

地一我。古今一我。毋爲薄惡所移。毋爲正人端士所不道。

庶齋老學叢談。張橋軒與元遺山爲斯文骨肉。張云富貴倘來良有命。才名如此豈長貧。元改。倘來爲逼人。此爲子。又云。半篙溪水夜來雨。一樹早梅何處春。元曰。佳則佳矣。而有未安。旣曰一樹。烏得爲何處。不如通作一句。改一樹爲幾點。壬辰北渡。寄遺山詩。萬里相逢真是夢。百年垂老更何鄉。元改。里爲死。垂爲歸。如光弼臨軍。旗幟不易。一號令之。而百倍精采。

堯山堂外紀。壬辰北渡。順天毛正卿楊德秀。祈仙寺中。蘇晉降筆。寫詩數十首。一詩有百僞無一真。中有義黃醇之句。餘詩除酒裏神仙我五言外。多不成語。二人初不知晉爲何代人。詩爲何人作。以語元遺山。遺山曰。余二十六七時。有詩曰。西郊一畝宅。閉門秋草深。牀頭有新釀。意慙成孤斟。舉杯謝明月。蓬華肯相臨。願將萬古色。照我萬古心。又去古日已遠。百僞無一真。獨餘酒鄉地。中有義黃醇。聖教難爲功。乃見酒力神。誰能釀滄海。盡醉區中民。今晉所批。乃有此十字。晉豈余前身邪。將近時鬼物之不昧者。記余詩託名於晉。以自神也。晉旣以余詩爲渠所作。余亦就酒裏神仙我五言取償於晉。因作樂府曰。繡佛長齋。枉伴蒲團過。酒鑪橫臥。一蹴虛空破。頗笑張顛。自謂無人知。還知麼。醉鄉天大。少個神仙我。

箕山

幽林轉陰崖。鳥道人跡絕。許君棲隱處。唯有太古雪。人間黃屋貴。物外祇自潔。尙厭一瓢喧。重負寧所屑。降衷均義稟。汨利忘智決。得隴又望蜀。有齊安用薛。干戈幾蠻觸。宇宙日流血。魯連蹈東海。夷叔採薇蕨。

至今陽城山。衡華兩邱垤。古人不可作。百念肺肝熱。浩歌北風前。悠悠送孤月。

元魯縣琴臺

荒城草木合。破屋風雨侵。千年一琴臺。睠焉涕盈襟。遺愛食縣社。公寧不堪任。此臺卽甘棠。忍使無餘陰。旁舍高以華。大豪日捐金。蒼雲元武暮。鬼物憑陰岑。尙德抑元虛。墜典誰當尋。我興薦寒泉。百拜公來臨。公來不能知。落日下飢禽。懷哉空山裏。鶴飛猿與吟。當年于蔦歌。補袞一何深。承平示得意。獨能正哇淫。君相此一時。又復悟良箴。諛臣坐廢黜。盍亦起幽沈。蒲輪竟頽轂。香草空深林。寂寞授書室。孤甥舉遺衾。生平諒已然。薄俗矧來今。千山爲公臺。萬籟爲公琴。夔曠不並世。月露爲知音。人間蹄涔耳。已矣非公心。元道州文編以元魯山爲元魯縣。又臺今爲元武祠。故及之。

郝文忠集業成下太行。渡大河。爲箕山琴臺等詩。朝禮部見之。以爲少陵以來無此作也。以書招之。於是名震京師。目爲元才子。

芳華怨

娃兒十八嬌可憐。亭亭裊裊春風前。天上仙人玉爲骨。人間畫工畫不出。小小油壁車。札札出東華。金縷盤雙帶。雲裙接鴈沙。一片朝雲不成雨。被風吹去落誰家。少年豈無恩澤侯。金鞍繡帽亦風流。不然典取驪駒裘。四壁相如堪白頭。金谷樓臺悄無主。燕子不來花著雨。只知環珮作離聲。誰向琵琶得私語。無情鵲鵲翡翠兒。有情蜂雄蛺蝶雌。勸君滿酌金屈卮。明日無情空折枝。

歸潛志。元裕之李長源同鄉里。各有詩名。由其不相下。頗不相成。李好憤怒。元嘗云。長源有憤擊

經元好滑稽。李輒以詩譏罵。元嘗如之何。元無權國史院編修官。時末帝召故駙馬都尉僕散阿海女子入宮。俄以人言其罪。又蒙放出。元因賦金谷怨樂府。李見之。作代金谷佳人答一篇以拒焉。一時士人傳以爲笑談。元詩云云。

贈別孫德謙

津橋垂楊雪花白。挽斷青衫苦留客。西湖一雨春意濃。絕似銅駝洛陽陌。湖亭蘿醉臥春風。到手金杯不放空。鵲山一帶傷心碧。羨殺孫郎馬首東。

庶齋老學叢談。張寓軒相公。少年與孫德謙。於東平嚴侯府從元遺山讀書。其歸也。命二子送行。及別。求詩。以東平二字爲韻。孫得詩云云。公得詩云。汝伯年年髮如漆。看渠著脚與雲平。孫竟不永年。或者謂德謙詩有殺孫郎語。不祥如此。則詩果有讖乎。

送李參軍

五日過居庸。十日渡桑乾。受降城北幾千里。出塞入塞沙漫漫。古來丈夫淚。不灑別離間。今朝送君行。清淚留餘潛。生女莫作王明君。一去紫臺空珮環。生男莫作班定遠。萬里馳書望玉關。我知驥子墜地無齊燕。我知鴻鵠意氣青雲端。草間尺鷃亦自樂。扶搖直上何勞搏。一衣敝緇袍。一飽苜蓿盤。歲時壽翁媼。團樂有餘歡。就令一朝使得八州督。爭似綵衣起舞春爛斑。去年洛陽人。今年指天山。地遠馬羈破。霜重貂裘寒。朔風浩浩來。客子慘在顏。扼胡嶺上一迴首。未必君心如石頑。君不見桓山鳥。乳哺不得須臾閒。衆雛一朝散。孤雛回顏聲悲酸。寒雁來時八九月。白頭阿母望君還。

歸田詩話。予適保安周府教授。滕碩亦以事累繼至。見予每誦元遺山送李參軍赴塞上長篇。謂舊讀此詩。備悉塞垣之苦。豈料今日親涉此境。予愛其詩。因請詳讀而備錄之。

論詩三十首

一語天然萬古新。豪華落盡見真淳。南窗白日羲皇上。未害淵明是晉人。柳子厚。唐之謝靈運。陶淵明。晉之白樂天。

定宇先生文集答問。問元裕之云。柳子厚。唐之謝康樂。陶元亮。晉之白樂天。此說如何。答曰。謝康樂以放曠不檢束遭禍。柳子厚陷伾文之黨。亦卒貶死。以之並說。亦自頗是。陶元亮忠義曠達。優游樂易。以白樂天比之。亦似。但優游樂易相似。而論其至到處。則樂天不能及淵明也。

望帝春心託杜鵑。佳人錦瑟思華年。詩家總愛西昆好。只恨無人作鄭箋。

牧菴集嘗疑遺山論詩於西昆有無人作鄭箋之恨。漫不知何說。心竊思之。後問高吏部談。遺山誦義山錦瑟中四偶句。以爲寓意於適怨清和。始知謂鄭箋者。殆是事也。

東野窮愁死不休。高天厚地一詩囚。江山萬古潮陽筆。合在元龍百尺樓。

歸田詩話。東野云云。推尊退之。而鄙薄東野至矣。東坡亦有未足常韓豪之句。又云我厭孟郊詩。復作孟郊語。

窘步相仍死不前。唱酬無復見前賢。縱橫自有凌雲筆。俯仰隨人亦可憐。

南濠詩話。東坡云。詩須有爲而作。山谷云。詩文唯不造空強作。待境而生。便自工耳。予謂今人之

詩。惟務應酬。皆無謂而作者也。無怪其語之不工。遺山云云。知其病者也。

有情芍藥含春淚。無力薔薇臥晚枝。拈出退之山石句。始知渠是女郎詩。

中州集。王中立傳。予嘗從先生學。問作詩究竟如何。先生舉秦少游春雨詩。有情云云。詩非不工。若以退之芭蕉葉大。梔子肥較之。則春雨爲婦人語矣。破卻工夫。何至學婦人。

歸田詩話。元遺山論詩三十首。內一首云云。初不曉所謂。後見詩文自警一編。亦遺山所著。謂有情二句。此秦少遊句也。非不工巧。然以退之山石句觀之。渠乃女郎詩也。破卻工夫。何至作女郎詩。

俳體雪香亭雜詠十五首

爐薰浥浥帶輕陰。翠竹高梧水殿深。去去氍毹雪三尺。畫羅休縷麝香金。泥金色如麝香。宮中所尙。

藝林伐山。宋徽宗宮人多以麝香色縷金羅爲衣裙。元裕之詩。此去穹廬千萬里。畫羅休縷麝香金。

羅綺深宮二十年。更持桃李向誰妍。人生只合梁園死。金水河頭好墓田。

山房隨筆。金國南遷。浸弱不支。又遷睢陽。某后不肯播遷。寧死於汴。元遺山有詩云云。

東皐雜鈔。金國南遷後。國浸弱云云。見山房隨筆。王阮亭但謂其擬張祜。人生只合揚州死。禪智山光好墓田。蓋哀金宮人之被俘虜者耳。豈未見此耶。

鄉郡雜詩五首

百年喬木鬱蒼蒼。耆老風流趙與楊。爲向榆關使君道。郡中合有二賢堂。

元朝名臣事略引四賢堂記。聶侯珪帥平定。聞敬齋李公之名而賢之。延至郡舍。會遺山元公還太原。過之。爲數日留。因追憶閒閒文獻二老。作詩云云。聶侯起謝曰。此珪志也。方經始而聶侯卒。至元二年。到侯天祿繼守是州。爲屋數楹。置楊趙元李四公像於中以事之。

論詩三首

暈碧裁紅點綴勻。一回拈出一回新。鴛鴦繡了從教看。莫把金針度與人。

月山詩話。元遺山詩。喜用古人成語。陶杜句尤多。論詩絕句。鴛鴦云云。亦是古句。朱子云。子靜說話。常是兩頭明。中間暗。其所以不說破。便是禪。所謂鴛鴦繡出從君看。莫把金針度與人。他禪家自愛如此。

遊天壇雜詩

道民初不忘天台。姓氏分明見密崖。爲問松臺千載鶴。白雲何處不歸來。

續夷堅志。明昌末。廬氏山密崖。石壁高峻。非人迹所到。忽有題字云。道民天台司馬承禎過。字大如盤。墨色光瑩而紫。予過中岩。謁白雲先生祠。碑載承禎葬松臺。因有詩云云。

仙貓聲在洞中聞。憑仗兒童一問君。同向燕家舐丹竈。不隨雞犬上青雲。

續夷堅志。天壇中岩有仙貓洞。世傳燕真人丹成。雞犬亦昇仙。而貓獨不去。在洞已數百年。游人至洞前呼仙哥。閒有應者。王屋令臨漳薛鼎臣呼之而應。親爲予言。己亥四月。予自陽臺宮將之。

上方過洞前。命兒子叔儀呼之。隨呼而應。殊清還也。因作詩云。

征人怨

瀚海風煙掃易空。玉關歸路幾時東。塞垣可是秋寒早。一夜清霜入鏡中。

塞上曲

平沙細草散羊牛。幾簇征人在戍樓。忽見隴頭新雁過。一時回首望南州。

梁園春五首車駕還汴京後作

軍從南去三回勝。雪自冬來二尺強。今歲長春多樂事。內家應舉萬年觴。長春。德陵誕節名。

暖入金溝細浪添。津橋楊柳綠纖纖。賣花聲動天街遠。幾處春風揭繡簾。
上苑春濃晝景閒。綠雲紅雪擁三山。宮牆不隔東風斷。偷送大香到世閒。
樓觀沈沈細雨中。出牆花木亂青紅。朱門不解藏春色。燕宿鶯啼處處通。
雙鳳簫聲隔綵霞。宮鶯催賞玉谿花。誰憐麗澤門邊柳。瘦倚東風望翠華。龍德宮有玉谿館。麗澤。燕都西門名。

詩藪。元人絕句。莫過虞范諸家。至樂府體絕少。惟元好問塞上曲。梁園春。征人怨。差有唐味。

宛丘歎

秦陽陂頭人迹絕。荻花茫茫白於雪。當年萬家河朔來。盡出牛頭入租帖。蒼髯長官錯料事。下考大笑陽城拙。至今三老背腫青。死爲懸逋出膏血。君不見劉君宰葉海內稱。饑摩寒撫哀孤惻。碑前千人萬人泣。

父老夢見如平生。冰霜紈袴渠有策。如我碌碌當何成。荒田滿眼人得耕。詔書已復三年征。早晚林閒見雞犬。一犁春雨麥青青。

自注。髡李令南陽。配流民以牛頭租。迫而逃者萬餘家。劉雲卿御史宰葉。除逃戶稅三萬斛。百姓爲之立碑頌德。賢不肖用心相遠如此。李之後十年。予爲此縣。大爲逋懸所困。辛卯七月。司農檄予按秦陽陂田。感而賦詩。李與劉皆家宛丘。故以宛丘歎命篇。

密公寶章小集

天東長白大寶幢。天河發源導三江。有木蔽映山朝陽。云誰巢者雛鳳凰。雲間吐氣日五色。百鳥不敢言文章。名都盤盤魏大梁。黃金甲第羅康莊。王家書絕畫亦絕。欲與中祕論低昂。密公書院無絲簧。窗明几潔凝幽香。元光以後門輪廢。文士稍得連壺觴。客來喜色浮清揚。典衣置酒餘空箱。生平俊氣不易降。眼中俗物都茫茫。淵明素琴嵇阮酒。妙意所寄誰能量。在昔武元握乾綱。扶桑爲弓射八荒。獵取大國如驅羊。民風朴魯資鶯彊。文治未及武尅剛。興陵之孫越王子。天以人瑞歸明昌。十三執經侍帝傍。十八健筆凌阿房。撐腸文字五千卷。靈臺架構森鋪張。高陽苗裔襲衆芳。胡不置之貢玉堂。袖中正有活國手。地下纔得修文郎。悲風蕭蕭吹白楊。丘山零落可憐傷。承平故態耿猶在。拂拭寶墨生輝光。恰似如菴連楊坐。一甌春露澹相忘。

自跋。明昌寶玩。羣玉中祕。內府圖書印也。越邸有柳公權紫絲鞵。歐率更海上。楊凝式乞花等帖。然獨推元章華佗爲古今絕筆。宋畫譜。山水以李成爲第一。國朝張太師浩然。王內翰子端。奉旨

品第書畫。謂成筆意繁碎。有畫史氣象。次之荆關范許之下。密公識賞超詣。亦以此論爲公。郭乾暉崔棘公以爲當在太古無上。唐以來諸人。筆虛筆實。皆非其比。故予詩及之。樗軒公自號也。又所居有如菴詩集。號如菴小藁。越王諸子。惟樗軒貧甚。典衣沽酒之句。蓋實錄云。甲午三月二十一日。爲輔之書于聊城至覺寺之寓居。

淮右

淮右城池幾處存。宋州新事不堪論。輔車漫欲通吳會。突騎誰當擣薊門。細水浮花歸別澗。斷雲含雨入孤村。空餘韓偓傷時語。留與纍臣一斷魂。

全金詩五六全用韓致光語。卽於結聯標出。自成一體。遺山詩用前人成語極多。陶杜句尤甚。又未可以此例概之也。

秋夜

九死餘生氣息存。蕭條門巷似荒村。春雷謾說驚坯戶。皎日何曾入覆盆。濟水有情添別淚。吳雲無夢寄歸魂。百年世事兼身事。尊酒何人與細論。

金詩紀事。此詩爲汴京之難言之也。金史文藝傳云。天興二年春。崔立變。羣小請爲立建功德碑。翟奕以尙書省命召翰林直學士王若虛爲文。若虛自分必死。以理論之。奕輩不能奪。乃召太學生劉祁麻革輩赴省。元好問張信之。喻以立碑事。祁等固辭。促迫不已。祁卽爲草定。好問意未愜。乃自爲之以示若虛。乃共刪定數字。詩中意含蓄未露。其痛切言之者。則見於集中外家上梁文。

及郝經辨磨甘靈碑詩。

上梁文略云。初一軍搆亂。羣小歸功。劫太學之名流。文鄭人之逆節。命由威制。佞豈願爲。伊誰受賞。於我嫁名。果吮癰舐痔之自甘。雖竄海投山。其何恨。追韓之騎甫還。射羿之弓隨。穀予北渡之初。獻書中令君。請以一寺觀所費。養天下名士。造謗二三。亦書中枚舉之類也。

金詩紀事。裕之寓書楚材。請養天大名士。書中所枚舉者。耆舊外時輩共四十九人。劉麻之名皆在焉。

陵川集詩有云。勒文誦德召學士。潯南先生副一死。林希更不顧名節。兄爲起草弟親刻。又數罇黃封幾斛米。賣卻家聲都不計。又作詩爲告曹聽翁。且莫獨罪元遺山。

案甘露碑文。必遺山推諉。劉京叔麻信之起草。而爲之刪定者。郝伯常爲遺山門人。但曰。且莫獨罪。可見非遺山一人所爲。而固未嘗不與其事。此一語可據以定讞矣。上梁文之命由威制。佞豈願爲。非自甘吮癰舐痔等語。明係自辨其出於強逼耳。不然。受賞穀弓。遺山於京叔信之。詆之已不遺力。此威制數語。豈反爲二人訟冤乎。金史謂若虛亦共刪定。自不足信。其謂遺山不愜郝等所作。乃自爲之者。亦太過之言也。

李仲華湍流高樹圖

小景風流恰入時。留題紙尾竟何辭。不因脫兔投林了。何處而今更有詩。

自注。癸巳正月之變。逆黨中有欲謀害己者。賴仲華力爲營護得釋。故篇末有及。

記夢

天上材官老不材。從教兀兀走塵埃。夢中望拜通明殿。曾見金書兩字來。

自注。戊子七月二十四日。內鄉往盧氏宿走馬平。夜夢拜天帝像。遂觀法駕導引畫幄。最前負弩三人。中有金書小字題裕之者。夢中不自知其爲予也。

初挈家還讀書山雜詩

天門筆勢到閒閒。相國文章玉筍班。從此晉陽方志上。繫舟山是讀書山。

自注。繫舟先大父讀書之所。閒閒公改爲元子讀書山。又大參楊公叔玉。謨先人墓銘。

姨母隴西君諱日作

寶鏡煌煌照九州。埋藏曾及見諸劉。豐城今日無雷煥。紫氣誰當辨斗牛。

自注。陽曲劉氏家大寶鏡。能照天地四方。以前知休咎。其家埋地中。人不得見也。明昌泰和中。北方兵動。渠父子欲卜之。一日。先以旃幕障中庭。乃扃閉門戶甚嚴。及掘鏡出。光耀爛然。一室盡明。如初日之照鏡中。見北來兵騎。穰穰無數。餘三方都無所覩。因大駭曰。不可不可。卽埋之。姨母時伏牀下。得竊窺焉。故予詩及之。

題張彥寶陵川西溪圖

松林蕭蕭映靈宇。燦石流金不知暑。太平散人江表來。自訝清涼造仙府。不到西溪四十年。溪光機影想依然。當時膝上王文度。五字詩成衆口傳。忽見畫圖疑是夢。而今塵土浣華顛。

自跋本送字。今改作浣字。陵川在太行之巔。蓋天壤閒清涼境界也。江淮太平散人題詩東廟。自謂已造仙府。恨居民不知其樂耳。此縣先君子舊治。宴游西溪。僕以童子侍焉。彥寶出此圖求賦詩。感今懷昔。爲之愴然。故篇中有及。癸丑十一月三日題。

汾亭古意圖

堯氏義黃去未遠。日日息天機。全柱侯袖裏姑汾筆。辦與南華談。眴然廢興知。經幾今昔。淳朴別有一山川。白雲亭上秋風客。不比仙翁甲子年。

自注。元祐以來。郭熙明昌泰和閒。張公佐皆年過八十。而以山水擅名。今雲中杜丈莘老。與張郭年相若。而畫品不下古人。爲侯廣道作汾亭古意橫披。灑然有塵外意。爲題四韻。其後神仙張果生帝堯甲子年。詩家亦傳習用之。故末句有及。

寄楊弟正卿

馬迹車塵漫白頭。蒼生初不待君憂。且從少傅論中隱。儘要元規擁上流。東閣官梅動詩興。洞庭春色入新筵。歸程未覺西庵遠。夜夜清伊繞石樓。

自注。正卿西庵。以名酒甲洛中。嘗賦觀漲詩。有狂瀾竟逐西風落。依舊清伊繞石樓之句。故兼及之。

句

高原水出山河改。戰地風來草木腥。花啼杜宇歸來血。樹掛蒼龍蛻後鱗。白骨又多兵死鬼。青山原

有地行仙。燕南趙北無金土。王後盧前總故人。神功聖德三千牘。大定明昌五十年。
歸田詩話。元遺山在金末。親見國家破殘。詩多感愴。如云云。皆寓悲愴之意。至神功云云。不忘前朝之盛。亦可念也。

句

秋風拂羅裳。秋水照紅妝。舉頭見郎至。低頭采蓮房。

詩藪。元裕之他詩不習杜。獨五絕學少陵。殊可笑。後平湖曲中得四句云云。殊有六朝風致。余爲刪作五言絕。可稱元初第一。然亦太白舉頭見山月語也。

句

千山分晚照。萬籟入秋風。雨入秦川黑。雲開楚岫青。時危頻虎穴。路絕更羊腸。露涼驚夜鶴。風細咽秋蟬。

詩藪。元五言律可摘者。元裕之云云。句格閎整。大曆元和間。

又

七重寶樹圍金界。十色雲華擁畫梁。

升庵集。金國仙人王予可詩。多用雲華字。見中州集。元好問詩。剝裂雲華漬月秋。又寶宮寺云云。雲文也。又石文似雲。亦曰雲華。古三墳書曰。雲赤曇月雲素雲。

又

英威未覺消沈盡。試向春陵望鬱蔥。

歸潛志。予先子翰林。令葉時同郝坊州仲純。賦昆陽懷古詩。諸公多繼作。元裕之云云。
案英威二句。遺山集中失載。

白君舉

君舉。號寓齋。隴川人。登金泰和詞賦進士第。北渡後。卜築於滹陽。與元遺山齊名。稱元白。
案全金詩。作君舉。失其名。元詩癸集。作白賁。字君舉。然君舉與元遺山友善。而中州集白賁下。不云字君舉也。

題靖節圖

咄哉靈運輩。竟坐衣冠辱。誰知五柳家。春雨東臯綠。

酬元遺山

夢裏薰風湛露歌。花開漢苑舊經過。拾遺老去青春暮。司馬歸來白髮多。橫槩賦詩吾豈敢。短衣扣角夜如何。相逢未盡相思話。草色連雲水碧波。

梧溪集。李治序其詩曰。龍韜雷厲於紛拏之頃。玉唾川流於談笑之餘。逢觀其題靖節圖有云云。風節可槩見矣。併錄酬元公八句云云。弟文舉亦登貞祐進士第。馮西巖內翰有科第聯飛光白傳之句。稱擬云。

句

欲搜春草池塘句。藥裏關心夢不成。

遺山集。李定齋有詩寄白。以因風何惜數行書。爲落句。白酬答云云。余平解之云。金粟岡頭有髮僧。遙知默坐對龕燈。書郵但覺浮沉久。詩卷何緣唱和曾。白日放歌須縱酒。清朝有味見無能。相逢定有池塘句。藥裏關心恐未應。

楊弘道

弘道字叔能。號素菴。淄川人。金末。補父廕不就。避亂走襄漢。宋人辟爲唐州司戶。不久棄去。年八十餘卒。有小亨集。

幽懷久不寫一首效韓子此日足可惜贈彥深

幽懷久不寫。鬱紆在中腸。爲君一吐之。慷慨纏悲傷。辭直非謗訐。辭誇非顛狂。流出肺腑中。無意爲文章。兒時捧書卷。十日讀一箱。少年弄柔翰。開口吐鳳凰。正月號悲風。總帷掛萱堂。先君官汝陰。九月飛嚴霜。纍纍二十口。丹旆迴南方。余年十一。正月喪母。九月喪父。哀哉。有叔不讀書。但知禽色荒。呼盧畜鷹犬。置我遊戲場。珠璧不受污。拂拭增耿光。郁郁弭南溪。絳帳懸郡庠。組纁合尺度。道業傳書生。握衣無幾何。叉手一韻成。南溪羅酒饌。列坐子姪行。青綾覆我身。醉臥家人傍。雲閒陸士龍。秋試獨騰驤。南溪先生之弟庭賢。名天瑞。嘗爲益都府經義都魁。明年桂枝春。兄弟雙翺翔。半途失明師。欲濟無舟航。故人何元理。名中庸。白日照忠誠。勸我從延賞。然後學明經。三年走遼碣。險阻實備嘗。鯨翻地軸傾。狼狽歸故鄉。鐵馬逐人來。蹴踏般溪冰。朔風振屋瓦。巷陌屍縱橫。鳴鏑射迴雁。冰消溪水清。親朋半凋落。殘月依長庚。婉婉兩

稚子面黥刀劍瘡。田園幸無恙。出郭依農桑。鋤耰干戈裏。三稔無積倉。一官調神京。妻子不得將。風塵復
瀕洞。齊魯多豺狼。庶歌無家別。揮淚哭途窮。李侯藝九畹。早播芝蘭香。奇字來無趾。側耳屬垣牆。粧鉏剪
翠羽。隨珥舍明璫。綴緝不憚煩。既成衣無裳。一朝忽變化。頭角高軒昂。男兒可如此。陋質傾高風。庶幾困
而學。否極承變通。師說無賢鄙。事業有專工。苟欲爲貿易。入市審鞠躬。恩袍映野草。道與人俱東。負笈遠
方來。歧路無修長。拂衣叩君門。樹屏遮長廊。溫言當八珍。令色充壺觴。遠來誠飢渴。蔓說辭乞漿。秉心在
黑白。掉舌談青黃。臉紅眼尾斜。引手摩匡床。自惟珉珠石。不中珪與璋。君家杵臼閒。何事舂糝糠。乃知畜
奇貨。韞匱方深藏。仕途得捷徑。改轍歸大商。紛紛輕薄子。仁義久已亡。彼非仁義器。仁義何可當。夫子青
雲姿。疑似令人驚。在我固自存。爲君惜清名。冰雪正凝沍。指屈迴春陽。皓鶴毛骨輕。雲靜天蒼蒼。小亨集

甘羅廟

峻坂欲盡長坡迎。後山未斷前山橫。甘羅廟下四山合。太始鬼物成天成。道傍一峰立突兀。瘦木上下攢
虎薨。此郎片紙附遷史。勳業不足煩題評。尙憐稚齒據高位。因使細人輕晚成。山間一笑爲絕倒。多少豎
子談功名。

遺山集。叔能與余會於京師。遂見禮部閑閑公及楊吏部。二公見其幽懷久不寫。及甘羅廟詩。嘖
嘖稱歎不已。

空村謠

淒風羊角轉。曠野埃塵腥。膏血夜爲火。望際光青燐。頽垣俯積灰。破屋仰見星。蓬蒿塞前路。瓦礫堆中庭。

殺戮餘稚老。疲羸行欲傾。居空村間汝。何以供朝昏。氣息僅相屬。致詞難遽言。往時百餘家。今日數人存。頃筐長鑊隨。日出樹木有皮草。有根春磨沃。飢火水土仍。君恩但恨誅求盡。地底官吏有時還到門。

中州集。張介嘗贈詩人楊叔能末章云。我貧自救如沃焦。君來過我亦何聊。爲君欲寫貧士歎。才思殊減荒村謠。楊初以荒村謠得名。故云。

困學齋雜錄。任城翟慶之云。在東平時。口南王子澗問楊叔能之詩於止軒先生。先生曰。叔能早年詩名藉甚。初入京時。如空村謠。甘羅廟諸作。楊趙諸公極口推許。及自關中還。所作澹不可讀。

李俊民

俊民字用章。號鶴鳴老人。澤州人。金承安中。舉進士第一。應奉翰林文字。入元。召見。乞還山。卒。賜諡莊靖先生。

寄趙庭幹

試將小錄問同年。風采依稀墜目前。三十一人今鬼錄。與君雖在各華顛。君還携幼去幽燕。我向荒山學種田。千里暮鴻行斷處。碧雲容易作愁天。

全金詩。先生嘗自書登科記後曰。余閱承安庚申登科記。三十三人。革命後。獨與高平趙楠庭幹二人在。一日邂逅于鄉邑。哽咽道舊。壬寅五月。庭幹復挈家之燕京。感慨忍淚書五十六字寄之。云云。是時蔡州失守已十年矣。故云。

贈張仲一

丹鳳啣書下九霄。山城和氣動民謠。久潛龍虎聲相應。未戮鯨鯢氣尙驕。萬里江山歸一統。百年人事見清朝。天教老眼觀新化。白髮那堪不肯饒。

中堂事記。追謚前經義狀元李俊民爲莊靜先生。先生字用章。懷澤人。明昌閒進士。道號鶴鳴老人。在河南時。於隱士荆先生。傳皇極數學。己未閒。聖上在潛。令張仲一就問禎祥。優禮有加。至是先生已歿。其言盡徵。故有是命。以旌其德。學云。初張辭去。繼請以蒲輪來起公。先生笑不答。贈詩以見方來。其辭云云。明年正月。先生卒于家。

段克己

克己字復之。河東人。金末以進士貢。北渡後。與弟成己。避地龍門山中。廿餘年卒。人稱遯菴先生。虞集河東段氏世德碑。克己成己之幼也。禮部尙書趙公秉文識之。目之曰二妙。

房祺河汾諸老詩集序。近代詩人。遺山元生爲之冠。與元老或詩或文數相贈遺者。遯菴菊軒有稷亭二段之目。

癸卯中秋之夕與諸君會飲山中感時懷舊情見乎辭

少年著意仿中秋。手卷珠簾上玉鉤。明月欲上海波闊。瑞光萬丈東南浮。樓高一望八千里。翠色一點認瀛洲。桂華徘徊初泛灩。冷溢杯盤河漢流。一時賓客盡豪逸。擁鼻不作商聲謳。無何陵谷忽遷變。殺氣黯慘纏九州。生民冤血流未盡。白骨堆積如山丘。比來幾見中秋月。悲風鬼哭聲啾啾。遺黎縱復脫刀几。憂思離散誰與鳩。回思少年事。刺促生百憂。良辰不可再。尊酒空相對。明月恨更多。故使浮雲礙。照見古人

多少愁。懶與今人照興廢。今人古人俱可憐。百年忽忽如流川。三軍鞍馬閒未得。鏡中不覺摧朱顏。我欲排雲叫閭闔。再拜玉皇香案前。不求羽化爲飛仙。不願雙持將相權。願天早賜太平福。年年人月長團圓。吳澄序其詩如冤血流未盡。白骨如山邱。四海疲攻戰。何當洗甲兵。蓋陶之遠。杜之憂。兼而有之。

元詩紀事卷三十一

趙復

復字仁甫，德安人。太宗時從姚樞北行，世祖在潛邸嘗召見，不仕終。牧菴集。歲乙未，王師徇地漢上，先公得故江漢先生見公戎服而髯，不以華人士子遇之。至帳中，見陳琴書，愕然曰：「公亦知事此耶？」公爲之一莞。以九族殫殘，不欲北，公止其宿。既覺，月色爛然，惟寢衣留故所。公遽鞍馬，周號於積尸間，行及水裔，見已被髮脫履，仰天而祝，蓋蹈水未入也。公曰：「徒死無義，可保君而北，無他也。」至燕，名益大著。

案元文類：趙復楊紫陽文集序，自稱前鄉貢進士。

寄皇甫庭

寄語江南皇甫庭，此行無慮隔平生。眼前漫有千行淚，水自東流月自明。

自遣

醉乘鸞馭到仙家，彩筆雲箋賦落霞。老去空山秋寂寞，自鋤明月種梅花。

困學齋雜錄：江漢先生趙復武昌之役，始初渡江時寄皇甫庭云云，又自遣云云，人甚稱之。案次首首句，雜錄又作乘雲曾到玉皇家。

汪元量

元量字大有號水雲錢唐人有水雲集湖山類稿

題賜硯

斧柯片石伴幽閑堪與遺民共號頑試憶當年承賜事墨痕如淚盡成斑

改蟲齋筆疏水雲以善琴供奉國亡隨三宮入燕久之請爲黃冠南歸藏有賜硯背刻天錫永寶四字分書右刻水雲二篆字左刻楷書絕句云云其北征古詩云北師有嚴程挽我投燕京挾此萬卷書明發萬里行則硯必並載入燕以詩書授瀛國公皆此硯矣

唐珏

珏字玉潛號菊山會稽人

冬青行

馬箠問髡行南面欲起語野麕尙屯東何物敢盜取餘花拾飄蕩白日哀后土六合忽怪事蛻龍挂茅宇
老天鑒區區千載護風雨

冬青花不可折南風吹涼積香雪遙遙翠蓋萬年枝上有鳳巢下龍穴君不見犬之年羊之月霹靂一聲天地裂

輟耕錄歲戊寅有總江南浮屠者楊璉真伽怙恩橫肆勢燄燦人不可具狀十二月十有二日帥徒役頓蕭山發趙氏諸陵寢至斷殘支體櫻珠襦玉柙焚其齒棄骨草莽閒時珏年三十二歲聞之痛憤亟貨其家具得白金百星許執券行貸得白金又百星許乃具酒醪市羊豕邀里中少年

若干輩狎坐轟飲酒且酣。少年起請曰：君儒者，若是將何爲焉？唐慘然具以告。願收遺骸共瘞之。衆謝曰：諾。中一少年曰：發丘中郎將，耽耽餓虎，事露奈何？唐曰：余固籌矣。今四郊多暴骨，取竄以易，誰復知之？乃斲文本爲匱，複黃絹爲囊，各署其表曰：某陵某陵，分委而散，遣之。藎地以藏，爲文而告。詰旦，事訖來集，出白金羨餘以酬，戒勿泄。越七日，總浮屠下令哀陵骨，雜置牛馬枯骼中，築一塔壓之，名曰鎮南。杭民悲切，不忍仰視，了不知陵骨之猶存也。禍淫不爽，流傳京師。上達四聰，天怒赫赫，飛風雷號令，掉首禍者北焉。山陰人始有籍籍傳唐氏者，由是唐之義風震動吳越。聲生勢長，若胥江掀八月之濤，名雖高，困固自若。明年己卯，後上元兩日，唐出觀燈歸，忽坐隕，息奄奄。若將絕者，良久始蘇曰：吾見黃衣吏持文書來告曰：王召君導之往觀闕巍峨，宮宇靚麗，殆非人世閒。有一冕旒坐殿上，數黃衣貴人，逡巡降揖曰：藉君掩骸，其有以報唐乃。陞謁造王前，王謂曰：汝受命竄且貧，兼無妻若子，今忠義勳天帝，命賜汝伉儷。子三人，田三頃，拜謝降出，遂覺。罔不知其何也。踰時，越有治中袁俊齋至，始下車爲子求師，有以唐薦者。一見置賓館。一日問曰：吾渡江間，有唐氏瘞宋諸陵骨，子豈其宗耶？左右指君曰：此是已。袁大駭，拱手曰：君此舉，豫讓不能抗也。曳之坐，北面而納拜焉。禮敬特加，情款益篤。叩知家徒四壁，惻然嗟矜，語左右曰：唐先生家甚寒，吾當料理，使有妻有田以給。左右逢迎，爰諏爰度，不數月，二事俱愜。聘婦偶故國之公女，負郭食故國之公田，所費一一自袁出人。固奇唐之節，而又奇唐之遇。兩高之曰：二公眞義士，爾後獲三丈夫子，鼎立頡頏。凡夢中神所許，稽其數無一不合。咄咄怪事，乃如此。唐葬骨後，又于宋常朝。

殿掘冬青樹植于所函土堆上有詩云云。

林景熙

景熙字德陽號霽山温州平陽人宋咸淳辛未上舍釋褐歷禮部架閣轉從政郎宋亡庚戌卒于家。

夢中作

珠亡忽震蛟龍睡。軒弊寧忘犬馬情。親拾寒瓊出幽草。四山風雨鬼神驚。
一坏自築珠丘土。雙匣親傳竺國經。獨有春風知此意。年年杜宇哭冬青。
昭陵玉匣走天涯。金粟堆寒起暮鴉。水到蘭亭轉嗚咽。不知真帖落誰家。
珠冕玉雁又成埃。斑竹臨江首重回。猶憶年時寒食節。天家一騎奉香來。

遂昌雜錄當發陵時林景熙故爲丐者背竹籬挾竹夾遇物夾投籬中潛鑄金牌繫腰間賄西僧求得高孝兩陵骨貯兩函葬東嘉故夢中作詩有雙匣親傳竺國經之句。

徐沁金華游錄注云楊璉真伽發宋陵事諸書紀載歲月不同按元史世祖至元二十一年九月丙申以江南總攝楊璉真伽發宋陵冢所收金銀寶器修天衣寺又按宋文憲書穆陵遺帑事及丘文莊續資治通鑑皆云至元二十一年甲申僧嗣占妙高上言欲毀宋會稽諸陵江南總統楊璉真伽與丞相桑哥表裏爲奸明年乙酉正月奏請如三僧言蓋其謀始于甲申而成于乙酉與周草窗密癸辛雜識年月正同是時會稽唐玉潛珏永嘉林景熙德陽鄭宗仁樸翁與臯羽咸主王

監簿家。協謀收掩陵骨。故別玉潛作冬青樹引。以紀其事。而景熙答臯羽詩。亦有夜夢繞句越。落日冬青枝。豈非諸公共事之明證乎。彭山季本以臯羽引中有白衣種年星在尾之句。謂與羅雲溪有開唐義士傳。歲次戊寅之說相合。善乎彭瑋解之曰。星在尾者。寅月也。此卽乙酉正月耳。宋詩紀事云。六陵遺骨。癸辛雜識輟耕錄俱云。葬蘭亭。若云高孝兩陵。林檎葬東嘉。則詩中所云。水到蘭亭轉嗚咽。不知真帖落誰家。又何謂耶。當以周草窗陶南村所紀爲是。而景熙則共事之人也。夢中詩係唐玉潛作。云景熙作者非。

案夢中詩。明言雙匣。自係指高孝兩骨。當時棄骨草莽。玉潛託諸少年。於倉皇急遽中。只求收得遺骸。豈能於諸陵之骨。全無遺漏。更何能辨別分明。德陽自僞爲丐者。又潛用金牌賄求。故能得二陵之骨。其餘亦不能盡得。可知其事之難。若疑水到蘭亭句爲無謂。則林所收者。自瘞東嘉。唐所收者。自瘞蘭亭。事後必相聞知。夢中作詩。先及高孝二陵骨。次及諸陵骨。不相妨也。若夢中詩爲唐作。則雙匣又何謂乎。鄭先於陶說較可信。南宋書亦詳林事。此詩自當屬林。

讀文山集

黑風夜撼天柱折。萬里飛塵九冥竭。誰欲扶之兩腕絕。英淚浪浪滿襟血。龍庭戈鋌爛如雪。孤臣生死早已決。綱常萬古懸日月。百年身世輕一髮。苦寒尙握蘇武節。垂盡猶存杲卿舌。膝不可下頭可截。哀鴻上訴天欲裂。一編千載虹光發。書生倚劍歌激烈。萬壑松聲助幽咽。世閒淚灑兒女別。大丈夫心一寸鐵。

詩藪謝臯羽歌行。雖奇選精工。備極人力。大概李長吉錦囊中物耳。林德陽七言古不多見。而合

處勁逸雄邁。視臯羽不曾過之。如讀文山集云云。可謂元初絕唱。

謝翱

翱字臯羽。福建長溪人。徙浦城。文天祥開府延平。署咨議參軍。有晞髮集。

招魂詞

魂來兮何極。魂去兮江水黑。化為朱鳥兮。其味焉食。

任松鄉謝處士傳云。臯羽常布衣杖策。參人軍事。晚登子陵西臺。以竹如意擊石。歌招魂之詞云。歌闋。竹石俱碎。失聲哭。何其情之悲也。

懷鄧牧心

謝豹花開桑葉齊。戴勝芊生草藥肥。九鎖山人歸未歸。

鄧牧謝臯羽傳略。臯父性耿介。不以貧累人。所居產薪若炭。率秋暮載至杭易米。卒歲少裕。則資遊江海。訪前代故實。著宋史。補詩人無傳者三十餘篇。傳近世隱逸數篇。歲甲午。與杭人鄧牧相遇。會稽。結為方外友。牧因為言杭大都會。文士輩出。余知若干人。盍往見之。旬日別去。逮牧歸杭。君已挈家錢唐江上。問所從遊。皆前所聞者。其信好學也。乙未秋。牧薄遊山水間。君病篤。望牧不至。懷以詩云云。蓋絕筆也。

鄭思肖

思肖字憶翁。號所南。福州連江人。太學上舍。應博學宏詞科。宋亡。客吳下。寄食報國寺以終。

遺民錄所南初名某。宋亡，乃改名思肖。即思趙憶翁與所南皆寓意也。坐臥不北向，扁其堂曰本穴世界。以本之十置下文，則大宋也。精墨蘭，自更祚後，爲蘭不畫土根，無所憑藉。或問其故，則云：地爲人奪去，汝猶不知耶。

句

此世但除君父外，不曾別受一人恩。禦寒不藉水爲命，去國自同金鑄心。

輟耕錄：歲時伏臘，望南野而再拜，乃返。人莫識焉。工畫墨蘭，不妄與人。邑宰求之不得，聞先生有田三十畝，因脅以賦役，取先生怒曰：頭可斫，蘭不可得。過齊子芳之書塾，云云。寒菊云云。其忠肝義膽，於此可見。

寧可枝頭抱香死，不曾吹落北風中。寒菊 姑蘇志卓行傳

純是君子，絕無小人。深山之中，以天爲春。畫蘭 南宋書圖繪寶鑑

一國之香，一國之殤。懷彼懷王，於楚有光。題畫蘭 寓意編

劉應鳳

應鳳，字堯舉，號書臺，安福人。中宋咸淳丁卯鄉試，廷對授僉判。宋亡，隱去。

句

天留仲子繼孤竹，誰向西山飯伯夷。

吾汶稿堯舉聞文山再執北行，有句云云。問其下句曰：伯夷久不死，必有飯之者矣。

周密

密字公謹。號草窗。濟南人。流寓吳興。居弁山。自號弁陽嘯翁。淳祐中爲義烏令。

韓氏慶樂園

舊事淒涼尙可尋。斷碑閑臥草深深。凌風閣下槎牙樹。當日人疑是水沈。

齊東野語云。四朝聞見錄載。蜀帥獻韓平原沈香。高五丈。立之南園。凌風閣下。今慶樂園。卽南園也。所謂香山。尙巍然立于閣前。乃枯枿耳。初非沈香也。

爲楊大芳悼亡

帳中蜨化眞成夢。鏡裏鸞孤枉斷腸。吹徹玉簫人不見。世閒難覓返魂香。

癸辛雜識。大芳娶謝氏。謝亡未殮。有蜨大如扇。其色紫褐。翩翩自帳中徘徊。飛集窗戶間。終日乃去。

錢選

選字舜舉。吳興人。宋景定閒。鄉貢進士。有習嬾齋稿。

六研齋筆記。至元閒。吳興有八駿之號。以子昂爲稱首。俄子昂以薦入朝。諸公皆相附。得官。錢選舉獨齟齬不合。流連詩畫以老。

題浮玉山居圖

瞻彼南山岑。白雲何翩翩。下有幽棲人。嘯歌樂徂年。叢石映清泚。嘉木澹芳妍。日月無終極。陵谷從變遷。

神襟軼寥廓。興寄揮五絃。塵影一以絕。招隱奚足言。

珊瑚網。吳興公蚤歲得畫法于舜舉。舜舉多寫人物花鳥。故所圖山水。當世傳罕。此卷蓋其自寫。山居景趣既高。筆墨精妙。尤爲合作。詩亦雅麗。非近人語。僕以戊子秋七月。得于書肆。如獲古圖。史云。因次韻識歲月于后。秋風動巖樹。歸鳥何其翩。我思巖中人。可以樂忘年。夫君乃詞客。畫手故作妍。吳興圖畫藪。詎隨時好遷。上巖雲積雪。下巖水鳴弦。展卷纔尺許。坐對兩無言。山澤臞者。張雨題于開元靜舍之浴鵲灣。

山居圖卷

山居惟愛靜。白日掩柴門。寡合人多忌。無求道自尊。鸚鵡俱有意。蘭艾不同根。安得蒙莊叟。相逢與細論。珊瑚網。此余年少時詩。近留湖濱寫山居圖。追懷舊吟。書於卷末。揚子雲悔少作隱居。乃余素志。何悔之有。吳興錢選。

自題桃花源圖

寡合人多忌。無求道自尊。鸚鵡俱有志。蘭艾不同根。

擇石齋詩集自注。錢舜舉桃花源圖。自題句云云。蓋吳興八俊。趙王孫被薦入朝。諸公皆相附取。官爵獨舜舉齟齬不合。以終其身。

是日汎舟歸湖濱。至夜雪大作。旦起賦五言古體一首。

夜來天雨雪。萬木同一變。飢鴉覺余起。觀覽立須儼。遙山瓊成積。平田玉如碾。老夫醒眼看。樹樹何其燦。

自跋至元二十九年冬余假弁山佑聖宮一室以避喧值雪作不已但閉門擁爐飲酒賦詩而已聊記數篇附見於此卷書試馮應科筆亦佳選重題

羅椅

椅字子遠號礪谷廬陵人宋寶祐四年登第

癸辛雜識少年以詩名高自標致常以詩投後村有華裾客子袖文過之句知其爲巨富家子也壯年留意功名借徑勇爵捐金結客馳名江湖時方尙程朱之學於是盡棄舊習而學焉尊饒雙峯爲師

瞌睡詩

瞌睡從何來譬若風雨至曲几不得憑虛櫺那暇寄鸞人眉強撐伸手扇已墜徑游華胥國欲見混沌帝胸胸自成腔兀兀更有味息疎疑暫醒氣窒還扶醉兒童欲惱翁搖膝問某字吻間僅一答言下已復寐雖然拍手笑欲噴噴不遂何曾參佛祖先會點頭意何曾逢麴車流涎已沾袂不省較短長誰能問興替陰天百怪舞開口輒差異三百六十日何以長瞌睡

東南紀聞澗谷羅椅子遠頃由乙科登顯仕廬陵大儒也江南革命後歸隱故鄉嘗作瞌睡詩曲盡其妙末意尤有味云云

劉辰翁

辰翁字會孟號須溪廬陵人宋景定廷試對策忤賈似道置丙第以親老請濂溪書院山長大德

初卒。

勤有堂隨錄。劉辰翁其人好怪。父喪七年不除。

月詩

覽裳聲裏一擲。如今是第幾輪。赤壁黃樓都在。古今多少愁人。

癸辛雜識。劉會孟嘗作月詩六言云云。爲人所訐。幾殆。

蘇李泣別圖

事已矣。泣何爲。蘇武節。李陵詩。噫。

輟耕錄。痛快嚴峻。抑揚感傷。

熊禾一作鉢。

禾字位辛。號勿軒。又曰退齋。建陽人。宋度宗咸淳十年登第。授寧武州司戶參軍。入元。隱居不仕。

贈筆生

東坡詠鼠鬚。山谷歌猩猩。微物豈足道。斯文頗關情。片言鈇鉞凜。一字華袞榮。化工運方寸。亦自芒中生。寄與管城子。所託甚非輕。

熊勿軒集原評。有鈇鉞華袞之任。自不得不託管城子。發揮予奪。

贈琢硯

我聞銅雀瓦。只覆嬌屋姝。又聞端溪石。亦近貪泉夫。胡爲得貴重。置我几案隅。尙恐習氣膩。解使簡冊污。

我有一寸鐵，秉心與之俱。永矢磨不磷，千載明區區。彼哉瓦與石，飄擲付太虛。熊勿軒集原評：先生自矢不磷，不與瓦石同碎，居然節義。

梁棟

棟字隆吉，其先湘州人。後遷居鎮江，登咸淳四年進士，官錢塘仁和尉。宋亡，弟柱入茅山，從老氏學。棟往依焉。乙巳無疾卒。有梁隆吉詩鈔。

四禽言

脫卻布袴，貧家能有幾尺布。寒機翦盡無可裁，可人不來廉叔度。脫卻布袴，不如歸去。錦官宮殿迷烟樹，天津橋上兩三聲。叫破中原無住處，不如歸去。提葫蘆，今年酒賤頻頻沽。衆人皆醉我亦醉，哀哉誰問醒三閭。提葫蘆，行不得也哥哥。湖南湖北秋水多，九疑山前叫虞舜。奈此乾坤無路何，行不得也哥哥。

山房隨筆云：寓意甚遠，諸作不及。

登大茅峯

杖藜絕頂窮追尋，青山世路爭嶮巖。碧雲遮斷天外眼，春風吹老人閒心。大君上天寶劍化，小龍入海明珠沈。無人更守元帝鼎，有客欲問秦皇金。巔崖誰念受辛苦，古洞未易潛幽深。神光不破幽暗惱，山鬼空作離騷吟。我來俯仰一慷慨，山川良昔人民今。安得長松撐日月，華陽世界收層陰。長嘯一聲下山去，草木爲我留清音。至正金陵新志。

至正直記遺編。宋末士人梁隆吉。有詩名。以其弟中砥柱爲黃冠師。三茅山嘗往還。一日登大茅峯。題壁賦長句。有黃冠訴于句容縣。以爲訕謗朝廷。行省聞之。都省收梁于獄。禮部免其罪。放還。高晞遠。

晞遠。字照庵。通州人。咸淳德祐間。嘗通判平江府。入元未仕。

句

豪氣欲吞天下士。冷官初到岳陽城。

輟耕錄。携李顧淵白。恃才傲物。嘗入京。獻燕都賦。翰長元公復初不喜曰。今天朝四海一統。燕蓋昔時戰國稱。何燕之稱。慚恨而歸。晚年始得領教岳陽。高照菴先生以詩送之云云。切中其實。

牟巖

巖字獻之。其先蜀人。徙湖州。登宋進士第。官大理少卿。入元不仕。有陵陽集。

題水村圖

山色濃還淡。孤村水遠之。俗塵飛不到。野老住偏宜。倚岸疎疎柳。茅簷短短籬。小舟欹側過。便是少陵詩。
詳錢仲鼎下。

句

翻手可覆手。曲身成直身。

癸辛雜識。牟巖之嘗有謝人送炭一聯云云。

李珣

珣字元暉吉水人宋末爲攢宮屬官大德間年八十餘自號廬陵民人稱鶴田先生

題汪水雲湖山類稿

天地事如許英雄鬢已斑淚添東海水愁壓北邙山

湖山類稿附錄案元詩癸集同詩藪引後二句作淚傾東海盡愁壓北邙低與首二句不同韻自非

題郭主簿模摩詰本輞川圖卷

園圖親畫早流傳已是人間五百年凝碧池頭秋句在當時幾負此林泉

珊瑚網王右丞輞川圖與余昔在杭茗故家見者一樣前有集賢院御書印內合同印題摩詰本後書河北郭忠恕奉命復本則知爲江南李後主時臨本也虎賁中郎更無辨處郭亦妙筆矣右丞唐開元天寶朝士名維字摩詰工詩畫輞川其所居自寫爲圖精密細潤在小李將軍著色山水右今如魯寶玉大弓絕無僅有吾昂霄珍之重之攜上天京名公相一見賞識鑒定增十倍價大德戊戌冬至廬陵民八十叟李珣元暉跋

句

此水自當兵十萬昔人曾有客三千

梅磻詩話江陰乃春申君舊封君山浮遠堂瞰江對淮爲一郡佳境李鶴田一聯云云人多稱誦

魏新之

新之字德夫。桐廬人。宋咸淳七年登進士第。除教授。

春日田園雜興

農圃誰言與世違。韶華正恐屬柴扉。天機花外聞幽訝。野色牛邊睨落暉。膏雨平分秧水白。光風小聚藥苗肥。行歌隱隱前村暖。忽省深山有蕨薇。

月泉吟社第六名。起有頓挫。二聯善琢句。善鍊字。末意尤永。

又

野景入時務。東風劇滿鋤。笛聲牛出後。酒味燕來初。穀種天心在。桑枝帝澤餘。紅塵幾飛鞚。肯信有農書。月泉吟社第五十三名。起句快便。結意深遠。兩聯亦高。不得已屈置諸此。

何鳴鳳

鳴鳳字逢原。分水人。宋末官教授。

前題

東風轉囑又東皋。久賦將蕪力未薅。古木陰深巢燕弱。荒陂水淺怒蛙號。兒癡方擬半栽秫。身隱尙嫌全種桃。何許巖微君欲采。饑眠堪羨華山高。

又

月泉吟社第十四名。語健意深。雖首句疊字。微欠推敲。後聯與末聯過人矣。

星明天駟兆興農。稼圃犁鋤處處同。播穀競趨新禹甸。條桑猶記舊函風。草綠疆畎縱橫綠。花隔藩籬深淺紅。自笑儉生勞種植。西山輸與采薇翁。

月泉吟社第四十五名。雋味寓於細律中。微作者不及此。

高鎔

鎔字聲玉。三山人。宋末官婺州教授。

前題

已學淵明早賦歸。東風吹醒夢中非。鶯聲睨睨來談舊。牛背安閒勝策肥。時聽樵歌時牧笛。閒披道箴閒農衣。篇詩那可形容盡。何似忘言對夕暉。

月泉吟社第二十二名。五六作意就雜字上形容。略似爲氣格之累。第二句穎拔。末用淵明意尤佳。

陳傑

隱居通議。近世豐城陳壽父傑。號自堂。江西名詩人。

案宋詩紀事作陳杰。字壽夫。分寧人。宋咸淳十年進士。制置司屬官。有自堂集。而七修類稿以爲元人。必入元尙存。

春風

著柳成新綠。吹桃作故紅。衰顏與華髮。不敢怨東風。

七修類稿。唐崔道融題班婕妤曰。寵極辭同輦。恩深棄後宮。自題秋扇後。不敢怨東風。曹鄴題庭草曰。庭草根自淺。造化無遺功。低徊一寸心。不敢怨春風。元陳自堂題春風云云句。意相似。

林月香

句

楚人一縷垂亡命。盡向秦庭哭得回。六國既亡秦一統。如何卻道帝秦非。那知老子癡頑福。曾見官家歷五朝。可憐幾幅通神畫。只入桓元夾袋中。

吳文正公集。昔予弱冠。與程鉅夫同學臨汝書院。時月香林君。以鄉先達。日坐前廡位。予二人朝夕出入。以諸生禮。詣位趨揖。然後退。不十年。事大異。鉅夫爲達官。位於朝。予爲農夫。耕于野。林君亦歸隱于市。又數年。君暫出爲縣大夫客。始相見。予既壯。君亦老矣。一日。君以詠史一編示予。君謂觀者必笑其癡。余讀至申包胥云云。魯仲連云云。馮道云云。顧愷之云云。曰。誰謂君癡。誰謂君癡。

莫崙

崙字子山。號兩山。江都人。咸淳四年進士。入元不仕。

書壁

又得浮生半日閒。忽聞春盡強登山。因過竹院逢僧話。終日昏昏醉夢閒。

滿淵靜語。莫子山暇日山行過一寺。頗有泉石之勝。因誦唐人絕句以快喜之云。終日昏昏醉夢

閒云云及叩其主僧庸僧也與語略不相入屢欲舍去僧意以爲檀施苛留作午供鬱鬱久之因索筆以前語錯綜其詞書于壁云云

錢仲鼎

仲鼎字德鈞通州人徙居吳宋末以詩經發解入元不仕

水邨歌

舟搖搖兮風嫋嫋兮波鱗鱗兮鷗翩翩兮扣舷漁歌兮孰知其他兮

珊瑚木難水村圖大德六年十一月望日爲錢德鈞作子昂後一月德鈞持此圖見示則已裝成軸矣一時信手塗抹乃過辱珍重如此極令人慙愧子昂題鄧椿詩云云又六言一首云云梅塘吳延壽云云顏天祥云云男資深原父云云林宏云云干文傳云云松陵葉齊賢云云吳郡陸桂云云哲理野臺云云陸祖宣錄秦風蒹葭三章跋云閱水村圖其景物蕭瑟煙波浩蕩有人乘扁舟往來其閒此圖此意殆與此詩若相符者故書於其後云延祐己未九月從大詩云云聚山黃肖翁云云東南仲云云羅志仁云云陵陽牟巖云云漢東孟淳云云

孫嵩

嵩字元京休寧人宋末入太學有艮山集

冬夜雜興五首

今晨霜露肅愛此羣山秋芳菲者何樹乃是丹楓稠草花無名字正類黃菊幽一筇步澗阿聊復舒我眸

雁聲一何高。渺渺關山愁。林閒有橡栗。歲晚行可收。

鐘聲煙外寺。報我明朝霜。籬落暝雀驚。原野昏鴉翔。杖策歸茅茨。偶一歌慨慷。千載有我輩。感念行斜陽。
齋中乃無紙。柿葉平籬根。稍取書點畫。帶此朝露痕。識字有何補。隨爾憂患繁。姓名縱不記。適有古意存。

惜哉結繩後。事始於乾坤。先生晚始悟。無術鳩田園。
秋晚種薺麥。覆塊青茸茸。茲物乃畏溼。溝作棋道通。江南地方瘠。百穀勞農工。杭稔蓄塋土。薺麥藏溝中。
從之防蹂嚙。早晚觀麥叢。須縱牛羊食。勿信東坡翁。吾詩乃農譜。亦著江南風。

新安文獻志。方虛谷曰。元京詩有近陶者。有似二謝者。有似元次山孟東野者。清勁枯淡。整嚴幽遠。五言古體。如秋懷感興。及冬初雜興諸作。近世詩人所不能爲。不謂吾州近有此人。持是以見朱文公。可無愧哉。

孫巖

巖字次皋。休寧人。嵩之弟。有爽山集。

方回序云。長孫君嵩詩。清勁苦淡。如其爲人。小孫君巖。予未之識。忽袖詩訪於武林。亦清勁苦淡。如其兄。

兵後續溪道中

古道緣流水。寒郊帶斷煙。稀疏鴉種麥。羞澀女耕田。人事休兵後。秋懷落木前。小蘇遺翰墨。今古一山川。
新安文獻志。方虛谷云。休兵落木之句。非近人晚進所能到。

九日呈戴兄

一別三十載。而今近講堂。蕭條同甲子。強健又重陽。萸菊數杯酒。煙雲千仞岡。偶然爲此夢。寧復次公狂。
新安文獻志。方虛谷云。類陳后山。

溪上

溪翁生計獨熙然。新買南鄰艤艇船。日載鷓鴣三十尾。魚爲租入水爲田。
新安文獻志。方虛谷云。此絕類陳后山。不具隻眼者不識也。

吳龍翰

龍翰字式賢。歙人。宋咸淳鄉貢。至元丙子。鄉校請充教授。尋棄去。有古梅吟稿。

樂府

妾心江岸石。千古無變更。郎心江上水。倏忽風波生。
製衣寄夫婿。妾有冰雪段。中間連理枝。不忍翦教斷。

方虛谷云。式賢詩有驚人語。如樂府諸篇。尤予所深喜者。

草堂

蒼煙落日草堂深。淺淺寒侵白玉簪。等客不來童睡去。自搖脩竹和新吟。
新安文獻志。方虛谷云。式賢嗜奇學博。如此絕尤予所深喜者。

曹良史

良史字之才。號梅南。錢塘人。咸淳故老。與周草窗游。有詩詞三摘。
俞宗大序云。曹君故宮詞十九首。與夫拜景靈。游湖曲。登北城。悼今思古。所謂哀而不傷。怨而不
怒。忠厚而悱惻者也。

句

雲生畫佛壁。葉落病僧房。閑來閉門處。認得讀書聲。牆園敗屋知無主。風響荒林似有人。深樹月
昏神火出。斷煙雪霽獵人回。

方虛谷跋曹君良史錢唐人衣冠佳盛。湖傲山酣。則有咸淳詩摘。兵火變遷。江淮奔走。則有梅南
詩摘。句如云云。展轉征旗。戰鼓十年閒。筆力益老矣。

陳普

普字尚德。號懼齋。寧德人。居石堂山下。有石堂先生遺集。

元詩選。普生鷓鴣百數。繞屋七歲時。坐田閒。有白鷺飛止。有士人戲語之曰。汝能賦一詩乎。應聲
曰。我在這邊坐。爾在那裡歇。青天無片雲。飛下數點雪。士人奇之。

顏杲卿

驪山歌笑入青雲。曾識常山有戰塵。忠骨已漸餘髮在。因人得見夢中身。

湘煙錄此詩。蓋指杲卿見夢明皇妻疑髮動之事。

邵武泰寧途閒一路海棠

萬騎接連出襄國。諸姨撩亂上驪山。道人不識紅妝面。何事扶筇過此山。

石堂集自注。趙石虎都襄國。作萬花騎。出入隨從。唐明皇同貴妃。每年十月幸繡嶺。諸姨別色隨從。望之如錦。

元詩紀事卷三十二

趙永嘉

寶蓋山詩刻

青山吐出白龍開。我是地仙趙秀才。嘉善有魚餐得去。永嘉有虎喚能來。

福建通志寶蓋山詩刻趙永嘉或曰宋時人或曰元時人虎岫僧有嘉善者與永嘉相好嘗網魚作食永嘉刻詩石上云云

金方所

廢家子孫詩

與廢從來固有之。爾家忒煞欠扶持。諸墳掘見黃泉骨。兩觀番成白地皮。宅眷皆爲撐目兔。舍人總作縮頭龜。強奴猾幹欺凌主。說與人家子弟知。

輟耕錄秀之斜塘有故宋大姓居焉家富饒而子孫多不肖祖父財產廢敗罄盡郡人金方所談辭滑稽爲撫其事成近體一律云云夫兔撐目望月而孕則婦女之不夫而妊也其家有道觀二所語雖鄙俚然爲人後者見此寧不知懼哉

項平父

絕句

日長沙岸立。看雲只念家。如何永州夢。偏愛在長沙。

研北雜誌。項平父詩云云。與賈島卻望并州之句全類也。

于演

演字佩遠。台州臨海人。

題金鰲山

金鰲之山金碧浮。重元寶坊居上頭。鐘聲夜度海門月。樹色遠攬豐山秋。龍伯國人真妙手。掣此巨靈鎮江口。丹邱逸士來跨之。石窪爲尊江當酒。黃鬚天子七寶鞭。黃頭漁郎櫂江船。百年塵跡果何在。芒碭雲去山蒼然。歷試諸難固天造。中興開國何草草。腹心有疾日月昏。英雄無聲天地老。兩宮不歸汴水流。此地空傳帝子游。惜無健筆驅風雨。一洗江山萬古愁。

輟耕錄。吾鄉于佩遠先生。題金鰲山詩云云。至今膾炙人口。山枕海。屬臨海縣章安鎮。初宋高宗在潛邸日。泰州人徐神翁云。能知前來事。羣閣言於徽宗。召至。以賓禮接之。一日獻詩於帝曰。牡蠣灘前一艇橫。夕陽西去待潮生。與君不負登臨約。同上金鰲背上行。及兩宮北狩。匹馬南渡。建炎庚戌正月三日。帝航海。次章安鎮。灘淺閣舟。落帆於鎮之福濟寺前。以候潮。顧問左右曰。此何山。曰。金鰲山。又問此何所。曰。牡蠣灘。因默思神翁之詩。乃屏去警蹕。易衣徒步登岸。見此詩在寺壁間。題墨若新。方信其爲異人也。

李宗洌

閔項氏

少無依倚老何堪。白髮婆娑亂不簪。夢裏尙思江北好。悔將夫骨葬江南。

輟耕錄。燕山項氏。其夫江南人。行賈燕薊間。聘項與居未幾。夫死。項奉柩回江南。勵志子居。以守夫祀。盱江李宗列閔其事賦之云云。

徐孟岳

岳王墓

童大王回事已非。岳將軍死勢尤危。直教萬歲山頭雀。去繞黃龍塞上旗。飲馬徒聞腥羶洛。洗兵無復望條支。湖邊一把摧殘骨。蓋世功成百世悲。

歸田詩話。岳王墓詩。趙子昂云云。世皆稱誦。和者二人。亦傑作也。徐孟岳云云。高則誠云云。

吳仁叔

答內

一幅空箋聊達意。佳人端的巧形容。賢妻若也投科試。應作人間女狀元。詳韓氏下。

吳伯慶

挽張伯成

何處重逢說別時。斯文千載盡交期。學憐知己先登早。生愧同庚後死遲。箋疏空令傳杜律。誌銘誰與繼唐碑。寡妻弱子將焉託。節傳遺文只益悲。

筆精杜律虞註楊文貞作序疑其不出伯生之手然實京口張伯成所著也亦元進士後世借伯生之名以行元吳伯慶有挽張伯成詩云

楊鵬翼

鞦韆

日轉華簷樹影偏謝家庭院簇神仙綵繩斜壁織纖笥畫板輕承步步蓮弄玉未升雲漢上綠珠先墜舞樓前不知小徑殘紅裏明日何人拾翠鈿

筆精咏鞦韆詩以洪覺範之作爲最而元人楊鵬翼一首尤佳也云云

張明

句

春風跨馬銀鞍穩夜月騎牛鐵笛閒

江南通志玉山在府南十里其上多古木蒼藤有惠昭寺宋尙書梅詢讀書處李含章亦嘗隱此元張明詩云云蓋詠二事也

案府甯國府

侯友彰字夢符衡山人

句

萬錢終有命遺汝不如廉

萬歷湖廣總志以進士任臨桂縣尉廉慎不苟其示子詩有云云之句人敬重之何有成

句

曾有仙人雙白鶴可無老子一青牛

山堂肆考白鶴觀在岳州石門縣西宋時建元何有成詩云云

劉淵

花林院

花落春已暮開門白雲來階前一片石風雨留莓苔

山堂肆考花林院在南雄府城東元劉淵詩云云

郭正平

句

灞橋柳絮人千里楚澤蘆花水半扉身臥不知雲子白氣酣聊作木奴酸

龍性堂詩話元人郭正平詠雪云云皆楚楚有致

文若

題第一山

汴水東流繞舊京恢圖妙算入皇明暫攜諸將停歸騎來看中原第一城

中都志此元人詩已有入皇明之句帝王之興豈偶然哉

李明中

題秋山小景

家在夕陽三峽口人行秋雨兩巖閒不知何處堪圖畫移得柴門到楚山

閒居偶錄史冊中所載隱士鮮有不工詩者其詩別有一種瀟灑出塵之致如元李明中工山水題秋山小景云云

張孟

句

鴻濛再剖一天地書契復見科斗文

升庵書品元朝主中國日用羊皮寫詔謂之羊皮聖旨其字用蒙古書中國人亦習之張孟詩云云張光弼輦下曲云和甯沙中撲朔筆史臣以代鉛槧事百司譯寫高昌書龍蛇復見古文字蓋春秋多微詞之義也

張起

句

別來越樹長爲客看盡吳山不是家

輟耕錄張起四明人有詩名嘗作一聯云云未幾卒詩亦有識歟

韃啞

戲贈瞽者

就鞍和袖綰絲韁也。逐王孫出晉陽。人笑但聞誇景物。風來應解審笙簧。馬蹄響處無芳草。爲舌調時有綠楊。休道不知春色好。東風桃李一般香。

草木子。韃啞御史春日與一瞽者並馬出遊晉陽。因戲贈以詩云云。不待吟諷亦知其爲瞽者之詩也。

元詩紀事卷三十三

邱處機

處機字通密號長春子登州棲霞人學道於重陽真人有磻溪集

元史歲己卯太祖自奈曼命近臣札八兒劉仲祿持詔求之處機一日忽語其徒使促裝曰天使來召我我當往翌日二人者至處機乃與弟子十有八人同往見焉自崑崙歷四載而始達雪山常馬行深雪中馬上舉策試之未及積雪之半

雪山

當時悉達悟空晴發軔初來燕子城撫州是也北至大河三月數即陸局河也四月盡到約二千餘里西臨積雪半年程即此地也山常有雪東至陸局河五千里七月盡到不能隱地迴風坐道法有迴風隱地舉斗藏天之術卻使彌天逐日行行到水窮山盡處斜陽依舊向西傾

長春真人西遊記踰嶺而南至蒙古營宿拂廬旦行迤邐南山望之有雪因以詩紀其行云云郵人告曰此雪山北是田鎮海八剌喝孫也八剌喝孫漢語爲城中有倉廩故又呼曰倉頭邊墩紀行北過撫州惟荒城在焉北入昌州有廨舍亦有倉廩

至回紇城暇日出詩一篇

二月經行十月終西臨回紇大城墉塔高不見十三級以磚刻鐵玲瓏外無層級內可通行山厚已過千

萬重。秋日在郊猶放象。夏雲無雨不從龍。嘉蔬麥飯葡萄酒。飽食安眠養素慵。

長春真人西游記。過大河至邪米思干大城之北。太師移刺國公及蒙古回紇。首載酒郊迎。大設帷幄。因駐車焉。宣師劉公以路梗留。師從之。太師遂月奉米麪鹽油菓菜等物。公見師飲少。請以蒲萄百斤作新釀。師曰。何必酒邪。但如其數得之。待賓客足矣。其蒲萄經冬不壞。又見孔雀大象。皆東南數千里印度國物。師因暇日出詩一首云云。

遊郭西歸作

陰山西下五千里。大石東過二十程。雨霽雪山遙慘淡。春分河府近清明。邪米思干大城大石。有國時名。爲河中府。園林寂寂鳥無語。花木雖茂並無飛禽。風日遲遲花有情。同志暫來開睥睨。高吟歸去待昇平。長春真人西游記。二月二日春分。杏花已落。司天臺判李公輩請師遊郭西。宣使洎諸官載蒲萄酒以從。是日天氣晴霽。花木鮮明。隨處臺池樓閣。間以蔬圃。憩則藉草。人皆樂之。談元論道。時復引觴。日昃方歸。作詩云云。郭西園林相接百餘里。雖中原莫能過。但寂無鳥聲耳。

寄東方道衆

當時發軔海邊城。海上干戈尙未平。道德欲興千里外。風沙不憚九夷行。初從西北登高嶺。卽野狐嶺。漸轉東南指上京。陸局河東畔。東南望上京也。迤邐直西南下去。西南四千里。到兀里朵。又西南二千里。到陰山。陰山之外不知名。陰山西南一重大山。一重小水。數千里到邪米思干大城。師館於故宮。

長春真人西游記。宣差李公東邁。以詩寄東方道衆云云。

邊墩紀行。至宣德州。復西北行。過沙嶺子口。及宣平縣驛。出得勝口。抵扼胡嶺。
西遊記。金山以東。釋扼胡嶺。疑卽野狐嶺之異名矣。

奉詔回作

外國深蕃事莫窮。陰陽氣候特無從。纔經四月陰魔盡。春冬霖雨。四月純陽。絕無雨。卻早彌天旱魃凶。浸
潤百川當九夏。摧殘萬草若三冬。我行往復三千里。不見行人帶雨容。

長春真人西遊記。始師來觀。三月竟。草木繁盛。羊馬皆肥。及奉詔而回。四月終矣。百草悉枯。作詩
云云。

王元粹

元粹字子正。初名元亮。後止名粹。平州人。

句

十月風霜侵病骨。數家鍼線補殘衣。

中州集。年十八九。作詩便有高趣。正大末。用門資敍爲南陽酒官。遭亂。流寓襄陽。襄陽破。隻身北
歸。寄食燕中。遂爲黃冠師。有云云之句。親舊有憐其孤苦。欲爲之更娶者。子正業已高舉。主太極
道院。竟不能自返。年四十餘。癸卯九月病卒。

聶碧窗

哀被虜婦

當年結髮在深閨。豈料人生有別離。到底不知因色誤。馬前猶是買胭脂。

誠齋雜記。聶碧窗有哀被虜婦詩。爲一時稱誦。

北朝赦至感而有詩

乾坤殺氣正沈沈。又聽燕臺降德音。萬口盡傳新詔好。四朝誰念舊恩深。分茅列士將軍志。問舍求田父老心。麗正押班猶昨日。小臣無語淚沾襟。

詠北婦

雙柳垂眉別樣梳。醉來馬上倩人扶。江南有眼何曾見。爭捲珠簾看固姑。

題趙太祖眞容

鳳表龍姿儼若新。一回展卷一傷神。天顏亦怪君非虜。河北山東總舊臣。

山房隨筆。京口天慶觀主聶碧窗。江西人。嘗爲龍翔宮書記。北朝赦至。感而有詩云云。又詠北婦云云。觀中有趙太祖眞容。北來者見必拜。聶因題其上云云。

梁大柱

大柱。字中砥。其先湘州人。徙居鎮江。入句曲山爲道士。

送存書記一作與存此山上人山行。吳興趙公作詩意圖。

一聲兩聲松子落。三片五片楓葉飛。夕陽在山新月上。道人相伴一僧歸。

清河書畫舫。吾家舊藏陳深手書。寧極齋稿。計四十葉。筆意不減子昂。今歸荻溪王氏。內有題梁

中砥詩。趙子昂畫古體一篇附此。其序曰。中砥有送存書記詩云云。趙公子昂畫而爲圖。中砥索詩漫賦一首。

案宋詩紀事作梁棟詩誤。

張侍講伯淳跋畫卷後云。觀子昂所畫梁中砥茅山送客詩景。如行靈鷲道中。商榷月中桂子一段清事。又如楓葉吳江得句時。此意超然塵外。固將物我兩忘。道邪釋邪。吾不得而知也。

馬臻

臻字志道。別號虛中。少著道士服。隱於西湖之濱。有霞外集。

句

達人不思貧。貞女不事媚。靜知春事佳。老覺世味熟。古交山上松。今交陌上花。某丘有樹猶堪宿。何處無魚可療飢。瘦梅喜浸古蟬蟲。老態怕著新衣裳。

霞外詩集。黃石翁序。後來作詩專門大家何限。及見林逋魏野孤聯隻字。便自使人意消。余欲摘虛中詩。顧未暇。童子在旁問所摘。余爲舉云云。後世視此數聯。以爲何如人也。

吳全節

全節字成季。號閒閒。饒州安仁人。學道於龍虎山張留孫。世祖賜號上卿。至治間。授玄教大宗師。有看雲集。

道園學古錄。作南山諸詩。沈鬱哀慕。

句

要知顏子如愚處。正是羲皇未畫前。

道園學古錄。嘗作環樞之室。畫先天諸圖於壁。有詩云云。其所造蓋如此。

句

渭城朝雨歌三疊。湘水秋風賦九疑。錦水東流江月白。潼關西擁蜀山青。

詩藪。吳成季云云。

李道坦

道坦。字坦之。錢唐人。

杜鵑行

吾聞昔有蜀天子。化作冤禽名杜宇。一身流落懷故鄉。萬里逢人訴離苦。西來縱呼巫峽間。楚臺花落青春闌。臺中魂夢久寂寞。行雲日暮愁空山。明朝復向瀟湘發。北叫蒼梧江竹裂。竹間之淚花上血。怨入東風俱不滅。天涯無窮朝暮啼。王孫草綠不須歸。哀哉王孫終不歸。江南江北楊花飛。

吳禮部詩話。坦之早歲入道洞霄宮。學文於隱者鄧牧。作杜鵑行云云。時年二十餘爾。逮從鄧公。日益精進。其歌行最爲流麗。

寄吳正傳

拂袖行歌歸故鄉。相思又是一星霜。夢回江上秋風杳。愁入天涯春草長。書問久淹嗟契闊。詩章時讀慰

淒涼。知君亦有逍遙興。肯學征鴻爲稻梁。

送人歸嚴陵併寄吳正傳

官車一兩馬並馳。送君朝出城門西。投觴誓河以爲別。東流到海無還期。雲間掛冠歸故里。河上停帆謝遊子。不願松江食巨鱸。甘向桐江釣寒水。子陵昔釣川之側。百尺高臺猶屹立。斜日歸舟繫石根。稽首清風無愧色。金華洞天清且幽。神仙牧羊松下遊。故人吳君仙者儔。高臥巖屋秋浮浮。茲山相鄰爾睦州。山翠俯壓城南樓。吳君之家某水邱。尺書欲煩親手投。一見足寫平生憂。

高將軍白鶴子歌

淮西猛士高將軍。新獲驍禽被涼素。調之弗顧情未狎。跨馬臂出城東去。征鴻作字雲邊斜。聳身直上誰能遮。天寒日暮望不見。北風萬里吹瑤花。雲飛忽斷鴻飛却。知草長煙沙際漠。但餘孤色搖清秋。未許纖毫生碧落。歸來珍衛不解譙。親手餽肉供飢喉。英雄遇合固有分。可惜驚塵俱雪頭。

李白酒樓歌

溧陽酒樓春水涯。白馬繫在樓東家。千金醉盡不復顧。猶吹玉笛引吳娃。日斜樓外東風起。春愁滿眼楊花裏。高歌一曲下樓去。傳徧江南數千里。錦袍綠水迷蹤跡。月落空梁照顏色。江頭盡日不見人。樓上幾年無此客。倚欄仰看西飛雲。胡爲不飲愁其身。卽今寂寞千年後。誰酌青山山下墳。

句

落日中原小。悲風易水寒。凡物皆歸土。深山始見天。落葉城南草。綠王孫去。江上花飛燕子來。清江

百轉秋花底。漁火孤舟暮雨中。芙蓉水碧雙鳧冷。苜蓿秋高萬馬肥。

吳禮部詩話在蘭江時。嘗手寫一帙。留予家。至大戊申。別後寄友三詩。一以與予云云。又送人歸嚴陵。併寄予云云。坦之素善書。余愛之。嘗裒其手寫者一卷。爲人竊去。僅存一幅。二詩皆佳。高將軍白鶴子歌云云。其一李白酒樓歌云云。警句如落日云云。嘗自言以此詩寄鄧善之。鄧借以爲己作。凡物云云。不可勝錄也。

句

天寒日暮望不見。北風萬里吹瑤花。

詩藪白鶴子歌。天寒云云。語甚雄峭。又落日云云。芙蓉云云。大類近日嘉隆語。案落日芙蓉云云。前已標出。

薛玄曦

玄曦字玄卿。河東人。入道龍虎山。至正三年。制授弘文裕德崇仁真人。有上清集。

送朱本初之玉隆堂

西山紫翠簇芙蓉。師住逍遙第一峯。慎勿挽弓思射鹿。祇須鑄鐵學降龍。閒穿曉月鉏靈藥。醉拂秋風臥古松。應憶京華舊遊處。蓬萊坊畔五雲重。

皇元風雅題作送真一詩云。西山紫翠鬱芙蓉。師住逍遙第一峯。滕閣雨收瞻駐鶴。楚江沙長羨降龍。有時帶月鉏靈藥。無事焚香對古松。謾憶京華舊遊處。蓬萊坊畔五雲東。與此小異。

句

臂鷹過雁磧。老馬上龍堆。明月夢回夔子北。長風吹度夜郎西。

詩數元五七言律。可摘者薛玄卿云云。

黃石翁

石翁字可玉。南康人。有松瀑集。

清容居士集。家居廬山下。少多疾。父母強使爲道士。

寒食客中

明朝便典黑貂裘。寒食甯無數日留。煙斷昔曾悲介子。火衰今不祀商邱。百年盡付風吹柳。一雨遠隨山入樓。安得五侯鯖到我。自脩茶事試香篝。

慘淡微茫斷客魂。最難忘處最難言。南陵不可避風雨。麥飯如何託子孫。往事滄江吹白鳥。誰家鐵撥送金尊。欲尋隱者相傾倒。煙柳深深不見門。

吳禮部詩話。黃石翁寒食客中云云。詞旨精深。音節悲壯。淒涼感慨之意。溢於言表。讀之猶使人惻然。

句

看山如覓孟萬年。君自求之眉睫間。病翁生愁午睡去。舟行失卻九峯山。前瞻數點頗銛銳。沿流計程只此是。

吳禮部詩話。舊得黃可玉江行小稿。讀其望九華山詩云。愛其意新而語佳。後閱程致道北山集。望九華山詩序云。船發大雲倉五十里許。顧江南衆山中。有數峯奇爽特異。一見卽知其爲九華。問篙人果然。因知褚季野於廣坐中。識孟萬年。正應如此。黃豈嘗見此耶。不然。則詩人胸次之妙。固有不約而同者。

句

歷落求奇蹟。丁甯問異書。石刻披秦篆。銅章驗漢官。

研北雜志。廬山道士黃石翁可玉父。好學多聞。性狷介。士大夫多與之游。嘗有詩云云。又云云。蓋其好古之篤如此。

王與敬

與敬號秋崖。三山人。武夷山道士。

句

依然拂袖歸山去。止止庵前伴白雲。

武夷山志。嘗遊雲州。求雨大應。城中有妖。治之頓滅。當事薦於朝。授號至道元應通妙法師。至大間。乞還山。有句云云。

彭日隆

日隆號隱空。崇安人。武夷山道士。

自讚

五五二十五。只管從頭數。到底一也無。松梢月當午。

武夷山志。信口吟詠。頗有理致。嘗自讚云云。卒時正七十五歲。

朱思本

思本。字本初。臨川人。出家上清宮三華院。有貞一齋雜著。

案貞一齋雜著。遊廬山記。有奉詔芘衛玄教。乘傳播告江南云云。

盜發亞父冢

戲馬臺前范增冢。英風千載行人竦。冢中寶氣騰光芒。識寶賈胡心爲動。築室潛謀二十年。一朝鑿井穿其壘。舂鍤纔深四十尺。乃有石盤青龍礎。四旁牂牁大十圍。各施九十森環拱。石穿棺槨更分明。漆光可鑑剛而鞏。斲之不用揮金椎。白骨儼然全頂踵。寶劍未化橫蒼虬。金玉輝耀氣交擁。賈胡致富須臾間。棄骨溝中甯愧恐。平原無色鼓角悲。山鬼夜號川澤湧。太守陳公英俊才。慨歎奸偷吾所統。亟呼五百取羣盜。械置狴犴見仁勇。傷哉亞父天下奇。鴻門高會真危機。火龍飛起實天意。拔劍起舞空爾爲。風雲變化失隆準。玉斗一碎山河非。如公明義古亦少。發憤乃作彭城歸。六合茫茫漢疆土。厚葬何人誠可嗤。君不見驪山牧豎遺燼酷。不如王孫裸葬良亦足。

風月堂雜識。范增墓。一名亞父塚。在徐州城南一里許。元季有賈胡。盜發其塚。深四十尺許。得寶劍。虞邵菴諸公皆有詩悼之。朱本初一首云云。

伯生學士見和。僕與李學士詩紙尾批云。已與旣之約。紅梨花開。當往訪也。臥病不知春事淺深。清明後四日。聞梨花盛開。復用清明詩韻。呈玄德真人。伯生旣之二學士。

紅入梨花媚更明。黃鶯飛下眼頻傾。玉容帶酒含春色。絳袂迎風感物情。幻化可能窮妙理。追歡聊復得浮生。開尊爲報虞夫子。莫待繽紛雪滿城。

清明後四日。紅梨花開。用明字韻賦詩一章。奉邀虞李二學士。以踐看花之約。玄德真人且屬和矣。學士竟不至。又六日。風雨大作。花已委地。依韻再賦一章。呈玄德真人。並簡二學士。

霞卷雲舒映樹明。花如嫵媚向人傾。仙翁染翰饒詩興。學士停驂傲物情。有限光陰春事老。無端風雨莫愁生。明朝掃地紅英遍。却待尋芳出鳳城。

案右二詩。見貞一齋雜著。元詩癸集。知本初從吳全節居都下。所著有貞一稿。而以本初爲名。不知其名思本。蓋未見貞一齋雜著。故僅錄盜發亞父冢一詩。今據鈔本雜著增錄。與虞伯生吳全節倡和二首。玄德卽全節賜號也。

張雨

雨字伯雨。一名天雨。別號貞居子。錢塘人。至正間卒。有句曲外史集。

西湖志餘作黃篋樓。儲古圖史。作水軒于浴鵲灣。營墓於靈石塢。售繫腰作梁。名玉鈎橋。橋南數十步。作藏書石室。自勒銘而吳睿隸古。

杭州府志。張伯雨嘗有春日游南山約云。看花長安。已是丈人之行。問鐵鑪步。聊從太史之觀。甫

及春晴可無宿諾。鷺峯猿洞。衆人何莫由斯。靈石龍泓。賢者而後樂此。

答楊廉夫二首

弄水摘花春可憐。風雨倦尋茅步船。我家南塢有靈石。龍井西頭無杜鵑。野鶴孕雛畏人過。弱柳委地趁蠶眠。子雲胡爲甘寂寞。後世何人知太玄。

黃篾樓中唯飲酒。樓下長溝鳧雁多。彎頭橋斷迷青草。闊處風來生白波。饑奴竟煮脫棚筍。老魚戲喚如錢荷。詔書寬大到海角。河北飢氓爭倒戈。

道言

造物於我厚。一切使我薄。瓶中有儲粟。持此臥雲壑。弊衣取苟完。得味在藜藿。花鳥予友于。尊酒不獨酌。牀頭堆故書。敗履置牀脚。未嘗身沒溺。何與世濁惡。正如散馬牛。不識穿與絡。異時老嫗餽。會有南面樂。

九月風雨清齋

中林授衣節。寒氣早已集。牖戶泊裘褐。凡百缺治葺。窮居昧時序。頗訝光景急。叢篁助幽翳。漾瀾發空寂。水禽穿屋過。巖樹排簷入。陶尊既塵漬。墨突亦雨立。遐思把菊詠。端處掬溜室。空言非藥餌。殆不廢九日。

澗河對雨二首

山雲油然作。山雨來不緩。既沾靈石塢。遂灑寒栖館。落水遽如許。衆草行復爛。有酒不堪酌。無口堪把玩。與聞季長笛。甯從中散鍛。代謝夫何如。徒爲白首歎。

步歸靈澗幽。泥染居士屨。不知嵐雨深。稍怯布衣薄。拂床次羣帙。掃徑堆脫籜。清坐亦偶然。吾非慕仙僞。

奔月卮歌答鐵雅所作

甕社明珠奔入月。脫殼正似風蟬潔。漁網出之不敢視。滌盡含沙光不滅。文昌四星吞在腹。一金晶大如菽。蜃物還來作飲器。日夜雄虹繞茅屋。一扇桃核寬有餘。半葉蕉心捲未舒。飲非其人躍入水。怪雨盲風生坐隅。置之天上白玉盤。斗柄挹酒長欄干。李白跳下鯨魚背。持勸我飲相交歡。幽宮馮夷爲予泣。酌盡海水百怪出。還我平生老蚌胎。許君醉臥蛟人室。

鐵網珊瑚右句曲外史與袁子英所寫詩凡五十五篇其首兩章乃此老道人效余鐵雅者也如道言清齋澗阿諸詩皆其道趣中流出者若奔月卮則又頑仙之橫出者吁道人仙去已一紀矣鐵雅之友屬之何人開卷愴然不勝山陽之感云至正二十有一年花朝日抱遺叟楊維禎在清真之竹洲館書

懷茅山

我有草堂南洞門。常時行坐虎同羣。丹光出林掩明月。玉氣上天爲白雲。遙憶田泉洗蒼朮。更思陶澗采香芹。歸來閉戶償高臥。莫遣人書白練裙。

西湖竹枝集其詩俊逸清澹儕輩鮮及有如丹光出林云云不目之爲仙才不可也。

贈紐憐大監

論卷聚書三十萬。錦江江上數連艘。遠追教授文翁學。重歎徵求使者勞。石室談經修俎豆。草堂迎詔樹旌旄。也知後世揚雄在。獻賦爲郎媿爾曹。

鐵網珊瑚自跋請以蜀文翁之石室揚雄之墨池杜甫之草堂皆列學宮又爲甫得諡曰文貞以私財作三書院徧行東南收書三十萬卷及鑄禮器以歸虞奎章紀其事邀予賦詩如左
宛委餘編偶閱張伯雨贈紐憐大監詩跋云云按元史有紐憐傳而不載此事
案詩跋亦見草堂雅集

題授經郎獻書圖

侍書愛題博士畫日日退朝書滿床奎章閣上觀政要無人知有授經郎

輟耕錄文宗御奎章日學士虞集博士柯九思常侍從以討論法書名畫爲事時授經郎揭傒斯亦在列比之集九思寵眷稍疏因潛著一書曰奎章政要以進二人不知也萬幾之暇每賜披覽及晏朝有畫授經郎獻書圖行於世厥有深意存焉張伯雨題詩云云蓋柯作畫虞必題故云

仲穆墨蘭

滋蘭九畹空多種何似墨池三兩花近日國香零落盡王孫芳草遍天涯

草木子趙仲穆者子昂學士之子宋秀王之後裔也能作蘭木竹石有道士張伯雨題其墨蘭詩云云仲穆見而媿之遂不復作

雪濤詩評趙子昂宋宗人也而仕於元書法丹青皆名後世然多有題其畫相譏訕者一人題子昂畫蘭云云

案詩評作譏子昂與集中詩題不合

西湖放燈

共泛蘭舟燈火鬧。不知風露濕青冥。如今池底休鋪錦。此日槎頭直掛星。爛若金蓮分夜炬。空於雲母隔秋屏。卻憐牛渚清狂甚。苦欲燃犀走百靈。

熙朝樂事七月十五日俗傳爲中元節地官赦罪之辰人家多持齋誦經僧家建盂蘭盆會放燈西湖及塔上河中謂之照冥官府張伯雨詩云云

卜居

浮家泛宅意何如。玉室金堂計不疎。歸錦橋邊停舫子。散花灘上築樓居。淡然到處自鑿井。元晏閉門方著書。但得草堂費便足。人生何地不樵漁。

紫桃軒雜綴散花灘在西湖東馬塍溜水鬧地。元張伯雨卜居有詩云云。想玉鈎橋未成。黃篋樓經始之日。余過訪馬塍地不可得。而杭人藝花者亦絕無佳種。伯雨風流逸不可追矣。

集太白語醉僧淨月

主人碧巖裏。爲余話幽棲。眞訣自從茅氏得。風流還與遠公齊。滿堂空翠如何掃。而君解來一何好。白玉塵尾談重玄。琉璃硯水常枯槁。蒼蒼雲松拂彼白石。世人聞此皆掉頭。就中與君心莫逆。袖拂紫煙去。空中聞天雞。借問蘇耽鶴。早晚向江西。

草堂雅集鐵崖先生跋曰。予觀貞居子集句詩。政如冶城銅像。捧額珠蓮座于長干也。可寶可玩。太白見之。當曰。吾錦千萬機。衣被天下。詩人烏得割截如此。貞居子其慎取之哉。勿俾責償也。會

稽楊維禎跋。

玉笙謠爲鐵門笙伶周奇賦

我有紫霞想。愛聞白玉笙。縣匏比竹無靈氣。昂邱採此十二莖。鳳唳啣明珠。鳳翼排素翎。金華周郎妙宮徵。子晉仙人初教成。月下吹參差。羣雛亦和鳴。緱氏山頭白雲起。七月七日來相迎。長謝時人一揮手。漂下滿空鸞鶴聲。

大雅集評曰甚似太白。

延陵公承慶堂詩

大江蒼蒼元龍虎。輔元之家百神頽。望拜受釐若稽古。上清真人閱衆甫。新宮潔齋導天語。紛雲郁霞錯承宇。虛皇穆然陽衛武。左懸右欵降輪羽。縣鐘鏜鏜迅擊鼓。赤金蔡服赭朱戶。雙珠月明帶寶璐。挾以流黃玉。櫬具旣竣大禮私事舉。吉日宗族奉爵俎。青紫系地簪綬組。魏張代劍新捧土。饒國開觀治宿莽。報君親師物咸祝。撫已一念或未溥。西壁考書元範府。寒冰層陰發春煦。日若休明沐仁雨。道德大非方仙。五月佩六印非適取。持旌召趣迹旁午。下土滓壘寧久處。天關會規足蹈矩。願天願地多黍稌。畢志萬年奉明主。小史作書孰敢侮。吁嗟厚德番之祖。

大雅集評曰不蹈黃庭句意深滿。

吳興墨蘭

墨君石友是同參。幾葉光風染碧嵐。悵望王孫杳何許。年年芳草滿江南。

句曲外史集彙讀葉靜齋草木子中一條云趙仲穆者子昂學士之子宋秀王之後也能作墨蘭竹石有道士張伯雨題其墨蘭詩滋蘭九畹云云仲穆見而媿之遂不復作所記與此詩意正合而集中無之因附見於此鐵崖之悲不其然哉石樓野生漫識

句

家藏逸少籠鵝字門繫龜蒙放鴨船

至正直記錢塘老儒葉森嘗登趙松雪之門松雪深愛之家住西湖婦女顏不潔所藏王右軍籠鵝帖石刻後有唐人復臨一帖副之誠爲妙品張外史每戲之賦詩以貽云云案直記專記鄙猥之事並喜言人曖昧今多不錄卽錄亦時有刪節

又

風沙不憚五千里將身跳入仙人壺

輟耕錄道士張伯雨嘗從王溪月真人入京初燕地未有梅花吳閒閒宗師時爲嗣師新從江南移至護以穹廬匾曰漱芳亭伯雨偶造其所恍若與故人遇徘徊旣久不覺熟寢於中真人終日不見伯雨深以爲憂意其外出迷失街道也夢覺日已暮矣歸道所由嗣師笑曰伯雨素有詩名宜作詩以贖過伯雨遂賦長詩有云云之句嗣師大喜送翰林集賢嘗所往來者袁學士伯長謝博士敬德馬御史伯庸吳助教養浩虞修撰伯生和之

鄒復雷

復雷號雲東。□□人。

自題春消息圖

蓬居何處索春回。分付寒蟾伴老梅。半縷烟消虛室冷。墨痕留影上窗來。

鐵網珊瑚。予抵鷓沙泊。洞元丹房主者。爲復雷鍊師設茗供。後連出清江楮三番。求東來翰墨。師與其兄復元。皆能詩畫。旣見元竹。復見雷梅。卷中有山居老仙品題春消息字。遂爲賦詩卷之端。時至正□□秋七月二十有七日。老鐵禪在蓬華居。試陳有墨。尙恨乏筆。

富恕

恕字□□。吳江人。以儒入道。號林屋道人。

西湖竹枝詞

十里荷花錦一機。雨餘荷氣撲人衣。滿船游女蒙白苧。陣陣腥風鷗鷺飛。

西湖竹枝集布袋筇杖。不憚險道。訪天下仙山。有所得。輒寄於詩。其作竹枝。雖不本題。無所比興。特於題外爲善刻云。

余善

善字復初。玉峯清真觀道士。

句

長桑樹爛金雞死。壺中天地小如瓜。

列朝詩集楊廉夫跋云此予方外友余善追和張外史游仙詩一十解予小加點讀至云云客遠床三叫以爲老鐵喉中語也又如云云雖老鐵無以著筆矣

于立

立字彥成號虛白子南康人學道會稽山中有會稽外史集

前題

儂家住在湧金門青見高峯白見雲嶺上已無丞相宅湖邊猶有岳王墳

楊柳樹頭雙鶺鴒雨來逐婦晴來呼鴛鴦到死不相背雙飛日日在西湖詳燕不花下

鄧青陽

句

忘情消白日高臥看青山

萬歷湖廣總志鄧青陽南巖道士生于元季早歲入武當從高士學黃老文始莊列周易參同龍虎大丹諸書精思純鍊深得其奧凡所寓興吐辭發語皆有激發寓武林有云云之句

方從義

從義字無隅貴溪人老修道金門之小洞天號方壺子洪武間卒

句

岸花汀鳥留幽意碧水丹山共隱情

元詩癸集嘗題碧水丹山圖云云清江劉永之謂方壺子非遺世者而世反遺之可爲惋惜

元詩紀事卷三十四

子溫

子溫字仲言號日觀華亭人宋亡出家住杭之瑯瑯寺

朱宣慰家題畫

昔有朱買臣今有朱宣慰兩個擔柴夫並爲朱紫貴

癸辛雜識嘗在朱宣慰家作畫訖遂寫一詩云云朱老欣然曰朱清果是賣蘆柴出身和尚說得我着遂饋贖資五錠酬之

題畫葡萄卷後

明月清風宗炳社夕陽秋色庾公樓修心未到無心地萬種千般逐水流

江村消夏錄紙長宜以好詩書之爲後之名勝笑覽子溫題

題畫

曾向流沙取梵書草龍珠帳滿征途輕包短策難將帶記得西風月上初

蟬精雋僧溫日觀能詩善寫葡萄精緻不俗世多寶之予一日於友人處觀其大畫四幅而皆有

題品其自作也格律不拘率意而就惟記得一絕云云言未盡而意有餘堪膾炙也

有規

絕句

讀書已覺眉稜重。就枕方欣骨節和。睡去不知天早晚。西窗殘日已無多。

吳中舊聞徐敦立言。往歲吳中多詩僧。其名往往見於前輩文集中。余渡江之初。猶見有規者。頗以詩知名。其爲人性坦率。其徒謂之規方外。時年七十餘矣。談論蕭散可嘉。臨終前數日。有詩云。葉左丞大愛之。

德豐

重陽

戰盡今秋見太平。西風多作北風聲。不吹烏帽吹氈帽。籬下黃花笑不成。

答鍾山長老

耿耿孤吟對古梅。忽傳軍將送書來。倚崖枯木摧殘甚。虛負陽和到一回。

山房隨筆。僧德豐三山人。有重陽詩云云。鍾山長老舉以自代。答云云。竟不赴。

炳同

炳同字野翁。新昌張氏子。居明州仗錫寺。

句

老來非厭客。靜裏欲書經。

四明山志。野翁宋亡之日。避跡仗錫。閉戶書法華經。有句云云。一時遺老家。則堂文本心。黃東發。

舒圓風周伯弼咸與之游。

淨權

淨權字道衡徑山僧。

南山詩

紫氣金丹曉青霞玉井春。畫牛曾寓意鳴鶴更通神。

閒居錄工於文章既寫與人即不留稿嘗有南山詩云云又好言葛稚川陶隱居事凡問權未言名字止曰大迂闊者即知爲道衡矣。

存誠

絕句

別後多遊滄海東忽攜詩卷到山中。立談數語飄然去滿徑松花落午風。

閒居錄蔣景斐嘗誦存誠上人詩云云余甚愛之。

了慧

了慧字岳重武林人。

春日田園雜興

平時水繞逕微分小圃雲深景不繁。此處農桑雖是僻多情鶯燕不嫌村。倦眠芳草閒黃犢靜對幽花倒綠尊。見說弓旌方四出欲更名姓掩衡門。

月泉吟社第三十三名。田園對起。已占地步。領聯得闢闢之妙。餘佳。

有在

武陵勝集得園字

騎馬一身雪。來敲隱者門。林林憂桂玉。草草樂琴樽。勳業誇麟閣。文章鄙兔園。探題歸去路。燈火已黃昏。
詳白斑下。

溥光

溥光字玄暉。大同人。幼爲頭陀。號雪菴和尚。文宗詔蓄髮。授大學士。

懷麓堂集嘗聞趙松雪過酒肆。見其帘字。駐視久之。謂當世書無我逮者。而此書乃過我。問知爲一僧書。則雪菴李溥光也。因薦之朝。累官昭文館大學士。

夷白齋詩話。元釋溥光字元暉。俗姓李氏。特封昭文館大學士。榮祿大夫。賜號立悟大師。有二絕句云。螻螟殺敵蚊眉上。蠻觸交爭蝸角中。何異諸天觀下界。一微塵裏鬪雌雄。豈苗鹿嚼解馬毒。艾葉雀銜奪燕巢。鳥獸不會有本草。諸知藥性是誰教。詩亦奇拔。恨不多見。

月山詩話。夷白齋詩話。載元釋溥光二絕句。稱其奇拔。恨不多見。其詩卽樂天螻螟殺敵蚊眉上。豈苗鹿嚼解馬毒。二首也。此君未讀長慶集。必平日不喜白體者。

鐮工

一聲鐮子噪秋蟬。門內老僧驚晝眠。毫髮盡時髦髮在。夕陽芳草自芊芊。

句

賈與買人誰是主。一犁春雨鵝鳩啼。

近峯聞略。予嘗得元僧雪菴外集。略記數語。其題買田券云云。鐫工云云。皆可人意。

明本

明本。號中峯。錢塘人。出家吳山聖水寺。後爲天目僧。有中峯廣錄。梅花百詠行世。

蘇談中峯卓錫處。皆以幻住名之。道行既高。四衆皈向。凡建所謂幻住庵者。有數十處。今在吳中者。居吾家雁蕩村之西。無二里遠也。雖殿堂三間。基址去地殆五尺餘云。禪師之所築也。故老相傳。建此庵時。馮海粟煉泥。趙子昂搬運。中峯自以塗壁。卽此草堂是也。

九字梅花詠

昨夜西風吹折千林梢。渡口小艇滾入沙灘坳。野橋古梅獨臥寒屋角。疏影橫斜暗上書窗敲。半枯半活幾個壓蓓蒂。欲開未開數點含香苞。縱使畫工奇妙也。縮手我愛清香故把新詩嘲。

風月堂雜志。昨夜西風云云。此天目山釋明本中峯九字梅花詩也。松雪趙文敏公與之爲方外交。同院學士馮海粟子振甚輕之。一日松雪強扯中峯同訪海粟。海粟出暇日所爲梅花百詠詩示之。中峯一覽。走筆亦成一百首。海粟猶未爲然。復出此詩求和。海粟竦然久之。致禮而定交焉。升庵詩話補遺。中峯有九字梅花詩云云。池南唐文薦錡謂余曰。此詩不佳。影不可言敲。又後四句。有齋飯酸餒氣。

次韻潘王題真際亭

高亭結構標真際。體共雲林一樣閒。山勢倚天忘突兀。水聲投澗自潺湲。伽陀迴出言詞外。海印高懸宇宙間。佇看凭闌人獨醒。又添公案入禪關。

中峯行錄。駙馬大尉潘王。王璋遣參軍洪鎰齋書幣。敍弟子禮。期請上命南來參叩。己未秋九月。王奉御香入山。謁師草廬。咨訣心要。請師陞座。爲衆普說。師激揚提唱萬餘言。王復求法名別號。師名王以勝光。號曰真際。王因建亭師子巖下。以託其事。

天目山

一山未盡一山登。百里全無一里平。疑是老僧遙指處。只堪圖畫不堪行。
柳亭詩話。中峯本詠天目云云。結句乃杜荀鶴閩中秋思詩。

雪

凍雲四合雪漫漫。誰解當機作水看。只爲眼中花未瞥。啓窗猶看玉琅玕。
小窗清紀。古今雪詩甚多。獨中峯老人一偈云云。自是中峯好句。

淨土詩

富貴之人宜念佛。黃金滿庫穀盈倉。世間受用無虧缺。只欠臨終見願王。
身膺宰輔與朝郎。蓋世功名勢莫量。自性彌陀如不念。未知何以敵無常。
筆精。中峯淨土詩云云。可爲富貴人之針砭。

與恭與一作允

與恭字行己號嬾禪上虞人餘姚九功寺僧

思母

霜隕蘆花淚濕衣白頭無復倚柴扉去年五月黃梅雨曾典袈裟糴米歸

靈隱寺志行己與趙子昂同時其思母詩云云可謂有陳尊宿之思矣

冷泉亭

天竺雨花飛寶臺北山門對冷泉開石磴老樹無人識時有黃猿抱子來

回雁峯

官路迢迢野店稀薄寒催客早添衣南分五嶺雲天遠雁到衡陽亦倦飛

元詩癸集嘗遊臨安題冷泉亭詩趙松雪見而異之追至淨慈寺與相見後遊蘇州定惠寺端然而逝檢其囊止有破紙一方則回雁峰詩也

覺恩

覺恩字以仁號斷江四明人

句

權擬三朝位三事祇應知己是僧彬

元詩癸集嘗經賈似道墓作詩有云云句最得詩人優游不迫之意極為柳道傳所稱

行端

行端字元叟臨海人。

續傳燈錄行端號元叟臨海何氏初參藏叟於徑山尋以靈隱山水清勝挂錫焉大德中主中天竺皇慶壬子遷靈隱三被金襴袈裟之賜

靈隱寺志端文字不由師授自然能通自稱寒拾里人。

題飛鳴宿食四雁圖

年去年來年復年帛書曾達茂陵前影連薊北月橫塞聲斷江南霜滿天雨暗蘆花愁夜渚露香菰米下秋田平生千里與萬里塵世網羅空自懸

堯山堂外紀客有以飛鳴宿食四雁圖求子昂跋者時翰林諸公在焉釋端元叟亦與坐末諸公咸命賦詩元叟卽援筆題詩云云諸公稱賞卽以詩授客去

擬寒山子詩

昨日東家死西家賻冥財今朝西家死東家陳酒杯東東復西西輪環哭哀哀不知本真性惜惜登泉臺筆精讀此可以警世之貪婪富貴而不知返者

一初

呈虞學士

翰苑虞夫子名聞四海傳偶攜天上月來繫寺前船一見如曾識三生定有緣不嫌雲臥冷與我共留連

袁州府志。一初分宜福勝寺僧。能詩。虞集過寺。初賦詩云云。集服膺之。

圓至

圓至。字天隱。別號牧潛。高安姚氏子。駐錫建昌之能仁。有筠溪牧潛集。

贈天紀

拈筆詩成首首新。興來豪叫欲攀雲。難醫最是狂吟病。我恰才痊又到君。

南濠詩話。長洲陳湖磧沙寺。元初有僧魁。天紀者居之。魁與高安僧圓至友善。至嘗注周伯弼所選唐三體詩。魁割其資。刻置寺中。方萬持爲作序。由是三體詩盛傳人間。今吳人稱磧沙唐詩是也。魁讀儒家書。尤工於詩。平生厓立絕俗。誓不出世。住山至有詩贈之云云。

寒食

月暗花明掩竹房。輕寒脈脈透衣裳。清明院落無燈火。獨向迴廊禮夜香。

曉過西湖

水光山色四無人。清曉誰看第一春。紅日漸高弦管動。半湖煙霧是游塵。

送人

送子江頭水亦悲。更能隨我定何時。垂楊但爲秋來瘦。不爲秋來有別離。

句

春路晴猶滑。山亭晚更深。再往湖南竹枯湘淚盡。花發楚魂香。同上。並坐夜深皆不語。一燈分映兩閒身。

徐香居士見訪。

南濠詩話。元僧圓至。工於古文。而詩尤清婉。其寒食各云云。他如云云。其造語之妙。當不減於惠勤參寥輩也。

善住

善住。字無住。別號雲屋。吳郡僧。有谷響集。

三高祠

越國謀臣吳國讎。如何廟食此江頭。扁舟載得蛾眉後。卻作三江汗漫游。范蠡

南濠詩話。三高祠在吳江長橋南。中祀越上將軍范蠡。晉大司馬東曹掾張翰。唐贈右補闕陸龜蒙。國朝著於祀典。齊東野語載宋人詩云。可笑吳癡忘越憾。卻誇范蠡作三高。又云。千年家國無窮恨。只合江邊祀子胥。蓋深非之。近讀僧善住三高祠詩。范蠡云云。其見亦同。

本一作文。誠

本誠。字道元。號覺隱。

睡起

花下拋書枕石眠。起來閒漱竹間泉。小窗石鼎天猶煖。殘燼時飄一縷煙。

江亭秋晚

獨倚清江秋思長。晚潮初上水亭涼。海門風起雙鸂鶒。一抹銀花湧夕陽。

又

藤枯摧老樹。石裂礙深溪。陰洞水聲合。短垣松影齊。礪回知徑遠。山迴覺梅低。忽爾破孤寂。嶺猿清晝啼。蓬窗日錄。元僧覺隱與笑隱訢公。天隱至公。皆以詩自豪。相頡頏。時號三隱。覺隱睡起云云。江亭秋晚云云。又云云。

題埵公畫

日暮東溪上。秋深景寂寥。葉疎林影薄。水落岸痕高。野燒明江嶼。漁舟入浦橋。故人烟水隔。悵望首空搔。六研齋筆記。覺隱寫石與菱蒲溪鳥最妙。又作疎林平遠。託埵仙筆。題云。蜀時埵公作畫。覺隱題印。又題云。余嘗爲此卷。埵仙亦到。埵仙喜。遂援筆寫此圖。余因題此詩云云。

廣漩

廣漩字空海。晉江蘇氏子。開元寺如照徒。

句

尋光來佛後。竊食犯僧殘。

開士傳所爲頌揭。語皆警策。嘗詠鼠。有云云之句。

壽寧

壽寧字無爲。號一菴。上海人。住持靜安寺。

元詩癸集治丈室。兩旁雜植檜竹桐柏。自號曰綠雲洞。合其寺之古跡。曰吳碑。曰陳檜。曰鰕禪。曰

經臺曰滬壘曰湧泉曰蘆渡爲靜安八景求題詠於時之長於詩者成靜安八詠一卷會稽楊維禎爲之序

靜安八詠

赤烏碑

佛法闡兮重元國江東兮紀年翠壁立兮高碣瞰波濤兮硤砢龜龍剝兮皇象書千載一日兮傳赤烏

陳檜

雙檜兮蒼蒼孰重元兮禎明叶芒蛟龍樛兮偃蹇接葉蕤兮翔鳳凰皎瓊樹兮壁月夜流望臨春兮使我心憂

鐵厓評曰騷人感慨

鰕子禪

若有人兮慧如癡啗生鮮兮俗見嗤日而出兮暮而歸亡寒暑兮亡渴飢鰕旣化兮鰕活而飛千秋萬歲兮人非

講經臺

有美人兮滬之渚徙神宮兮在蘆野叶序築高臺兮壘土天花續兮如雨倏奄沒兮谷成陵塞予之仍兮續乃成

鐵厓評曰多少涵蓄也見後人不負山門

滬濱壘

築滬兮防海。叶喜。蘆之東兮滬之水。崧潭兮千秋故壘。巖巖兮枕江之流。風淒淒兮竹蕭蕭。叶韻。

鐵崖評曰：朱紘三歎有餘音。

湧泉

坤之機兮下旋。湧吾水兮泡漩。一氣孔神兮無爲自然。吁嗟泉兮何千萬年。

鐵崖評曰：八題之中，此題爲悟道之題。坤機下旋，便說得湧泉活潑潑地。一氣孔神，又見寧之祖教滅而又不滅者。

蘆子渡

蘆瑟瑟兮水溶溶。望美人兮袁之崧。雁嚶嚶兮心忡忡。眺東城兮江之中。吾將踏葦兮歌清風。

鐵崖評曰：七縱七擒，手堪用事。

綠雲洞

萬樾兮森森。雲承宇兮陰陰。洞有屋兮雲無心。我坐石兮鼓瑤琴。耶之溪兮華之崑。叶今。雲之逝兮吾將曷尋。

梵琦

梵琦字楚石。

句

自言羊可種。不信繭成絲。詳吳萊下。

祖柏

祖柏字子庭。四明一作嘉定人。有不繫舟集。

題自寫菖蒲二首

盆泓淺淺映幽叢。綠髮脩脩墜鏡中。瀟灑憑誰供拂掠。澹煙微雨及清風。
雲骨溪毛瘦不禁。井花濯濯翠陰陰。閑來坐對清詩眼。月落半窗風露深。

宏秀集。嘗講台教於赤城。性好浪迹雲遊。乞食村落。對人不作長語。閒雜諧謔。喜畫石菖蒲。題句甚多。

賦蓋

百骨攢來一線收。葫蘆金頂蓋諸侯。一朝撐出馬前去。真個有天無日頭。

江南通志。柏子庭能詩。浪迹雲游。乞食嘉定村落。語雜諧調。一日偶觸某官騶從。縛至。知爲子庭。命賦所張蓋。應聲云云。某官笑而釋之。

口占

一封丹詔未爲真。三杯淡酒便成親。夜來明月樓頭望。惟有嫦娥不嫁人。

輟耕錄。後至元丁丑夏六月。民間謠言。朝廷將采童男子。以授韃靼爲奴婢。且俾父母護抵直北交割。故自中原至於江之南。府縣村落。凡品官庶人家。但有男女年十二三以上。便爲婚嫁。六禮

既無片言，卽合。至於巨室，有不待輿馬親迎，輒徒步以往者。自後有貴賤貧富，長幼妍醜，匹配之不齊者，各生怨悔。或夫棄其妻，或妻憎其夫，或訟於官，或死於天。此亦天下之大變。吳中僧祖柏，素稱滑稽，口占絕句云云。又有人集古句云云，可謂深於命意者矣。

句

誰呼蓬島青頭鴨，來殺松江赤練蛇。

輟耕錄：丙子歲，松江亢旱，聞方士沈雷伯道術高妙，府官遣吏齎香幣過嘉興，迎請以來，驕傲之甚，以爲雨可立致。結壇仙鶴觀，行月孛法，下鐵簡于湖柳潭，井日取蛇燕焚之，了無應驗。羞赧宵遁。僧柏子庭有詩云云，聞者絕倒。

若舟

若舟字別岸，攜李人。

館娃宮

白晝娃宮宴未旋，東風吹下越來船。捧心方妬三千女，嘗膽誰知二十年。花暗屨廊蜂蝶困，草深香徑鹿麋眠。憑欄一段傷心事，都在西山夕照邊。

歸田詩話：姑蘇靈巖寺館娃宮舊基也。吳僧若舟別岸一詩云云，用意遣詞甚佳，實有初嘗爲子誦之。

宗衍

宗衍字道原中吳人至正初住石湖楞伽寺有碧山堂集

野雞毛羽好

野雞毛羽好不如家雞能報曉新人美如花不如舊人能績麻績麻作衫郎得著郎見花開又花落
列朝詩集此詩流俗訛傳爲陳少卿妻寄夫之作

文信

文信字道元永嘉人

西湖竹枝詞

西湖日腳欲沒山湖東新月牙梳彎南北兩峯船裏看卻比阿儂雙髻鬟

梧溪集道元少與道士張伯雨會稽楊廉夫齊名嘗有西湖竹枝詞云云或者病其浮薄廉夫謂曰金沙灘頭菩薩亦隨世作戲或者釋焉誠演二公與道元同字皆博學負重名而道元僅住小山林而已

法智

法智吳山僧

泊安慶城一作挽余廷心

浮圖高出暮雲低雉堞連陰碧樹齊茅屋人家兵火後樓船鞞鼓夕陽西大江千里水東去明月一天烏夜啼欲將忠魂荒冢外白楊秋色轉淒迷

宏秀集。法智。余忠宣公闕故人也。讀其弔余忠宣公一篇。可稱哀而不傷。

祖銘

祖銘字古鼎。奉化應氏子。至正閒主徑山。有古鼎外集。

徑山五峰

堆珠峰

天勢下凌霄。坐使萬壑趨。元氣結巒岫。獻此大寶珠。翊殿護釋梵。鼓鐘殷人區。

大人峰

五髻生雲雨。鎮踞何春容。具此大人相。題爲大人峰。偉哉天地閒。萬象同擴充。

鵬搏峰

峰勢來大鵬。鼓此垂天翼。培風本無待。適茲造化力。何須問天地。在在六月息。

宴坐峰

杉松太古色。不別春與冬。道人此宴坐。一念萬劫融。不特座燈王。等了諸法空。

朝陽峰

二儀開幽漠。日月臨下土。萬物麗高明。此峰正當午。堂堂大聖人。兩眼空寰宇。

自注。山中五峰傳之久矣。然指者不一。今各賦一詩。庶來者不待問而知也。至正庚寅七月。徑山釋銘書。

至剛

至剛閩縣人。居聖羅山。人稱石門和尚。

句

菖蒲葉瘦黃花老。白虎黃猿自往來。砂鍋常煮和根菜。不與人閒氣味同。

元詩癸集有云云句皆爲人所稱道。

瞻

瞻字無及。

遊虎邱

城裏看山看不足。花時雪後每來遊。洗空塵土惟池水。磨盡英雄是石頭。此日憑欄開楚雁。何人掘冢得吳鉤。東風又綠蒼崖樹。檀板娥筌醉未休。

案元詩癸集於僧靈惲下云。虎邱志中載無及洗空塵土一聯。惜未見全篇。然於瞻下實已錄全篇矣。

辨才

辨才。吳僧。

題安分軒

姑蘇朱景春。取河南邵子安分吟。題其軒居曰安分。吳郡滕遠爲之圖。金文徵爲之銘。

知君近構竹間房。牆下新栽幾樹桑。採藥不辭霑雨露。禦寒聊欲足衣裳。春深門外車無跡。秋晚籬邊菊有香。我亦林泉安分者。向尋時過小池塘。

鐵網珊瑚。敬觀諸大老所題安分軒佳什。理趣宏深。文義浩博。韓子所謂光燄萬丈長是也。因知景春高士。固能安其分矣。非至尊好。何能致多如是耶。雖然。未有無名而有其實者也。抑未有有名而無其實者也。景春可謂名實克符矣。諸大老所言。亦不虛美矣。眇余小子。執筆題贊。增毫芒於泰山。未免取大方之誚。吳釋辨才題。

惟則

惟則字天如。吉之永新人。有師子林別錄。

送鄉僧昱曉林

鄉人問我幾時還。向道於今又入山。一個蒲團半間屋。吳淞江上九峯閒。

一峯雲外菴和韻

竹屋茶香滿澗煙。綠杉深處響流泉。目前有法誰能說。落日微風一樹蟬。

湖邨菴卽事

竹根犬吠隔溪扉。湖雁聲高木葉飛。近聽始知雙擣響。一燈浮水夜船歸。

絕句

開渠築岸護低田。坐聽鄰翁說去年。賣卻犂鋤買漁網。兒童蕩槳到床前。

筆精。元末姑蘇城中師子林。天如禪師俗姓譚氏。江西永新人。嘗作楞嚴會解行於世。又能詩。聊錄數首於後云云。皆警句也。

普惠

普惠號洞雲。平定人。

句

君王若問榆關郡。地瘦民貧山水多。

山西通志。與中書左丞呂思誠爲方外友。呂嘗作洞雲歌贈之。及呂北上。惠貽詩云云。

椿

椿字大年。吳中人。

謁楊廉夫

揚雄宅上好修竹。黃妃塔前多翠微。自愛高文每相見。莫怪短筇來叩扉。

西湖竹枝集。游錢塘南北兩峯詩最多。惜年不永。予讀其見予詩云云。爲之深悲云。

良震

良震字雷隱。三山人。

絕句

六月七月生晚涼。大樹小樹臨幽窗。枯槎行蟻過無數。晴空好鳥飛一雙。

西湖竹枝集。愛吟唐人七字詩。而不爲律縛。如云云。

照

照字覺元。四明人。

寄楊廉夫

絕愛才多楊執戟。家住東吳錦繡場。姓氏已知傳宇宙。玉堂新誦好文章。畫船百丈牽春雨。鐵笛一聲鳴鳳凰。海上相望千里隔。尺書無使爲吾將。

西湖竹枝集。讀書澱山湖濱者十年。尤長於詩云云。蓋不在大年之下也。

自悅

自悅號白雲。天台人。明洪武初。被召賜還。

續蘭亭會補任城呂系詩

崇阿撫神祕。微風扇和淳。靈雨旣云沐。品彙區以陳。蘭若擢中沚。葩萼媚芳辰。散懷得真契。引觴答熙春。
詳張溥下。

如阜

如阜字物。元餘姚僧。洪武初。徵至南京。卒。

續蘭亭會補任城令呂本詩

禊飲秘圖湖。天氣淑且柔。傳觴際曲渚。濯纓臨芳洲。纖條亂風樹。幽葩落晴溝。衆賓亦以樂。正忘塵世憂。

詳張溥下。

福報

福報字復原。臨海人。洪武初。被召賜還。

續蘭亭會補彭城曹誼詩

柔條扇微風。輕波漾晴旭。羣彥此委蛇。鳴條集中谷。列席依巖隈。飛觴隨水曲。緬懷古先哲。庶以繼遐躅。

詳張溥下。

句

東海人歸雙燕語。北窗病起百花飛。天台倒影三江北。太白垂芒九隴東。西湖竹枝集。苦志讀書尤耽於詩。清峻絕人。如云云。皆佳句也。

甯

甯字居中。虎邱僧。

次韻答邾仲誼

公餘聯騎入山城。老衲追陪得散行。短簿祠前看竹色。小吳軒上聽松聲。來遊古苑春將暮。歸去南樓月已明。題遍新詩佳勝處。定應商略過天平。詳邾經下。

實

實字積中。號竹樵。

竹深處詩

修竹千竿一草堂。幽深偏愛水雲鄉。碧陰滿地春簾濕。蒼雪侵幃夏簟涼。詩刻粉筠初解籜。聲傳茶臼遠飄香。宦游十載天南北。猶想園林思不忘。詳金灝下。

回

回號竹菴。

前題

分得瀟湘數畝陰。中藏茅屋往來深。半窗色淨涼偏入。一榻聲清暑不侵。雨長子孫金个个。風生頭角玉森森。此君今向圖中見。時報平安慰客心。同上。

明

母生日

今朝是我娘生日。剔起佛前長命燈。白米自炊還自吃。與娘齋得一員僧。

草木子。明首坐東南行脚僧也。至正間來游雁蕩山。值母生日。以飯一盂。經一卷爲母壽。作偈云。

清濬

廣輪疆里圖

萬里山川咫尺中。江河迢遞總朝東。常時漢帝曾披此。鄧禹因之立大功。

水東日記予近見廣輪疆里一圖如右其方周尺僅二尺許皆界爲方格大約南北凡九十餘格東西差少其陰則清濬等二詩云云此圖乃元至正庚子僧清濬所畫

越僧

錢塘懷古

天定終南恃武功不堪雙淚濕東風百年南渡斜陽外十里西湖片雨中燕子來時龍輦去楊花飛徹鳳樓空倚筇曾向高風望山掩江城霧氣籠

西湖志餘元詩有傳按察嘗作鴨頭綠詞悼宋云云又有越僧云云

禪僧

黃鶴樓

一拳搥碎黃鶴樓一脚踢翻鸚鵡洲眼前有景道不得崔顥題詩在上頭

游僧

前題

一拳搥碎黃鶴樓一脚踢翻鸚鵡洲有意氣時消意氣不風流處也風流

升庵詩話李太白過武昌見崔顥黃鶴樓詩歎服之遂不復作去而賦金陵鳳凰臺也其事本如此其後禪僧用此事作一偈云云傍一游僧亦舉前二句而綴之云云元時借此事設辭非太白詩也

無名僧

題趙子昂書歸去來辭

典午河山半已墟。褰裳宵逝望歸廬。翰林學士宋公子。好事多應醉裏書。

又

歸田詩話。趙子昂以宋王孫仕元。嘗書淵明歸去來辭。有僧題絕句於後云云。後人不復著筆。

戲笑隱

欣哉笑隱住中峯。本是鴻儒學說空。羅刹江頭潮未白。稽留峯下火先紅。青霄有路干丞相。紺殿無顏見大雄。若使斷江知此意。兩人握手泣西風。

又

西湖志餘。一日省相笑隱看潮。其日寺火。時恩斷江住虎邱寺。同日災。有僧爲詩戲之云云。

贈張伯雨

久聞方外有神仙。只住華陽古洞天。花徑不曾緣客掃。石床今許借僧眠。穿雲去汲燒丹井。帶雨來耕種玉田。一自茅君成道後。幾人騎鶴下蒼煙。

南濠詩話。張伯雨外史。晚居茅山。罕接賓客。一日有野僧來謁。童子拒之。僧云。語而主。吾詩僧也。胡爲拒我。乃爲入報。伯雨書老杜花徑不曾緣客掃之句。使持以示僧。僧略不運思。卽成詩云云。末二句頗涉譏刺。伯雨得詩大驚。延入置之上坐。留連數日。

又

絕句

百丈巖頭挂草鞋。流行坎止任安排。老僧腳底從來闊。未必骷髏就此埋。

又

年節

殘年節禮送紛紛。盡是豪門與富門。惟有老僧階下雪。始終不見草鞋痕。

七修類稿。嘗記元僧有詩云云。又一云云。予以當時忻笑隱。恩斷江無無極皆著名。斯時要如二詩。落脫高遠。夫豈可到。惜忘其名。

元詩紀事卷三十五

略妃

舞月歌

五華兮如織。照臨兮一色。麗正兮中域。同樂兮萬國。

元氏掖庭記。己酉仲秋。武宗與諸嬪妃。泛月於禁苑太液池中。月色射波。池光映天。綠荷含香。芬藻吐秀。游魚浮鳥。競戲羣集。於是畫鷁中流。蓮舟夾持。舟上各設女軍。居左者冠赤羽冠。服斑文甲。建鳳尾旗。執泥金畫戟。號曰鳳隊。居右者冠漆朱帽。衣雪氍毹。建鶴翼旗。執瀝粉雕戈。號曰鶴團。又綵帛結成採菱採蓮之舟。往來如飛。當其月麗中天。彩雲四合。帝乃開宴張樂。薦蜻翅之脯。進秋風之鱠。酌元霜之酒。唱華月之糕。令宮女披羅曳縠。前爲八展舞。歌賀新涼一曲。有略妃者。素號能歌。趨出爲帝舞。月照臨而歌云云。歌畢。帝悅其以月喻己。賜八寶盤。玳瑁盞。諸妃各起賀。

程一甯

元氏掖庭記。順帝宮嬪進御無紀。佩夫人貴妃印者不下百數。如淑妃龍瑞嬌。程一寧。戈小娥。麗嬪。張阿元。支祁氏。才人英英。凝香兒。尤見寵愛。宮中稱爲七貴云。

春夜吹笛詞

闌徑香銷玉輦蹤。梨花不忍負春風。綠窗深瑣無人見。自碾朱砂養守宮。

又

牙牀錦被繡芙蓉。金鴨香銷寶帳重。竹葉羊車來別院。何人空聽景陽鐘。

案此首元文類作馬祖常宮詞首四字作華清水殿。

又

淡月輕寒透碧紗。窗屏睡夢聽啼鴉。春風不管愁深淺。日日開門掃落花。

惜春詞

春光欲去疾如梭。冷落長門苔蘚多。懶上粧臺脂蓋蠹。承恩難比雪兒多。

元氏掖庭記。程一甯未得幸時。嘗於春夜登翠鸞樓。倚欄弄玉龍之笛。吹一詞云云。帝忽於月下聞之。問宮人曰。此何人吹也。有知者對曰。程才人所吹。帝雖知之。未召也。及後夜帝復遊此。又聞歌一詞云云。又繼一詞云云。又吹惜春詞云云。歌中音語咽塞。情極悲愴。帝因謂宮人曰。聞之使人能不悽愴。深宮中有人愁恨如此。誰得而知。蓋不遇者亦衆矣。遂乘金根車至其所。甯見龍炬簇擁。遂趨出叩頭俯伏。帝親以手扶之曰。卿非玉笛中自道其意。朕安得至此。攜手至柏香堂。命寶光天祿廚設開顏宴。進兔絲之膳。翠濤之酒。雲仙樂部坊奏鴻韶樂。列朱戚之舞。鳴雝之曲。笑謂甯曰。今夕之夕。情圓氣聚。然玉笛卿之三青也。可封爲圓聚侯。自是寵愛日隆。改樓爲奉御樓。堂爲天怡堂。

凝香兒

弄月曲

蒙衫兮蕊裳。瑤環兮瓊璫。泛予舟兮芳渚。擊余楫兮徜徉。明皎皎兮水如鏡。弄蟾光兮捉娥影。露團團兮氣清。風颼颼兮力勁。月一輪兮高且圓。華綵發兮鮮復妍。願萬古兮每如此。予同樂兮終年。

天香亭歌

天風吹兮桂子香。來閭闔兮下廣寒。塵不揚兮玉宇淨。萬籟泯兮金階涼。元漿兮進酒。兔霜兮爲脩。舞亂兮歌狂。君飲兮一斗。雞鳴沈兮夜未央。樂有餘兮過霓裳。吾君吾王兮壽萬歲。得與秋香月色兮。酬酌乎樽觴。

採菱曲

伽南楫兮文梓舟。泛波光兮遠夷猶。波搖兮舟不定。揚余袂兮金風競。棹歌起兮纖手揮。青角脫兮水潏潏。歸去來兮樂更誰。

採蓮曲

放漁舟兮湖之濱。剪荷柄兮折荷英。鴛鴦飛兮翡翠驚。張蓮葉以爲蓋兮。緝藕絲以爲衿。雲光淡兮微煙生。對芳華兮樂難極。返予棹兮山月明。

元氏掖庭記。凝香兒。本部下官妓也。以才藝選入宮。遂充才人。帝嘗中秋夜泛舟禁池。香兒着瑣里綠蒙之衫。瑣里夷名。產撒哈刺。蒙茸如氍毹。但輕薄耳。宜於秋時着之。有紅綠二色。至元間進貢。帝又命工以金籠之粧。出鸞鳳之形。製爲十人衫。香兒得一焉。又服玉河花蕊之裳。于闐國烏

玉河生花蕊草。採其蕊。織之爲錦。香兒以小艇蕩漾於波中。舞婆婆之隊。歌弄月之曲云云。帝復置酒於天香亭。香兒復易服趨亭前。昂鸞縮鶴而舞。乃歌云云。京城北三十里。有玉泉山。帝於夏月。嘗避暑於北山之下。曰西湖者。其中多荷蒲菱芡。帝以文梓爲舟。伽南爲楫。隨風輕漾。又作採菱小船。縛綵爲棚。木蘭爲槳。命宮娥乘之以采菱。爲水戲。時香兒亦在焉。帝命製採菱曲。使篙人歌之。遂歌水而剪青之調云云。篙人歌之。聲滿湖上。天色微曛。帝乃周遊荷閒。取荷之葉。或以爲衣。或以爲蓋。又命作採蓮之曲。於是調折新荷而歌云云。

順帝宮人

絕筆詩

君王慧性被奸迷。妾曾三諫觸闈墀。不能死守身先遁。致令鐘移社稷墟。

逐鹿記。元宮人至京師。將籍之。以給令後宮。有一人不屈。上言爾卽守節。何不死於元時。此女對曰。願明一言而死。以爲有名鬼耳。上令左右以紙筆與之。女寫云云。擲筆投地而死。

元詩紀事卷三十六

耶律夫人

夫人耶律履妻。楚材母。

案湛然居士集云。昔予從征。太夫人以髮少許賜予。則入元尙存。

挑燈教子哦新句。冷淡生涯樂有餘。

湛然居士集。太夫人昔有句云云。

張阿慶

阿慶。順天張萬戶德明第八女。小字度娥。

句

醒思昏昏如醉思。閨心寂寂似禪心。桃李東風蝴蝶夢。關山明月杜鵑魂。

續夷堅志。資質秀爽。眼尾入鬢。丙午秋。入小學。生七年矣。日誦數百言。比戊申二月。女史屬詞。孝經論語。孟子。易乾傳。至下繫。詩二南。曲禮。內則。少儀。中庸。大學。儒行。祭統。祭義。經解。冠婚諸篇。班氏女誡。郝氏內則。內訓通。喪記六卷。皆成誦。日兼二詩。古律至十篇。學書下筆。卽有成人之風。旦夕家居。見家人或不整肅。以禮責之。又所誦書多能通大義。時爲講說。其屬對才思敏捷。無小兒

女子語云云。識者謂此詩不佳。後日果得病。又四日亡。甫九歲。郝伯常爲詩弔之。

句

洗硯黑雲浮水面。折花紅雨落牆頭。滿地梨花三月暮。隔牆楊柳兩家春。秋水芙蓉粧鏡曉。暖煙楊柳畫屏春。

燕石集。張女挽詩序。女。汝南忠武王第八女。今翰林待制郝陵川口口口日誦數百言。尤工屬對。十歲卒。所屬對。今略附於後云云。江湖鷗鷺。不關名利也。風波野外。荆榛有底。功勳承雨露。驟雨翻空。滌世閒之塵垢。飛虹飲海。收天下之風雲。

管道杲

道杲。吳興人。道昇姊。嫁姚氏。

烏程縣志。列女附傳。道昇姊道杲。適南潯姚氏。亦善書畫。嘗爲道昇題畫。有手書觀世音普門品。孟頫題其後。姚氏之婦。世以書名稱爲韻事。

題仲姬墨竹

綠窗無長物。樹蕙與滋蘭。光風布淑氣。揚揚畹畝閒。窗外何所有。修竹萬千竿。密葉敷午陰。勁節當歲寒。方欣同臭味。且以報平安。吾妹忽來顧。綠紗生薄寒。慢結貽佩纓。重重青琅玕。寫真一揮灑。翰墨猶未乾。古意鎖長在。高風渺難攀。況有斐比德。懿名垂不刊。

履園叢話。世傳管仲姬墨竹最多。而真者絕少。憶於甲寅三月。余在錢塘。晤鮑葵飲先生於西湖。

寓中見一卷。當夫人傑作。後有夫人之姊名道杲者。嫁於姚。居南潯。一詩一跋。寫作俱妙。後跋云。至大二年四月二日。吾妹魏國夫人仲姬。見訪于南潯里第。宴坐君子軒。夫人笑曰。君子名軒。何以無竹。爰使奴磨墨。寫此幅于軒中。夫婦人之事。箕帚中饋刺繡之外。無餘事矣。而吾妹則無所不能。得非所謂女丈夫乎。爲吾子孫者。可不寶之。他日妹丈松雪來看。當可乞題詠也。姚管道杲識。

管道昇

道昇字仲姬。一字瑤姬。吳興人。趙孟頫妻。封魏國夫人。

松雪齋集。天子命夫人書千文。勅玉工磨玉軸。送祕書監裝池收藏。因又命余書六體爲六卷。雍亦書一卷。且曰。令後世知我朝有善書婦人。且一家皆能書。亦奇事也。又嘗畫墨竹。及設色竹圖。以進。亦蒙聖獎。賜內府上尊酒。

鄭媛記。管夫人性嗜蘭梅。下筆精妙。不讓水仙。有時對庭中修竹。亦自興至。不能自休。

荻樓雜抄。吾竹房嘗題其所畫竹石。竹房有一私印。是好嬉子三字。卽以此印倒用於跋尾。人皆以爲竹房之誤。魏公見之曰。這瞎子道婦人會作畫。倒好嬉子。

自題竹石

暮嶂遠含青。春光帶空碧。細看風前枝。拋書枕羅石。

好古堂書畫記。又趙氏一門。木石蘭竹卷一。爲子昂古木石竹。法唐人。款云。子昂作與淑安三娘。

一爲管夫人竹石自題云云。一爲仲穆蘭竹三幀皆有會稽馬氏圖書。蓋其所裒集也。

漁父詞

遙想山堂數樹梅。凌寒玉蕊發南枝。山月照。曉風吹。只爲清香苦欲歸。
南望吳興路四千。幾時回去雪溪邊。名與利。付之天。笑把漁竿上釣船。
身在燕山近帝居。歸心日夜憶東吳。斟美酒。鱸新魚。除卻清閒總不如。
人生貴極是王侯。浮利浮名不自由。爭得似。一扁舟。弄月吟風歸去休。

清河書畫舫吳興郡夫人。不學詩而能詩。不學畫而能畫。得於天者然也。此漁父詞。皆相勸以歸之意。無貪榮苟進之心。其與老妻強顏道。雙髻未全斑。何苦行吟澤畔。不近長安者異矣。皇慶二年十二月十八日子昂書。

寄子昂君墨竹

夫君去日竹初栽。竹已成林君未來。玉貌一衰難再好。不如花落又花開。

蘄石齋詩集題管夫人寄子昂君墨竹。注自題云云。管氏仲姬寫寄子昂君覽。

題畫

春晴今日又逢晴。閒與兒曹竹下行。春意近來濃幾許。森森稚子石邊生。

庚子銷夏記。管夫人畫竹。風格勝子昂。此幀凡三竿。極其蒼秀。自題一詩云云。字法似子昂。

自題畫竹

罷宴歸來未夕陽。鎖衣猶帶御爐香。侍兒不用頻揮扇。修竹蕭蕭生嫩涼。

瓜棚避暑錄。瑤林瑤口四巨冊。第十三幅。爲管夫人墨竹。自題云云。皇慶元年五月。朝興慶宮賜宴歸。作此幅付口女。書款云。天水仲姬。左方有天水郡圖記。

句

山迴新綺閣。竹掩舊朱門。

池北偶談。祁縣戴楓仲藏管夫人道昇小畫一幀。有細書十字云云。

万俟蕙柔

蕙柔。江南士人妻。

題壁

夫官湖右妾江東。三載孤幃日夕空。葵萼有心終向日。柳花無力苦隨風。兩行血淚孤燈下。萬里家鄉一枕中。雁到衡陽身卽返。有書難倩子卿鴻。

元詩癸集。遭北虜。被執至壽沙驛。題詩驛中。

杜氏婦

北行詩

北行幼女別鄉閭。一似昭君遠嫁胡。默默一身離故國。區區千里逐征夫。慵拈簫管吹羌曲。懶繫羅裙舞鷓鴣。多少眼前悲泣事。不堪花柳舊江都。

山房隨筆杜氏婦作北行詩云云此等多有戲作題之驛亭以爲美談

劉氏

賦庭柏

羣卉枯落時挺節成孤秀既保歲寒心不在遐年壽

山西通志張思孝妻華氏善詠爲貆高兵所執以不受辱見殺其婦劉氏乃僵壓姑尸大罵不已兵併殺之後家人殮其屍姑婦之手猶相持不釋劉有賦庭柏自況詩云云

陸蕙奴

蕙奴錢唐人

舟中漫成

耶孃重利妾身輕獨抱琵琶萬里行彈後月明人拍手不知元是斷腸聲

元詩癸集至元己丑胡參政自北歸於濟川得浙西船船上有詩末云錢唐陸氏蕙奴隨某官歸於宣德府漫成

張玉娘

玉娘字若瓊松陽人許字中表不果而卒有蘭雪集

山之高三章

山之高月出小月之小何皎皎我有所思在遠道一日不見兮我心悄悄

采苦采苦。於山之南。仲仲憂心。其何以堪。

汝心金石堅。我操冰霜潔。擬結百歲盟。忽成一朝別。朝雲暮雨心去來。千里相思共明月。

草木子近時有一婦人。姓張氏。不知誰氏之女也。善屬文。嘗寄外兄弟一詩云云。又云云。明月之詩。美則美矣。未免桑間濮上之音爾。

案蘭雪集。此三首係玉娘詩。草木子未詳。

塞下曲橫吹曲辭

寒入關榆霜滿天。鐵衣馬上枕戈眠。秋生畫角鄉心破。月度深閨舊夢牽。愁絕驚聞邊騎報。匈奴已牧隴西還。

塞上曲橫吹曲辭

爲國勞戎事。迢迢出玉關。虎帳春風遠。凱甲清霜寒。落雁行銀箭。開月響鏐環。三更豪鼓角。頻催鄉夢殘。勒兵嚴鐵騎。破虜燕然山。宵傳前路捷。遊馬斬樓蘭。歸書語孀婦。一宵私昵難。

從軍行

三十遊驍勇。從軍事北荒。流星飛玉彈。寶劍落秋霜。畫角吹楊柳。金山險馬當。長驅空朔漠。馳捷報明王。

幽州胡馬客

幽州胡馬客。蓮劍寒鋒清。笑看華海靜。怒振河山傾。金鞍試風雪。千里一宵征。鞭底揪羽箭。彎弓新月明。仰天墜鵬鵠。回首貫長鯨。慷慨激忠烈。許國一身輕。願繫匈奴頸。狼煙夜不驚。

自跋已上凱歌樂府俱閒中效而不成者也。丈夫則以忠勇自期。婦人則以貞節自許。妾深有意焉。

春思

玉勒雕鞍燕北春。閒愁空自惜芳塵。楊花入戶還飛去。應笑虛幃翠被新。
龍谿曰。怨而不怒。

暮春夜思

夜涼春寂寞。淑氣浸虛堂。花外鐘初轉。江南夢更長。野春鳴澗水。山月照羅裳。此景誰相問。飛螢入繡牀。
元詩選虞伯生讀至末句。拍案曰。此豈婦人所及。大爲當時所稱。

賈娉娉

娉娉。字雲華。

集唐絕句十首

兩行清淚語前流。千里佳期一夕休。倚柱尋思倍懊恨。寂寥燈下不勝愁。
相見時難別亦難。寒潮惟帶夕陽還。鈿蟬金雁皆零落。離別煙波傷玉顏。
倚欄無語倍傷情。鄉思撩人撥不平。寂寞閒庭春又晚。杏花零落過清明。
自從消瘦減容光。雲雨巫山枉斷腸。獨宿空房淚如雨。秋宵只爲一人長。
紗窗日落漸黃昏。春夢無心只似雲。萬里關山音信斷。將身何處更逢君。

一身憔悴對花眠。零落殘魂倍黯然。人面不知何處去。悠悠生死別經年。
眞成薄命久尋思。宛轉蛾眉能幾時。漢水楚雲千萬里。留君不住益淒其。
魂歸冥漠魄歸泉。卻恨青蛾誤少年。三尺孤墳何處是。每逢寒食一潸然。
物換星移幾度秋。鳥啼花落水空流。人間何事堪惆悵。貴賤同歸土一丘。
一封書寄數行啼。莫動哀吟易慘悽。古往今來只如此。幾多紅粉委黃泥。

剪燈餘話。魏鵬父巫臣。延祐初。參政江浙行省。父卒。歸襄陽。至正間。母命之錢塘。出書一緘。令訪
故賈平章鈞眷莫夫人。生私啓其封。知與彼有指腹之約。抵杭取書投上。因見女名娉娉字雲華
者。夫人令爲兄妹呼。留生住前堂外東廂房。娉娉亦厚屬生。二人時有出入唱和。得會合於娉處。
後生回應鄉試。領高薦。中會闈。廷試又在甲榜。授翰林應奉。心念雲華。因求外補。夫人以生少年
高擢。歎歷仕途。若以歸之。勢必攜去。喻生使他圖。娉銜恨死。先以手書囑春鴻寄謝魏生。折覽之。
乃集唐人詩。成七言絕句十首云云。

王嬌紅

嬌紅。蜀人。與中表申純善。訂生死之盟。爲婢飛紅所聞。父別許字帥子。嬌紅悲怨卒。純亦不食死。
寄申生

雲重月難見。風狂雨不成。尺書從寄意。傾淚若爲情。
送別二首

綠葉陰濃花正稀。聲聲杜宇勸君歸。相如千里悠悠去。不道文君淚濕衣。

永別

合懽帶上真珠結。箇箇團圓又無缺。當時把向掌中看。豈意今爲千古別。

寄別申生二首

如此鍾情古所稀。吁嗟好事到頭非。汪汪兩眼西風淚。獨向陽臺作雨飛。
月有陰晴與圓缺。人有悲懽與會別。擁爐細語鬼神知。拚把紅顏爲君絕。嬌紅記。

余氏

寄夫詩

妾誰怨兮薄命。一氣孔神兮化生。若飢春山娟兮秋水淨。秉貞潔兮妾之性。聊復歌兮遣興。
夜夢兮食梨。命靈氛兮與子占之。曰行道兮遲遲。斂角枕兮粲如。風動帷兮心而悲。
雲黯黯兮雪飛棘。夫子介兮如石。苦復留兮不得。望平原兮太息。涕泗橫兮沾臆。

送子去兮春樹青。望子來兮秋樹零。樹有枝兮枝有英。我胡爲兮煢煢。子在此兮山城。

織女兮牛郎。豈謂化兮爲參商。欲徑度兮河無梁。霜露侵襲兮。病偃在牀。嗟嗟夫子兮。誰與縫裳。

梧溪集。台州人余季女。善屬文。當元盛時。贅同郡水宗道。水具見余才。邁柳絮。學不若彼。辭歸。閉門讀書。余裁九章招之。水卒不聽。及余病且死。水夢余訣別。既訃。至今存五章云云。

吳氏

和鄭生

慈親未識意如何，不肯令君畫翠蛾。自是杏花開較晚，梅花占得舊情多。詳鄭禧下。

孫淑

淑字蕙蘭，新喻傅若金妻。

句

露下庭梧葉，風吹月桂花。登樓聞過雁，開戶見棲鴉。繡簾當雪捲，銀燭背風然。雪晴山顯翠，風暖水生紋。萱草當階綠，櫻桃落地紅。芍藥開時病，荼蘼落處愁。玉釵簪茉莉，羅扇繡芙蓉。窗前垂柳分春色，鏡裏幽蘭對曉粧。花間影過那知燕，柳外聲來不見鶯。慈親教婢回金剪，嬌妹嗔人奪繡絨。妝成寶鏡楊花過，行出珠簾燕子歸。自傾瓮裏春泉水，親灌階前石竹花。海棠帶雨胭脂重，楊柳凝煙翡翠濃。

輟耕錄傳汝礪先生嘗志其妻殯云云，及序其遺稿云，故妻孫氏蕙蘭，因其弟受唐詩家法於庭，取而讀之，得其音格，輒能爲近體五七言語，皆閒雅可誦，非苟學所能至者，然不多爲，又恒毀其藁，家人或竊收之，既卒，家人哭而稱之，因出其稿，得五言七首，七言十一首，未成章者廿六句，特爲編集成帙，題曰綠窗遺稿，未成章詩云云。

鄭允端

允端，字正叔，吳郡人，同郡施伯仁妻。

四庫全書存目。碧筩一首。結有云。可笑狂生楊鐵笛。風流何用飲鞮盃。然歸田詩話稱。維禎過宗吉家。以香奩八題見示。依其體作八詩以呈。維禎稱賞。因以鞮盃命題云。鐵崖香奩八詠。有自序稱。至正丙午。詠鞮盃。又必在丙午之後。以允端小傳考之。是時已沒十年矣。安得聞鞮盃之事。

桃花集句

細雨春寒江上時。小桃欹樹出疎籬。從教一簇開無主。終不留題崔護詩。

列朝詩集。楊循吉吳中往哲記云。女秀一人李氏。洪武間人有集一卷。警句曰。桃花一簇云云。此詩載鄭氏肅雎集中。錢惟善及杜寅爲敍傳曰。鄭氏居吳中。號花橋鄭家。嫁同郡施伯仁。能詩文。至正丙申。妖兵據城。家爲盜所破。年三十得疾卒。君謙博學多聞。而此詩屬諸李氏。豈偶失考耶。

劉氏

寄衣詩

情同牛女隔天河。又喜秋來得一過。歲歲寄郎身上服。絲絲是妾手中梭。剪聲自覺和腸斷。線脚那能抵淚多。長短只依先去樣。不知肥瘦近如何。

輟耕錄。洞庭劉氏。夫葉正甫。久客都門。因寄衣侑以詩云云。

韓氏

答外

碧紗窗下折緘封。一紙從頭徹底空。料想僊郎無別意。憶人長在不言中。

詩話雋永。士人郭暉，因寄安問，誤封一白紙去。細君得之，乃寄一絕云云。
山堂肆考：元吳仁叔妻韓氏，仁叔業大學，寄簡於妻，妻折簡，乃白紙一幅，遂題詩返附之云云。仁叔得詩，大披賞之，復答以詩。

李氏

巴家富

誰道巴家窘，巴家十倍鄒。池中羅水馬，庭下列蝸牛。燕麥紛無數，榆錢散不收。夜來添驟富，新月挂銀鈎。

詩話雋永。李黨學次女適巴，長適鄒，巴貧甚，李亦安之。嘗戲作詩云云。

山堂肆考：元時李氏女適巴，長卿，甚貧，女亦安之。諸姊妹中有適鄒者，甚富，而笑之。巴妻遂作巴家富詩。

案以上二詩，據肆考，顯係元人，而亦見崖下放言。又疑宋人，前首一詩，放言作郭暉妻，而肆考以爲吳仁叔妻，并著其爲韓氏，與仁叔業太學，復答以詩各等語，則較詳，而當別有所據矣。其亦見放言者，或後人誤歸入也。

萬氏

詠枕上繡梅

瀟灑英標別一奇，歲寒心事有誰知。妾心正欲同貞白，枕上殷勤繡一枝。

草木子：處之龍泉縣飛溪，李君問妻萬氏，守節不再適。詠枕上繡梅詩云云。

吳氏

氏伯固女昭武人

寄外

昔君曾奏三千牘。凜凜文風誰敢觸。鄉老薦賢親獻書。邦侯勸駕勤推轂。馬頭三控登長途。謂君此去離
場屋。整頓羅裳出送君。珠淚盈盈垂兩目。枕前一一向君言。馬頭猶自叮嚀囑。青衫寸祿早榮歸。莫遣妾
心成局促。秋天冬暮風雪寒。對鏡懶把金蟬簇。夢魂夜夜到君邊。覺來寂寞鴛鴦獨。此時行坐閒窗紗。忍
淚含情眉黛蹙。古人惜別日三秋。不知君去幾多宿。山高水闊三千里。名利使人復爾爾。昔年曾撥伯牙
絃。未遇知音莫怨天。去年又奏相如賦。漢殿依前還不遇。時人不知雙字訛。平川倏忽起風波。當時南宮
罷捷音。教妾沉吟杵中心。爲君滴下紅粉淚。紅羅帳裏濕鴛衾。憤憤調琴蟬鵲噪。默默吟詩怨桂林。千調
萬撥不成曲。爭那胸中氣相掬。千思萬想不成詩。心如死灰自得知。料得君心當此際。已拚拋卻閒田地。
朝朝暮暮望君歸。日在東隅月在西。碧落翩翩飛雁過。青山切切子規啼。望盡一月復一月。不見音容寸
腸結。又聞君自河東來。夜夜不教紅燭滅。雞鳴犬吠側耳聽。寂寂不聞車馬音。自此知君無定止。一片情
懷冷如水。既無黃耳寄家書。也合隨時寄雁魚。日月逡巡又一年。何事歸期竟杳然。堂上雙親髮垂白。用
盡倚門多少力。孟郊曾賦游子行。陟岵如何不見情。室中兒女亦雙雙。頻問如何客異鄉。異鄉知是育才
處。人情不免且契慕。低頭含淚告兒女。遊必有方況得所。八月涼風滿道途。好整征鞍尋舊路。吾鄉雖多
俊秀才。往往怕君頭角露。聖朝飛詔下來春。青氍早早慰雙親。飛龍公道取科第。男兒事業公卿志。筆下

密密爲君言。書中重重寫妾意。秋林有聲秋夜長。願君莫把斯文棄。

元詩癸集。其夫詣闕上書稱旨。送太學三年不回。吳氏作詩寄之。未幾天子幸學。夫受職東歸。
曹妙清

妙清字比玉。號雪齋。錢塘人。

東維子集。余居錢塘。聞女士有曹雪齋者。以才謂稱於人。嘗持所著詩文若干篇。介爲其師者邱公以見。自陳幼獲晉於酸齋貫公。恕齋班公。而猶未及見先生也。幸先生賜一言以自勵。今年余在吳興。復偕乳母訪余洞庭太湖之上。爲余歌詩鼓琴。以寫山川荒落之悲。引關雎。朝雉。琴操。以和白雪之章。余默諗雪齋氏之善人倫。風操述作。又其餘爾。

西湖竹枝詞

美人絕似董嬌嬈。家住南山第一橋。不肯隨人過湖去。月明夜夜自吹簫。

西湖竹枝集。士女曹妙清。字比玉。自號雪齋。錢塘人。善鼓琴。工詩章。三十不嫁。而風操可尙。觀其所賦竹枝詞。可識其人焉。行書點畫皆有法度。嘗寫詩寄予。答之云。紅牙管蒂紫狸毫。雪水初融玉帶袍。寫得薛濤萱草帖。西湖紙價頓能高。

蟬精雋。元時錢塘曹妙清。其事母尤孝謹。鐵崖答詩云云。玉帶袍。蓋其家硯名也。

張妙淨

妙淨字惠蓮。錢塘人。居姑蘇春夢樓。號自然道人。

西湖竹枝詞

憶把明珠買妾時。妾起梳頭郎畫眉。郎今何處妾獨在。怕見花間雙蝶飛。詳燕不花下。

蟬精雋。張妙淨善詩。曉音律。晚居姑蘇之春夢樓。號自然道人。有竹枝詞云云。以詩觀之。曹乃處子之言。公羊氏所謂猶有童心也。張則拳拳舊主。執心不二。其操亦可尙焉。

薛蘭英蕙英

蘇臺竹枝曲十首

姑蘇臺上月團圓。姑蘇臺下水潺潺。月落西邊有時出。水流東去幾時還。
館娃宮中麋鹿遊。西施去泛五湖舟。香魂玉骨歸何處。不及真娘葬虎邱。
虎邱山上塔層層。靜夜分明見佛燈。約伴燒香寺中去。自將釵釧施山僧。
門泊東吳萬里船。烏啼月落水如煙。寒山寺裏鐘聲早。漁火江楓惱客眠。
洞庭金柑三寸黃。笠澤銀魚一尺長。東南佳味人知少。玉食無緣進上方。
荻棟抽筍棟花開。不見河豚石首來。早起腥風滿城市。郎從海口販鮮回。
楊柳青青楊柳黃。青黃變色過年光。妾似柳絲易憔悴。郎如柳絮太顛狂。
翡翠雙飛不待呼。鴛鴦並宿幾曾孤。生憎寶帶橋頭水。半入吳江半太湖。
一綈鳳髻綠於筠。八字牙梳白似銀。斜倚朱門翹首立。往來多少斷腸人。
百尺高樓倚碧天。曲曲畫屏連。儂家自有蘇臺曲。不去西湖唱采蓮。

剪燈新話。吳郡富室。有姓薛者。至正初。居於閭閻門外。以糴米爲業。有二女。長曰蘭英。次曰蕙英。皆聰明秀麗。能爲詩賦。遂於宅後建一樓。以處之名曰蘭蕙聯芳之樓。有詩數百篇。號聯芳集。時會稽楊鐵厓作西湖竹枝曲。和之者百餘。鏤板書肆。二女見之。笑曰。西湖有竹枝曲。東湖獨無竹枝曲乎。乃製蘇臺竹枝曲十章云云。

盛貞一

貞一。馬彥奇妻。早寡。

梅花

古枝點點類瑤瑰。不假天工爲剪裁。月夜孤標憐晚景。冰溪瘦骨絕塵埃。寒香泣雨魂難返。貞節凌霜志莫回。桃李未曾爭艷冶。半窗疎影自徘徊。

元詩癸集有三男一女。家甚貧。以指取漬麻水作點畫教其子。自述詩有云。一經教子丹心苦。半世紉箴白髮新。又爲梅花詩。多以自況。至正閒避亂居華巖。

趙氏

謝世詩

九重縹緲黃金闕。十二玲瓏白玉樓。明朝了却人間夢。獨跨青鸞自在遊。

梧溪集。南臺掾趙晉女。生而多病。愛讀列仙傳。人請婚。輒謂母辭之。一夕題詩云云。端坐而逝。

陳氏

聞雁

浪喜燈花落又生。夜寒頻放剪刀聲。游鴻不寄征夫信。顧影娉婷無限情。

梧溪集。右婦陳題於華亭戍壁。陳儒家女。夫本縣曹吏。因兵亂隸軍籍。久在外。

范秋蟾

秋蟾。台州人。

弔秦不華

江頭沙磧正交舟。江上懷人百戰憂。力屈杲卿生罵賊。功成諸葛死封侯。波濤洶洶鯨橫海。天地寥寥鶴怨秋。若使臨危圖苟免。讀書端爲丈夫羞。

湧幢小品。范秋蟾者。台州塘下戴氏妻也。琴棋書畫。靡所不精。尤工音律。一日。其夫與客同賦詩。弔秦不華。未就。秋蟾出一律云云。

賈蓬萊

蓬萊。揚州江都人。初與上官粹議婚。後許字林氏子。林死。歸上官。至正閒。隨宦閩中。盜起。一門被戕。賈亦自刎死。有絮雪稿。

龍劍合曲

龍劍埋沒獄閒久。巨靈晝衛鬼夜守。蛟螭藏。魍魎走。紫焰煌煌射牛斗。影含秋水刃拂霜。司空照之識早有。豐城發函留其良。千歲純鈎始分首。龍劍靈。是龍精。瑩如鵬尾搖清冰。雄作萬里別。雌復千古情。會當

逐風雷。相尋入延平。天遣雷煥兒。佩之大澤濱。鏗然一躍同駿奔。駭浪驚濤白晝昏。始知神物自有偶。千秋萬歲肯離羣。

剪燈餘話。蓬萊雖爲父母許他姓。然非其意也。粹念蓬萊之意雖堅。而林氏之聘終不可改。乃賦鳳分飛曲以寄之。蓬萊讀之垂泣曰。嗟呼。郎尙下余諒也。乃作龍劍合曲答之。示終身相從之意。

趙鸞鸞

鸞鸞字文鶴。東平人。初嫁繆氏子。無人道。復嫁柳穎。至正中陷於寇。拔歸。隱徂徠山。穎遇賊被害。鸞鸞罵賊死。

悲笳四拍

我生之初尙無爲。我生之後元運衰。夫與妻兮忽仳離。父與母兮生死安可知。狼煙四起兮沸鼓鼙。鋒鏑成林兮盛旌旗。人民塗炭兮城郭壞。禮義滅亡兮法度隳。身流落兮天一涯。腸欲絕兮心孔悲。山可平兮河可塞。妾怨苦兮無窮期。

蜂蟻屯聚兮豺虎嗥。心毒狠兮體腥臊。煙塵瀕洞兮人竄逃。寒沙暴骨兮沒蓬蒿。亡家遇亂傷吾曹。義重命輕兮如鴻毛。誓捐此生兮期弗辱。仰天俯地兮獨煩勞。

棄賢俊兮逐兇惡。東西轉徙兮卒無寧居。貪淫是樂兮殺戮是娛。所在剽掠兮所過爲墟。發墳墓兮焚燬室廬。閨門孱弱兮被虜驅。舍生取義兮捐微軀。誰云女婦兮丈夫弗如。

行處坐處兮思念我鄉曲。地角天涯兮不見我骨肉。姑亡舅沒兮家傾覆。逃竄苟活兮被驅逐。伉儷離背

今何時復幸茲陋軀。今得免汚辱。誰爲義士。今揮金玉。歌行路兮。妾身贖。

剪燈餘話。至正戊戌。田豐破東平。穎與鸞相失。已而毛貴復陷東昌。留僞將俞左丞者鎮守。俞頗知道理。凡所掠男女。出榜召人認識給還。穎聞之。意鸞或在彼。衝冒白刃求之。知在周萬戶處。因一巫媼探之。果得鸞。鸞密出一緘付媼。媼以授穎。題曰悲笳四拍云云。乃就懇媼請于萬戶夫人。贖歸。

劉翠翠

翠翠。淮安人。

和金生

平生每恨祝英臺。懷抱何爲不早開。我願東君勤用意。早移花樹向陽栽。

剪燈新話。翠翠姓劉氏。淮安民家女也。生而穎悟。能通詩書。父母不奪其志。就令入學。同學有金氏子者。名定。與之同歲。亦聰明俊雅。諸生戲之曰。同歲者當爲夫婦。二人亦私自許。金生贈翠翠詩云。翠翠和云云。

縫衣領詩

一自鄉關動戰鋒。舊愁新恨幾重重。腸雖已斷情難斷。生不相從死亦從。長使德音藏破鏡。終教子建賦游龍。綠珠碧玉心中事。今日誰知也到儂。

剪燈新話。翠翠年長。父母爲議親。輒悲泣不食。以情問之。久乃曰。西家金定。妾已許之矣。父母不

得已而聽焉。劉富金貧，贅於其家。結婚之夕，翠翠於枕畔作臨江仙一闋贈生，邀生繼和。二人相得之樂可知也。未及一載，張士誠兄弟爲亂，女爲其部下李將軍所掠。至正末，士誠納款元朝，生乃往來江湖，訪求其妻。李將軍方威焰隆赫，乃僞爲兄妹，得相見於廳前，不能措一詞，但哽咽而已。將軍亦留生充記室，荏苒數月，西風夕起，乃成一詩，題片紙，縫於衣領，託小豎付其妹。折而縫，綴翠翠解其意，折衣詩見，別爲一詩云云，亦縫於衣領，付出生。得詩愈加抑鬱，遂感沈疾。翠翠請於將軍，始得至床前一訣。將軍憐葬之，翠翠送殯歸得疾，一月卒。臨終乞埋骨兄側，使泉下庶有依托。將軍不違其意，宛然東西二丘_正。

曠家婦

題壁

涇渭能分濁與清，妾身豈肯墮風塵。孤兒未必從他姓，一女何曾侍二人。白刃自傷心似鐵，黃泉要見骨如銀。深山落日猿啼處，過客聞之亦慘神。

草木子：至正壬辰，紅巾盜起，江西吉安敖城曠家婦，爲盜所得，欲妻之。婦乃先刃其子，題詩於壁，亦自盡。

案江西通志：作廬陵人曠維禎妻。

徐綵鸞

被掠詩

萬水千山去路賒。青鞋踏破幾層沙。登山絕頂重逢嶺。渡水尤深又復涯。雁字只傳夫與子。魚書難寄母和爺。回頭遙望鄉關處。雲下峯前是我家。

草木子。至正乙未。青田寇侵浦城西北隅。徐嗣元女爲所掠。嘗作詩云云。寫顛沛流離之狀。

惟有桂林橋下水。千年照見妾心清。

浦城縣志。徐綵鸞。字叔和。浦城人。徐嗣源之女。李文景妻。略通經史。每誦文天祥六噫歌。歔歔泣下。至正十五年。青田賊寇浦城。氏從父逃山谷。俱爲賊所掠。賊持刀欲害其父。氏直前願代父死。賊乃釋父而縶氏。氏顧語父曰。兒義不受辱。必死。父可速去。賊拘氏至桂林橋。氏拾炭題詩壁間云云。遂厲聲罵賊。投橋下。賊競出之。旣而乘間復投水死。

何氏

裂帛題詩

妾長朱門十九春。豈期今逐虜囚奔。失身無補君王事。死節難酬夫壻恩。江靜從教沈弱質。月明誰與弔歸魂。只愁父母難相見。願與來生作子孫。

草木子。元至正間。衢州陷。龍游有一大家婦何氏。爲兵所掠。裂帛題一詩云云。書畢。卽投於江而死。

胡妙端

嚙指題壁

弱質空懷漆室憂。搜山千騎入深幽。旌旗影亂天同慘。金鼓聲淫鬼亦愁。父母劬勞何日報。夫妻恩愛此時休。九泉有路還歸去。那個雲邊是越州。

輟耕錄。越嵎縣刻溪胡氏。諱妙端。適同邑祝某。至正庚子春。爲苗獠虜。至金華縣。將妻之。義不受辱。乘間嚙指血。題詩壁上。已赴水而死。獠帥服其節。爲立廟祀之。詩云云。

董淑貞。餘干人。譚友妻。

托歌

天蒼蒼兮。不吾家造。地茫茫兮。不吾身容。不造不容。托乎火以相從。

江西通志。紅巾亂。友與父母兄弟被殺。土渠欲污之。作托歌云云。乃縱火入烈燄死。

元詩紀事卷三十七

元氏

詠天花板

補天手段暫施張。不許纖塵落畫堂。寄語新來雙燕子。移巢別處覓雕梁。

誠齋雜記。元遣山妹爲女冠。文而艷。張平章當揆。欲娶之。使人囑裕之。辭以可否在妹。張喜。自往訪。觀其所向。至則方自手補天花板。輟而迎之。張詢近日所作。應聲答云云。張悚然而出。閨秀詩評。清貞之意。因物觸發。足令觀者起敬。

李翠娥

庭前梅樹

粲粲梅花樹。盈盈似玉人。甘心對冰雪。不愛艷陽春。

覓燈因話翠娥姓。李氏淮揚名倡也。長通詩書。自身隸樂籍。怨恨殊不聊生。至元二年。雲間陸公宅之。爲揚州總管。一日以官召之。不得已至。命之歌。對曰。幼時未習。公怫然曰。然則汝習何事。曰。學讀史漢等書。公曰。汝能識字。必能賦詩。因指庭前梅樹爲題。翠娥口占云云。公奇之。乃賜之坐。居無何。翠娥束髮簪冠。披道士服。持疏赴公。拜懇賜一言。公援筆作檄文一道授之。翠娥遂終其身於洞真觀。

元詩紀事卷三十八

妙湛

妙湛大德間人。

題管夫人長明菴圖

雙樹陰陰落翠巖。一燈千古破幽關。也知諸法皆如幻。廿老煙霞水石閒。

珊瑚網。管夫人長明菴圖。菴居曠野。垣內有屋三層。橫廊通門徑。豎杆懸一燈。所謂長明也。旁有石蓮臺。作施鳥食者。垣外二長松下。廡又一樹參之。門外坡臨水際。水閒復有坡樹。墨氣高古。無兒女子態。夫人款云。大德九年冬十一月廿五日。仲姬管道昇作。有比邱尼妙湛詩云云。小行書題其上。此尼想卽菴畫中人也。

梅花尼

詠梅花

終日尋春不見春。芒屨踏破嶺頭雲。歸來笑撚梅花嗅。春在枝頭已十分。
紅樹瘡。歷朝名媛詩詞未詳姓氏。梅花絕句。人皆稱善。因號梅花尼。詩有悠然自得之趣。此尼直已悟道。不特詩句之佳也。

元詩紀事卷三十九

徐氏

座上題詩

平康巷裏掌中身。翠舞珠歌玉樹春。不得籍除今義死。天教娼婦愧降臣。

元史類編。徐娼婦不知何許人。紅巾寇常州。有叛將召婦佐飲。婦憤懣不聽指使。題詩座上云云。叛將寸磔之。

案梧溪集。以爲龍江章琬孟文詩。未知孰是。

羅愛卿

愛卿嘉興名妓。

凌虛閣避暑玩月四首

畫閣東頭納晚涼。紅蓮不似白蓮香。一輪明月天如水。何處吹簫引鳳凰。
日出天邊水在湖。微瀾倒浸玉浮圖。舉簾欲共嫦娥語。卻恨林間鳥亂呼。
手弄雙頭茉莉枝。曲終不覺髻雲欹。珮環響處飛仙過。願借青鸞一隻騎。
曲曲欄干正正屏。六銖衣薄嬾來凭。夜深風露涼如許。身在瑤臺第一層。

剪燈新話。郡中名士嘗以季夏望日。會於鴛湖凌虛閣。避暑翫月。賦詩。愛卿先成四首。坐間皆開。

筆詩云云

暨氏

句

多情樵牧頻簪髻。無主蜂鶯任宿房。

七修類稿元末建安暨氏女。十歲能詩。人令賦野花云云。識者知後不潔。此卽薛濤父愀然之事。後果然。

元詩紀事卷四十

阿蓋主以下滇南

主段功妻

愁憤詩

吾家住在雁門深。一片閒雲到滇海。心懸明月照青天。青天不語今三載。欲隨明月到蒼山。悞我一生踏裏彩。錦被名也。吐嚕吐嚕段阿奴。吐嚕可惜也。施宗施秀同奴歹。歹不好也。雲片波鱗不見人。押不蘆花顏色改。押不蘆北方起死回生之草。肉屏獨坐細思量。肉屏駱駝背也。西山鐵立霜瀟瀟。鐵立松林也。

滇載記。九代總管段功。至正十三年。繼立爲總管。明玉珍自將紅巾攻雲南。梁王及憲司官皆奔威楚。諸部悉亂。功收紅巾。梁王深德功。以女阿蓋妻之。其大理夫人高氏。寄樂府促之歸。功得書乃歸。既而復往。梁人私語梁王曰。段平章復來。大有吞金馬嘯碧雞之心矣。蓋早圖之。梁王密召阿蓋命之曰。親莫若父母。寶莫若社稷。功今志不滅我不已。脫無彼。猶有他平章。不失富貴也。今付汝孔雀膽一具。乘便可毒殪之。主潛然受命。夜寂。私語平章曰。我父忌阿奴。願與阿奴西歸。因出毒具示之。平章曰。我有功爾家。我趾蹶傷。爾父爲我裹之。爾何造言至此。三諫之。終不聽。明日邀功東寺演梵。至通濟橋。馬逸。因令蕃將格殺之。阿蓋聞變。失聲哭曰。昨暝燭下。纔講與阿奴。雲南施宗施秀煙花殞身。今日果然。阿奴雖死。奴不負信黃泉也。欲自盡。梁王防衛者乃萬方。主愁。

憤作詩云云。

楊淵海

題壁

半紙功名百戰身。不堪今日總紅塵。死生自古皆由命。禍福于今豈怨人。蝴蝶夢殘滇海月。杜鵑啼破點蒼春。哀憐永訣雲南土。錦酒休教灑淚頻。

演載記。平章從官員外楊淵海亦題詩粉壁。飲藥而卒。詩云云。梁王愛淵海之才。倦意欲爲己用。見詩痛悼。乃厚恤之。

段寶

寄梁王

烽火狼煙信不符。驪山舉戲是支梧。平章枉死紅羅帳。員外虛題粉壁圖。鳳別岐山祥兆隱。麟游郊藪瑞光無。自從界限鴻溝後。成敗興衰不屬吾。

演載記。大理十代總管段寶。功之子。明玉珍復侵善闡。梁王遣叔鐵木的罕借兵大理。時寶已長。答書云。殺虎子而還喂其虎母。分狙栗而自詐其狙公。假途滅虢。獻璧吞虞。金印玉書。乃爲釣魚之香餌。繡閨淑女。自設掩雉之網羅。況平章已亡。兄弟罄絕。今止遣一嫠一奴。奴再贅華黎氏。嫠又可配阿懿妃。如此事。諸必借大兵。如其不可。待金馬山換作點蒼山。昆明池改作西洱河。時來矣。書後附以詩云云。梁王見而恨之。

段僧奴

寄兄詩二首

珊瑚勾我出香閨。滿目潸然淚濕衣。冰鑑銀臺前長大。金枝玉葉下芳菲。烏飛兔走頻來往。桂馥梅馨不暫移。惆悵同胞未忍別。應知含恨點蒼低。
何彼穠穠花自紅。歸車猶別洱河東。鴻臺燕苑難經目。風刺霜刀易塞胸。雲舊山高連水遠。月新春疊與秋重。淚珠却似通宵雨。千里關河幾處逢。

演載記。平章女僧奴。志恆不忘父讎。將適建昌阿黎氏。出手刺繡文旗。以與寶曰。我自束髮聞母稱父冤。恨非男子。不能報此旗。所以識也。今歸夫家。收合東兵。飛檄西洱。汝急應兵。會善闡。又作詩二首云云。

段明

句

方今天下平猶易。自古雲南守獨難。

炎徼紀聞。段寶卒。子明。以洪武十四年繼爲宣慰使。壬戌春。上遣潁川侯傅友德。西平侯沐英。將兵破善闡。梁王把都鴆死。段明懼。乃馳書友德等。略曰。大理乃唐交綏之外國。善闡實宋斧畫之餘邦。地莫能酬中國之郡邑。民莫能列中國之營屯。征之而徒勞甲兵。寬之而海納鱗介。乞依唐宋故事。頒降雲南玉印一顆。大統歷一本。律令一部。比年小貢。三年大貢。則君臣之閒。兩無猜疑。

上下之分。各安勞逸。友德怒。撻辱其使。諭令速降。明再上書。其略曰。善闡危如登天。大理險倍投海。自古以講和爲上。全師爲奇。大國既有其兵。小國亦有其備。迨乎糧盡馬死。將獨兵離。爲天下笑。書後附以詩。有云云。句。友德等大怒。督兵並進。明兵大敗。擒俘京師。雲南悉定。分置府縣。比之中州矣。

案。段明始終不降。當歸元藩屬。

陳日照以下安南

宋史。吳昌卒。無子。以女昭聖主國事。遂爲其婿陳日照所有。

案。吳昌李氏。安南國王。

元史。安南列傳。憲宗三年。烏蘭哈達兵次交趾北。先遣二人往諭之。不返。乃分道進兵。遂入其國。八年。日照傳國於長子光昺。光昺遂納款。

案。史作日照。而齊東野語安南傳皆作日照。

句

池魚便作鵲鵬化。燕雀安知鴻鵠心。

齊東野語。安南國王陳日照者。本福州長樂邑人。姓名爲謝升卿。少有大志。不屑爲舉子業。間爲歌詩。有云云。類多不羈語。

陳日照

日烜光。曷子元世祖時自立。薨諡聖王。道號大虛子。

安南傳。元兵凡三破國。殺獲幾十萬。然終不可久。而日烜亦進代身金人贖罪。詔止不伐。

遊天長故鄉

景清幽。物亦清幽。一十仙洲此一洲。百部笙歌禽百舌。千行奴僕橘千頭。月無事。照人無事。水有秋。涵天有秋。四海已清塵已淨。今年游勝去年遊。

南翁夢錄。陳氏第二代王曰聖王。既傳位世子。晚年頗閒適。嘗遊天長故鄉。有詩云云。此詩作時。蓋經元軍兩度征伐之後。國中安樂。故結意如此。其命意清高。疊字振響。非老於詩者。焉能道此。

陳日煊

日煊。日烜子。諡仁王。

南翁夢錄。仁王既傳位世子。乃出家修行。刻苦精進。爲一方祖師。菴居安子山紫霄峯。自號竹林大士。

詠梅

五出圓葩金撚鬚。珊瑚沈影海鱗浮。個三冬白枝前面。此一瓣香春上頭。甘露歌凝癡蝶醒。夜光如水渴禽愁。嫦娥若識花佳處。桂冷蟾寒只麼休。

山房漫興

誰縛更將求解脫。不凡何必覓神仙。猿閒馬倦人應老。依舊雲莊一榻禪。

是非言逐朝花落。名利心隨夜雨寒。花盡雨晴山寂寂。一聲啼鳥又春殘。

南翁夢錄。竹林大士詠梅云云。其清新雄健。迥出人表。千乘之君。趣興如此。誰謂人窮。詩乃工乎。又山房漫興二絕句云云。其瀟灑出塵。長空一色。騷情清楚。逸足超羣。有大香海印集。頗多絕唱。惜其地遭兵火。不得流傳。余只記誦一二而已。

口占

紅潤剝龜腳。黃香炙馬鞍。山僧持淨戒。同坐不同餐。

南翁夢錄。陳太上之孫。名道載。號文肅者。仁王之從弟。仁王出家。一時入城。文肅來謁。命官廚以海味食之。笑語盡歡。王口占云云。觀其君臣兄弟。相得如此。足感激也。

陳日燿

日燿。日燿子。諡明王。

案南翁夢錄。安南陳氏第八代王。諱叔明。明王第三子。知明王爲第七世。而安南傳云。日燿卒。子日套嗣。日套卒。子日燿嗣。日燿卒。子日燿嗣。日燿爲第三世。知第七世名日燿。賜范邁。

臺烏久矣。噤無聲。整頓朝綱事匪輕。殿上昂藏鷹虎氣。男兒到此是功名。

南翁夢錄。明王叔父爲上宰。傳國柄。不避嫌疑。且與宰執有隙。適仇人上變。告誣搆上宰。國相率百官彈劾。議置大辟。獨范邁爲御史中丞。固請緩獄。慎刑。時上宰被收。而家臣僚屬。親戚奴僕下。

獄殺戮甚衆。邁連上諫疏。面折法司。辯析冤屈。人主威怒之削。力爭不已。王叔既幽死。後得誣構實跡。坐其姦人。王甚慚愧。追贈叔父極隆。乃賜邁詩云云。

世子

句

自顧不才慙錫土。只緣多病欠朝天。

兩山集。世子和前韻有云云之句。卽席次韻。

案李兩山思衍使安南。在世祖時。此世子當是聖王之子日煊。頗能詩。然未詳也。

陳遂

遂號岑樓。

句

古來何物不成土。死後惟詩可勝金。山豈忍埋成器玉。月空自照少年魂。

安南志略。陳遂。陳大王甥。封威文王。聰明好學。自號岑樓。有文集傳世。詩云云。輓姪文憲侯云云。遂年二十四卒。國人惜之。

句

簞笠五湖榮佩印。桑麻數畝勝封侯。詳阮忠彥下。

陳秀峻

秀峻字粹山安南國王姪。武道侯子。封文紹侯。更文義侯。

句

三世八喪千古痛。一身萬里百年孤。

元詩癸集至元閒。元兵至安南。勸其父歸順。途中見出國道亡者。作八悼章。有云云。至京師。詔封輔義公。

陳元旦

寄臺中寮友

臺端一去便天涯。回首傷心事事違。九陌塵埃人易老。五湖風雨客思歸。儒風不振回無力。國勢如懸去亦非。今古興亡真可鑒。諸公何忍諫書稀。

南翁夢錄。至正間。交趾陳元旦。以陳家宗冑。仕裕王。爲御史大夫。王不勤政。權臣多不法。元旦數諫不納。裕王沒。其姪皆德嗣立。時事愈甚。元旦上書不報。乃乞骸骨而去。有寄臺中寮友云云。

陳愛山

絕句

寶鼎香消沈水煙。碧紗春帳薄如蟬。洞章吟罷愁成海。人在闌干月在天。

又

牕畔香雲暗碧紗。平分午睡不禁茶。相思在望登樓怯。一樹木棉紅盡花。

南翁夢錄。陳家宗冑。有號愛山者。多吟小詩。時有麗句。嘗有云云。又云云。

黎崱

崱字京高。號東山。安南人。九歲試童科。陳大王留左右。官至僉歸化路宣撫司事。晚自號靜樂。入中國垂五十年。著有安南志略二十卷。靜樂藁若干卷。

內附

十丈樓船下粵瀧。將軍繫組列城降。中朝一統有今日。南國小臣如此江。自入羽毛州賦後。須忠鱗介土飛光。當年百歲秦佗老。何事詩書滯一邦。

安南志略自注。至元甲申。官軍入境。世子遣兄子彰憲侯。率崱等拒之。力屈遂降。

黎括

字伯括。清化人。

送友人使元

驛路三千君據鞍。海門二十我還山。中朝使者滄江客。君得功名我得閒。

南翁夢錄。其友人爲官者。當元季時。奉使燕京。括送之云云。識者知括將貴。後括登科。果驟遷擢居政府。先於其友云。

范邁

絕筆

自從謫落人間。六十餘年一瞬看。白玉樓前秋夜月。朝眞依舊傍闌干。

南翁夢錄。范遇。范邁。不姓祝氏。交趾莊仁人也。兄名堅。弟名固。皆少年登高科。有才名。至正間。在陳明王歷官清要。王以祝氏古無顯人。乃改祝堅爲范邁。同爲范邁。邁遷參知政事。在政府多年。有清名。一日微恙。索筆題詩云云。書畢擲筆而逝。有鏡溪詩集行世。

阮忠彥

追挽陳岑樓

平生恨不識岑樓。一讀遺編一點頭。簞笠五湖榮佩印。桑麻數畝勝封侯。世間此語誰能道。萬古斯文去已休。欲醉騷魂何處是。煙波萬頃使人愁。

南翁夢錄。陳家宗。有號岑樓者。弱冠能詩。二十七歲而卒。有岑樓集行于世。墳在烏薦江上。介軒阮忠彥亦有詩名。不及相識。行過烏薦。有追挽詩云云。簞笠五湖一聯。是岑樓詩句也。

句

介軒先生廟廊器。茂齡已有吞牛志。年方十二太學生。纔登十六充廷試。二十有四入諫官。二十有六燕京使。

南翁夢錄。阮忠彥早有才名。頗自負。嘗有長篇詩。其略云云。其自負矜伐如此。然事陳明王。歷樞要。登政府。卒有令名。有介軒集行世。

阮聖訓

句

巢鳥寄林休伐木。蟻封在地未耕田。

南翁夢錄。澄太父之外祖曰阮公。諱聖訓。事陳仁王爲中書侍郎。性甚仁厚。少年登高科。最能詩。當時無敵。後人稱爲南方詩祖。嘗有田園漫興詩。其一聯云云。識者歎其仁心及物。必有餘慶。後其女配我曾祖。生大父。及陳明王次妃。妃生藝王。卒有贈典。尊榮門閥。

范五老

絕句

橫槩江山恰幾秋。三軍貔虎氣吞牛。男兒未了功名債。羞聽人間說武侯。

南翁夢錄。范五老事陳仁王。爲殿帥上將軍。平生出身戎行。頗好讀書。倜儻有大志。喜吟詩。於武事若不經意。然所領軍。必爲父子之兵。每戰必勝。嘗有詩云云。

圓照

句

籬下重陽菊。枝頭淑氣櫻。

安南志略。梅圓照禪師。嘗作參從題訣。略云。一日堂前坐次。忽有僧問佛之與聖。其義云何。曰云云。多類此。

李齊賢以下高麗。

齊賢字仲思號益齋高麗人官至雞林府院君諡文忠

益齋亂豪李穡序年未冠已有名當世大爲忠宣王器重從居輦轂下朝之大儒縉紳先生若姚公牧菴閻公子靜趙公子昂元公復初張公養浩咸游王門先生皆得與之交際李穡撰墓志奉使西蜀所至題詠膾炙人口從王降香江南樓臺風物遇興遣懷每從容曰此間不可無李後主也

則天陵

歐陽永叔列武后唐紀之中蓋襲遷固之誤而益失之呂氏雖制天下猶名嬰兒以示有漢若武后則抑李崇武革唐稱周立宗社而定年號凶逆甚矣當舉正之以誠無窮而反尊之乎謂之唐紀而書周年可乎或曰記事者必首年以繫事所以使條綱不紊也如子之說中宗旣廢之後將闕其年而不書天下之事當何所繫哉曰魯昭公爲季氏逐居乾侯春秋未嘗不書昭公之年房陵之廢與此奚異作史而不法春秋吾不知其可也

久客萬事慵好古意未歇停驂問遺民枉道尋斷碣關輔古帝畿壯觀不湮沒千年阿婆陵百里見城闕根連隴坂長氣壓秦川闊麒麟與獅子左右勢馳突侍臣羅簪纓左右列鈇鉞當時竭財力慮欲鋼局鑰興廢理難逃久爲狐兔窟憶昔陰乘陽四海憂禍烈叱鳴殷家索燕啄漢嗣絕文皇順天心百戰啓王室居然攘神器肯念黃裳吉丁寧雙陸夢黯慘虞淵日向賴得忠賢尙能返故物歐公信名儒筆削未免失那將周餘分續於唐日月區區女媧石豈補青天缺擬作撻瑛編才疏愧王勃

益齋亂藁。閱晦菴感遇詩。拊卷自歎。孰謂後生陋學。其議論有不謬於朱子耶。又得范氏唐鑑讀之。亦有此論。不覺一笑。悔其少作也。仲思誌。

李穡撰墓志銘。初公讀史。筆削大義。必法春秋。至則天紀。曰。那將周餘分。續我唐日月。後得朱子綱目。自驗其識之正。

鄭瓜亭

憶君無日不霑衣。政似春山蜀子規。爲是爲非人莫問。只應殘月曉星知。

高麗史。鄭瓜亭內侍郎。鄭敍所作也。敍自號瓜亭。聯昏外戚。有寵於仁宗。及毅宗卽位。放歸其鄉。東萊曰。今日之行。迫於朝議也。不久當召還。敍在東萊日久。召命不至。乃撫琴而歌之。詞極悽惋。齊賢作詩解之。

居士戀

鵲兒籬際噪花枝。蟾子牀頭引網絲。余美歸來應不遠。精神早已報人知。

高麗史。行役者之妻。作是歌。託鵲蟾以冀其歸也。齊賢作詩解之。

處容

新羅昔日處容翁。見說來從碧海中。貝齒頰脣歌夜月。鳶肩紫袖舞春風。

高麗史。新羅憲康王游鶴城。還至開雲浦。忽有一人。奇形詭服。詣王前歌舞。讚德。從王入京。自號處容。每月夜歌舞于市。竟不知其所在。時以爲神人。後人異之。作是歌。齊賢作詩解之。

鄭可臣

可臣高麗人。

詠駱駝鳥卵

有卵大如甕。中藏不老春。願將千歲壽。醺及海東人。

朝鮮史略。世子如元謁帝。引見便殿。問讀何書。對曰。有師儒鄭可臣從行。宿衛之暇。時從質問。孝經論語。帝大悅。試喚可臣來。世子引與俱入。賜坐。後一年。帝召見於紫檀殿。御案前有物大圓小銳。色潔而貞。高可尺有五寸。內可受酒數斗。乃摩訶鉢國所獻駱駝鳥卵也。命世子觀之。仍使可臣賦詩以進。詩云。

柳淑

句

不是忠衰誠意薄。大名之下久居離。

朝鮮史略。元至正二十八年。辛屯殺柳淑。初淑之退也。于餞席作詩。末聯云云。屯陰求淑罪。有人爲屯誦此詩。屯譖於王曰。淑以句踐比上。范蠡自比。罪莫大焉。王乃命杖之。除名籍沒。屯遣人縊殺之。

元詩紀事卷四十一

北客

宋太祖

憶昔陳橋兵變時，欺他寡婦與孤兒。誰知二百餘年後，寡婦孤兒又被欺。詳劉因下。

又

句

萬里風霜空綠樹，百年興廢又青城。

癸辛雜識：北客有詠汴京青城云云。蓋大金之亡，聚其諸王於青城而殺之。

何公

絕句

白帝城邊春草生，黃牛峽裏水波清。追思昭烈千年事，長使英雄氣不平。

井蛙雜記：峽口石上字多磨滅。惟一詩云云。後書大元至元十九年歲次壬午，鎮國上將軍四川宣慰使何公同男到此吟。

仙村人

春日田園雜興

芳草東郊外，疎籬野老家。平疇一尺水，小圃百般花。青箬開耕雨，紅裙闢採茶。村村寒食近，插柳遍檐牙。

月泉吟社第四名領聯十字一毫不費力自與粘泥體者不同餘見雜興

東湖散人

物色天成畫不如，東風又到野人廬。蜜蜂辛苦供常課，科斗縱橫學古書。小雨杏花村問酒，澹煙楊柳巷巾車。汀洲水暖蘆芽長，更買扁舟伴老漁。

月泉吟社第四十三名前聯得咏物之工後聯句法亦好未見雜興

感興吟

前題

兒結蓑衣婦浣紗，暖風疎雨趲桑麻。金桃接種連花蕊，紫竹移根帶筍芽。椎鼓踏歌朝祭社，賣薪挑菜晚回家。前村犬吠無他事，不是搜鹽定椎茶。

月泉吟社第四十八名此詩無一字不佳語雖似過直若使采詩觀風亦足以戒聞者

九山人

前題

軒裳一夢斷塵寰，桑柘陰陰靜掩關。種秫已非彭澤縣，采薇何必首陽山。因憐社鼓剛催老，轉覺儒冠不負閒。君看浣花臺上燕，芹泥雖好亦知還。

月泉吟社第五十五名。前聯就事映帶田園。次聯韻度迥別。末尤有趣。

桑柘區

前題

粟爵瓜官懶覲觐。生涯雲水與煙腴。晚風一笛麥秧隴。春雨半鉏桑柘區。可是樊遲宜請學。肯教陶亮歎將蕪。斜陽芳草關情處。更把新詩弔石湖。

月泉吟社第五十六名。起四字絕佳。二聯分明見田園惜尾句弔字大過。

柳州

句前題

稻種開包曬。菊苗依譜分。疇西曉耕雨。舍北暮鉏雲。

月泉吟社第五十七名。二聯見田園分明。第四句最好。曬字欠工。

草堂後人

前題

桑眼已開芳晝長。西疇東墅足相羊。麥風初暖燕爭壘。林雨忽晴蛙滿塘。野老新衣逢社喜。山妻椎髻爲蠶忙。紛紛游騎踏花去。誰識吾家舊草堂。

月泉吟社第五十八名。第二句入田園快便。前聯絕好。後半篇意順。

君瑞

前題

白粉牆頭紅杏花。竹槍籬下種絲瓜。廚煙乍熟抽心菜。篝火新乾捲葉茶。草地雨長應易墾。秧田水足不須車。白頭翁媿閒無事。對坐花陰到日斜。

月泉吟社第五十九名此真雜興詩起頭便見作手。

青山白雲人

句前題

遮門賸喜有桑柘。輸國不憂無繭絲。小婦餉耕因廢織。老夫觀社忽成詩。

月泉吟社第六十名領聯語意深頸聯尤傷。

無機老農

句前題

名利有危機。老於農圃宜。

子問

又

驅却餘寒碎土牛。田園生計又從頭。

田農夫

又

桃李場中已免參，只將農圃繫頭銜。

唐人機軸

又

風暖柴荆鳥語幽，麥高麻矮野桑柔。

忘懷老人

又

寸地不可棄，東風何處無。

五雲山人

又

種瓜思夏實，分菊待秋花。

老農

又

幸存耕雨地，況值養花天。

石姥寄客

又

水暖眠秧珥，風香豎茗旗。

雙澗

又

雨露桑麻晴夜話。清明花柳少年心。

雲水

又

晴雨花時遊子意。寒暄秧信老農心。

白雲人

又

嶺外醉分芳草臥。鶯邊吟踏落花行。

跨犢者

又

有酒便嘗烹筍蕨。無花聊自賞桑麻。

缺名

又

社近記穿黃蠶子。雨前趨摘紫槍茶。

山野人

又

鶯藏楊柳金歌舞。蝶宿梨花雪夢魂。
盤隱末子

又

桃林我憶放牛日。葵圃誰思逸馬時。
扶杖夫

又

一生甘作扶犁手。萬變寧移抱甕心。
廷雲

又

蛙鳴暮夜官何爲。蝶戀芳菲夢不知。
晚靜

又

牛飲芳陂鵝立背。馬過秀野蝶隨蹄。
竹簑笠翁

又

蠶一二眠催出伏。秧三四葉尙憂風。

藍田道人

又

晴原望新麥。一片綠雲香。

才人

又

山翁不識時宜甚。猶學淵明裹葛巾。

月泉吟社摘句圖起句云云。聯句云云。結句云云。

翁某

句

地下修文同父子。人間讀傳各君臣。

輟耕錄至元間宋文丞相有子出爲郡教授。行數驛而卒。人皆作詩以悼。閩人翁某一聯云云。獨爲絕唱。

山堂肆考文文山二子道生佛生皆以流離中死亡。治命以弟璧之子陞爲後。至元皇慶中陞復仕元爲集賢學士。奉使懸州道卒。有挽之者云云。

鎮江郡人

句

億千萬劫山長在。一百八聲天未明。

至順鎮江志。至元二十六年。甘露寺大鐘毀缺。乃於壽邱山普照寺。鳴鐘以節晝夜。時郡庠卽壽邱。曉鐘命題以課多士。郡人一詩爲冠。警句云云。

康衢遺民

句

桑麻已接東西畝。禾麥相連上下田。詳朱仲明下。

章某

寄子詩

九十衰翁七十兒。此時那可兩分離。客鄉已是三年別。人世應無百歲期。春雁北飛頻送目。夕陽西下幾顰眉。何如及早成歸計。莫待山楸開滿枝。

庶齋老學叢談。章德元嘉。溫平陽人。時官延之師席。偕詣京師。薦除翰林編修。洊職將二年。其父寄以詩云云。卽告歸侍焉。

郊居生

金銅仙人辭漢歌

神明臺些茂陵鬼。六宮火滅劉郎死。芙蓉仙掌擎高秋。雄雷掣碎銅蛟髓。魏宮移盤天日昏。車聲磷磷繞

漢門鐵肝苦淚滴鈴水。石馬尙載西風魂。青天爲客驚曉別。天籟啼聲地維裂。銅臺又折當塗高。夜夜相思渭城月。

筆精。余客邵武。於友人徐梧家。見楊廉夫手書一卷。字法蒼勁。其後跋云。此乃郊居生題金銅仙人辭漢歌。予謂小李絕唱後。萬代詞人不可著筆。此生膽大而有是作也。呼天籟裂地維。鼎定天下。見於此矣。銅臺折。當塗高。又豈爲卯金氏感慨也哉。其詩云云。

白縣尹

戲題

紅紅白白好花枝。盡被山僧折取歸。祇有野薇顏色淺。也來鈎惹道人衣。

輟耕錄。嘉興白縣尹得代。過姚莊。訪僧勝。福州開遊市井間。見婦人女子。皆濃妝豔飾。因問從行者。或答云。風俗使然。少艾者。僧之寵下。此則皆道人所有。白遂戲題於壁云云。勝見。亟命去之。然已盛傳矣。

朽木居士

題雲林六君子圖

江頭碧樹動秋風。江上青山接遠空。若向波心添釣艇。還須畫我作漁翁。詳黃公望下。

張某句

草中人不見。空外鶴先知。

至正直記。國初有張某者。真定人。幼能詩。賦小松云云。後能篆法。自號秦山某神童。

句

分得兩頭輕與重。世閒何事不擔當。

至正直記。脫脫丞相當朝。時有神童來謁。令賦擔詩。卽成云云。蓋諷丞相也。

嘲員炎

韓有鐙青雖可愛。面無人色亦堪憐。

秋澗集。員先生傳。素不能騎乘。人強之。輒色變。或以詩戲云云。嘗懷金一餅。曰。鎮心不可以闕此。繼爲人竊去。

嘲賓羅漢溫相公

長竿醉草賓羅漢。短褐徉狂溫相公。

珊瑚網。溫日觀雅好著恢帽短衣。囊錢果投市中小兒。問識溫相公否。由是迨止。輒擁小兒呼溫相公。時有賓肖羅漢。醉則維筆竿杪。草聖秀媚。時人遂有云云之句。

贈陳克甫詩

夜過浮邱月滿山。一尊相對坐漫漫。門臨大海風濤壯。家有小天星斗寒。

閩書云陳紹叔字克甫興化人居靈川里浮山下洞達性理至於河圖雒書太極通書律歷制度靡不研究有外集百餘卷題曰浮邱集因與學者說璇璣玉衡遂揉木像示之既鐫銅仿古制又別制器象天體虛中而髹之上刻周天度數填以鈿羸揭南北二極凡天河星宿皆列其中其制度精微名曰小天有友人贈詩云

蘇長公墨竹

黃陵廟前春雨足湖皐煙樹錦模糊慟天大嘆苦無語二女祠中叫鷓鴣

耳新費文孫家藏蘇長公墨竹枝榦突兀枝葉離披卷末一詩云云作者姓字朦朧莫辨而書法委蛇有姿態要亦宋元間名筆也

聯方回詩

把酒從來不可期吾降今日少人知但看建德安民榜便是虛翁德政碑

癸辛雜識回自壽詩把酒云云有輕薄子聯之但看云云

句

兩朝忠義傳俱有若人名

句

葵藿有心終向日杏桃無力謾隨風

熊勿軒集鄉牧祠內有某人者顯爲清議不容舊曾守土不死封疆姑且勿論丁丑戊寅之間反

覆變詐。後又資緣一謚。命下之日。有作詩諷之者云云。方其反覆之際。題門云云。是全不知有世間羞恥事。以此得朝廷爵謚。又以此齒學校祀典。豈不爲郡泮羞。

和湯西樓

榮華富貴等浮花。膂力難勝國爪牙。漢世但知光擁立。唐朝誰識杞姦邪。綺羅化作春風蝶。絃管翻成夜雨蛙。縱有清漳人去也。碧天難挽紫雲車。

山房隨筆。賈秋壑敗師亡國後。有人刺以詩。湯西樓詩云云。有和之者云云。

句

山中烏喙方管膽。臺上蛾眉正捧心。空懷狗監知司馬。且喜龍門識李膺。生藏魚腹不見水。死挽龍髯欲上天。

麓堂詩話。元詩云云。皆得李義山遺意。至戲爾築臺登大將。危乎操印立真王。自是假王先賈禍。非關真主不憐才。直世俗所謂簡板對耳。

古銅器詩

模稜難斷佞臣頭。碎腦翻成百倍憂。解使英雄生膽氣。從今不用佩吳鉤。

懸筍瑣探予嘗。南內於戊子庫見古銅器一事。如劍而無刃。平直。首微稜。下有靶。長可二尺。闊僅及寸。面嵌銀。題云云。直似宋元人作。然不可考矣。

天目山詩

天目山前水齧磯。天心地脈露危機。西周浸冷觚棱月。未必遷岐說果非。

古杭雜記。高宗中興建邦。天目乃主山。至度宗甲戌山崩。京城騷動。時有建遷蹕之議者。未幾。宋鼎遂移。有人作詩云。

贈夏貴

自古誰無死。惜公遲四年。問公今日死。何似四年前。

三朝野史。至元丙子春。淮西閫帥夏貴歸附大元。宣授中書左丞。至元己卯薨。有贈以詩云。

弔夏貴墓

享年八十三。而不七十九。嗚呼夏相公。萬古名不朽。

比事摘錄。至元丙子。淮南閫帥夏貴歸附元。至己卯歲死。有人贈以詩云。又有人弔其墓云。

譏文壁

江南見說好溪山。兄也難時弟也難。可惜梅花有心事。南枝向暖北枝寒。

山堂肆考。宋文文山死。宋而其弟壁。號文溪。附元。當時有詩云。

贈虞伯生

萬世文章凌日表。驚人風采動朝端。窮經白首討論易。草詔丹墀潤色難。憂國淚多雙眼暗。歸田計早一身安。不堪回首昭陵道。落日西風莎草寒。

朱遺民錄附錄。右詩得於傳聞。而末句之意。有不可解者。故老云。伯生嘗私於文宗妃。故贈者因

以譏之。不知其果然否也。

訪樵隱不遇詩

想是朝真去未回。空教人久立丹臺。冰盤露冷生瓊屑。元圃春深長碧苔。巖下響知松子落。洞中香是竹花開。拍闌一笑欲歸去。海闊天高鶴不來。

蘭溪遺事。天歷初。開奎章學院。命余充授經郎。專教望族。宿衛四官。次校經世大典。時南省爲翰林院。余因以寓其居。松風滿庭。內翰虞伯生扁曰。松濤圭齋。歐公寄其名。余暇日。扃戶獨出。有持詩見訪者。題曰。無名氏訪樵隱不遇而去。今收篋中。已十九年矣。至正七年丁亥。余自蘭溪往浦江。薄暮雨迫。道過元常。就憩于此。問其觀主。亦曰樵隱。其扁書曰。鵲華友。若有所契者。搜枯不及。緬想向者無名氏所贈詩。以誌於壁。從行者憲使沙仲誠。秦子章。余文卿。道士陳虛白。書此壁者。濟南必申達。而唐隱樵吾氏也。

集古句

翡翠屏風燭影深。良宵一刻值千金。共君今夜不須睡。明日池塘是綠陰。詳祖柏下。

嘲伯顏

百千萬定猶嫌少。埽積金銀北斗邊。可惜太師無運智。不將些子到黃泉。

輟耕錄。元統至元間。太師丞相伯顏專權蠹政。貪惡無比。以罪左遷南恩州。達魯花赤至隆興卒。寄棺驛舍。滑稽者題於壁云云。

弔秦王伯顏

人臣位極更封王。欲逞聰明亂舊章。一死有誰爲孝子。九泉無面見先王。輔秦應已如商鞅。辭漢終難及子房。虎視南人如草芥。天教遺臭在南荒。

草木子。後至元間。太師秦王伯顏。專權變法。謀爲不軌。貶嶺南。道江西。死於薦福寺。遂殯於是。有人以詩弔之云云。蓋其在生出。令北人歐打南人。不許還報。又欲刷子女。天下騷動。

悼何巨川

奇才不泄神仙事。抗疏曾干世祖知。每恨南邦本無罪。比留北使欲何爲。忠魂久掩孤城館。褒詔新鐫二品碑。地下若逢姦似道。爲言故國黍離離。

輟耕錄。何公巨川者。京師長春宮道士也。會世皇將取宋。乃上疏抗言。宋未有可伐之罪。遂命副國信使郝文忠公。使江南。歿於真州。至正間。詔贈二品官。有人作詩悼之云云。

西湖竹枝詞

蘇公堤上楊柳青。人來人去綰離情。東風爲爾丁寧道。折斷柔條莫再生。

天竺寺前開翠微。長年流水白雲飛。流水入湖無日歇。白雲出岫有時歸。詳燕不花下。

嘲時政詩

舊省新丞相。新臺舊大夫。大夫聽子語。丞相愛金珠。

書臺門

苟苴賄賂尙公行。天下承平得未能。二十四官徒獬豸。越王臺上望金陵。

輟耕錄。集慶失守。行御史臺移置紹興路。前御史大夫納璘再任時。浙省丞相達失帖木兒。得便宜行事。民間頗言其貪。後又以大夫子安安。判行樞密院。護臺治。大夫之政。一聽決於院判。有人作詩云云。又有人書於臺之門云云。

嘲廉訪司官

解賊一金并一鼓。迎官兩鼓一聲鑼。金鼓看來都一樣。官人與賊不爭多。

草木子。廉訪司官分巡州縣。每歲例用巡尉司弓兵旗幟金鼓迎送。其音節則二聲鼓。一聲鑼。起解殺人強盜。亦用巡尉司金鼓。用一聲鼓。一聲鑼。後來風紀之司。賊汚狼藉。有輕薄子爲詩嘲之云云。

嘲諸司

丞相做假鈔。舍人做強盜。賈魯要開河。攪得天下鬧。

草木子。元之將亂。上下諸司。其濫愈甚。又有無名子爲詩嘲之云云。

弔四狀元

四榜狀元逢此日。他年公論定難逃。空令太守提三尺。不見元戎用六韜。元舉何如兼善死。公平爭似子威高。世間多少偷生者。黃甲由來出俊髦。

輟耕錄。平江一驛。舟中有題弔四狀元詩者。不知誰所作。詩云云。元舉。王宗哲字也。至正戊子科。

三元進士時爲湖廣憲僉兼善泰不花字也時爲台州路達魯花赤公平李齊字也時爲高郵府知府子威李黼字時爲江州路總管此四公者或大虧臣節或盡忠王事或遇難而亡故云

句

黃金合鑄李將軍

輟耕錄元帥李其姓者杭州庚子之圍解頗著戰功一士人投之以詩將有求焉其詩有云云之句李大怒曰吾勞苦數年只是將軍今年纔得元帥乃復令我爲將軍耶命帳下策出之

嘲廉夫

竹枝柳枝桃花吹彈歌舞撥琵琶可憐一個楊夫子變作江南散樂家

歸田詩話楊廉夫晚年居松江有四妾竹枝柳枝桃花杏花皆能聲樂乘大畫舫恣意所之豪門巨室爭相迎致人有詩云云

句

山前有客祠彭越塞上無人斬郅支

歸田詩話岳王墓詩徐孟岳云云高則誠云云少日過葛嶺憶有人題墓上云云和支字韻亦佳當時不能全記再過之則已漫矣

句

斜倚水開花有思緩隨風轉柳如癡

壘起雜事。韓林兒母楊氏。雖老而善自妝飾。性頗淫。見人則匿其年云四十。自稱少娘。又善爲嬌狀。使人忘其老。司徒杜遵道通焉。目爲少郎。自是專權怙勢。人皆嫉之。時有好事者。榜其門云云。

弔張士誠

天星夜落水犀軍。又見吳臺走鹿羣。睥睨金湯空自固。倉皇珠玉竟俱焚。將軍只合田橫死。國士嗟無豫讓聞。風雨年年寒食節。麥盂誰上太妃墳。

蓬窗日錄。杜東原作耕餘錄。有弔張士誠詩云云。不載爲何人所作。疑當時有感於士誠者。

不平詩

天遣魔軍殺不平。不平人殺不平人。不平人殺不平者。殺盡不平方太平。

七修類稿。輟耕錄有詩云云。又嘗聞有詩云。中原不可生強盜。強盜纔生不可除。一盜旣除羣盜起。功臣原是盜根株。二詩語意相類。

元詩紀事卷四十二

岳武穆降箕詩

百戰間關鐵馬雄。尙餘壯氣凜秋風。有時醉倚箕山望。腸斷中原一夢中。

志雅堂雜鈔。胡天放降仙。箕忽踴躍可畏。經時書一詩云云。後大書一鄂字。人始知爲武穆也。

馬巫父

似華山詩

玉樓雲淡曉光浮。中有飛仙駕鶴游。下界此時方熟睡。誰尋紫氣問青牛。

志雅堂雜鈔。辛卯正月。胡天放降仙。馬巫父。弋陽人。地仙。玉華山詩云云。

三茅吳真人

絕句

深深門巷老翁家。自洗銅瓶浸杏花。喚起承平當日夢。令人轉憶舊京華。

柳杏

岸曲紛紛已弄煙。園林點點欲爭然。何人折取歸深院。兩樣風光在眼前。

鄭文選

九洞

拖露搏風海嶠來。舳舻寂寂自樓臺。春光不比承平日。淚眼看花薦一杯。

張君有

絕句

八千里路到杭郡。城郭人民幾變遷。惟有吳山青不改。令威何日是歸年。

蘭渚

光轉東風弄暖天。永和人物尙依然。誰憐紉佩淒涼客。倚策愁吟楚澤邊。

方武裘

賦筆

兔出中山骨欲仙。何人拔穎縛尖圓。拙夫堪笑堆成冢。豪客曾聞掃似椽。窗下玉蜍涵夜月。几間雪竇湧春泉。當時定遠成何事。輕擲毛錐恐不然。

志雅堂雜鈔。二月初三日降仙。三茅吳真人詩云云。柳杏云云。鄭文選九洞云云。張君有眉山書房吏人云云。蘭渚云云。方武裘。莆人。潛夫之友也。今爲大陽洞主。求賦筆詩云云。

王大圭

絕句

六朝盛事總成塵。結綺樓前草自春。一曲後庭何處覓。空留月伴倚闌人。

志雅堂雜鈔。辛卯十二月。天放降仙。江口口口口詩云云。

翠華仙伯

示張唐臣諸人

玉皇香案晚朝迴。小小星壇向夜開。一炷信香通鼻觀。翠鸞飛背酒仙來。

示問行藏者

春來看取百花叢。粉白妖紅造化功。燕子鶯兒休調舌。花殘明日起熏風。

雙溪醉隱集。張唐臣等諸公。夜祈大仙。批以詩云云。或有問予行藏者。亦批以詩云云。祈求仙號。批以翠華仙伯。是夜更有詩數首。并滿江紅詞一闕。氣語豪邁。篇什可觀。

趙靜齋

享祭降筆

生居四代將門家。不幸遭逢被虜拏。死在瓜洲無葬地。幽魂夜夜到長沙。

山房隨筆。趙靜齋准被執於溧陽。至瓜洲被刑。其孫享祭靜齋。降筆云云。

獨樂園主

詠史

三皇之前不可傳。堯舜垂衣化自然。夏衰商敗兵革起。征討有罪非傳賢。蒼姬種德極深厚。歷載八百何綿綿。孔丘孟軻不得位。唯有文字登書編。春秋筆削嚴一字。誅惡褒善持大權。丘明作傳詳本末。下迨戰國何茫然。秦皇併吞六王畢。始廢封建迷井田。功高自謂傳萬世。仁義不施徒託仙。東游弗返祖龍死。赤

靈火德明中天。漢朝文景稱至治。刑措可比成康前。無端雜用黃老術。是以未得稱其全。王莽賊臣篡漢祚。賴有光武如周宣。雲臺名將應列宿。婉婉良策扶戎軒。絕勝高祖醢彭越。可比周召終天年。崇儒往謁曲阜廟。典章燦燦羅星躔。後人不省創業苦。寵任閹宦皆貂蟬。西園粥飯誠可恥。黨錮忠士災何延。一朝曹氏帝稱魏。銅駝荆棘生荒煙。關張早死後主弱。典午白帝開坤塹。五胡雲擾亂中國。五馬南渡何翩翩。六朝興廢有得失。豈知合併歸楊堅。瓊花城裏建宮闕。汴河春水浮龍船。亂離思治否復泰。唐至高祖催飛鷲。秦王神武不可及。遂承天祚傳高玄。大綱不正有慚色。我嘗撫卷思其淵。紛紛女禍握神器。擾擾藩鎮橫戈鋌。乘輿避亂數奔竄。翠華幾度游西川。黃巢殘賊不忍說。白骨山積血成泉。侵凌漸使唐祚絕。江海雖大猶涓涓。朱溫降將乃一賊。僭號暫時得復失。後唐石晉暨知遠。但以功利不尚德。周家亦僭登天基。獨有世宗明治術。我朝列聖皆深仁。天下蒼生得蘇息。史書浩浩充屋棟。人主欲觀寧遍及。小臣纂集作通鑑。治亂興亡明似日。願言乙夜細垂觀。比美成王戒無逸。

輟耕錄懸箕扶鸞所作詩文間有絕佳者友人構李願元凱嘗召一仙至大書曰獨樂園主也可命題衆以詠史請鸞不停留作成篇云云

密蘭沙求仙詩

刀筆相從四十年。非非是是萬千千。一家富貴千家怨。半世功名百世愆。牙笏紫袍今已矣。芒鞋竹杖任悠然。有人問我蓬萊事。雲在青山水在天。

草木子至正辛未間福建廉訪使密蘭沙求仙詩云云

忠烈祠神

示陳友定

將軍何事訪山家。火冷爐溫謾煮茶。若問聖明吾豈敢。止能療病與驅邪。
榕陰新檢至正末。陳友定據閩。過福寧。栖雲忠烈祠。叩己當爲天子。懸箕一絕云云。不懌而去。

元詩紀事卷四十三

羽客

題蕉葉詩

午夜君山玩月回。西鄰小圃碧蓮開。天風香霧蒼華冷。名籍因由問汝來。白雪紅鉛立聖胎。美金花要十分開。好同子往瀛洲看。雲在青霄鶴未來。

西湖游覽志。元妙觀。元時改今名。時蕉花盛開。有趙道士居之。一日羽客來訪。趙適他出。客題詩蕉葉云云。識者以爲呂洞賓也。

懸葫蘆詩

葫蘆一箇是生涯。閒步人間訪酒家。要問狂夫何處住。蓬山洞口有桃花。

元詩癸集。大德間。安肅剏建擬江亭落成。俄有三仙。一曰散漢。二曰雙口叟。三曰懸葫蘆。共題詩于壁而去。本州判官張莘有記。

劉妙容歌

月既明。西軒琴復清。寸心斗酒爭芳夜。千秋萬歲同。此情歌宛轉。宛轉聲已哀。願爲星與漢。光景共徘徊。悲且傷。參差淚成行。底紅掩翠方無色。金徽玉軫爲誰鏘。歌宛轉。宛轉結復悲。願爲煙與霧。氤氳共容姿。元詩癸集。皇慶改元。有張三郎者善笛。八月十五夜。倚樂橋作伊州曲。夜靜有老人來曰。爾笛固

清未能脫俗。爲爾釐正之。當熟記無忘。乃指教其孔。換易數字。曲益清峻。張更別求曲。老人取笛自吹。超出塵壒。張問何人作。答曰。仙妹劉妙容歌也。因以傳我。復請授其指。老人笑而起曰。子凡心。我豈能教爾耶。去數步不見。張後以指尋其曲。終不能得其高古之趣。

水仙祠神

臨別留詩

盤塘江上是奴家。郎若閒時來喫茶。黃土築牆茅蓋屋。庭前一樹紫荊花。

輟耕錄。揭曼碩先生未達時。多游湖湘間。一日舟泊江涘。夜二鼓。攬衣露坐。仰視明月如晝。忽中流一櫓。漸近舟側。中有素妝女子。襖衽而起。容儀甚清雅。先生問曰。汝何人。答曰。妾商婦也。良人久不歸。聞君遠來。故相迎耳。因與談論。皆世外恍惚事。且云妾與君有夙緣。非同人間之淫奔者。幸勿見卻。先生深異之。迨曉。戀戀不忍去。臨別。謂先生曰。君大富貴人也。亦宜自重。因留詩云。明日舟阻風。上岸沽酒問其地。卽盤塘鎮。行數步。見一水仙祠。牆垣皆黃土。中庭紫荊芬然。及登殿。所設像。與夜中女子無異。

衛芳華鬼

聚景園

湖上園亭好。重來憶舊游。徵歌調玉樹。閱舞按梁州。徑狹花迎輦。池深柳拂舟。昔人皆已沒。誰與話風流。西湖游覽志餘。延祐初。永嘉滕穆僑居臨安。月夜游聚景園。遇一美人。自言衛芳華。故宋理宗朝。

宮人卽命侍女翹翹設茵席酒果歌木蘭花一闋又賦詩云云

鄭婉娥鬼

口占

鳳艦龍舟事已空。銀屏金屋夢魂中。黃蘆晚日空殘壘。碧草寒煙鎖故宮。隧道魚燈油欲盡。妝臺鸞鏡匣長封。憑君莫話興亡事。淚溼臙脂損舊容。

列朝詩集吳江沈韶洪武初遊九江琵琶亭月下彷彿聞歌聲明日復往有麗人冉冉而來呼韶同茵坐曰妾僞漢婕妤鄭婉娥死殯亭側命侍兒鈿蟬取酒口占一律贈韶韶與留連半載談元末羣雄興廢又僞漢宮中事歷歷可記

華亭二生

全生詩

幾年兵火接天涯。白骨叢中度歲華。杜宇有冤能泣血。鄧攸無子可傳家。當時自詫遼東豕。今日翻成井底蛙。一片春光誰是主。野花開滿蒺藜沙。

賈生詩

漠漠荒郊鳥亂飛。人民城郭歎都非。河沈朽骨何須葬。血汚遊魂不得歸。麥飯無人作寒食。綈袍有淚哭斜暉。生存零落皆如此。但恨平生壯志違。

列朝詩集吳元年明兵圍姑蘇上洋人錢鶴皋起兵援張氏華亭有全賈二生參與謀議事敗皆

赴水死。洪武四年春。華亭士人石若虛。出近郊。遇二生於途。忘其已死。班荆酌酒。二生各賦一詩。揮手別去。不知所之。

仙方詩

紛紛墓土黃金屑。片片花飛白玉芝。君主一斤臣四兩。調和服下卽平夷。

七修類稿。元末嘉興桐鄉縣。後朱村徐通判。素慕洞賓。朝夕供禮。一日疽發於背。勢垂死。猶扶起。禮之如昔。偶見淨水盂下白紙一幅。視之。有詩云云。意其仙方。然不知何物爲黃金白玉。乃召仙。以大黃白芷爲問。仙曰然。服之果驗。

晚翠亭詩

一徑入青松。飛流澹晴綠。道人晚歸來。長歌振林谷。山深不知秋。落葉下枯木。須臾翠煙開。月色照綵服。草木子。鬼作晚翠亭詩云云。

荊州鬼語

苦也苦。幾時泥到襄陽府。苦也苦。幾時泥到成都府。草木子。昔元戊寅年間。荊州分城。有鬼夜叫云云。居人皆聞之。而不見其形。及早視之。凡樹木不論大小。皆用泥和狗豬毛。離根一二尺泥之。至樹分枝處則止。後又改呼云云。蓋古今未聞之異也。

元詩紀事卷四十四

大滌洞天仙人

示周允和

蒼然聳空碧。指點人不識。我來契宿緣。鵲記雲根石。

洞霄圖志。周允和字謙甫。號清溪。十八歲入大滌師沖妙先生。今至元戊寅。授崇道沖應清真大師洞霄主席。壬午三月。兼領太一宮。秋九月。復還九鎖。乙酉七月初。夢遊大滌洞天。見數仙人吟詠。一指示云云。

夢中貫酸齋彭郎詞

番之湖兮雲水杳。萬頃晴波淨如埽。相逢漁子問二姑。大姑不如小姑好。小姑昨夜妝束巧。新月半痕玉梳小。彭郎欲娶無良媒。飛向廬山尋五老。五老頽然不肯起。彭郎怒踢香爐倒。彭郎彭郎歸去來。陶令門前煙樹曉。

詳楊維禎瀑布謠下。

元詩紀事卷四十五

元初童謠

塔兒紅。北人來作主人翁。塔兒白。南人是主北爲客。

帝京景物略。白塔寺。元初有童謠云云。世祖時塔色燄赤。及我太祖兵起。淮陽塔白如故。

元讖

大元之後有庚申。

西湖志餘。或問宋祚於邵子。邵子對以五更頭。蓋謂五庚申也。而元讖亦云云。順帝庚申。生纔六庚耳。

法服歌訣

襪履中單黃帶先。裙袍蔽膝綬紳連。方心曲領藍腰帶。玉珮丁當冠笏全。

山居新話。郊祀祭廟。天子御袞冕。百官皆法服。凡披秉須依歌訣次第。則免顛倒。謾識歌訣於左云云。

濱州民歌

田野桑麻一倍增。昔無粗麻今續繒。太守之德如景星。

松雪齋集。公諱或。姓姜氏。知濱州。謂民栽桑。歲餘新桑徧野。人呼曰太守桑。且歌云云。

馬氏鐵券識

至元十五六狗兒壞我屋。

武林舊事。至元十五年六月。有軍廝名狗兒者。因樵採墾土。得一鐵券。上有字云。雁門馬氏。葬於橫衝橋云云。後又有十字云云。

信州路識

水打巷村園。永豐出狀元。

江西通志。篤列圖。字彥誠。蒙古人。父揭南新。祥興間鎮信州路。得一識云云。遂家於永之進賢坊。生篤列圖。登至順庚午蒙古榜進士第一。

嘲洪起畏

家在臨安。職守京口。北騎若來。不降則走。

癸辛雜識。洪起畏知京口日。乃北軍入境之初。嘗大書揭榜四境云。家在臨安。職守京口。北騎若來。有死不走。其後舉郡以降。或爲改其末句云云。

皇舅墓謠

皇舅墓門閉。運糧向北去。水泚墓門開。運糧卻回來。

輟耕錄。河間路景州舊縣河澚一土阜。相傳爲皇舅墓。自國家奄混區夏。卽有謠云云。至正辛卯。中原大水。舟行木杪間。及水退。土阜崩圯。墓門顯露。繼後天下多事。海道不通。

井字謎

四十零八個頭。一頭還對一脚。中間全無肚腸。外面許多棱角。

用字謎

三山自三山。山山甘倒懸。一月復一月。月月還相連。左右排雙羽。縱橫列二川。闔家都六口。兩口不團圓。敬齋古今註。謎固小技倆。然其諷詠比興。固與詩人同義。而在士大夫事中。亦談笑一助。嘗擬作井謎云云。此末聯亦借前人語。嘗聞用字謎既久。止記一二句。今爲足成之云云。

案齊東野語。用字謎云。一月復一月。兩月共半邊。上有可耕之田。下有長流之川。六口共一室。兩口不團圓。又云。重山復重山。重山向下懸。明月復明月。明月兩相連。

大明寺水隱語

一人堂堂。兩曜垂光。井深尺一。點去冰旁。二人同行。不欠一邊。三梁四柱。足火然。若有雙鉤。日月至。

湛淵靜語。今杭之西大明寺。亦鑄隱語於上云云。乃大明寺水。天下無比也。

頌程雪樓

閩中有雪方爲貴。天下無樓如此高。

草木子。程雪樓爲閩守。任滿歸。民有獻箭旗者。以百數。公於內取其一聯云云。

無名狀

老書生。小書生。二書生。壞了中書省。不言不語張左丞。鋪眉搨眼董參政。也待學魏徵。一般倖讀捧。請讀。

備

山居新語。桑哥丞相當國擅權之時。同僚張左丞董參政者。二公皆以書生自稱。凡事有不便者。多沮之。桑哥欲去之而未能。是時都省告狀擯箱。乃暗令人作一狀投之箱中。至午收狀。當日省掾須一一讀而分揀之。中有一狀無人名事實。但云云。

寧都州民歌

去年雪。今年雨。微計侯。那得此。民既悅。天應喜。

江西通志。計初。浮梁人授寧都州同知。覈板冊以定賦。出冤獄以正刑。上下推服。謁假歸省。飢民起爲亂。當道檄初往諭。盜遂息。州久無雪。民苦瘡瘍。復任時大雪。明年旱。一禱輒雨。民歌云云。案末二句。據吳草廬集增。

宣城民哭邑令

公來何其遲。公去何其速。使我宣城民。何以遂生育。

江西通志。尹希善。吉水人。被薦授宣城令。有善政。以病卒於官。民哭之云云。

雷州民歌

渴鹵爲田兮。孫父之教。渠之泱泱兮。長我秔稻。自今有年兮。無旱無澇。

元史。烏古孫澤傳。擢爲海北海南廉訪使。雷州地近海。澤行視城陰。乃教民浚故湖。築大堤。竭三溪。瀦之爲斗門。七堤。竭六。以制其贏耗。醴爲渠二十有四。計得良田數千頃。瀕海廣渴。並爲膏土。

民歌之云云。

浮梁民謠

桃李陰陰六萬家。下居民不識官衙。甘棠喜有千年政。美玉終無一點瑕。

江西通志。郭郁。大梁人。皇慶間。浮梁令。善爲鈎距。以廉民隱。自比趙廣漢。聘吳仲遷爲弟子師。士風丕變。政爲江南諸邑最。民謠云云。

太倉謠

打碗花子開。今搬州縣來。黃郎屋上走。州來住不久。

平江記事。元貞初。升崑山縣爲州。州治去府治七十二里。延祐中。移太倉。未移之先。太倉江口。打碗花子遍地盛開。民謠云云。遷移之先。常有鼠郎出沒廳事上。民復謠云云。至正間。果復移回玉峯舊治。

至治間占

天狗墜地爲赤犬。其下有大軍覆境。

楮室記。至治元年。玉案山產小赤犬。羣吠遍野。占云云。

李好文諺

目耕夜分李好文。

梧溪集。幼力學。家苦貧。夜就鄰之磨坊燈讀書。凡十餘年。一日值雪。抵村舍媼。貸斗麥。媼卻曰。子

奚拙耕好文曰吾目耕耳既而諺云云

紹興鄉人語

欲學孝婦當學俞母

函史紹興俞新之妻聞人氏夫歿誓不貳事姑病風失明聞人手滌溷穢時時舐其目目爲復明姑卒與子親負土葬之鄉人爲之語云云

斛銘

出以是入以是是子孫永如是

輟耕錄上海費宣慰裕輕財好施人呼爲費佛子刻銘於斛之四面云

浙西諺

年年防火起夜夜防賊來

至正直記浙西諺云云蓋地勢低下濱湖多盜常有此患此語亦好令人儆戒無虞也

無錫識

無錫平天下寧

至正直記相傳無錫有石刻識云云在惠山寺泉之旁或云天下井舊咸置錫以滋泉味蓋茗與錫相便惟是邑無之或云有錫則民爭兵故名無錫皆未詳孰是

三險諺

醴香吸髓倚闌干。

至正直記。諺云云。言三險也。

巴豆黃連諺

巴豆未開花。黃連先結子。

至正直記。諺云云。蓋黃連能制伏巴豆毒也。

金銀珠謠

活銀病金死珠子。

至正直記。有謠云云。蓋言銀爲諸家所尙。金遇主漸少。珠子則無問及者。猶死物也。

明宗時童謠

牡丹紅。禾苗空。牡丹紫。禾苗死。

古今風謠

案明宗在位五月而崩。廟諱乃和字也。

十七字詩

自謂非其子。如今作天子。傳語老蠻子。請死。

歸田詩話。虞伯生際遇文宗。置奎章閣爲學士。順帝爲明宗子。文宗忌之。遠竄海南。詔書有曰。明宗在北之日。自以爲非其子。伯生筆也。文宗晏駕。寧宗立。八月崩。國人迎順帝立之。帝入太廟。斥

去文宗神主而令四方毀棄舊詔。伯生時在江西，命以皮繩拴腰，馬尾縫眼，夾兩馬間，逮捕至大都。嫉之者十七字詩云云。至則以文宗親改詔稿呈順帝覽之，曰：「此朕家事，外人豈知？」遂得釋。兩目由是喪明，不復能楷書。

函史侍臣有以詔本侍讀學士虞集所草者，請罪之。王嘻笑曰：「此我家事，豈繇彼書生？」彼代書傭耳，賜酒幣遣歸。

石洲詩話：田汝成西湖志餘所載順帝卽位時，馬尾縫眼，由是喪明之事，爲此說者。第因文靖晚年目疾而傳會之耳。宋前年得宋宣和畫貓卷，有文靖題云云。至正五月，夏仙井虞集筆勢尤蒼逸，信乎前說之誣也。

元統間謠

天雨鼈事不齊

元史：元統二年六月，彰德雨白毛，俗呼云「老君髯」。民謠云云。

菩薩線謠

天雨線，民起怨，中原地，事必變。

元史：至元三年三月，彰德雨毛如線，而俗呼云「菩薩線」。民謠云云。

京師童謠

白雁望南飛，馬札望北跳。

元史至元五年八月云云。

京師語

上把君欺下把民虐。太皇太后倚恃着。

庚申外史。伯顏數往太皇太后宮。或通宵不出。京師爲語云云。

書省壁

人皆謂我不辦事。天下辦事有幾人。袖裏屠龍斬蛟手。埋沒青鋒二十春。

庚申外史。至元四年冬十一月。河南范孟端反。孟端者。河南杞縣人也。始爲內臺知班發身。掾河南臺。其人貧無資。寡交遊。人皆謂不辦事。鬱鬱不得志。又久不得補。一日大書省壁云云。後有守省御史來。與孟端有舊。力爲言之。乃得補。又不幫俸。孟端曰。我必殺若輩。

至正中諺

李如黃瓜。民皆無家。

留青日札。元順帝至正中。李實如黃瓜。諺云云。

江西福建怨謠

九重丹詔頒恩至。萬兩黃金奉使回。奉使來時驚天動地。奉使去時烏天黑地。官吏都歡天喜地。百姓卻啼天哭地。官吏黑漆皮燈籠。奉使來時添一重。

輟耕錄。至正乙酉冬。朝廷遣官奉使宣撫諸道。問民疾苦。明年江右儒人黃如徵。邀駕上書。指數

散散王士宏等罪狀上喜特授江西等處儒學提舉其書略曰江西福建一道地處蠻方去京師萬里外傳聞奉使之來皆若大旱之望雲霓而散散王士宏等不體聖天子撫綏元元之意鷹揚虎噬雷厲風飛聲色以淫吾中賄賂以絨吾口閭閻失望田里寒心乃歌云云又云云又云云如此怨謠未能枚舉

石人謠

莫道石人一隻眼此物一出天下反

草木子徐州盜韓山童叛先是至正庚寅間參議賈魯以當承平之時無所垂名欲立事功於世及河決南行勸脫脫求夏禹故道開使北流身專其任瀕河起集丁夫二十六萬餘人朝廷所降食錢官吏多不盡支河夫多怨韓山童等因挾詐陰鑿石人只開一眼鑄其背云云預當開河道埋之掘者得之遂相驚詫而謀亂

平胡錄一云先是河南北童謠云云及魯治河果於黃陵岡得石如謠云

七修類稿韓山童礪城人祖父以白蓮會燒香惑衆至山童因棗陽有男週歲暴長四尺鰭腹如世所塑布袋和尚者遂倡言彌勒下生天下當亂又陰鑿一眼石人埋當道鑄其背云石人一隻眼挑動黃河天下反

平江郡石上識

三十八十八子寅卯年至辰巳合收張翼同爲列國不在常不在祥切須款款細思量旦卜水暮愁米浮

圖倒地莫扶起。修石岸。重開河。軍民拍手笑呵呵。日出屋東頭。鯉魚上山遊。星從月裏過。會在午年頭。日聞錄。至正壬辰年。平江郡守六十差民。言於舊城址下。得一石鐫云云。訪問不得其實。予後於松江。偶見前人一日錄。亦載此語。乃知此語。不特見於平江。蓋已識於前矣。

至正直記。平江始築城時。某處城數丈。築而復陷者三。於是深掘其地。得一石。方廣三尺。刻云云。首句作三十六。未行云。唐癸丑三月三日立。時至正辛卯秋冬之間。民相傳誦。竟不曉其識。至丙申。春城陷。張九四據之。明年秋納款。始有人云。張起謀時。止十八人。若火周李嚴等也。又測鯉魚山上游者。高郵也。星從月裏過者。橫舟也。三十六者。四九三十六也。皆未知應在何事也。開河是賈魯爲之。天下遂亂。浮屠倒地者。亂後寺觀皆廢。以置軍寨。

嘲三寶奴

茶鹽酒醋都提舉。僧道醫工總相公。

至正直記。三寶奴作相日。富戶雜流。皆可入官。時人嘲之有云云。

粘國門詩

蝦蟆水上浮。雪見日消。定住不開口。汪家奴。只一朝。國事休矣。

草木子。至正壬辰。丞相脫脫統兵征南浦。兵甫及高郵。答麻奏天下亂。皆由怨脫脫之故。罷脫脫。盜自寧息。上入其說。卽軍中貶之。脫脫釋兵奉詔赴貶所。兵遂大潰。大率皆歸紅巾。答麻復矯詔殺之。答麻與脫脫初無讎恨。但欲謀其相位。杜其再來之路爾。未幾答麻坐配死。或以詩粘國門。

云云。雪雪。答麻弟。爲御史大夫。黨兄爲奸。定住緘默。汪終日酣飲而已。

上海縣謠

雞啼不拍翅。鴉鳥不轉更。

山居新話。至正癸巳冬。上海縣十九保。村中雞鳴不鼓翼。民謠云云。

至正中大理童謠

莫道君爲山海主。山海笑咳咳。園中花謝千萬朵。別有明主來。

演載記。寶聞我高皇帝開基金陵。遣其叔段真。自會川入京奉表歸款。朝廷亦以書報之。時有妖巫女歌曰。莫道云云。寶數日疾卒。子明嗣。

至正中燕京童謠三首

牽郎郎。拽弟弟。打破碗兒便作地。

陰涼陰涼過河去。日頭日過山來。

腳驢斑斑。腳躡南山。南山北斗。養活家狗。家狗磨麪。三十弓箭。上馬琵琶。下馬琵琶。驢蹄馬蹄。縮了一隻。

以上古今風謠

台溫處樹旗謠

天高皇帝遠。民少相公多。一日三遍打。不反待如何。

閒中今古錄。元到末年。數當亂。任非其人。酷刑橫斂。台溫處之民。樹旗村落云云。由是謀反者各

起黃巖方谷珍因而肇亂江淮紅巾徧四方矣。

方國珍謠

楊氏青出賊精。

草木子方國珍台之寧海人其居有在山中曰楊氏嘗有童謠云云其初亦欲立功爲國宣力後失賞遂出忿言曰蔡能爲盜我豈不能耶遂叛。

京師童謠

一陣黃風一陣沙千里萬里無人家回頭雪消不堪看三眼和尚弄瞎馬。

元史至正十五年云云。

松江謠

滿城都是火府官四散躲城裏無一人紅軍府上坐。

輟耕錄至正丙申正月常熟州陷松江府印造官號散給吏兵佩帶以防姦僞號之製作畫爲圓圈繞圈皆火燄圈之內一府字以府印印府字上圈之外四角府官花押民間謠云云不二月城破悉如所言。

張士信楊完者謠

死不怨泰州張生不謝寶慶楊。

樂郊私語丁酉八月張氏以水師數萬來攻嘉興羽檄星馳川陸戒嚴楊完者以大軍大破之斬

首萬七千級。俘者數千。張氏統軍張士信。以伏水遁還。然完者兇肆。掠人貨錢。至貴家命婦室女。見之。則必圍宅勒取淫汙。少與相拒。則指以通賊。縱兵屠害。民謠云云。

閩清民歌

彼寇來讎兮。得吾侯而蒙休。彼寇遠遁兮。吾侯錫我室家之無憂。

福建通志。蔡嗣宗由閩縣簿遷閩清尹。邑有外寇。嗣宗募民兵卻之。百姓安堵。乃歌云云。

武岡民頌

前有公綽。武岡父母。今之郡侯。毋乃其後。足我衣食。安我田畝。我子我孫。與侯同久。

萬歷湖廣總志。柳不華。武岡路總管。元季兵亂。不華率義屯戍同保山。控制蠻獠。守境衛民。幾二十年。邊方賴之。後以疾卒。民嘗頌之云云。

曲沃民歌

泮宮之崇。以扶儒宗。社稷之封。以祈年豐。肇之者誰。令尹之功。

山西通志。閻得中。至正間任曲沃。首建社稷壇。鼎新文廟。惠愛黔黎。作興人材。民歌云云。

福寧州謠

吾儂生長莆山曲。三尺茅檐四尺屋。大男終歲食無鹽。老婦蒸藜淚盈掬。阿郎辛苦學弄兵。年年販鹽南海濱。擔頭有鹽兵一束。羣行大隊驚四鄰。邇來紅巾掠州縣。沃野平民不知戰。賢哉太守死作灰。勇矣林僧命如線。林僧一戰功業單。策馬東走來莆山。山人躑躅喜相遇。邀我鄰社東南旋。我鄰我社輕死士。苦

竹長槍兼丈五。自從行劫出社來。社甲吹螺整行伍。時維癸巳夏五月。喝暑微民正愁絕。螺聲隱隱入郭門。白旆央央下林樾。餓兒寡婦常諮諮。老弱奔走趨道隅。鶩鶩翻羽動天哭。虎豹掉尾何時需。空城一炬灰燼後。車蓋歸來仍白授。阿娘垢面迎相公。西鄰椎牛喚新酒。酒酣拍掌浩浩歌。天地雖大如吾何。女兒朝餐歷梁肉。走卒出市陳干戈。市人纍纍喪家狗。路上相逢盡纏首。儒巾驚駭迎先鋒。小兒號哭畏郎吼。老翁再拜乞見憐。自從亂後無一錢。舍人官買雞豕盡。有田未種蠶未眠。先鋒拔刀倍噴怒。縛得家翁出門去。妻兒哭泣投社官。願獲生全拜君賜。社官點頭見始歡。年來錢鈔交莫慳。爾田儻入莆社籍。爾屋老稚從居安。我田我廬不足惜。應當門戶誰出入。生男願作社中吏。生女願作先鋒妾。胡然太府豈不聰。有書輒上莆社公。柏臺主人任刀筆。札札按覆皆相同。向來壤地方萬里。比屋豪華皆武士。五侯同封不足誇。一家十輪未爲易。匹夫勢轉千乘強。驅役百姓如驅羊。編民貢稅入私室。小大驅合無邊方。手提文印綠衣者。饑食無魚出無馬。流離安集無定期。蓬蒿獵獵故城下。道旁遺老問行人。泰安有社民未貧。行人蹙額皆相語。我聞公社吏更仁。前年泰安挹城邑。未曾入城先報捷。前師失利後師奔。一市橫尸更稠疊。至今大廈環州營。一門公相皆弟兄。豺狼盤踞食人肉。一吐一咤風雲生。我聞有命不敢告。俯首未言膽先破。老翁聞此雙淚垂。風雨洗天何人到。

元詩癸集。至正十七年春正月。諸部各起團社。吞并田土。民怨有謠。

又

袁君袁君誠兒嬉。東山之下築城池。掘人家石疊牆塹。占民田土開營基。欲謀於此豚漢菜。井蛙尊大情

何癡。役民荷鍤任犁穴。無骸不露堪歎。前人盡辭長夜室。天陰露冷涼啾悲。山中獨存袁氏墓。若堂之封何巍巍。又見若坊若夏屋。芙蓉築城芳飛飛。無歸之鬼欲託處。游目一見動所思。鬼靈相率語其下。主人肅入安便宜。衆鬼夜深苦啼哭。主人慰勉甘其辭。惟桑與梓焉有舊。顛危自合相扶持。兒孫祭掃同爾享。佳城爽塏同爾歸。且敍平生受苦語。又奚深夜啼悲爲。衆鬼致詞恤久遠。天地循環何所期。城池恐爲他人得。他人又嫌牆塹卑。發號令民更增築。吾家已破牆無基。恐人掘石及君墓。嗟余與君俱無依。

元詩癸集。至正二十一年冬十月。太安社築城。是時凡橋道墳墓。盡毀掘。莫敢誰何。民作吟傷之。

又

山巍巍兮無麥原。白麪細粉常盈盆。林森森兮無桑柘。錦繡綾羅色相亞。出門見嶺不見江。案前羅列皆鱸魴。兒童吼閩南山下。剩逐牛羊與驢馬。山妻嘻笑臨堂前。滿頭珠翠垂翩翾。自言獲功始三載。勝如仕宦數十年。但願魁寇未殄滅。與我增財廣置山閒田。

元詩癸集。至正二十四年。開王理田。令人四方射矢之所及。悉爲社田。民怨有謠。

安鄉謠

羅長卿。羅長卿。朝朝打鼓捷蠻兵。一朝打發蠻兵去。千門萬戶樂太平。

元詩癸集。安鄉羅長卿。爲襄陽路總管。家貲素饒。至正末。倪文俊僭據。與張鎮等協力保障。亂平。鄉民謠云云。

嘲許敬仁

祭酒許敬仁。入門隄輶喚。出門傳聖旨。口口稱先人。

至正直記。許敬仁祭酒。魯齋子也。學行皆不逮於父。以門第自高。常忽傲人。每說及乃父奉旨之榮。口稱先人者不一四明袁伯長嘗嘲敬仁云云。蓋敬仁頗尙剝氣。習國語。乘怒必先以阿刺花刺等叱人人咸以爲誚也。

續溪歌

前有蘇黃門。後有葉令君。

元詩癸集。葉楠。貴池人。調鄱陽尉。力請蠲租。以救荒滂。後爲績溪令。邑人歌云云。

書楮衾語

的的的。孰令爾紙被似鈔角。問我何處住。五色雲中住。問我是何姓。杓子少個柄。爾也錯。我也錯。不如歸去的去的。

霏雪錄。元末有人襖被行山逕間。遇惡少。意所負必楮鏹也。擊殺之。視襖特楮衾耳。大悔之。乃書楮衾云云。愬官不知主名。召商謎者問之。曰。五色雲。綵煙也。綵煙。新昌山名。杓子少柄。孟也。蓋于姓也。密令隸人往蹤跡之。久而不得。隸人亦了事者。一日坐鐺肆櫛髮。見一人對門賣餅。鼓其鎚。作的的之聲。乃揚言曰。某山中劫負紙被者。官知賊處。卽來捕也。覘其人有懼色。次日閉門不賣餅矣。竟捕之。果服其辜。

元末湖湘中童謠

不怕水中魚。只怕岸上豬。豬過水。見糠止。

元末真定童謠

塔兒白。北人是主南人客。塔兒紅。南人來做主人公。

以上古今風謠

趙烈婦歌

四月三日兵繞湖。婦女多被辱與驅。殉節伊誰天水姝。

梧溪集。趙氏。鄞處士陸燾妻也。至正間。兩浙多虞。燾與趙隱居松之瓢湖。丁未夏。海隅有警。兵猝至。燾偕趙倉皇赴舟。未幾。同難者爭舍舟陸竄。燾登岸。傷刃者三。遂仆深淖。趙自投於淵。時有歌之者云云。

蕭華翁書衣帶語

男子之貞。猶女之烈。一有玷焉。萬善難雪。

江西通志。寇亂家居。江西參政全子仁。率師平袁州。辟華翁爲參謀。會僞漢陷廬陵。子仁遁去。華翁歎曰。有城不守。非忠也。遇敵弗戰。非勇也。謀人軍而不死。何而見天下士乎。投井不死。爭出之。三日不食。書衣帶云云。竟赴井死。

羊兒年謠

富漢莫起樓。貧漢莫起屋。但看羊兒年。便是吳家國。

庚申外史。本朝龍興淮南。卽以建康爲天下根本。東征西伐。南誅北討。四海人心歸順。先是童謠云云。迨本朝定都建康。築壇於建康南門。郊天受命。改元朝至正二十七年。爲吳元年。實丁未歲也。

黃菜葉謠

張王做事業。只憑黃菜葉。一夜西風來。乾癟。

剪勝野聞。僞周主張士誠。據有江東。時姑蘇市井中童謠云云。後國事旣去。太祖取其黃菜葉三人者。刳其腸而懸之。至成枯腊。蓋三人皆元戚機臣。其殘膏積侈。敗國喪家。帝特惡焉。

西樵野記。僞吳嘗用黃參軍敬夫。蔡參軍彥文。葉參軍德新。圖事三人皆迂闊書生。不識大計。洪武丁未春。太祖下江南。三人皆伏誅。其屍風乾於旗竿之首。初吳中謠云云。

七修類稿。三人黃書生。蔡業醫。吳星士也。吳中因作云云。至吳元年九月初八日癸未。西風大作。徐達攻破姑蘇。從西門進兵。

案古今風謠。作黃菜葉。西風來。便乾折。

又案鐵崖集。有蔡葉行。注云。張氏亡國由大弟。致此實由二佞。丁未春。二佞伏誅於臺城。風乾其尸。



中華民國二十五年一月初版

C 六一四九平

張

(S1022.1)

國學基
本叢書
元詩紀事二冊

每部定價國幣壹元叁角

外埠酌加運費匯費

編輯者
陳衍

發行兼
印刷者
商務印書館
上海河南路

發行所
商務印書館
上海及各埠

版 權 所 有
翻 印 必 究

82

